

# Nihánj me se-nanā Jesucristó nanā sa' cachrón síí cu'naj Mateo rihaan yanj a

Nanā nihánj taj xna'anj che'é nij xii Jesucristó nij síí man gaa naá a

**1** Yanj nihánj me taj xna'anj che'é nij xii Jesucristó a. Veé xii Jesucristó me síí cu'naj David síí cane gaa naá, ne xii David me síí cu'naj Abraham síí cane gaa naá adonj.

<sup>2</sup>Dan me se síí cu'naj Abraham me rej síí cu'naj Isaac, ne Isaac me rej síí cu'naj Jacob, ne Jacob me rej nij tinuj síí cu'naj Judá, <sup>3</sup>ne Judá me rej síí cu'naj Fares ga síí cu'naj Zara, ne chana cu'naj Tamar me nii roj so' a. Ne Fares me rej síí cu'naj Esrom, ne Esrom me rej síí cu'naj Aram, <sup>4</sup>ne Aram me rej síí cu'naj Aminadab, ne Aminadab me rej síí cu'naj Naasón, ne Naasón me rej síí cu'naj Salmón, <sup>5</sup>ne Salmón me rej síí cu'naj Booz, ne nii Booz me chana cu'naj Rahab a. Ne Booz me rej síí cu'naj Obed, ne nii Obed me chana cu'naj Rut a. Ne Obed me rej síí cu'naj Isaí, <sup>6</sup>ne Isaí me rej síí cu'naj David, ne síí cu'naj David ro', me síí nicañ suun rey uun chij rihaan nij yuvií israelitá gaa cane so' adonj.

Ne David me rej síí cu'naj Salomón, ne nii Salomón me nica

síí cu'naj Urías a. <sup>7</sup>Ne Salomón me rej síí cu'naj Roboam, ne Roboam me rej síí cu'naj Abías, ne Abías me rej síí cu'naj Asa a. <sup>8</sup>Ne Asa me rej síí cu'naj Josafat, ne Josafat me rej síí cu'naj Joram, ne Joram me rej síí cu'naj Uzías a. <sup>9</sup>Ne Uzías me rej síí cu'naj Jotam, ne Jotam me rej síí cu'naj Acaz, ne Acaz me rej síí cu'naj Ezequías a. <sup>10</sup>Ne Ezequías me rej síí cu'naj Manasés, ne Manasés me rej síí cu'naj Amón, ne Amón me rej síí cu'naj Josías a. <sup>11</sup>Ne Josías me rej nij tinuj síí cu'naj Jeconías, ne cayáan nij so' yo' qui'yaj canaán nij síí man Babilonia rihaan nij yuvií israelitá, ne ca'anj nicañ nij so' man nij yuvií israelitá chiháan nij so' guun nij yuvií israelitá mozó rihaan nij so' adonj.

<sup>12</sup>Guun naá doj, ne guun Jeconías me rej síí cu'naj Salatiel, ne Salatiel me rej síí cu'naj Zorobabel, <sup>13</sup>ne Zorobabel me rej síí cu'naj Abiud, ne Abiud me rej síí cu'naj Eliaquim, ne Eliaquim me rej síí cu'naj Azor, <sup>14</sup>ne Azor me rej síí cu'naj Sadoc, ne Sadoc me rej síí cu'naj Aquim, ne Aquim me rej síí cu'naj Eliud, <sup>15</sup>ne Eliud me rej síí cu'naj Eleazar, ne Eleazar me rej síí cu'naj Matán,

ne Matán me rej sí cu'naj Jacob,  
 16 ne Jacob me rej sí cu'naj José, ne  
 José me sí xcaj man chana cu'naj  
 Mariá, ne no' me nii sí cu'naj Jesús,  
 ne sí ca'née Diose tinanii man yuvii  
 man rihaan chumii nihánj rihaan  
 sayuun me Jesús adonj.

17 Dan me se asij sí cu'naj  
 Abraham ndaa sí cu'naj David síj  
 xca'anj xii sí cu'naj Jesucristó a.  
 Ne asij sí cu'naj David ndaa ca'anj  
 nicaj nij sí man Babilonia man  
 nij yuvii israelitá chiháán nij  
 so' síj yo'ó xca'anj xii sí cu'naj  
 Jesucristó a. Ne asij ca'anj nicaj  
 nij sí man Babilonia man nij  
 yuvii israelitá chiháán nij so' ndaa  
 ca'ngaa sí cu'naj Jesucristó, ne  
 síj yo'ó xca'anj nij xii Jesucristó  
 uún adonj.

**Nana nihánj taj xna'anj daj  
 guun gaa ca'ngaa Jesucristó  
 rihaan chumii nihánj a**

18 Ne nihánj me se vaa guun asij  
 rque gaa ataa ca'ngaa Jesucristó a.  
 Dan me se nii Jesucristó me chana  
 cu'naj Mariá a. Gaa asino yaan  
 guun ya rá no' ga sí cu'naj José se  
 vaa xcaj tuvi' roj so' a. Tzaj ne ataa  
 cunuu rcua'aan roj so' a. Tzaj ne  
 xcaj no' cuentá se vaa aj nari' no'  
 ne'ej qui'yaj Nimán Diose a. 19 Dan  
 me se sí cu'naj José me sí xcaj  
 man chana cu'naj Mariá, ne xcaj  
 so' cuentá se vaa aj nuú rque no'  
 ne'ej a. Che'é dan nuchruj raa so',  
 ne guun rá so' se vaa tanáj yuve so'  
 man no' adonj. Dan me se síj vaa  
 nica nimán me so', ne guun rá so'  
 cataj xna'anj so' rihaan nij sí nicaj  
 suun, tzaj ne guun vij rá so', ne ne  
 ca'vej rá so' cuta' so' cacun' xráá

chana cu'naj Mariá rihaan nij sí  
 nicaj suun a. 20 Dan me se nuchruj  
 raa so' daj qui'yaj so', gaa ne rej nii  
 ca'mii nej rihaan so' a. Dan me se  
 cotoj so', ne naqui'yaa rihaan so' se  
 vaa ca'na' yo'ó se-mozó sí 'nij ra'a  
 man ní', ne cataj se-mozó sí 'nij  
 ra'a man ní' rihaan so' a:

—Cunó so' ca'mii 'unj, José. 'O  
 se ta'nij si'no sí cu'naj David sí  
 cane gaa naá mé so' adonj. Se  
 cuchu'vi' so' xcaj so' man chana  
 cu'naj Mariá ma'. Ne tumé no'  
 cacun' ma'. Maan se nayón ne'ej  
 rque no' qui'yaj Nimán Diose adonj.  
 21 Dan me se cuchruj no' ne'ej sno'o  
 cunii, ne asa' cuchruj no' ne'ej, ne  
 Jesús tucu'náj so' man ne'ej yo' á.  
 Danj tucu'náj soj man so', che'é se  
 guun so' sí tinanii man nij tuvi'  
 so' rihaan chrej chi'ii uun chij  
 nimán nij so' adonj. —Danj ca'mii  
 se-mozó sí 'nij ra'a man ní' rihaan  
 sí cu'naj José a.

22 Nu' nihánj me se vaa qui'yaj  
 sí 'nij ra'a man ní' a. Qui'yaj guee  
 so' nu' nana cataj xna'anj so' gaa  
 naá rihaan 'o sí nata' se-nana Diose  
 rihaan yuvii, ne nihánj me nana  
 ca'mii so' rihaan sí nata' se-nana  
 Diose yo' a: 23 “Quene'en soj se  
 vaa quinari' 'o chana yaan ne'ej,  
 ne cuchruj no' ne'ej sno'o cunii, ne  
 Emanuel cu'naj ne'ej adonj”. Danj  
 ca'mii sí 'nij ra'a man ní' gaa naá  
 rihaan sí nata' se-nana Diose, ne  
 nana “Emanuel” taj se vaa cane  
 ma'an Diose ga ní' adonj.

24 Veé dan, ne quinanuú rá sí  
 cu'naj José, ne qui'yaj so' nu' ndaa  
 vaa cataj xna'anj se-mozó sí 'nij  
 ra'a man ní' rihaan so', ne xcaj so'  
 man chana cu'naj Mariá a. 25 Tzaj ne

ne cotoj so' ga no' ndaa se quisij cuchruj no' ne'ej sno'o cunii a. Ne tucu'náj José Jesús man ne'ej adonj.

Nana nihánj taj xna'anj che'é nij sí tucu'yón ndo'o che'é yati' a

**2** Dan me se ca'ngaa Jesucristó chuman' Belén chuman' naj estadó Judea, ne sí cu'naj Herodes me sí nicaj suun rey uun chij rihaan chuman' rej ca'ngaa Jesucristó a. Quisij ca'ngaa Jesucristó, gaa ne ca'na' nij sí tucu'yón ndo'o che'é yati' chuman' cu'naj Jerusalén, ne nij sí cavii rej síj güii me nij so' a. <sup>2</sup>Ne xná'anj nij so' man nij sí man Jerusalén, cataj nij so':

—Ne'ej guun sí nicaj suun rey guun chij rihaan nij yuvií israelitá ro', me rej ca'ngaa so' ga. Quene'len núj yati' taj xna'anj yo' se vaa ca'ngaa so' nanj á. Cavii yati' yo' xtá' rej síj güiii, ne che'é dan ca'na' núj quina'vij núj rihaan so' adonj —taj nij sí tucu'yón ndo'o che'é yati' a.

<sup>3</sup>Gaa ne cuchi' nana rihaan síj nicaj suun rey cu'naj Herodes se vaa xná'anj ndo'o nij sí tucu'yón ndo'o che'é yati' me rej ca'ngaa ne'ej yo', gaa ne cuchu'vi' ndo'o so' se vaa cachij ne'ej yo', ne ca'nee ne'ej yo' se-suun so' ra'a so' vaa güii, rá so' a. Ne kuchu'vi' ndo'o nij sí man chuman' Jerusalén se vaa caxrii yuvaa Herodes man ma'an nij so' a. <sup>4</sup>Veé dan, ne cunuu chre' taran' nij xrej atá suun nocoo doj cunuu chre' nij sí naqui'yaj cuu se-tucuanj Moisés rihaan nij yuvií cunuu chre' rihaan so', qui'yaj so', ne xná'anj Herodes man nij so' me

rej ca'ngaa síj ca'nej Dióse tinanii man yuvií man rihaan chumii rihaan sayuun a. <sup>5</sup>Gaa ne cataj nij so' rihaan Herodes a:

—Ca'ngaa so' chuman' Belén chuman' naj estadó Judea a —taj nij so' rihaan síj nicaj suun rey cu'naj Herodes a.

Danj ca'mii nij so' che'é nana nihánj nana cachrón síj nata' se-nana Dióse rihaan yanj a: <sup>6</sup>“Ne ma'án so', chuman' Belén chuman' naj estadó Judea ro', chuman' sa' ndo'o 'nij ra'a man tuvi' chuman' naj estadó Judea mé so' á. Dan me se vaa sí guun chihanj man so', ne guun chij uxrá so', ne uxrá cutumé so' man nij yuvií israelitá yuvií cuné' 'unj canoco' manj a”. Nihánj me nana cachrón síj nata' se-nana Dióse rihaan yanj gaa naá a.

<sup>7</sup>Cuno síj nicaj suun Herodes nana ca'mii nij so', gaa ne ca'neé yuve so' nana rihaan nij sí tucu'yón ndo'o che'é yati' se vaa ca'na' nij so' rihaan Herodes a. Gaa ne xná'anj Herodes man nij so' me yavii curuvi' naca' yati' taj xna'anj che'é ne'ej yo', taj Herodes a. Gaa ne cataj xna'anj nij so' rihaan Herodes a. <sup>8</sup>Gaa ne ca'neé Herodes man nij so' ca'anj nij so' chuman' Belén, ne ca'ne' Herodes suun rihaan nij so', ne cataj Herodes:

—Nano' uxrá soj man ne'ej yo', ne asa' nari' soj man ne'ej, ne cataj xna'anj soj rihanj me rej ne ne'ej yo', gaa ne ca'anj ma'anj quina'vij ma'anj rihaan ne'ej yo' adonj —taj Herodes rihaan nij sí tucu'yón ndo'o che'é yati', ca'mii ne so' rihaan nij sí tucu'yón ndo'o che'é yati' a.

<sup>9</sup>Quisíj cuno nij so' nana cataj xna'anj síi nicaj suun rey rihaan nij so', gaa ne curihanj nij so', ca'anj nij so', gaa ne quene'en uún nij so' man yati' yo' a. Yati' aj quene'en nij so' rej síj güii me yati' yo', ne dan me se vaj yati' yo', ne yo'o canoco' nij so' man yati' yo', ndaa se canicun' yati' yo' rej xta' rej yanj ne'ej yo' a. <sup>10</sup>Gaa quene'en nij so' man yati' yo', gaa ne uxrá guun niha' rá nij so', <sup>11</sup>gaa ne catúj nij so' rá ve' rej canicun' yati' xta', gaa ne nari' nij so' man ne'ej ga nii ne'ej chana cu'naj Mariá, gaa ne canicun' ruj nij so', ne quina'víj nij so' rihaan ne'ej yo' a. Veé dan, gaa ne nuxra' nij so' se-chrunj nij so', gaa ne rqué ndo'o nij so' rasuun sa' rihaan ne'ej yo' a. Dan me se aga' oró míi do', squíi cu'naj incienso do', squíi cu'naj mirra do', rqué uún nij so' rihaan ne'ej yo' a. <sup>12</sup>Ne rej nij ca'mii nej rihaan nij so', ne cataj xna'anj Diose rihaan nij so' se vaa se canicaj uún nij so' ca'anj nij so' rihaan síi nicaj suun rey cu'naj Herodes, taj nej rihaan nij so' a. Che'é dan yo'ó chrej canicaj nij so' quinan' nij so' chiháán nij so' a.

**Nana nihánj taj xna'anj se vaa ca'anj nicaj José ga Mariá man Jesucristó rej cu'naj Egiptó a**

<sup>13</sup>Quisíj quinan' nij síi tucu'yón ndo'o che'é yati', gaa ne rej nij ca'mii nej rihaan síi cu'naj José a. Dan me se naquiyaa yo'o se-mozó síi 'nij ra'a man ní' rihaan so', ne cataj se-mozó síi 'nij ra'a man ní' rihaan so' a:

—Naxagaa so', ne nicaj so' man roj nii ne'ej, ne cunanj so' ca'anj so' rej

cu'naj Egiptó, ne cayáán so' Egiptó ndaa güii ca'mii uún 'unj rihaan so' á. 'O se nano' ndo'o síi nicaj suun rey cu'naj Herodes man ne'ej, ne ticavi' so' man ne'ej yo' vaa taj so' adonj —taj se-mozó síi 'nij ra'a man ní' rihaan síi cu'naj José a.

<sup>14</sup>Gaa ne naxagaa síi cu'naj José, ne nicaj so' man roj nii ne'ej, ne rej nij cavii nij so' ca'anj nij rej so' Egiptó, <sup>15</sup>ne cane nij so' Egiptó yo' ndaa se cavi' síi nicaj suun rey cu'naj Herodes a.

Dan me se quisíj ya nu' nana ndaa vaa cataj xna'anj síi 'nij ra'a man ní' rihaan 'o síi nata' se-nana Diose gaa naá, se vaa cataj so': “Canacúún 'unj man ta'níj se vaa cavii so' Egiptó ca'na' so' adonj”. Danj taj Diose gaa naá che'é ta'níi so' Jesucristó adonj.

**Nana nihánj taj xna'anj se vaa cavi' ndo'o ne'ej man chuman' Belén, qui'yaj síi nicaj suun cu'naj Herodes a**

<sup>16</sup>Quisíj ca'anj nij rej Jesucristó rej cu'naj Egiptó, gaa ne xcaj síi nicaj suun rey cu'naj Herodes cuentá se vaa aj tiha' yu'unj nij síi tucu'yón che'é yati' man so', gaa ne ca'maan ndo'o rá so', ne che'é dan ca'ne' so' suun rihaan tanuu se vaa ticavi' tanuu man nu' ne'ej sno'o cunii yanj nu' anicaj chuman' Belén a. Ne'ej vaj víj yo' rej rque ro', cavi', taj so' a. Danj qui'yaj so', gaa ne cavi' ne'ej ca'mii yati' che'é taj nij síi tucu'yón che'é yati' rihaan so', rá so' a.

<sup>17</sup>Danj qui'yaj so', ne quisíj ya nu' nana cataj xna'anj síi nata' se-nana Diose gaa naá síi cu'naj Jeremías,

se vaa cataj so': <sup>18</sup>“Cuno nii ta'vee ndo'o chana man chuman' cu'naj Ramá a. Ase vaa chana cu'naj Raquel chana cane gaa naá gaa nij chana, ta'vee ndo'o nij no' che'é ta'níi nij no' a. Ne se ca'vej uxrá rá nij chana naquiyaj niha' no' nimán no', che'é se navij ta'níi nij no' cavi' nanj adonj”. Danj ca'mii síi cu'naj Jeremías gaa naá a.

**Nana nihánj taj xna'anj se vaa curihanj uún nij rej Jesucristó rej cu'naj Egiptó, ca'anj nij so' chuman' Nazaret a**

<sup>19</sup>Gaa quisij cavi' síi nicaj suun rey cu'naj Herodes, gaa ne naquiyaa uún yo'o se-mozó síi 'nij ra'a man ní' rihaan síi cu'naj José gaa yáan so' Egiptó gaa otoj so' rej nij a. <sup>20</sup>Ne cataj xna'anj se-mozó síi 'nij ra'a man ní' rihaan José a:

—Naxagaa so', ne nicaj so' roj nii ne'ej, ne ca'anj so' rej cu'naj Israel á. 'O se yaj me se cavi' nij síi me rá ticavi' man ne'ej yaj nanj adonj —taj se-mozó síi 'nij ra'a man ní' rihaan síi cu'naj José a.

<sup>21</sup>Gaa ne naxagaa síi cu'naj José, ne nicaj uún so' roj nij ne'ej ca'anj so' rej cu'naj Israel a. <sup>22</sup>Ne cuchi' nana rihaan so' se vaa síi cu'naj Arquelao guun síi nicaj suun rey uun chij rihaan estadó Judea a. Dan me se nayón síi cu'naj Arquelao rihaan rej so' síi cu'naj Herodes a. Che'é dan cuchu'vi' ndo'o síi cu'naj José ca'anj so' estadó Judea, gaa ne ca'mii nej rihaan uún so' se vaa se ca'anj so' estadó Judea ma'. Che'é dan ca'anj so' estadó Galilea, <sup>23</sup>ne cuchi' so' chuman' Nazaret, ne cayáan so'

chuman' yo' a. Dan me se cayáan nij so' chuman' Nazaret, ne quisij yanu' nana cataj nij síi nata' se-nana Diose gaa naá, se vaa síi cavii Nazaret me síi ca'nej Diose tinanii man yuvii rihaan sayuun adonj. Inanj danj ca'mii nij síi nata' se-nana Diose gaa naá yo' a.

**Nana nihánj taj xna'anj daj vaa ca'mii natáj síi cu'naj Juan síi cuta' ne yuvii a**

**3** Dan me se yo'o yáan Jesucristó chuman' Nazaret, ne cavii síi cu'naj Juan tacaan estadó Judea, ne ca'mii natáj ndo'o so', <sup>2</sup>cataj so':

—Nuchran' nimán soj, ne tanáj soj chrej chil'i ei. 'O se nichrun' guun chij Diose rihaan chumii nihánj nanj adonj —taj so', a'mii natáj so' a.

<sup>3</sup>Síi nata' se-nana Diose rihaan yuvii gaa naá síi cu'naj Isaías ro', cataj xna'anj che'é síi cu'naj Juan, cataj so': “Nucuj ndo'o ca'mii natáj 'o so' rej tacaan, ne cataj so' se vaa nuchran'nimán yuvii, ne ve'é ca'mii nij yuvii ga síi 'nij ra'a man ní' asa' ca'na' so' a”, taj síi cu'naj Isaías gaa naá a.

<sup>4</sup>Dan me se síi cu'naj Juan me se nuu so' yatzij nuj xcuu camelló ne 'nij catuun so' merque nuj, ne chá so' inanj rquíi, ne catzi' xtaan man quij co'o so' adonj. <sup>5</sup>Ne curihanj ndo'o yuvii man chuman' Jerusalén do', yuvii man nu' estadó Judea do', yuvii man nij chuman' naj tu'va chráa cu'naj Jordán do', ca'na' rihaan síi cu'naj Juan, <sup>6</sup>gaa ne cata' ne nij yuvii rá chráa cu'naj Jordán, quiyaj Juan a. Dan me se

nata' ya nij yuvii che'é nu' cacun' tumé nij yuvii, gaa ne cata' ne nij yuvii adonj.

<sup>7</sup>Gaa ne quene'en síi cu'naj Juan se vaa ca'na' ndo'o nij síi fariseo do', nij síi saduceo do', me rá nij so' cuta' ne Juan man nij so' a. Gaa ne ca'mii natáj so' rihaan nij so', cataj so':

—Ase vaa xcuáá yuvaa vaa soj á. Me síi cataj xna'anj rihaan soj cunanj soj, ne quinanii soj rihaan sayuun qui'yaj Diose ga. Asá' ca'vee quinanii soj rihaan sayuun, qui'yaj inanj na cata' ne soj ga.

<sup>8</sup>Sese ya cunuu sa' nimán soj, ne ca'anj soj qui'yaj soj ndaa vaa 'yaj yuvii cunuu sa' nimán á. <sup>9</sup>Ne tadó soj sese quisij rá soj cataj soj se vaa ta'níi ta'nij si'no síi cu'naj Abraham síi cane gaa naá me soj, ne ne tumé soj cacun', cataj soj á. Se ca'mii soj daj chihaa mój danj ma'. Maan se cataj xna'anj 'unj rihaan soj se vaa nuveé se ya'anj tiha' ta'níi ta'nij si'no síi cu'naj Abraham me soj a ma'. Maan se sese Diose rá, ne ca'vee nicaj Diose náá guun yahij naj rihaan yo'óo nihánj, ne qui'yaj Diose man 'o ta'níi ta'nij si'no síi cu'naj Abraham adonj. Che'é dan canoco' ya soj man Diose á.

<sup>10</sup>Q se nichrun' qui'yaj Diose sayuun man nij síi na'vej rá cunó rihaan so' nanj á. Ase vaa síi oró' aga' a'ne' chruun, ne oró' so' aga' ca'ne' so' chruun ro', danj vaa Diose cuano ei. Che'é dan ase vaa 'yaj nii man chruun ro', ta'nga' danj qui'yaj Diose man nij síi ne uno rihaan so' a. Dan me se a'ne' nii chruun nuvi' chruj sa' raá, ne araa nii man chruun yo' rihaan ya'an a. Ta'nga'

danj qui'yaj Diose man nij síi na'vej rá canoco' chrej sa' adonj.

<sup>11</sup>Uñj nihánj me síi cuta' ne un man soj sij nuchran' nimán canoco' chrej sa' a. Tzaj ne vaa yo'ó síi ca'na', ne sij sca' doj guun so' rihanj a. Che'é dan me aj ne nó xcúnj nachej nuj correá 'nij tacanj so' ma'. Ne ca'na' so', ne ca'na' Nimán Diose ga so', ne caxrii ya'an so' man soj sij na'vej rá cunó rihaan Diose, ne cacaa soj adonj. <sup>12</sup>Dan me se ase vaa síi oró' chruun palá vaa so' cuano adonj. Dan me se síi nicaj chruun palá ro', rii nu' 'núú trigó naj rihaan yo'óo, ne naqui'yaj chre' so' man 'núú trigó sa', ne araa so' man 'núú trigó sa' rá ve', ne anicaj so' araa so' squij ni'ya xráá trigó rihaan ya'an a. Ne ase vaa síi nicaj palá man cuano ro', danj qui'yaj síi ca'na', ne naqui'yaj chre' so' man cunudanj nij síi cunuu sa' nimán, ne caraa so' man nij síi chi'ii rihaan ya'an, ne cacaa nij so' nu' cavii nu' ca'anj, ne daj chihaa mój se quina'áj ya'an yo' a man adonj. —Danj ca'mii síi cu'naj Juan rihaan nij yuvii yo' a.

**Nana nihánj taj xna'anj se vaa cata' ne Jesucristó a**

<sup>13</sup>Gaa ne curihanj Jesucristó estadó Galilea ca'anj so' chráá cu'naj Jordán rihaan síi cu'naj Juan, ne cuta' ne Juan man Jesucristó, rá so' a. Dan me se cuchi' Jesucristó rihaan síi cu'naj Juan, <sup>14</sup>tzaj ne veé dan me se ne ca'vej rá síi cu'naj Juan cuta' ne so' man Jesucristó ma'. Maan se cataj síi cu'naj Juan rihaan Jesucristó a:  
—Me che'é 'ná' so' cuta' ne 'unj mán so' ga. Tananj ma'án so' me

sí vaa che'é cuta' ne man ma'anj nanj á. Tzaj ne xa' 'unj me se ne nó xcúun 'unj cuta' nej mán so' ma' —taj sí cu'naj Juan rihaan Jesucristó a.

<sup>15</sup>Gaa ne cataj Jesucristó rihaan so' a:

—Ca'vej so' cuta' ne so' manj ei. Danj qui'yaj ní', che'é se nó xcúun ní' qui'yaj ní' nu' se vaa me rá Diose qui'yaj ní' adonj —taj Jesucristó rihaan sí cu'naj Juan, gaa ne ca'vej rá so', gaa ne cuta' ne so' man Jesucristó a.

<sup>16</sup>Quisíj cata' ne Jesucristó, gaa ne curihanj so' rá na, gaa ne taj ni'yón naxra' rej xta', ne quene'en so' se vaa nanij Nimán Diose rej xta', ne ase vaa cha'aan ro', vaa Nimán Diose, curuvi' yo' rej xta' nanij yo' raá Jesucristó a. <sup>17</sup>Gaa ne rej xta' ca'mii Diose rihaan Jesucristó, ne cuno nij sí nicun' ga Jesucristó nana ca'mii Diose, ne dan me se cataj Diose a:

—Ta'níí 'unj síí 'ee ndo'o raj man mé so', ne niha' ndo'o raj ni'yaj 'unj mán so' adonj —taj nana cavii rej xta' ca'mii Diose rihaan Jesucristó a.

**Nana nihánj taj xna'anj se vaa guun ndo'o rá síí chree tihá' yu'unj síí chree man Jesucristó a**

**4** Gaa ne ca'anj Jesucristó rej tacaan, qui'yaj Nimán Diose, che'é rej ca'vee guun rá síí chree tihá' yu'unj síí chree man Jesucristó a. <sup>2</sup>Ne vij chihaa ya güii quisíj Jesucristó toco' Jesucristó x'naa man ma'an so' che'é se aráj guee so' rihaan Diose, gaa ne quina'aan ndo'o rque Jesucristó a.

<sup>3</sup>Dan me se cuchi' síí chree rihaan Jesucristó, gaa ne guun rá so' tihá' yu'unj so' man Jesucristó, che'é se guun rá so' canoco' Jesucristó man so' adonj. Che'é dan cataj so' rihaan Jesucristó, ne:

—Sese ya ya ta'nij Diose mé so', ne cataj so' rihaan yahij nihánj se vaa guun yo' rachrúun cha so' á —taj síí chree rihaan Jesucristó a.

<sup>4</sup>Gaa ne cataj Jesucristó rihaan síí chree a:

—Tzaj ne danj Diose taj: “Nuveé inanj se chá me se achiin rihaan yuvii, ne ca'vee cayáan sa' yuvii ma'. Tananj achiin cunudanj se-nana Diose cuno yuvii, ne ve'é cayáan yuvii ei”. Inanj danj taj danj Diose —taj Jesucristó rihaan síí chree yo' a.

<sup>5</sup>Gaa ne ca'anj nicaj síí chree man Jesucristó chuman' guee chuman' Jerusalén, ne tacavii so' man Jesucristó raá nuvíí nocoo, <sup>6</sup>ne cataj so' rihaan so':

—Sese ya ta'nij Diose mé so', ne güej so', ne nanij guee so' rihaan yo'óo á. 'Q se danj Diose taj: “Yo'ó a'ne' Diose suun rihaan nij se-mozó so' se vaa cutumé nij so' mán so', ne caráan ra'a nij so' mán so', se gaa nanj cacó' che'é so' yahij a”. Inanj danj a'mii danj Diose —taj síí chree rihaan Jesucristó adonj.

<sup>7</sup>Gaa ne cataj Jesucristó rihaan so' a:

—Tzaj ne ne nó xcúnj qui'yáj danj ma'. 'Q se taj uún danj Diose: “Se guun qiri'yunj so' man Diose síí 'nij ra'a man ní' ne tihá' so' man so' ma'”. Inanj danj a'mii danj Diose rihaan ní' adonj —taj Jesucristó rihaan síí chree a.

<sup>8</sup>Gaa ne nicaj síi chree man Jesucristó ca'anj so' raa 'o quij xcaan ndo'o uún a. Ne tihaan so' man nu' chuman' man rihaan cunu' chumii rihaan Jesucristó, ne tihaan so' rihaan Jesucristó se vaa ve'é ndo'o vaa nu' chuman' yo' adonj. <sup>9</sup>Dan me se cataj uún síi chree rihaan Jesucristó a:

—Guun chij so' rihaan cunudanj chuman' naj rihaan chumii, qui'yáá 'unj, sese canicun' ruj so' quina'vij so' rihaan 'unj á —taj síi chree yo' rihaan Jesucristó a.

<sup>10</sup>Gaa ne cataj xna'anj Jesucristó rihaan síi chree a:

—Naxuun yanij so' mán so', Satanás. 'O se danj Diose taj: “Rihaan orún' Diose síi 'nij ra'a man ní' canicun' ruj so', ne a 'ó rihaan tuví' so' se ca'vee na'vij so' ma’”. Danj taj danj Diose adonj —taj Jesucristó rihaan síi chree yo' a.

<sup>11</sup>Gaa ne tanáj síi chree man so', ca'anj síi chree yo', gaa ne cuchi' nij se-mozó Diose rihaan Jesucristó, rqué nij so' me ma'an se cachiin rihaan Jesucristó a.

**Nana nihánj taj xna'anj se vaa ca'anj Jesucristó estadó cu'naj Galilea a**

<sup>12</sup>Cuchi' nana rihaan Jesucristó se vaa quita'aa nij tanuu man síi cu'naj Juan, caxrj tanuu taga' man so', ne che'é dan ca'anj Jesucristó estadó Galilea, <sup>13</sup>tzaj ne ne cayáan so' chuman' Nazaret ma'. Cavii so' chuman' Nazaret yo', ne ca'anj so' cayáan so' chuman' Capernaum chuman' naj tu'va na lacuaná a. Chuman' yo' naj rihaan to'óo nij ta'níi ta'nij si'no síi cu'naj Zabulón do', síi cu'naj Neftalí do', síi man gaa naá yo' a.

<sup>14</sup>Dan me se danj qui'yaj Jesucristó ca'anj so' rej yo', gaa ne guun ya nu' ndaa vaa cataj síi cu'naj Isaías síi nata' se-nana Diose gaa naá se vaa cataj so': <sup>15</sup>“To'óo nij ta'níi ta'nij si'no Zabulón do', to'óo nij ta'níi ta'nij si'no Neftalí do', me yo'óo naj tu'va na lacuaná rej rnej tu'va chráa cu'naj Jordán, ne estadó Galilea estadó yanj nij síi yanij me uún yo' a. <sup>16</sup>Ne nij síi man rej yo' ro', guun que'ee yo' ne quene'en uxrá nij so' rasuun che'é Diose ma'. Maan se ase vaa yuvii ne rej rmi' ro', danj vaa nij so' ne nij so' nanj adonj. 'O se vaa güii, ne cavi' uun nij so', ne danj uun ma'an, rá nij so' adonj. Tzaj ne ca'na' 'o ya'an, ne cuchuguun rej yanj nij so', qui'yaj ya'an yo', ne ve'é ndo'o xcaj nij so' cuentá adonj”. Yo' me se vaa cataj síi cu'naj Isaías gaa naá a.

<sup>17</sup>Gaa ne guun che'e Jesucristó ca'mii natáj so' rihaan yuvii, ne cataj so':

—Nuchran' nimán soj ei. 'O se nichrun' quisij güii ca'na' Diose guun chij Diose rihaan chumii nihánj nanj adonj. —Inanj danj ca'mii natáj Jesucristó rihaan nij yuvii a.

**Nana nihánj taj xna'anj se vaa cataj xna'anj Jesucristó rihaan ca'anj síi rii xcuaj se vaa canoco' nij so' man Jesucristó a**

<sup>18</sup>'O güii cachén Jesucristó tu'va na lacuaná cu'naj na Galilea, ne quene'en so' man roj tinuj roj so' a. Yo'o so' me síi cu'naj Simón, ne Pedró cu'naj yo'ó se-chuvii síi cu'naj Simón yo' a. Ne tinúu so' me síi cu'naj Andrés a. Dan me se gaa



quene'en Jesucristó man roj so', ne nicun' roj so' tu'va na lacuaná, ne tigu'ij roj so' nanj rque na, ne dan me se síi rii xcuaj me roj so' a. <sup>19</sup>Ne cataj Jesucristó rihaan roj so' a:

—Canoco' roj soj manj á. 'O se síi naqui'yaj chre' xcuaj me roj soj, tzaj ne rej rihaan ní' me se guun roj soj síi naqui'yaj chre' yuvii, qui'yáj, ne canoco' nij yuvii manj a —taj Jesucristó rihaan roj tinuj roj so' a.

<sup>20</sup>Ne nu' canicaj roj so' tanáj roj so' xnánj roj so', ne canoco' roj so' man Jesucristó ca'anj roj so' nanj adonj.

<sup>21</sup>Veé dan, ne cachéé nij so' doj, ne quene'en Jesucristó man yavij roj tinuj roj so' a. Yo' o so' me síi cu'naj Jacobo, ne tinúú so' me síi cu'naj Juan, ne ta'níi síi cu'naj Zebedeo me roj tinuj roj so' a. Dan me se nuu roj so' rque rihoo chéé rihaan na ga rej roj so' síi cu'naj Zebedeo, ne naqui'yaj sa' nij so' nanj rii xcuaj, ne canacúun Jesucristó man roj tinuj roj so' canoco' roj so' man Jesucristó a. <sup>22</sup>Veé dan, ne canicaj roj so' tanáj roj so' rihoo do', rej roj so' do', ne canoco' roj so' man Jesucristó ca'anj roj so' nanj adonj.

**Nana nihánj taj xna'anj se vaa nahuun ndo'o yuvii, qui'yaj Jesucristó a**

<sup>23</sup>Veé dan, ne cachéé Jesucristó nu' estadó Galilea, ne tucu'yón so' se-nana Diose man nij yuvii nuu chre' rá ve' tucu'yón nij yuvii israelitá se-tucuanj Moisés, ne ca'mii natáj so' nana sa' rihaan nij yuvii che'é yan guun chij Diose rihaan chumii nihánj me nana sa' ca'mii natáj so' a. Ne

nahuun cunudanj nij yuvii ran' do', cunudanj nij yuvii ninaj do', qui'yaj so' a. <sup>24</sup>Ne cuchi' nana che'é so' nu' estadó Siria, gaa ne nicaj ndo'o nij yuvii tuvi' nij yuvii síi ran' ndo'o, ca'anj nij yuvii rej vaj Jesucristó a. Dan me se nij yuvii ran' ndo'o qui'yaj chi'ii do', nij yuvii a'ngaj ndo'o cúu man do', nij yuvii nuu nana chree nimán do', nij yuvii snúu qui'yaj yavii do', nij yuvii na'vee cachee do', cuchi' rihaan Jesucristó, qui'yaj tuvi' nij yuvii, ne nahuun cunudanj nij so', qui'yaj Jesucristó nanj adonj. <sup>25</sup>Veé dan, ne canoco' que'ee ndo'o yuvii man so', ne dan me se yuvii man estadó Galilea do', yuvii man rej cu'naj Chi' Chuman' do', yuvii man chuman' Jerusalén do', yuvii man estadó Judea do', yuvii man ndaa rnej tu'va chráa cu'naj Jordán do', canoco' man so' nanj adonj.

**Nana nihánj taj xna'anj se vaa cavii Jesucristó raq quij ga nij yuvii, ne nago' so' chrej man nij yuvii a**

**5** Quene'en Jesucristó man ndo'o yuvii nu' anicaj x'núu so', ne che'é dan cavii so' ca'anj so' raq 'o quij, ne ndaa dan ca'anj cayáan so', gaa ne cuchi' nij síi tucu'yón se-nana so' rihaan so' a.

**Nana nihánj taj xna'anj me yuvii cavii sa' doj a**

<sup>2</sup>Gaa ne guun che'e Jesucristó tucu'yón Jesucristó rihaan nij so', cataj so':

<sup>3</sup>—Cavii sa' taran' nij síi vaa nica' nimán adonj. 'O se nij so' me síi cayáan ga Diose güii guun chij Diose rihaan chumii nihánj adonj.

<sup>4</sup>”Cavii sa' taran' nij síí nanó ndo'o rá adonj. 'O se guun niha' nimán ma'an nij so', qui'yaj Diose vaa güii adonj.

<sup>5</sup>”Cavii sa' taran' nij síí ni'yanj a'mii adonj. 'O se guun to'óó ma'an nij so' man nu' chumii vaa güii adonj.

<sup>6</sup>”Cavii sa' taran' nij síí me ndo'o rá cunuu sa' nimán adonj. 'O se cunuu sa' ma'an nij so' vaa güii, qui'yaj Diose adonj.

<sup>7</sup>”Cavii sa' taran' nij síí ee rá man tuvi' adonj. 'O se cunuu ee rá Diose man ma'an nij so', ne taj sayuun quiran' nij so', qui'yaj Diose a man adonj.

<sup>8</sup>”Cavii sa' taran' nij síí vaa sa' nimán adonj. 'O se quene'en ma'an nij so' man Diose vaa güii adonj.

<sup>9</sup>”Cavii sa' taran' nij síí nacaj man síí me rá cunuj adonj. 'O se ase vaa Diose ro', danj gaa ma'an nij so' vaa güii adonj.

<sup>10</sup>”Cavii sa' taran' nij síí ran' sayuun 'yaj tuvi' che'é se ve'é 'yaj sa' nij so' adonj. 'O se cayáan ma'an nij so' ga Diose güii guun hij Diose rihaan chumii nihánj adonj.

<sup>11</sup>”Ne cavii sa' ndo'o soj sese ca'mii yuvii nana nij rihaan soj do', sese qui'yaj yuvii sayuun man soj do', sese ca'mii ne yuvii cataj yuvii se vaa tumé ndo'o soj cacun' do', che'é se me soj síí noco' mán 'unj adonj. Ne quene'en soj se vaa ya cavii sa' soj adonj. <sup>12</sup>Gaa ne no xcúún soj guun niha' uxrá rá soj, che'é se uxrá naru'vee Diose rihaan soj asa' nucui' soj rej xta' adonj. 'O se ase vaa 'yaj nii sayuun man soj ro', ta'nga' danj qui'yaj nii sayuun

man nij síí nata' se-nana Diose rihaan yuvii gaa naá uún adonj.

**Nana nihánj taj xna'anj se vaa ase vaa yaan do', ase vaa ya'an chuguun do', danj vaa ní' a**

<sup>13</sup>”Ase vaa yaan ga chraa ro', danj vaa soj ga chumii nihánj ei. Dan me se sese ne 'ne' chá yaan yo', gaa ne taj se qui'yá' cunuu sa' yaan gaa a ma'. Taj se gún' man yaan yo' gaa ma'. Maan se quirilij nii man yaan yo' xe', ne cachee uun yuvii xráa yaan yo' nanj ei. Ne danj vaa uún soj ei. Sese taj se gún' man soj rihaan chumii nihánj, ne daj chihaa mij se cavii sa' soj a man adonj.

<sup>14</sup>”Ne ase vaa ya'an vaa soj chuguun soj rihaan chumii nihánj a. Ne'en soj se vaa sese naj 'o chuman' raa tacaan, ne quene'en cunudanj yuvii naj chuman' yo' raa tacaan ei. <sup>15</sup>Ne gaa rmi', ne a 'ó yuvii uta' ya'an raa aga' ya'an ne axrij yuve nij so' rque 'o chrúún ma'. Sese rmi', ne achrón nii ya'an raa aga' ya'an ne uta' nii aga' yo' rej xta', ne daj a nij yuvii atúj rá ve' ro', chuguun ni'yaj nij so' adonj. <sup>16</sup>Ne ve'é danj vaa guee soj, ne ase vaa aga' ya'an ro', vaa soj rihaan chumii nihánj, ne sese sa' qui'yaj soj, ne sa' doj xcaj yuvii cuentá, qui'yaj soj ei. Che'é dan se guun na'aj soj quene'en yuvii daj vaa 'yaj soj ma'. Tananj guun niha' rá soj quene'en yuvii se vaa ve'é 'yaj soj, ne che'é dan danj nanj ve'é ca'mii nij yuvii che'é Rej ní' Diose, qui'yaj soj nanj adonj.

**Nana nihánj taj xna'anj se vaa no xcúún ndo'o ní' cunó ní' se-nana Jesucristó a**

<sup>17</sup>”Se guun rá soj se vaa ca'ná 'unj tirí' 'unj se-tucuanj Moisés

tucuáan cuchruj so' gaa naá ma'. Se guun rá soj se vaa ca'ná' 'un̄j tiri' 'un̄j nana ca'mii natáj nij síí nata' se-nana Diose gaa naá ma'. Nuveé che'e yo' ca'naj ma'. Tananj ca'naj che'é rej quinavij quisij nu' tucuáan yo', gaa ne nari' nu' soj daj me rá Diose qui'yaj soj adonj. <sup>18</sup>Ya uxrá cataj xna'an̄j 'un̄j rihaan soj se vaa gaa ataa navij chumií nihánj do', gaa ataa navij xta' nihánj do', ne qui'yaj Diose nu' se vaa me rá Diose qui'yaj Diose rihaan chumií nihánj, ne che'é dan se tanáj xco ní' a 'ó nana rque Diose rihaan ní' canoco' ní' ma'. <sup>19</sup>Dan me se me ma'an 'o síí tiri' 'o nana le'ej a'mij nihánj ne ino vaa nana tihaaan so' man nij tuvi' so', ne asa' guun chij Diose, ne guun so' síí le'ej uxrá rihaan Diose nanj adonj. Tzaj ne sese me ma'an 'o síí 'yaj ya ndaa vaa taj 'un̄j nihánj ne tihaaan ya so' man tuvi' so' ndaa vaa taj 'un̄j nihánj, ne síí nihánj ro', me síí guun síí chij rej guun chij Diose vaa güii adonj.

<sup>20</sup>"O se cataj xna'an̄j 'un̄j rihaan soj, ne sese nij síí naqui'yaj cuu se-tucuanj Moisés rihaan yuvií ga nij síí fariseo me se 'yaj sa' nij so' rihaan yuvií, rá nij so', tzaj ne sese se qui'yaj sa' soj doj rihaan nij yuvií ndaa vaa 'yaj nij síí naqui'yaj cuu se-tucuanj Moisés ga nij síí fariseo, gaa ne daj chihaa míj se cayáan soj ga Diose asa' guun chij Diose rihaan chumií nihánj a man adonj.

**Nana nihánj taj xna'an̄j se vaa  
sese axriy yuvaa ní' man tuvi'  
ní', ne tumé ní' cacun' a**

<sup>21</sup>"Aj ne'en soj nana nihánj nana ca'na' rihaan nij síí man gaa naá

ei: "Se ticavi' soj man yuvií ma'. Dan me se qui'yaj Diose sayuun man cunudanj yuvií ticavi' tuvi' adonj", me nana ca'na' rihaan nij so' a. <sup>22</sup>Tzaj ne 'un̄j nihánj me se cataj xna'an̄j 'un̄j, ne a me ma'an 'o síí ca'maan rá ni'yaj man tinúú, ne aj tumé so' cacun' rihaan Diose, ne veé danj qui'yaj Diose sayuun man so' uún adonj. Ne a me ma'an síí cataj rihaan tuvi': "Síí snúú rma'an mé so' ei", cataj so' rihaan tinúú so', ne aj tumé ndo'o so' cacun' rihaan Diose nanj adonj. Ne a me ma'an 'o síí cataj rihaan tuvi' se vaa mayán tuvi' so' me se vaa che'é ca'an̄j ma'an so' rihaan ya'an cacaa so' nanj adonj.

<sup>23</sup>"Che'é dan me sese ca'an̄j nıcaj so' rasuun rihaan chraan altar, rque so' rasuun guee rihaan Diose, rá so', ne sese ninuj rá so' se vaa qui'yáa so' cacun' man tinúú so', <sup>24</sup>ne se guun go' so' rasuun yo' rihaan Diose ma'. Maan se cuchruj so' rasuun yo' rihaan yo'óó, ne ca'an̄j so' rej yanj tinúú so', gaa ne na'mii sa' so' ga so', gaa ne canıcaj so' rej naj si'yáa so', gaa ne rque so' si'yáa so' rihaan Diose adonj.

<sup>25</sup>"Ne so' me se sese vaa síí taj se vaa nij qui'yáa so' rihaan so', ne gaa tihaj vaj so' chrej ga so', ne ve'é ca'mii so' ga so', cataj so' rihaan so' se vaa: "Ca'ne' rá so', ne se cutá' so' cacun' xráj ma'", cataj so', ne ve'é ca'mii so' ga so' á. Ne sese se qui'yáa so' danj ve'é ca'mii so' ga so' gaa tihaj vaj roj soj chrej rihaan chumií nihánj, ne nıcaj so' man so' ca'an̄j so' rihaan cuese, ne cuese yo' ro', taçuachén man so' ra'a síí tumé taga', ne so' me síí caxrii taga' man

so', <sup>26</sup>ne yo' me se guun raan ndo'o so', ne ndaa navij naru'vee so' nu' cacun' qui'yáá so', gaa ne curihanj so' taga' nanj adonj.

**Nana nihánj taj xna'anj se vaa tumé ní' man ní' se qui'yaj ní' cacun' ga yo'ó chana a**

<sup>27</sup>”Aj ne'en soj nana nihánj a: “Orún' nica soj cotoj ga soj á”, me nana ca'na' rihaan soj gaa naá a. <sup>28</sup>Ne cataj xna'anj 'unj rihaan soj se vaa naj guun síi ni'yaj ni'yaj man yo'ó chana, ne che'é rej guun ndo'o rá so' cotoj so' ga no' ro', ase vaa nimán síi otoj ga yo'ó chana ro', ta'nga' danj vaa nimán síi ni'yaj ndo'o man yo'ó chana yo' nanj adonj. Ne tumé ya so' cacun' adonj. <sup>29</sup>Danj nanj uún, ne sese 'o rlij rihaan so' rej nuva' so' me rá qui'yaj cacun', ne táá a se quirii so' man yo', ne taj se 'yaj ma'. Ca'vee a doj quiri' orún' yo' ne se cacaa nu' nee mán so' ma'. <sup>30</sup>Danj nanj uún, ne sese 'o ra'á so' rej nuva' so' me rá qui'yaj cacun', ne táá a se ca'ne' so' man yo', ne taj se 'yaj ma'. Ca'vee a doj ca'anj ni'ya orún' yo' ne se ca'anj ni'ya cunudanj nee man ma'an so' ma'.

**Nana nihánj taj xna'anj che'é síi me rá quiri'ij nica a**

<sup>31</sup>”Ne gaa naá me se ca'na' nana nihánj a: “Sese me rá yo'ó so' quiri'ij so' nica so', ne naxcaj so' 'o yanj cataj xna'anj se vaa ya quiri'ij so' nica so' á”. Danj vaa nana ca'na' rihaan nij yuvii ei. <sup>32</sup>Ne cataj xna'anj 'unj rihaan soj se vaa sese quiri'ij yo'ó so' man nica so', ne sese nuvi' cacun' tumé no' se vaa

cotoj no' ga yo'ó chii, ne ma'an síi ri'ij man no' qui'yaj tumé no' cacun' gaa ei. Ne che'é se quiri'ij nica chana man no', che'é dan xcaj no' yo'ó snó'o, ne ase vaa chana otoj ga naj guun snó'o ro', danj gaa ma'an no', qui'yaj síi quiri'ij man no' adonj. Ne síi xcaj man chana quiri'ij nica me se ase vaa síi otoj ga nica yo'ó snó'o ro', vaa uún so' adonj.

**Nana nihánj taj xna'anj se vaa ca'mii ya ní' a**

<sup>33</sup>”Ne aj ne'en soj nana nihánj nana ca'na' rihaan nij síi man gaa naá adonj: “Sese cata' tu'vá so' rihaan síi 'nij ra'a man ní' se vaa qui'yáá so', ne se ca'ne' rá so' qui'yáá so' danj ma'. Maan se ya qui'yáá so' nu' se vaa cataj xna'anj so' rihaan so', gaa ne ca'vee nanj adonj”. <sup>34</sup>Ne cuano nihánj ro', cataj xna'anj 'unj rihaan soj se vaa asa' ca'mii soj 'o nana guun ya ya rá soj, ne daj chihaa mij se cuta' soj raá xtá' ma'. 'O se xtá' ro', nicun' ma'an Diose ya ya nanj adonj. <sup>35</sup>Ne raá chumii se cuta' soj ma'. 'O se chumii nihánj me rej taj tacóo Diose nanj adonj. Ne raá chuman' Jerusalén se cuta' soj ma'. Ése chuman' yo' ne ma'an Diose síi nicaj yu'unj man ní' nanj adonj. <sup>36</sup>Ne raá ma'an soj se cuta' soj ma'. 'O se se guun nucuaj soj naquiyaj catzii soj yo'ó yuvé raá soj, ne se guun nucuaj soj naquiyaj maruu soj yo'ó yuvé raá soj ma'. <sup>37</sup>Veé dan, ne sese ya a'mii soj, rá soj, ne cataj soj: “Ya ei”. Ne sese ne ya vaa 'o nana, rá soj, ne cataj soj: “Ne ya ma'”, cataj soj á. Inanj danj ca'mii soj ei. Sese nano' soj yo'ó nana, ne chi'ii vaa nimán soj nanj adonj.

Nana nihánj taj xna'anj daj qui'yaj ní' rihaan yuvii 'yaj chi'ii rihaan ní' a

<sup>38</sup>”Aj ne'en soj nana nihánj nana ca'na' gaa naá a: “Sese curihañj rlij rihaan so' qui'yaj tuví' so', ne ca'vee quirii so' rlij rihaan tuví' so' á. Ne sese curihañj cúu yán' so', qui'yaj tuví' so', ne ca'vee quirii so' cúu yan' tuví' so' á”. Daj vaa nana ca'na' rihaan yuvii nanj adonj. <sup>39</sup>Tzaj ne cuano nihánj ro', cataj xna'anj 'unj rihaan soj se vaa se qui'yaj soj sayuun man sí' 'yaj sayuun man soj ma'. Tananj sese vaa sí' coxro nichrej xruú so', gaa ne ca'ne' rá so' coxro so' nichrej xruú so' uún ei. <sup>40</sup>Ne sese me rá yo'lo so' cuta' so' cacun' xráa so' rihaan cuese ca'nee so' cotoo nuu so', ne go' uun so' cotoo yo' do', ndaa se-roto so' do', go' so' man so' ei. <sup>41</sup>Ne sese ca'ne' yo'lo so' suun rihaan so' ca'anj tanáj so' si'yaj so' yo'lo kilómetro, ne ca'vej so' ca'anj tanáj so' si'yaj so' ndaa vij kilómetro ei. <sup>42</sup>Sese achín yo'lo so' rasuun mán so', ne go' so' se achiin man so' ei. Ne sese me rá yo'lo so' racuúj so' sa'anj man so', ne se cataj so' se vaa taj vaj sa'anj ma'. Racuúj so' man so' ei.

Nana nihánj taj xna'anj daj qui'yaj ní' gaa 'ee rá ní' man nij sí' taj ri'yunj man ní' a

<sup>43</sup>”Aj ne'en soj nana nihánj nana ca'na' gaa naá a: “Gaa 'ee rá so' man tuví' so', tzaj ne se guun gaa 'ee rá so' man nij sí' taj ri'yunj mán so' ma’”. Daj vaa nana ca'na' gaa naá nanj adonj. <sup>44</sup>Tzaj ne cuano nihánj me cataj xna'anj 'unj rihaan soj se vaa no xcuún soj cunuú 'ee rá

soj ni'yaj soj man nij sí' taj ri'yunj man soj, ne cachñj ni'yaj soj rihaan Diose che'é nij sí' 'yaj sayuun man soj á. <sup>45</sup>Gaa ne guun soj ta'ní' Rej soj Diose sí' nicun' xta' ei. 'O se Diose 'yaj sí' güii, ne o' naán rihaan to'óo nij sí' chi'ii do', rihaan to'óo nij sí' sa' do', 'yaj Diose, ne aman' rihaan to'óo nij sí' 'yaj sa' do', rihaan to'óo nij sí' 'yaj chi'ii do', 'yaj uún Diose adonj. <sup>46</sup>'O se sese 'ee rá soj man inanj nij sí' 'ee rá man soj, gaa ne me che'é naru'vee Diose rihaan soj, rá soj ga. 'O se ne'en soj se vaa ndaa nij sí' tiha' yu'unj man soj che'é puextó ro', 'ee rá nij so' man tuvi' ma'an nij so' adonj. <sup>47</sup>Che'é dan, sese ve'é a'mii soj ga inanj tinúú soj, ne sa' doj vaa soj rihaan yo'lo nij yuvii, rá soj na'. Taj ma'. Ne ndaa nij sí' ne ne'en daj vaa Diose ro', ne'en soj se vaa 'ee rá nij so' man tuvi' ma'an nij so' nanj á. <sup>48</sup>Che'é dan sese nuveé sij tiha' yu'unj do', sij yaníj do', me soj, ne no xcuún soj guun soj sí' vaa sa' inanj nimán adonj. Ne ase vaa sí' sa' inanj me Diose ro', daj gaa ma'an soj, sí' sa' inanj guun soj adonj.

Nana nihánj taj xna'anj daj qui'yaj ní' gaa rque ní' sa'anj man nij sí' nique a

**6** ”Ne cutumé soj man soj gaa 'yaj soj se sa' do', se luj do' á. Se guun rá soj quene'en yuvii man soj ne cataj nij yuvii che'é soj se vaa sí' sa' inanj me soj ma'. Sese daj qui'yaj soj, ne daj chihaa míj se rque Rej soj sí' nicun' xta' a doj rasuun sa' man soj a man adonj. <sup>2</sup>Che'é dan sese me rá so' rque so'

sa'anj man nij sí nique, ne se guun rá so' ca'yanj nii chruun a'yanj qui'yáa so', ne ni'yaj yuvií go' so' sa'anj man sí nique, ne cataj nij yuvií se vaa ve'é qui'yáa so' ma'. 'O se inanjanj 'yaj nij sí nucui' rá gaa vaj nij so' rá ve' tucu'yón ní' se-tucuanj Moisés do', rihaan nij callé do', ne uno cunudanj yuvií, 'yaj nij so' adonj. Ya ya cataj xna'anj 'unjanj rihaan soj se vaa aj ve'é ca'mii yuvií che'é nij so', tzaj ne a 'ó rasuun se quiri' uún nij so' a ma'. A 'ó xco' se naru'vee Diose rihaan nij so' man adonj. <sup>3</sup>Tzaj ne so' ro', sese me rá so' rque so' sa'anj man nij sí nique, ne se natá' so' rihaan yuvií daj 'yáa so' ma'. Dan me se daj chihaa mój se cataj xna'anj so' rihaan ra'á so' rej nichruún so' se vaa rque ra'á so' rej nuva' so' ma'. <sup>4</sup>Asa' quisij rque yuve so' sa'anj yo', gaa ne orún' Réé so' Diose me sí quene'en daj qui'yaj yuve so', gaa ne so' me sí naru'vee rihaan so' quene'en cunudanj yuvií nanjanj adonj.

**Nana nihánjanj taj xna'anjanj daj qui'yaj ní' gaa achíin ni'yaj ní' rihaan Diose a**

<sup>5</sup>Ne gaa achíin ni'yaj soj rihaan Diose, ne se qui'yaj soj se vaa 'yaj nij sí nucui' rá ma'. 'O se niha' rá nij so' canicun' nij so' rá ve' tucu'yón yuvií se-tucuanj Moisés, ne niha' rá nij so' canicun' nij so' rej nuná tuvi' chrej ca'aan nocoo, ne achíin ni'yaj nij so' rihaan Diose, tzaj ne inanjanj me rá nij so' quene'en yuvií man nij so', ne ve'é ca'mii yuvií che'é nij so', rá nij so' adonj. Ya ya cataj xna'anjanj 'unjanj rihaan soj se vaa aj ve'é ca'mii yuvií che'é nij so', ne aj navij quiri' nij

so' tu'vee nij so' vaa, ne a 'ó xco' se naru'vee uún Diose rihaan nij so' a ma'. <sup>6</sup>Tzaj ne so' ro', gaa me rá so' cachinjanj ni'yáa so' rihaan Diose, ne asino catuu so' rá ve', gaa ne caráan so' ta'yaa, gaa ne cachinjanj ni'yaj yuve so' rihaan Rej ní' Diose á. Ne Rej ní' Diose me sí ne'en se vaa achíin ni'yaj niganjanj so' rihaan so', ne naru'vee so' rihaan so' adonj. <sup>7</sup>Ne gaa achíin ni'yaj soj rihaan Diose, ne se qui'yaj soj se vaa 'yaj nij sí ne ne'en daj vaa Diose ma'. Dan me se a'mii rma'an ndo'o nij so' nana, tzaj ne ne ne'en nij so' me taj nana yo' ma'. Maan che'é se a'mii a'mii nij so', che'é dan guun niha' rá Diose ne cuno Diose nu' nana a'mii nij so', rá nij so' nanjanj adonj. <sup>8</sup>Che'é dan se qui'yaj soj danjanj ma'. 'O se asij ataa cachinjanj ni'yaj soj rihaan Rej soj Diose, ne aj ne'en so' nu' se vaa achiin man soj nanjanj adonj.

<sup>9</sup>”Che'é dan asa' achíin ni'yaj soj, ne nihánjanj cataj soj á: “Ataj Chij sí nicun' xta', me rá núj xcaj yuvií cuentá se vaa inanjanj sa' 'yáa so' a. <sup>10</sup>Ne me rá núj quisij güii guun chij so' rihaan chumii nihánjanj, ne me rá núj qui'yaj yuvií nu' se vaa me rá so' qui'yaj yuvií a. Dan me se ase vaa 'yaj nij sí man xta' nu' se vaa me rá so' qui'yaj nij so' ro', danjanj gaa qui'yaj núj sij man rihaan chumii nihánjanj nu' se vaa me rá so' qui'yaj núj, rá núj a. <sup>11</sup>Ne rque so' nu' rasuun achiin rihaan núj cha' núj cuan' á. <sup>12</sup>Ne caraa x'naa so' che'é xcúun taj xraá núj rihaan so' á. Dan me se ase vaa qui'yaj núj caráj x'naa núj che'é cacun' qui'yaj tuvi' núj rihaan núj ro', ta'nga' danjanj qui'yáa so' che'é ma'an núj caraa

x'naa so' rihaan núj á. <sup>13</sup>Dan me se caráan ra'á so' xráá núj rihaan chrej ch'i'ii á. Ne tĩnanii so' man núj se guun qui'yaj núj cacun' a". Inañj danj ca'mii soj cachinj ni'yaj soj rihaan Diose adonj. <sup>14</sup>O se sese caraa x'naa soj che'é cacun' qui'yaj tuvi' soj rihaan soj, ne danj qui'yaj uún Rej soj síi nicun' xta', ne caraa x'naa so' rihaan soj uún adonj. <sup>15</sup>Tzaj ne sese se ca'vej rá soj caraa x'naa soj che'é cacun' qui'yaj tuvi' soj rihaan soj, ne daj chihaa mĩj se tinavij Rej soj Diose cacun' tumé ma'an soj a man adonj.

**Nana nihánj taj xna'anj daj qui'yaj ní gaa caraa guee ní rihaan Diose a**

<sup>16</sup>"Ne gaa toco' soj x'naa man soj che'é se aráj guee soj rihaan Diose, ne se qui'yaj soj ndaa vaa 'yaj nij síi nucui' rá ma'. Dan me se gaa aráj guee nij so', ne ase vaa rihaan síi nanó ndo'o rá ro', vaa rihaan nij so', 'yaj nij so', ne anó ndo'o nacaj rihaan nij so', 'yaj uún nij so', ne me inañj rá nij so' quene'en yuvi man nij so' daj 'yaj nij so' gaa ne xcax nij yuvi cuentá se vaa aráj guee nij so' rihaan Diose, rá nij so' nanj adonj. Ya ya cataj xna'anj 'unj rihaan soj cuano se vaa aj quiri' nij so' tu'vee nij so' vaa, ése aj ve'é ca'mii yuvi che'é nij so' nanj adonj. Ne a 'ó rasuun se quiri' nij so' rihaan Diose a ma'. <sup>17</sup>Tzaj ne soj ro', ino qui'yaj soj á. Gaa toco' soj x'naa man ma'an soj che'é se aráj guee soj rihaan Diose, ne canaan soj rihaan soj ne caxrii soj casté raaj soj á. <sup>18</sup>Dan me se se guun rá soj quene'en yuvi se vaa aráj guee soj a ma'. Ne ca'vee se taj vaj

yuvi quene'en man soj aráj guee soj, tzaj ne quene'en Rej soj Diose daj 'yaj soj, ne so' me síi naru'vee rihaan soj nanj adonj.

**Nana nihánj taj xna'anj se vaa qui'yaj suun ní che'é yan cumán si'yaj ní rej xta' a**

<sup>19</sup>"Se qui'yaj suun soj cumán ndo'o si'yaj soj rihaan chumii nihánj ma'. O se rihaan chumii nihánj mán ndo'o xcuu xlúu xij rasuun do', tacunj yoo do', chá si'yaj yuvi nihánj a. Ne vaa síi ituu atúj rá ve' ne 'yaj ituu si'yaj tuvi' uún a. <sup>20</sup>O se taj che'é naquiyaj ru'vee soj man soj nihánj ma'. Tananj qui'yaj suun ndo'o soj che'é yan cumán si'yaj soj rej xta' á. Dan me se xta' ro', taj se cha si'yaj soj ma'. Ne taj síi qui'yaj ituu si'yaj soj man adonj. <sup>21</sup>Ne sese inañj che'é rasuun man rihaan chumii nihánj qui'yaj suun soj, gaa ne veé maan rihaan chumii nihánj quinaj nimán soj gaa nanj adonj. Ne sese inañj che'é rasuun man xta' ro', qui'yaj suun soj, gaa ne veé rej xta' ro', ca'anj nimán soj nanj adonj. Me rej ma'an araa sa' soj rasuun, ne veé rej danj vaj nimán soj nanj adonj.

**Nana nihánj taj xna'anj se vaa no xcúun ní xcax ní cuentá daj qui'yaj ní a**

<sup>22</sup>"Rlij rihaan ní' me ya'an nicaj yu'unj man ní' ei. Dan me se sese rlij rihaan ní' ro', ni'yaj yo' ne nuu sa' rá yo', gaa ne nu' nee man ní' ro', sa' vaa, ne adi' se chuguun aga' ya'an ro', danj chuguun man ní' gaa sa' rihaan ní' adonj. <sup>23</sup>Tzaj ne sese rlij rihaan ní' ro', ni'yaj yo' ne

inanj uun chi'ii rá yo', gaa ne nu'  
 nee man ní' ro', uun chi'ii rá, gaa ne  
 adi' síí nicun' yan rmi' ne cunudanj  
 man so' ro', rmi', ne danj vaa síí  
 uun chi'ii rá, ne rmi' uxrá nu' man  
 so' adonj.

**Nana nihánj taj xna'anj se vaa  
 se guun nucuaj ní' ca'nej nucuaj  
 ní' nimán ní' qui'yaj suun ní'  
 se-suun Diose, sese me rá ní'  
 qui'yaj suun ní' che'é sa'anj a**

<sup>24</sup>”Taj vaj síí guun nucuaj qui'yaj  
 suun sa' rihaan vij ru'vee ma'.  
 Sese qui'yaj suun 'o so' rihaan  
 vij ru'vee, ne nachri' so' ni'yaj so'  
 man 'o ru'vee yo', ne caran' rá so'  
 ni'yaj so' man yo'ó ru'vee yo' a. Se  
 guun nucuaj so' caran' rá so' ni'yaj  
 so' man vij ru'vee ma'. Ne xa' soj,  
 tzaj ne se ca'vee qui'yaj suun soj  
 che'é Diose ne qui'yaj suun soj  
 che'é nij rasuun man rihaan chumi  
 nihánj a ma'.

**Nana nihánj taj xna'anj se vaa  
 ne nó xcúún ní' nanó ndo'o rá  
 ní' che'é se cha ní' do', che'é  
 yatzíj cunuú ní' do' a**

<sup>25</sup>”Che'é dan cataj xna'anj 'unj  
 rihaan soj se vaa taj che'é nano  
 ndo'o rá soj che'é soj ma'. Ne che'é  
 dan se nanó rá soj che'é se cha soj  
 do', che'é yan quirí' soj se caráan  
 xráá soj do', se nanó rá soj ma'.  
 Dan me se aj ne'en soj vaa i'na' soj,  
 qui'yaj Diose, ne se guun nucuaj  
 Diose rque Diose se cha soj, rá soj  
 gaa a na'. Daj chihaa míj se guun  
 danj rá soj ma'. Ne Diose me síí  
 ca'vee rque se cha soj ei. Ne Diose  
 me síí qui'yaj nee man soj, ne se  
 guun nucuaj Diose rque Diose yatzíj

caráan xráá soj, rá soj gaa a na'.  
 Daj chihaa míj se guun danj rá  
 soj ma'. Ne Diose me síí ca'vee rque  
 se caráan xráá soj ei.

<sup>26</sup>”Xcaj soj cuentá daj 'yaj nij xtâj  
 vaj xtâ', ne ne unô nij xo' 'núú, ne  
 ne rii nij xo' naa, ne ne araa nij xo'  
 tan' rá cuchruu, tzaj ne Rej soj síí  
 nicun' xtâ' ro', a'vee rque se chá nij  
 xo' ei. Ne táá a soj, ne sa' doj vaa  
 soj rihaan xtâj ne'en Diose a adonj.  
 Ya sa' doj vaa soj chuguanj. <sup>27</sup>Ne  
 nda' se nanó ndo'o rá soj che'é yan  
 chre' vaa soj, tzaj ne a 'ó xco' se  
 guun nucuaj soj cachij xcaan soj doj  
 qui'yaj ma'an soj ma'. Maan Diose  
 ro', me síí ne'en daj gaa cachij soj,  
 ne che'é dan taj che'é nano rá soj  
 a ma'.

<sup>28</sup>”Ne me che'é nanó rá soj che'é  
 yatzíj caráan xráá soj ga. 'O se  
 xcaj soj cuentá ni'yaj soj nij yâj  
 man tacaan se vaa ve'é ndo'o vaa  
 nij yâj man tacaan ei. Ne 'yaj  
 suun nij yâj, tzaj ne ma'an Diose  
 ro', me síí sa' ndo'o vaa qui'yaj  
 man nij yâj adonj. Ne ne rii nij yâj  
 yu'vej ma'. <sup>29</sup>Tzaj ne adi' se vaa síí  
 ru'vee ne sa' uxrá vaa sagan' so' ro',  
 vaa nij yatzíj nuu nij yâj adonj. Dan  
 me se cataj xna'anj 'unj rihaan soj  
 se vaa síí cu'naj Salomón síí cane  
 gaa naá, ne ve'é uxrá vaa yatzíj  
 nuu so', qui'yaj cunudanj sa'anj vaa  
 rihaan so', tzaj ne nij doj vaa yatzíj  
 nuu so' rihaan nij yâj man tacaan  
 yo', qui'yaj Diose adonj. <sup>30</sup>Dan me  
 se danj nanj nij yâj man tacaan yo',  
 tzaj ne sa' uxrá vaa nij yatzíj nuu  
 nij yâj yo', 'yaj Diose, ne cuan' ro',  
 mán nij yâj tacaan, tzaj ne a'yuj ne  
 ca'ne' nii man nu' coj do', yâj do',  
 man tacaan, ne caraa nii man yo'



rihaan ya'an, ne cacaa nu' nij yâj yo' nanj adonj. Ne a doj yu'vee taj nó yâj yo' a ma'. Táa a soj yuvii, ne se nanó rá soj ma'. Diose me sí rque sagan' soj adonj. Tzaj ne ne guun ya sa' rá soj se vaa Diose me sí racuj ya man soj man adonj.

<sup>31</sup>”Dan me se se nanó ndo'o rá soj cataj soj: “Me se cha ní' ga. Me se co'o ní' ga. Me se caráán xráá ní' ga”. Se guun rá soj danj ma'.

<sup>32</sup>’O se nij síi ne ne'en daj vaa Diose ro', inanj lyaj suun ndo'o nij so' che'é rasuun man rihaan chumii nihánj adonj. Tzaj ne nu' rasuun achiin man soj ro', aj ne'en Rej soj síi nicun' xta' se vaa achiin nu' rasuun yo' man soj adonj. <sup>33</sup>Che'é dan nano' soj rej daj qui'yaj soj ne guun chij Diose nimán soj ne cunuu sa' nimán soj, gaa ne rque Diose nu' rasuun yo' man soj ei. <sup>34</sup>Che'é dan se nanó rá soj che'é se vaa cachiin rihaan soj a'yuj ma'. 'O se vaa sayuun 'na' daj a 'o 'o güiii adonj. Che'é dan xcaj soj cuentá daj qui'yaj soj güiii cuan', ne se nanó rá soj che'é se vaa qui'yaj soj güiii a'yuj ma'.

**Nana nihánj taj xna'anj daj qui'yaj ní' gaa ca'mii ní' ga tinúú ní' che'é cacun' tumé tinúú ní' a**

**7**”Se guun niha' rá soj cuta' soj cacun' xráá tinúú soj, gaa ne taj cacun' cuta' Diose xráá ma'an soj man adonj. <sup>2</sup>Dan me se sese guun niha' rá soj cuta' soj cacun' xráá tinúú soj, ne cuta' Diose cacun' yo' xráá ma'an soj ei. Ne sese se cuta' soj cacun' xráá tinúú soj, ne cunuu 'ee rá Diose man ma'an soj uún nanj adonj. <sup>3</sup>Me che'é

guun chree rá so' ni'yaj so' ni'ya nuu rihaan tinúú so' ga. Ne ne ni'yaj so' chruun manj nuu rihaan ma'an so' a. <sup>4</sup>Asa' ca'vee cataj so' rihaan tinúú so', “rque so' rihaan so' quirii 'unj ni'ya á”. Se guun a doj cataj so' danj tihá' so' man tinúú so' ma'. 'O se ni'yaj so', ne chruun manj vaa guee nuú rihaan so' ei. <sup>5</sup>Síi nucui' rá mé so' ei. Asino quirii so' chruun manj nuu rihaan so', gaa ne ca'vee quirii so' ni'ya nuu rihaan tinúú so' adonj. Dan me se ase vaa aráán ni'ya rihaan yuvii ro', danj vaa aráán rihaan yuvii lyaj cacun' ata yuvii adonj.

<sup>6</sup>”Tzaj ne ne'en soj se vaa ne nó xcúún soj go' soj rasuun guee man chuvee ma'. Ne se caraa soj chruj perlá tu'vee ndo'o rihaan xcáá ma'. 'O se chuvee yo' ro', canicaj ne cha man soj, ne xcáá yo' ro', tuguáj che'é xcáá man se sa' yo', ne quinavij nu' yo' xtun', qui'yaj xcáá nanj adonj. Ne se sa' yo' me chrej nocó' ní' adonj. Che'é dan sese na'vej uxrá rá yuvii cunó yuvii chrej nago' soj rihaan nij yuvii, ne ase vaa xcáá do', ase vaa chuvee do', danj vaa nij yuvii ei. Ne se nago' soj doj chrej sa' man nij yuvii lyaj danj a ma'.

**Nana nihánj taj xna'anj se vaa no xcúún ní' cachinj ni'yaj ní' rihaan Diose che'é rasuun achiin man ní' ei**

<sup>7</sup>”Cachinj soj se vaa achiin man soj rihaan Diose, ne so' me sí rque man soj, ne nano' soj rasuun achiin man soj, ne nari' soj rasuun yo', ne ase vaa 'yaj síi tica'mii ta'yaa tucúá tuvi' ro', danj qui'yaj soj ga Diose, ne ca'nuu Diose ta'yaa yo',

ne rque Diose rasuun achiin man soj adonj. <sup>8</sup>O se sí achíin rasuun rihaan Diose ro', quirí' so' rasuun achiin man so', ne sí nano' rasuun achiin man ro', quirí' so' rasuun yo', ne sí tica'mii ta'yaa rej yanj Diose ro', ca'nuu Diose ta'yaa, ne quirí' sí tica'mii ta'yaa rasuun achiin man so' adonj. <sup>9</sup>Xcaj soj cuentá se vaa ma'an soj, nanj yuvii me soj, tzaj ne sese achíin ta'níi yo'o soj chraa chá yo' man soj, ne se ca'vee nano' soj yahij ne caxrii soj ston yo' ma'. <sup>10</sup>Ne sese achíin ta'níi soj nee xcuaaj chá yo' man soj, ne se ca'vee nano' soj xcuáa ne caxrii soj ston so' ma'. <sup>11</sup>Dan me se danj nanj soj, ne sí chilii nimán me soj, tzaj ne ne'en soj rque soj se sa' chá ta'níi soj ei. Che'é dan táa a Rej soj sí nicun' xta', ne sij sa' inanj me so', ne so' me sí rque ya rasuun sa' man nij sí achíin rasuun man so' nanj adonj.

**Nana nihánj taj xna'anj daj  
qui'yaj ní' rihaan tuvi' ní' a**

<sup>12</sup>Dan me se daj se uun rá soj qui'yaj sa' yuvii rihaan soj ro', ta'nga' danj qui'yaj sa' soj rihaan tuvi' soj á. Sese danj qui'yaj soj rihaan tuvi' soj, ne sí uno nu' se-tucuanj Moisés me soj, ne sí uno nu' se-nana nij sí nata' se-nana Diose gaa naá me uún soj adonj.

**Nana nihánj taj xna'anj  
che'é vij chrej a**

<sup>13</sup>Ase vaa vij chrej vaa rej vaa rihaan soj, ne dan me se chrej ca'aan me yo'o chrej yo', ne caxra' ndo'o vaa rej nayón yuvii, ne rihaan ya'an ro', vaj chrej yo' nanj adonj. Ne man uxrá yuvii vaj

chrej yo' ei. Se ca'anj soj chrej yo' ma'. Nanj vaa chrej ca'anj soj ei. Chrej catuun me chrej ca'anj soj, <sup>14</sup>ne chruj vaa rej nayón yuvii a. Sayuun ndo'o vaa vaj yuvii chrej yo', tzaj ne vaj chrej yo' rej gaa i'na' yuvii cayáan yuvii ga Diose nu' cavii nu' ca'anj adonj. Tzaj ne doj nij yuvii nari' chrej catuun nanj ei.

**Nana nihánj taj xna'anj daj  
gaa qui'yaj ní' quene'en ní'  
daj vaa nimán yuvii a**

<sup>15</sup>Vaa yuvii taj se vaa me nij so' sí nata' se-nana Diose, tzaj ne ne ya a'mii nij so' ma'. Cütumé soj man soj, se gaa nanj qui'yaj nij so' sayuun man soj á. Dan me se vaa güii cuchi' nij so' rihaan soj, ne ase vaa matzinj ro', danj gaa nij so' cuchi' nij so' rihaan soj, ne ni'yanj ndo'o ca'mii nij so' rihaan soj, tzaj ne nimán nij so' ro', ase vaa nimán xca'yanj ca'nu' ro', gaa nimán nij so', guun rá nij so' qui'yaj nij so' sayuun man soj nanj adonj. <sup>16</sup>Che'é dan xcaj soj cuentá ni'yaj soj man nij so' daj qui'yaj nij so', gaa ne quene'en nij soj daj vaa nimán nij so' ei. Uta nii chruj chá raá chruun tanj, rá soj na'. Taj ma'. Ne uta nii chruj chá raá coj yaj ya'aa, rá soj na'. Taj ma'. <sup>17</sup>Dan me se chruun sa' ro', man chruj chá raá a. Ne chruun tanj ro', man chruj xnaj raá uún a. Sese cuchruu chruun, ne se cumán chruj sa' raá chruun yo' a ma'. <sup>18</sup>Chruun sa' ro', se guun cumán chruj nij raá ma'. Ne chruun nij ro', se guun cumán chruj sa' raá ma'. Ase vaa chruun yo' ro', danj vaa nimán yuvii, ne ase vaa chruj yo' ro', danj vaa rasuun 'yaj

yuvii adonj. <sup>19</sup>Ne sese nuvi' chruj sa' raa 'o chruun, ne a'ne' nii man chruun yo', ne axrij ya'an nii man chruun yo' nanj adonj. Ne ase vaa ran' chruun yo' ro', ta'nga' danj quiran' uún nij yuvii 'yaj se chi'ij nanj adonj. <sup>20</sup>Dan me se sese xcaj soj cuentá ni'yaj soj man yuvii, gaa ne quene'en soj daj vaa nimán nij yuvii, gaa ne quene'en soj daj yuvii me nij so' adonj.

**Nana nihánj taj xna'anj me síi cayáan ga Diose asa' guun chij Diose rihaan chumii nihánj a**

<sup>21</sup>Ne'en soj se vaa man ndo'o yuvii taj rihanj se vaa uno nij so' rihanj, tzaj ne tu'va rma'an ta'aj nij so' nanj á. Nuveé cunudanj nij síi taj ne'en manj ca'anj cayáan ga Diose asa' guun chij Diose rihaan chumii nihánj ma'. Tananj orún' me se inanj nij síi uno rihaan Réé 'unj síi nicun' xta' me síi cayáan ga so' nanj adonj. <sup>22</sup>Ne güii ca'ne' 'unj cacun' che'é yuvii me se cumán ndo'o yuvii cataj rihaan 'unj: "Síi uno rihaan so' me núj, Señor. Aj nata' núj nana rqué so' man núj rihaan yuvii á. Ne cata' tu'va núj se-chuvií so', ne quirii núj nana chree nimán yuvii á. Ne qui'yaj suun ndo'o núj suun sa' che'é so' adonj". Danj ca'mii nij yuvii yo' rihaan 'unj vaa güii nanj adonj. <sup>23</sup>Gaa ne cataj yá 'unj rihaan nij yuvii a: "A 'ó güii ne ne'én 'unj man soj ma'. Maan síi 'yaj inanj cacun' me soj nanj adonj. Naxuun soj man soj rihanj á". Danj cataj 'unj rihaan nij síi 'yaj cacun' vaa güii nanj adonj.

**Nana nihánj taj xna'anj daj quiran' nij síi uno rihaan Jesucristó do', nij síi ne uno rihaan Jesucristó do' a**

<sup>24</sup>"Dan me se a me ma'an síi uno sa' nana nihánj nana cataj xna'anj 'unj rihaan soj ne 'yaj so' ndaa vaa taj 'unj, ne ase vaa 'o síi cune' ve' tucua' rihaan yuvej vaa so' ei. Síi cune' ve' yo' me se síi acaj ndo'o cuentá me so', ne cune' so' ve' yo' rihaan 'o yuvej adonj. <sup>25</sup>Gaa ne ca'na' maan, ne go' ndo'o maan raa ve', ne cavii ni'yoj chráa, ne ca'na' go' tacóo ve', ne ca'na' uxrá nana yuvaa, ne go' rihaan ve' yo' a. Tzaj ne ne canee ve' yo' a ma'. 'O se raan inanj ne ve' yo' rihaan yuvej nanj adonj. <sup>26</sup>Tzaj ne síi na'vej rá cunó nana nihánj nana cataj xna'anj 'unj rihaan soj me se ase vaa síi cune' ve' rihaan yo'óo vaa so' adonj. Ne síi ni'yon rmii me so', ne cune' so' ve' rihaan yo'óo chruu, <sup>27</sup>ne veé dan, gaa ca'na' uxrá maan yuvaa go' yo' xráa ve', ne cavii ni'yoj chráa, ne ca'na' na xee go' na xee tacóo ve', ne ca'na' uxrá nana yuvaa ne go' xráa ve' yo' a. Veé dan, ne canee nu' ve' tucua' síi ni'yon yo' nanj adonj. Che'é dan xcaj soj cuentá, ne ve'é cunó soj nana nihánj, ne se quiran' soj sayuun ma'. —Inanj nana nihánj ca'mii Jesucristó rihaan nij síi tucu'yón se-nana so' a.

<sup>28</sup>Veé dan, ne quisij tucu'yón Jesucristó nu' nana nihánj rihaan nij yuvii, gaa ne caráya'anj ndo'o nij yuvii noco' man so' che'é nana nihánj, nana cataj xna'anj Jesucristó rihaan nij so' a. <sup>29</sup>'O se xcaj nij yuvii cuentá se vaa ase vaa

a'mii 'o sítí nicaj suun avii tu'va ro',  
vaa a'mii Jesucristó, rá nij so' a. Ne  
c̄uu doj vaa se-n̄ana so' ga se-n̄ana  
nij sítí naqui'yaj c̄uu se-tucuanj  
Moisés, rá nij so' a.

**Nana nihánj taj xna'anj daj  
vaa nahuun sa' 'o sítí ran' luj  
ri'yuj, qui'yaj Jesucristó a**

**8** Gaa ne nanij Jesucristó quij yo',  
ne cachéé ndo'o yuvij ga so' a.

<sup>2</sup>Dan me se cuchi' yo'o sítí ran' luj  
ri'yuj rihaan Jesucristó, ne canicun'  
ruj so' rihaan Jesucristó, ne cataj so':  
—Sese me rá so', ne ca'vee ca'nee  
so' chi'ii xráj, Señor —taj so' rihaan  
Jesucristó a.

<sup>3</sup>Gaa ne cuta' Jesucristó ra'a  
Jesucristó raa sítí ran', ne cataj  
Jesucristó:

—Me raj qui'yáj danj ei. Nahuún  
so', qui'yáj adonj —taj Jesucristó  
rihaan so' a.

Nu' danj cataj Jesucristó, ne nu'  
quinavij luj xráá sítí ran' a. <sup>4</sup>Gaa ne  
cataj Jesucristó rihaan so' a:

—Cutumé so' mán so' se cataj  
xna'anj so' rihaan yuvij che'é se  
qui'yáá 'unj che'é so' ma'. Maan se  
cuchi' so' rihaan xrej, ne t̄ihaán so'  
mán so' rihaan xrej se vaa nahuún  
so', ne rque so' rihaan Diose se vaa  
cataj sítí cu'naj Moisés gaa naá ndaa  
vaa n̄o xcúún so' rque so' rihaan  
Diose á. Gaa ne xcaj nij xrej cuenta  
se vaa nahuún so' qui'yáj adonj —taj  
Jesucristó rihaan sítí nahuun yo' a.

**Nana nihánj taj xna'anj se vaa  
nahuun se-mozó yo'o tanuu  
capitán, qui'yaj Jesucristó a**

<sup>5</sup>Dan me se cuchi' Jesucristó  
chuman' Capernaum, ne catúj so'

chuman' yo', ne cuchi' yo'o tanuu  
capitán rihaan so' a. Ne so' ro',  
me sítí rii ta'nga' rihaan 'o cientó  
tanuu adonj. Dan me se cachíin  
ni'yaj so' rihaan Jesucristó, <sup>6</sup>cataj  
so':

—Canó chi'ii man se-mozó  
'unj, Señor. Ne ne nasqui' so' ma'.  
'O se yo'o naj so' rá ve', ne ran'  
uxrá so' sayuun, 'yaj chi'ii nanj  
á —taj tanuu capitán yo' rihaan  
Jesucristó a.

<sup>7</sup>Ne cataj Jesucristó rihaan so':  
—Ca'anj ní', gaa ne nahuun so',  
qui'yáj á —taj Jesucristó a.

<sup>8</sup>Gaa ne cataj uún tanuu capitán  
yo':

—'O se nuveé sij sa' mé 'unj ma'.  
Ne nó xcúún 'unj catuu so' rá ve'  
tucuaq qui'yáj a ma'. Maan se  
ca'ne' uun so' suun se vaa nahuun  
se-mozó 'unj, gaa ne nahuun ma'an  
so' adonj. <sup>9</sup>'O se vaa sítí rii ta'nga'  
rihaan 'unj, ne rii ta'ngá' 'unj  
rihaan tanuu, ne taj xna'anj 'unj  
rihaan tanuu se vaa ca'anj nij so',  
ne 'anj nij so', ne taj xna'anj 'unj  
rihaan nij so' se vaa ca'na' nij so',  
ne 'na' nij so' rihaan 'unj, ne taj  
xna'anj 'unj daj qui'yaj nij so', ne  
veé danj 'yaj tanuu adonj. Ne ne'én  
'unj se vaa ase vaa rii ta'ngá' 'unj  
rihaan nij tanuu noco' manj ro',  
danj rii ta'nga' guee so' rihaan chi'ii  
anó man yuvij nanj á —taj tanuu  
capitán yo' rihaan Jesucristó a.

<sup>10</sup>Dan me se, gaa cuno Jesucristó  
nana ca'mii tanuu capitán yo', ne  
ca'anj rá Jesucristó, ne cataj so'  
rihaan nij sítí noco' rej xco so' a:

—Ya ya cataj xna'anj 'unj rihaan  
soj se vaa taj vaj a 'ó rej ne narij  
man yo'o sítí israelitá sítí cuchumán

ndo'o rá nana a'mii 'un̄j ndaa vaa amán rá tanuu capitán nihánj a ma'.

<sup>11</sup>Ne cataj xna'an̄j 'un̄j rihaan soj se vaa güii guun chij Diose rihaan chumii nihánj ro', ca'na' ndo'o yuvii man̄ cun̄' chumii, ne cayáán̄ nij so' rihaan se-mesa Diose, ne chā nij so' chraa gā sí cu'naj Abraham do', gā sí cu'naj Isaac do', gā sí cu'naj Jacob do', adonj. <sup>12</sup>Ne nij sí israelitá ro', n̄o xcúún̄ nij so' cuchuman̄ rá nij so' ni'lyaj̄ nij so' manj, ne sese cuchuman̄ rá nij so' ni'lyaj̄ nij so' manj, ne ca'vee canē nij so' uún̄ gā Diose nan̄j á. Tzaj ne na'vej rá nij so' a man adonj. Che'é se na'vej rá nij so' qui'yaj̄ nij so' danj, che'é dan quiri'ij gan' ndo'o nii man̄ nij so' rej rmi', ne ta'vee uxrá nij so', ne ndaa chā ruj ma'an̄ nij so' cúu yan' nij so' nan̄j adonj. Danj quiran̄' nij so' che'é se na'vej rá nij so' cuchuman̄ rá nij so' ni'lyaj̄ nij so' manj nan̄j á —taj Jesucristó rihaan̄ nij yuvii canoco' man so' a.

<sup>13</sup>Canicaj̄ uún̄ Jesucristó cataj Jesucristó rihaan̄ tanuu capitán:

—Ca'vee ca'an̄j so' yaj a. Yā cuchuman̄ rá so' se vaa nahuun̄ se-mozó so' qui'yáj̄ a. Ne nahuun̄ so' ei —taj Jesucristó rihaan̄ so' a.

Ne veé maan̄ orá yo' ro', nahuun̄ se-mozó tanuu capitán yo', qui'yaj̄ Jesucristó adonj.

**Nanā nihánj̄ taj xna'an̄j̄ daj̄ qui'yaj̄ Jesucristó, nahuun̄ nii chej̄ Pedró do', que'eē uxrá yo'ó yuvii do', qui'yaj̄ Jesucristó a**

<sup>14</sup>Gaā ne ca'an̄j̄ Jesucristó tucúa sí cu'naj̄ Pedró, ne quene'en so' se vaa naj̄ nii chej̄ Pedró ran' no', ne caxrj̄j̄ uxrá cachi' man no' a. <sup>15</sup>Ne

quita'aa Jesucristó ra'a no', gaā ne veé maan̄ orá dan nahuun̄ no', qui'yaj̄ Jesucristó, ne naxagaā no', ne qui'yaj̄ chuvii no' chā nij so' nan̄j adonj.

<sup>16</sup>Rej ca'an̄j̄ güii cuchi' yuvii rihaan̄ Jesucristó a. Dan me se nicaj̄ nij yuvii man̄ que'eē uxrá sí nuu nanā chree nimán, cuchi' nij yuvii rihaan̄ Jesucristó, ne cataj̄ xna'an̄j̄ uun̄ Jesucristó rihaan̄ nij nanā chree se vaa naxuun̄ nij so' man̄ nij so', gaā ne, veé dan, ne curihan̄j̄ nij nanā chree nimán nij yuvii, gaā ne cunuu sa' nimán nij yuvii yo' cuaj̄ nan̄j adonj. Ne quinahuun̄ sa' cunudan̄j̄ nij sí ran', qui'yaj̄ uún̄ Jesucristó a.

<sup>17</sup>Dan me se quisj̄ ya nu' nanā nihánj̄ nanā ca'mii sí cu'naj̄ Isaías sí nata' se-nanā Diose gaā naá, se vaa cataj̄ so': “Ninaj̄ ní, ne canó chi'ii man ní, tzaj̄ ne nahuun̄ ní, qui'yaj̄ sí ca'na' vaa güii nan̄j adonj”, taj sí cu'naj̄ Isaías gaā nata' so' adonj.

**Nanā nihánj̄ taj xna'an̄j̄ daj̄ ca'mii Jesucristó rihaan̄ vij̄ sí tihaj̄ guun rá canoco' man so' a**

<sup>18</sup>Quene'en Jesucristó se vaa man̄ ndo'o yuvii anicaj̄ rej nicun̄' so' ni'yaj̄ man so' a. Che'é dan ca'ne' so' suun̄ rihaan̄ nij sí tucu'yón se-nanā so' se vaa ca'an̄j̄ nij so' gā so' ndaa rnej̄ na lacuaná cu'naj̄ Galilea a.

<sup>19</sup>Gaā ne cuchi' yo' o so' rihaan̄ Jesucristó a. So' ro', me sí naqui'yaj̄ cuu se-tucuan̄j̄ Moisés rihaan̄ yuvii adonj. Ne cataj̄ so' rihaan̄ Jesucristó a:

—Canocó' 'un̄j̄ mán so' daj̄ rej ma'an̄ vaj so', maestro —cataj̄ so' rihaan̄ Jesucristó a.

<sup>20</sup>Gaa ne cataj ya Jesucristó se vaa ran' so' chéé so' a:

—'O se nij chunee ro', otoj sa' nij xo' rá yu'uj taj rque yo'óó, ne nij xtâj chéé xta' ro', vaa saca' nij xo' a. Ne xa' 'unj sij ca'néé Diose nijaj yu'unj man yuvi, tzaj ne taj a 'ó rej quináá 'unj cotoj 'unj a ma' —taj Jesucristó rihaan so' a.

<sup>21</sup>Ne vaa yo'ó sít tucu'yón se-nana Jesucristó cuchi' rihaan so', ne cataj so':

—Ca'vej so' nanj tucuj, ne ndaa cavi' réj, gaa ne cachin' 'unj man réj, gaa ne canocó' 'unj mán so', Señor —taj yo'ó so' a.

<sup>22</sup>Tzaj ne cataj Jesucristó rihaan so' a:

—Ca'ne' rá so' cachin' ma'an nij sít cavi' nimán man tuvi' so' xngá á. Tzaj ne cuano nihánj ro', nō xcúún so' yo'o canocó' so' manj adonj —taj Jesucristó rihaan yo'ó so' a.

**Nana nihánj taj xna'anj se vaa ca'ne' Jesucristó suun rihaan na do', rihaan nana do', se vaa canicun' yo' a**

<sup>23</sup>Gaa ne catúj Jesucristó rque rihoo chéé rihaan na, gaa ne catúj nij sít tucu'yón se-nana so' rque rihoo ga so' a. <sup>24</sup>Veé dan, ne nasqui' nucuaj ndo'o rihaan na lacuaná, ne me ndo'o rá na yo' guun nucuaj yo' caráán yo' xráá rihoo a. Ne veé dan vaj Jesucristó, ne cotoj so' adonj. <sup>25</sup>Gaa ne ca'anj nij sít tucu'yón se-nana Jesucristó rej naj so' cotoj so', ne narii nij so' nej rihaan so', ne cataj nij so':

—Tinanii so' man ní' se cavi' nu' ní', man Señor —taj nij so' rihaan Jesucristó a.

<sup>26</sup>Dan me se ma'an Jesucristó cataj, ne:

—Me che'é chu'vi' ndo'o nimán soj ga. Yo' me rej ataa cuchuman sa' rá soj ni'yaj soj manj adonj —taj Jesucristó rihaan nij so' a.

Gaa ne canicun' caya so', ne caxrój yuvaa so' man na do', man nana do' a. Gaa ne canicun' dínj uxrá rihaan na lacuaná yo', qui'yaj Jesucristó nanj adonj.

<sup>27</sup>Ne cuchu'vi' nij snó'o yo' ni'yaj nij so' man Jesucristó, cataj nij so': —Daj sij me sít nihánj ga. 'O se ndaa nana ndaa na uno a'mii so' ason —taj nij so' rihaan tuvi' nij so' a.

**Nana nihánj taj xna'anj se vaa quirii Jesucristó man nij nana chree nimán vij snó'o a**

<sup>28</sup>Gaa ne cuchi' Jesucristó ndaa rnej na lacuaná yo' rej ne nij sít man chuman' cu'naj Gadara a. Ne vaa yu'uj yuvej, rej cachin' nij yuvi xngá a. Dan me se cavii vij snó'o yu'uj yuvej yo', ne cuchi' roj so' rihaan Jesucristó a. Roj so' me sít nuu nana chree nimán, ne yuvaa ndo'o roj so' adonj. Che'é roj so' na'vee cachin yuvi rej yo' a ma'. <sup>29</sup>Dan me se caguáj roj so' rihaan Jesucristó, cataj roj so':

—Veé ne'en núj se vaa ta'nij Diose mé so' á. Me che'é ca'ná' so' rej ne núj ga. Ca'ná' so' qui'yáá so' sayuun man núj na'. 'O se ataa doj quisij güii qui'yáá so' sayuun man núj adonj —taj roj so' rihaan Jesucristó a.

<sup>30</sup>Dan me se rej xco roj so' ro', vaj que'ee xcáá chá coj man tacaan a. <sup>31</sup>Ne nij nana chree nuu nimán roj snó'o yo' ro', cachín ni'yaj nij so' rihaan Jesucristó, cataj nij so':

—Sese quiriij so' man núj nimán roj snó'o nihánj, ne qui'yáá so' se ndo'o ca'nej so' man núj, catuu núj nimán xcáá yo' ruguanj —taj nij nana chree yo' rihaan Jesucristó a.

<sup>32</sup>—Ca'anj soj cuaj á —taj Jesucristó rihaan nij so' a.

Gaa ne ca'anj nij so' catúj nij so' nimán xcáá yo', ne dan me se ruvaa uxrá tacaan nicun' tu'va na lacuaná rej vaj nij xcáá yo', ne gaa catúj nij nana chree nimán nij xcáá yo' me se cunánj ndo'o nij xo' ca'anj xo', ne veé danj vaj nij xo', ne quiniij cunudanj nij xo' rque na, ne canó xráá nij xo', qui'yaj na nanj adonj.

<sup>33</sup>Ne nij síi tumé xcáá yo' ro', cunánj nij so' ca'anj nij so' ndaa chuman', ne catúj nij so' chuman', ne cataj xna'anj nij so' rihaan nij síi man chuman' yo' nu' se vaa quiran' roj snó'o do', nij xcáá do' a. <sup>34</sup>Gaa ne curihanj cunudanj nij síi man chuman' yo', guun rá nij so' nari' nij so' man Jesucristó a. Dan me se quene'en nij so' man so', ne cachíin ni'yaj nij so' rihaan so' se vaa curihanj so' rej yanj nij so' ca'anj so' rej yanj a.

**Nana nihánj taj xna'anj se vaa nahuun sa' 'o síi na'vee cachee, qui'yaj Jesucristó a**

**9** Gaa ne cavii Jesucristó rihoo chéé rihaan na, ne ca'anj so' chuman' cayáán so', ne catúj so' chuman' yo' a. <sup>2</sup>Ne veé nicaj nii man 'o síi na'vee cachee táá rihaan yuvéé, ne ca'na' nii rihaan Jesucristó a. Ne quene'en Jesucristó se vaa cuchumán uxrá rá nij yuvi se vaa nahuun sa' síi na'vee cachee yo' qui'yaj so' a.

Che'é dan cataj so' rihaan síi ran' yo' a:

—No xcúun so' guun niha' rá so' che'é se navij cacun' xráá so', nanj tinuj —taj Jesucristó rihaan síi na'vee cachee yo' a.

<sup>3</sup>Dan me se cane doj síi naquiyaj cuu se-tucuanj Moisés rihaan yuvi rá ve' ga Jesucristó, ne cataj nij so' rihaan tuvi' nij so' a:

—Nij vaa nana ca'mii síi nihánj rihaan Diose á. 'O se orún' Diose no xcúun cataj se vaa navij cacun' xráá yuvi á —taj nij síi tucuyón se-tucuanj Moisés ni'yaj nij so' man Jesucristó a.

<sup>4</sup>Ne quene'en Jesucristó me nana guun rá nij so' ca'mii nij so', ne che'é dan cataj so':

—Me che'é avii ndo'o nana chi'ii raá soj ga. <sup>5</sup>Tu'va ruma'án 'unj se vaa navij cacun' xráá síi nihánj, rá soj a na'. Ca'vee cataj uun ní' navij cacun' xráá síi nihánj na'. Ase ca'vee doj cataj ní' naxagaa so', ne cachee so' cuaj, cataj ní' xa'. <sup>6</sup>Dan me se me rá 'unj xcaj soj cuentá se vaa síi ca'née Diose nica' yu'unj man yuvi mej ne no xcúun 'unj tinaví 'unj cacun' xráá nij yuvi man rihaan chumii nihánj adonj —taj Jesucristó rihaan nij so' a.

Dan me se cataj Jesucristó rihaan síi na'vee cachee a:

—Nacue so' tuvée so', ne nan' so' tucua so' á —taj Jesucristó rihaan síi naj rihaan yuvéé yo' a.

<sup>7</sup>Gaa ne naxagaa so', ne cavii so', ne quinan' so' tucua so' adonj.

<sup>8</sup>Ne quene'en nij yuvi se vaa nahuun sa' so', qui'yaj Jesucristó, ne che'é dan chucu'vi' nimán nij so', quene'en nij so' Jesucristó, ne ve'é

ndo'o ca'mii nij so' che'é Diose, se vaa guun nucuaj Jesucristó racufj ndo'o Jesucristó man yuvi, qui'yaj Diose adonj.

**Nana nihánj taj xna'anj se vaa cataj xna'anj Jesucristó rihaan sí cu'naj Mateo se vaa canoco' so' man Jesucristó a**

<sup>9</sup>Gaa ne cavii Jesucristó rej yo', ne quene'en so' man yo'o sí yanj 'o ve' a'néj nii puextó man yuvi a. Mateo cu'naj sí ne rej yo' a.

Dan me se cataj Jesucristó rihaan so', ne:

—Canocó' so' manj, ca'anj ní' á —taj Jesucristó rihaan so' a.

Gaa ne naxumaan so', ne canoco' so' man Jesucristó, ca'anj so' a.

**Nana nihánj taj xna'anj se vaa me rá Jesucristó racufj so' man nij sí tumé cacun' a**

<sup>10</sup>Dan me se 'o güii cayáan Jesucristó rá ve', ne ca'na' ndo'o tuvi' so' sí a'néj puextó do', yo'ó nij sí tumé ndo'o cacun' do', ne catúj nij so' rá ve', ne ca'anj cayáan nij so' ga Jesucristó, ne dan me se man rcua'aan nij sí tucu'yón se-nana Jesucristó do', ne chá cunudanj nij so' chraa a. <sup>11</sup>Ne quene'en nij sí fariseo se vaa chá Jesucristó chraa ga nij sí a'néj puextó do', ga yo'ó nij sí tumé ndo'o cacun' do', ne xná'anj nij so' man nij sí tucu'yón se-nana Jesucristó, cataj nij so':

—Sí tucu'yón nana rihaan soj ro', me che'é chá so' chraa ga nij sí a'néj puextó do', ga yo'ó nij sí tumé ndo'o cacun' do', rá núj a —taj nij sí fariseo rihaan nij sí tucu'yón se-nana Jesucristó a.

<sup>12</sup>Ne cuno Jesucristó nana ca'mii nij so', ne cataj so' rihaan nij so' a: —Sí vaa nucuaj ro', ne nano' nij so' man doctor ma'. Maan sí ran' ro', me sí nano' man doctor adonj. Gaa ne ase vaa sí ran' ro', danj vaa nij sí nihánj adonj. <sup>13</sup>O se vaa che'é ca'anj soj tucu'yón soj daj taj nana nihánj nana no rihaan danj Diose á: “Ne uun niha' rá 'unj ni'yaj 'unj yuvi nago' xcuu rihaan 'unj ma'. Tananj uun niha' rá 'unj ni'yaj 'unj yuvi ee rá man tuvi' adonj”. Inanj danj me se-nana Diose nana tucu'yón soj á. Dan me se xcaj soj cuentá se vaa ne ca'na' 'unj canacunj 'unj man sí sa' ma'. Che'é nij sí tumé cacun' ca'naj se vaa canoco' nij so' se-nanaj adonj. Tzaj ne sese sí sa' me soj, rá soj, ne nuveé sij canacunj 'unj man me soj ma' —taj Jesucristó rihaan nij so' a.

**Nana nihánj taj xna'anj me che'é ne toco' nij sí tucu'yón se-nana Jesucristó x'naa man ma'an nij so' a**

<sup>14</sup>Gaa ne nij sí tucu'yón se-nana sí cu'naj Juan cuhi' rihaan Jesucristó, ne xná'anj nij so' man so', cataj nij so':

—Me che'é, ne toco' núj x'naa man ma'an núj che'é se aráj guee núj rihaan Diose, ne toco' nij sí fariseo x'naa man ma'an nij so' uún, tzaj ne nij sí tucu'yón se-nana so' me se ne toco' nij so' x'naa man ma'an nij so' ga —taj nij so' rihaan Jesucristó a.

<sup>15</sup>Gaa ne cataj Jesucristó rihaan nij so' a:

—Ase vaa sí cuchruj sa'anj vaa 'unj, ne asa' ca'vee toco' nij sí man gaj x'naa man ma'an nij so', rá soj ga. Ase vaa sí cataj xcaj man chana ne man tuvi' so'



do', danj vaa nij sí man nihánj cuano, ne anuú ndo'o cha'anj man nij so', ne se ca'vee toco' nij so' x'naa man ma'an nij so' ma'. Tzaj ne vaa güii, ne guun yaníj 'unj rihaan nij so' qui'yaj yuvi, gaa ne nano rá nij sí nihánj, gaa ne toco' nij so' x'naa man ma'an nij so' adonj.

**Nana nihánj taj xna'anj se vaa nij sí noco' tucuáan nga ro', se guun nucaj nij so' cunqo nij so' se-nana Jesucristó ma'**

<sup>16</sup>Tzaj ne ase vaa yatzíj sin' vaa tucuáan nga noco' soj, ne se guun na'nej ní' mantá naca man yatzíj nga yo' ma'. 'O se sese qui'yaj ní' danj, ne güii quinanj yuvi yatzíj yo', gaa ne nagüej mantá naca yo', ne sese cuxuun yuvi man yatzíj yo', ne quisín' yo', gaa ne cunu xij doj yu'uj aj taj man yatzíj nga yo' nanj adonj. <sup>17</sup>Ne dan me se ase vaa nuj nga nuj araa nii na vinó vaa uún soj a. Ne se ca'vee tucuyón 'unj se-tucañj 'unj rihaan soj ma'. 'O se ase vaa na vinó naca vaa nana tucuyón 'unj, ne se guun caraa yuvi na vinó naca rque nuj nga ma'. Sese danj qui'yaj yuvi, ne cuyan na vinó cunu xee na vinó, ne se cacua nuj nga ma'. Che'é dan canu yo', ne cayan na vinó rihaan yo'óo a. Che'é dan araa nii na vinó naca rque nuj naca, ne 'o mán sa' na vinó rque nuj yo' a. Che'é dan inanj rihaan sí naca sí ne noco' tucuáan nga tucuyón 'unj se-nanaj nanj adonj —taj Jesucristó rihaan nij sí tucuyón se-nana sí cu'naj Juan yo' a.

**Nana nihánj taj xna'anj che'é chala cunii do', che'é chana chij do', nahuun sa', qui'yaj Jesucristó a**

<sup>18</sup>Asij ca'mii Jesucristó nana yo' rihaan nij sí tucuyón se-nana sí

cu'naj Juan, ne cuchi' 'o sí nicaj suun rihaan Jesucristó, ne canicun' ruj so', cachín ni'yaj so' rihaan Jesucristó, cataj so':

—Cuanqo cavi' ta'níj chala cunii a. Tzaj ne qui'yáa so' se ndo'o, ca'anj ní', ne cuta' so' ra'á so' xráa no', ne cunu i'na' uún no' nanj ruguanj —taj so', cachín ni'yaj so' rihaan Jesucristó a.

<sup>19</sup>Gaa ne naxumaan Jesucristó, ne canoco' so' do', nij sí tucuyón se-nana so' do', man sí nicaj suun yo' a.

<sup>20</sup>Gaa ne ca'na 'o chana rej xco Jesucristó, ne quisíj 'o chujij yo' xra' ton man chana yo', ne canó ra'a no' doj tu'va sagan' Jesucristó a.

<sup>21</sup>'O se: “Sese canqo ra'aj sagan' Jesucristó, ne nahuun sa' 'unj nanj adonj”, guun rá no' a.

<sup>22</sup>Gaa ne canicaj Jesucristó quene'en Jesucristó man no', ne cataj so':

—No xcúun so' guun niha' rá so', nocoj. 'O se che'é se amán rá so' ni'yaj so' manj ro', che'é dan nahuun sa' so' á —taj Jesucristó rihaan chana yo' a.

Ne veé maan orá dan nahuun sa' chana yo' adonj.

<sup>23</sup>Gaa ne ca'anj Jesucristó ve' tucuá sí nicaj suun yo', ne catúj so' rá ve', ne quene'en so' se vaa man sí o' chra' man rihuu flauta, ne quene'en so' se vaa man ndo'o yuvi rá ve', ne nanó ndo'o rá nij yuvi che'é se cavi' chala cunii yo' adonj.

<sup>24</sup>Gaa ne cataj so':

—Curihanj soj xe' á. 'O se ne cavi' chala cunii nihánj ma'. Maan se otoj un no' nanj á —taj Jesucristó rihaan nij yuvi man rá ve' yo' a.

Gaa ne ca'nga' nacoꝝ nij yuvii ni'yaj nij so' man Jesucristó a.

<sup>25</sup>Gaa quisíj quirii Jesucristó man cunudañj nij yuvii xe', ne catúj Jesucristó rej táá chala cunii yo', ne quita'aa so' ra'a no', ne cunuu i'na' uún chala cunii, ne naxagaa no' adonj. <sup>26</sup>Ne cuchi' nana rihaan cunudañj nij yuvii man rej yo' che'é se vaa qui'yaj Jesucristó, se vaa cunuu i'na' chala cunii yo' qui'yaj so' adonj.

**Nana nihánj taj xna'anj se  
vaa naxra' rihaan vij sí  
tuchrii, qui'yaj Jesucristó a**

<sup>27</sup>Dan me se gaa cavii Jesucristó tucua' síf nicaj suun yo', ne canoco' vij síf tuchrii man so' a. Ne caguáj roj so', cataj roj so':

—Ne'en rój se vaa tuvi' síf cu'ñaj David síf cane gaa naá mé so' á. Che'é dan cunuu 'ee rá so' man rój ruguñj —taj roj so', caguáj roj so' a.

<sup>28</sup>Dan me se catúj Jesucristó rá ve', ne cuchi' roj síf tuchrii yo' rihaan so' a. Gaa ne cataj Jesucristó rihaan roj so':

—Amán rá roj soj se vaa guun nucuáj naxra' rihaan roj soj qui'yáj na' —taj Jesucristó, xná'anj Jesucristó man roj so' a.

—Amán rá rój, Señor —taj roj so' rihaan Jesucristó a.

<sup>29</sup>Gaa ne cuta' ra'a Jesucristó rihaan roj so', ne cataj Jesucristó:

—Che'é se amán rá roj soj, ne che'é dan naxra' rihaan roj soj adonj —taj Jesucristó a.

<sup>30</sup>Veé dan, ne naxra' rihaan roj so' nanj adonj.

Gaa ne caxríj yuvaa Jesucristó rihaan roj so', ne cataj Jesucristó rihaan roj so' a:

—Cütumé uxrá roj soj man roj soj, ne a 'ó yuvii se cuno se vaa qui'yáá 'unj che'é roj soj á. —Dan me se nucuaj ndo'o ca'mii Jesucristó nana yo' rihaan roj so' a.

<sup>31</sup>Tzaj ne curihañj roj so' ca'anj roj so', ne uxrá nata' roj so' rihaan cunudañj nij yuvii man rej yo' che'é yan qui'yaj sa' Jesucristó che'é roj so' nanj adonj.

**Nana nihánj taj xna'anj  
se vaa ca'vee ca'mii 'o síf  
ya'mii, qui'yaj Jesucristó a**

<sup>32</sup>Dan me se tanáj roj so' man Jesucristó, gaa ne ca'anj Jesucristó, gaa ne cuchi' yuvii rihaan so' a. Dan me se nicaj nij yuvii man 'o síf ya'mii cuchi' nij yuvii rihaan Jesucristó a. Síf ya'mii yo' me se nana chree nuû nimán so', ne che'é dan ne ca'mii so', qui'yaj nana chree yo' a. <sup>33</sup>Dan me se quirii Jesucristó man nana chree yo' nimán so', gaa ne guun che'e síf ya'mii ca'mii so' nanj adonj. Veé dan quene'en nij yuvii, ne caráya'anj uxrá nij yuvii, ne cataj nij so':

—Xa' ní' sij israelitá, tzaj ne a 'ó síf 'yaj danj ne quene'en ní' ma' —taj nij yuvii che'é Jesucristó a.

<sup>34</sup>Tzaj ne nij síf fariseo cataj me se:

—Guun nucuaj so' quirii so' man nana chree, che'é se a'mii so' ga ma'an síf chree uun chij adonj —taj nij síf fariseo, ca'mii ne nij so' che'é Jesucristó a.

**Nana nihánj taj xna'anj daj  
qui'yaj Jesucristó gaa cunuu 'ee  
ndo'o rá so' man nij yuvii a**

<sup>35</sup>Gaa ne ca'anj Jesucristó nu' nij chuman' noco nu' nij chuman' cunii nu', ne tucuyón so' rihaan nij yuvii man rá ve' tucuyón nij yuvii israelitá se-tucuanj Moisés, ne ca'mii natáj so' nana sa' che'é güii guun chij Diose rihaan chumii nihánj, ne nahuun sa' taran' nij síi ran' do', nij síi ninaj do', qui'yaj uún so' adonj. <sup>36</sup>Ne quene'en so' man cunudanj nij yuvii, ne cunuu 'ee rá so' man nij yuvii yo' a. 'O se quene'en so' se vaa ase vaa matzinj vaj ma'an vaa nij yuvii, nuvi' síi tumé man nij so', ne aj quiran' ndo'o nij so' sayuun, ne ninaj ndo'o nij so' adonj. <sup>37</sup>Gaa ne cataj so' rihaan nij síi tucuyón se-nana so' a: —Ya uxrá, ne vaa ndo'o suun rihaan ní', ne nij síi 'yaj suun me se doj nij so' nanj adonj. <sup>38</sup>Ne cachinj ni'yaj ní' doj nij síi qui'yaj suun rihaan Diose síi uun chij 'nij ra'a suun, gaa ne ca'nej so' doj yuvii qui'yaj suun se-suun so' adonj —taj Jesucristó rihaan nij síi tucuyón se-nana so' a.

**Nana nihánj taj xna'anj se vaa  
ca'née Jesucristó man chujij  
nij síi tucuyón se-nana so'  
ca'anj ca'mii natáj nij so' a**

**10** Gaa ne canacúun Jesucristó man chujij nij síi tucuyón se-nana so', ne cuchi' nij so' rihaan so', ne go' so' rej nucaj man nij so', gaa ne ca'vee qui'yaj canaán nij so' rihaan nij nana chree a. Dan me se guun nucaj nij so' quirii nij so'

man nij nana chree nimán yuvii, ne guun nucaj nij so' nahuun sa' yuvii ran' do', yuvii ninaj do', qui'yaj uún nij so' a.

<sup>2</sup>Ne nihánj me se-chuvii chujij nij apóstol cune' Jesucristó man nata' rihaan yuvii che'é so' a. Yo'o so' me síi cu'naj Simón, ne Pedró cu'naj yo'ó se-chuvii síi cu'naj Simón a. Ne yo'ó so' me tinúu Simón, síi cu'naj Andrés a. Ne yo'ó so' me síi cu'naj Jacobo, ne ta'níi síi cu'naj Zebedeo me so' a. Ne yo'ó so' me tinúu Jacobo, síi cu'naj Juan a. <sup>3</sup>Ne vaa síi cu'naj Felipé vaa síi cu'naj Bartolomé vaa síi cu'naj Tomás vaa a. Ne yo'ó so' me síi cu'naj Mateo síi ca'néj puextó man yuvii a. Ne yo'ó so' me síi cu'naj Jacobo uún, ne ta'níi síi cu'naj Alfeo me so' a. Ne yo'ó so' me síi cu'naj Lebeo, ne Tadeo cu'naj yo'ó se-chuvii síi cu'naj Lebeo a. <sup>4</sup>Ne yo'ó so' me síi cu'naj Simón uún, ne so' me tuvi' nij síi me rá cunuj ga gobiernó man Romá a. Ne yo'ó so' me síi cu'naj Judas Iscariote, ne so' me síi tacuachén man Jesucristó rihaan nij síi taj ri'yunj man Jesucristó a.

<sup>5</sup>Dan me se ca'née Jesucristó man chujij nij snó'o yo', ne cataj xna'anj so' rihaan nij so' daj qui'yaj nij so' a:

—Se ca'anj nij soj rej man nij síi yanij ma'. Se ca'anj soj chiháan nij yuvii samaritana ma'. <sup>6</sup>Rihaan orún' nij yuvii israelitá ca'anj soj á. 'O se ase vaa daán Diose matzinj vaa nij so', tzaj ne ca'anj ni'ya nij so', ne ne noco' sa' nij so' man Diose ma'. <sup>7</sup>Dan me se ca'anj soj, ne ca'mii natáj soj rihaan nij so', cataj soj: “Nichrun' quisij güii guun chij Diose

rihaan chumii nihánj adonj". Danj cataj soj á. <sup>8</sup>Nahũun sa' nij sí ran', qui'yaj soj, ne cunuũ i'na' uún nij sí cavi', qui'yaj soj, ne nahũun sa' nij sí ran' luj ri'yuj, qui'yaj uún soj, ne quirii soj man nij nana chree nimán nij yuvii á. Cuaño nihánj me rquej rej nucuaq man soj qui'yaj soj danj a. Che'é dan nihánj me cataj xna'anj 'unj rihaan soj se ca'nej soj sa'anj man nij yuvii ma'.

<sup>9</sup>Se nano' soj aga' oró míi do', aga' platá catzii do', naj guun sa'anj do', caraa soj rque se-caxran' soj a ma'. <sup>10</sup>Se nicaj soj xnánj soj ma'. Se ca'anj vij cotoó ga soj ma'. Se qui'nij tacóo soj canj ma'. Ne chruun garroté se coro' soj cachee soj ma'. Maan se gaa uun soj ca'anj soj á. 'Q se no xcúun yuvii rque yuvii chraa cha soj che'é suun sa' 'yaj suun soj nanj adonj. <sup>11</sup>Asa' catúj soj chuman' nocoo do', chuman' ra'a do', ne xna'anj soj man nij yuvii me sí me chuman' yo' me sí sa', gaa ne cuchi' soj tucua sí sa' yo', ne cayáán soj tucua so' ndaa se cavii uún soj ca'anj soj á. <sup>12</sup>Asa' cuchi' soj tucua sí sa' yo', ne ve'é ca'mii soj nana sa' rihaan nij sí tucua yo', cataj soj se vaa dínj gaa cuman nij so' á. <sup>13</sup>Ne sese ya sí sa' me nij sí tucua yo', ne ya dínj gaa cuman nij so', qui'yáj a. Tzaj ne sese nuveé sij sa' me nij so', ne canicaj uún nana sa' ca'mii soj rihaan ma'an soj, qui'yáj, tzaj ne se cavií sa' nij sí tucua yo' a ma'. <sup>14</sup>Ne naj guun yuvii se ca'mii sa' ga soj do', naj guun yuvii se ca'vej rá cunõ nana a'mii soj do', cavii soj ve' tucua so' cavii soj chiháán so' cavii soj, ne nacunan' soj tacóo soj tucua yuu

soj yo'óo tachruũ avii chuman' yo' rihaan yo'óo, ne ndaa dan, gaa ne quene'en yuvii se vaa sí man chuman' yo' tumé cacun' se vaa ne uno nij so' rihaan Diose ma'. <sup>15</sup>Ya ya cataj xna'anj 'unj rihaan soj se vaa güii ca'ne' 'unj cacun' che'é nij yuvii, gaa ne quiran' yuvii man chuman' yo' doj sayuun rihaan nij sí chi'ii man chuman' Sodoma do', rihaan yuvii man chuman' Gomorra do' adonj.

**Nana nihánj me taj xna'anj  
Jesucristó rihaan nij sí  
tucu'yón se-nana so' daj gaa  
sayuun quiran' nij so' a**

<sup>16</sup>"Dan me se ca'nej 'unj man soj rej man sí me rá qui'yaj sayuun man soj a. Ase vaa matzinj vaj rej man xca'yanj ca'nu' ro', danj gaa soj adonj. Che'é dan gaa cuu raq soj á. Ase cacuij raq xtaa ro', danj cacuij gaa raq soj á. Tzaj ne ase vaa taj vaj cacun' tumé cha'aan ro', danj gaa soj, se cutumé soj cacun' ma'. <sup>17</sup>Cutumé ndo'o soj man soj se qui'yaj yuvii sayuun man soj ma'. Dan me se ca'anj nicaj nij yuvii man soj rihaan cuese, ne go' ndo'o nij so' vará xráa soj rá ve' tucu'yón nij so' se-tucuañj Moisés a. <sup>18</sup>Ne ca'anj nicaj nij yuvii man soj rihaan sí nicaj suun do', rihaan sí nicaj suun rey do', che'é se me soj sí nocoo manj a. Ne cataj xna'anj soj rihaan nij sí nicaj suun do', rihaan nij sí yaníj do', che'ej a. <sup>19</sup>Asa' tacuachén nij so' man soj rihaan nij sí nicaj suun, ne se nanó rá soj daj ca'mii soj rihaan nij so' ma'. Maan Nimán Diose rque nu' nana ca'mii soj maan orá yo' nanj adonj. <sup>20</sup>'Q

se nuveé ma'an soj me nij sí ca'mii rihaan nij so' ma'. 'O se Nimán Rej ní' me sí rque nana ca'mii soj nanj adonj.

<sup>21</sup>”Dan me se ca'anj nıcaj snó'o man tinúú snó'o rihaan yuviı, ne ticavi' nii man tinúú snó'o yo', qui'yaj ma'an so' nanj adonj. Ne ca'anj nıcaj snó'o man ta'nıı snó'o rihaan yuviı, ne ticavi' nii man ta'nıı snó'o yo', qui'yaj so' ei. Ne cunı' xnii ga rej xnii, ne ca'anj nıcaj xnii man rej xnii rihaan yuviı, ne ticavi' nii man rej xnii yo', qui'yaj xnii ei. <sup>22</sup>Ne quitaj ri'yunj cunudanj yuviı man soj che'é se me soj síf noco' manj a. Tzaj ne síf yo'o canoco' manj ndaa se quisij nu' sayuun yo' ro', ve'é caviı sa' so' rihaan Dıose adonj. <sup>23</sup>Ne sese qui'yaj nij síf man yo'o chuman' sayuun man soj, ne cunanj soj ca'anj soj yo'ó chuman' á. Ya ya cataj xna'anj 'unj rihaan soj se vaa se canó cunudanj nij chuman' man nij yuviı israelıtá ca'anj soj, ne ca'na' uún 'unj sij ca'néé Dıose nıcaj yu'unj man yuviı rihaan chumii nihánj adonj.

<sup>24</sup>”Dan me se tucu'yón 'unj se-nanaj rihaan soj, ne noco' soj se-nanaj a. Ne ase vaa uno mozó rihaan se-ru'vee mozó ro', danj vaa uno soj rıhanj nanj á. Ne ne'en soj se vaa ase vaa 'yaj yuviı man síf tucu'yón nana rihaan tuvi' ro', danj qui'yaj uún nij yuviı man síf noco' nana yo' a. Ne ase vaa 'yaj yuviı man nij ru'vee ro', danj qui'yaj uún nij yuviı man se-mozó ru'vee yo' a. <sup>25</sup>Dan me se ne'en síf noco' nana ne'en mozó ne'en daj qui'yaj yuviı man ma'an so', tzaj ne me inanj rá

so' guun so' ndaa vaa síf tucu'yón nana man so' do', ndaa vaa se-ru'vee so' do' a. Dan me se tucu'náj nij yuviı Beelzebú manj, cataj nij yuviı se vaa síf chree mej a. Ne ase vaa rej soj vaa 'unj a. Che'é dan danj ca'mii nij yuviı nana vaa danj che'é ma'an soj nanj adonj.

**Nana nihánj taj xna'anj se vaa se cuchu'vi' ní' quene'en ní' yuviı ma'**

<sup>26</sup>”Che'é dan se cuchu'vi' soj ni'yaj soj yuviı me rá qui'yaj sayuun man soj ma'. 'O se nu' nana ca'mii yuve nij yuviı do', nu' se vaa qui'yaj yuve nij yuviı do', nu' yo' ro', nurihanj quene'en cunudanj yuviı vaa güii adonj. <sup>27</sup>Nana a'mii yuve 'unj rihaan soj cuano ro', ca'mii ranga' soj á. Ne nu' se vaa a'mii 'unj xrée soj ro', caviı soj rej quene'en yuviı man soj, ne ca'mii natáj soj nana yo' á.

<sup>28</sup>”Ne se cuchu'vi' soj quene'en soj nij síf guun nucuaj ticavi' man inanj nee man soj ma'. 'O se se guun nucuaj nij so' ticavi' nij so' man nimán soj a ma'. Tzaj ne vaa che'é cuchu'vi' soj ni'yaj soj Dıose nanj á. 'O se so' me síf guun nucuaj qui'yaj cacaa nimán soj cacaa nee man soj cacaa rihaan ya'an adonj.

<sup>29</sup>”Ne'en soj daj vaa nij xtáj chrın' se vaa vij un' yo' nó yo'o sa'anj nii cuartó a. Tzaj ne se guun cavi' yo'o xo' quinij xo' rihaan yo'óó, sese na'vej Rej soj síf nicun' xta' cavi' yo'o xo' ma'. <sup>30</sup>Ne Dıose me se vaa cuentá yuvé raaj soj 'yaj so', ne ne'en so' me daj yuvé raaj soj, <sup>31</sup>ne che'é dan se cuchu'vi' soj che'é sayuun qui'yaj yuviı man soj ma'. 'O se uxrá vaa yu'vee doj

nó soj rihaan xtâj chrin' yo', 'yaj  
Diose adonj.

**Nana nihánj taj xna'anj se vaa  
no xcúun ní' cataj xna'anj ní'  
rihaan yuvii che'é Jesucristó a**

<sup>32</sup>”Che'é se tumé Diose man soj,  
che'é dan no xcúun soj nata' ya soj  
rihaan yuvii se vaa me soj síí noco'  
manj, ne nu' síí 'yaj danj ro', vaa  
güii, ne nata' 'unj rihaan Réé 'unj  
síí nicun' xtá' se vaa sij noco' manj  
me so' a. <sup>33</sup>Ne síí taj xna'anj rihaan  
yuvii se vaa ne noco' so' manj  
ro', vaa güii, ne cataj xna'anj 'unj  
rihaan Réé 'unj síí nicun' xtá' se  
vaa nuveé sij noco' manj me so'  
a ma'.

**Nana nihánj taj xna'anj se  
vaa cunu' ndo'o yuvii ga tuvi'  
yuvii che'é Jesucristó a**

<sup>34</sup>”Se guun rá soj se vaa ca'ná'  
'unj rihaan chumii nihánj che'é  
rej dínj doj cayáan nij yuvii man  
rihaan chumii nihánj ga tuvi'  
yuvii ma'. Ne quí'yáj danj ma'. 'O  
se che'é se ca'ná' 'unj rihaan chumii  
nihánj, che'é dan cunu' ndo'o  
yuvii ga tuvi' yuvii adonj. <sup>35</sup>'O se  
ca'ná' 'unj che'é rej nata' 'unj  
se-nanaj rihaan yuvii, tzaj ne se  
cuno cunudanj nij yuvii rihanj ma'.  
Che'é dan cunu' snó'o ga rej ma'an  
so', ne xa' chana, tzaj ne cunu' no'  
ga nii no' do', ga nii chej no' do',  
che'ej a. <sup>36</sup>Ne nij tuvi' yuvii síí man  
rá ve' tucua' yuvii cunu' ga yuvii  
nanj á. <sup>37</sup>Sese guun rá yo'ó so' se  
vaa sa' doj vaa rej so' do', nii so'  
do', rihanj, ne taj che'é cataj so' se  
vaa sij noco' manj me so' ma'. Ne  
sese guun rá yo'ó so' se vaa sa' doj

vaa ta'níí so' rihanj, ne taj che'é  
cataj so' se vaa sij noco' manj me  
so' ma'. <sup>38</sup>Ne síí na'vej rá quiran'  
sayuun che'é se me so' síí noco'  
manj ro', taj che'é cataj so' se vaa  
me so' síí noco' manj ma'. <sup>39</sup>Síí  
cavii sa' nimán rihaan chumii  
nihánj ro', cavi' nu' so' a. Ne síí  
cavi' che'é se noco' so' manj ro', so'  
me síí gaa i'na' nimán nu' cavii nu'  
ca'anj adonj.

**Nana nihánj taj xna'anj daj  
quiran' nij yuvii racuíf man nij  
síí 'yaj suun rihaan Diose a**

<sup>40</sup>”Sese a'mii sa' yo'ó so' ga soj,  
ne sij a'mii sa' gaj me so' adonj. Ne  
sese a'mii sa' so' gaj, ne sij a'mii  
sa' ga síí ca'née manj rihaan chumii  
nihánj me uún so' adonj. <sup>41</sup>Sese  
a'mii sa' yo'ó so' ga 'o síí nata'  
se-nana Diose, che'é se ve'é 'yaj  
so' nata' so' se-nana Diose, ne rá  
se vaa ma'an síí nata' se-nana Diose  
vaa so' uún adonj. Dan me se 'o  
cuyaan naru'vee Diose rihaan so'  
ga ma'an síí nata' se-nana Diose ei.  
Ne sese a'mii sa' yo'ó so' ga yo'ó síí  
sa' 'yaj, ne naru'vee Diose rihaan  
so' uún adonj. 'O cuyaan naru'vee  
Diose rihaan so' ga ma'an síí sa'  
'yaj ei. <sup>42</sup>Dan me se a me ma'an yo'ó  
síí rqué doj na acoj co'ó yo'ó nij síí  
noco' uun nihánj che'é se-chuvií  
'unj, ne ya ya cataj xna'anj 'unj  
rihaan soj se vaa daj chihaa míf  
se quinavij se sa' naru'vee Diose  
rihaan síí rqué doj na yo' ma'.

**11** Dan me se quisíj nana  
yo' nana cataj xna'anj  
Jesucristó rihaan chuvij nij síí  
tucu'yón se-nana so', ne curihanj  
Jesucristó rej yo', ne ca'anj so'

chiháan nij yuvií israelitá tucu'yón so' rihaan nij so' ne ca'mii natáj so' rihaan nij so' a.

**Nana nihánj taj xna'anj che'é nana ca'mii Jesucristó che'é síí cu'naj Juan síí cuta' ne man yuvií a**

<sup>2</sup>Dan me se 'nij síí cu'naj Juan síí cuta' ne man yuvií taga', ne cuchi' nana rihaan so' che'é nu' se vaa qui'yaj Jesucristó a. Che'é dan ca'née so' vij tuvi' nij síí tucu'yón se-nana so' rihaan Jesucristó a. <sup>3</sup>Ne nana nihánj ro', xná'anj roj so' man Jesucristó, qui'yaj síí cu'naj Juan a:

—So' me síí ca'na' tinanii man yuvií rihaan sayuun na'. Ase na'vij ní' ca'na' yo'ó so' xa'. —Dan me nana me rá síí cu'naj Juan xna'anj roj so' man Jesucristó a.

<sup>4</sup>Gaa ne cataj xna'anj Jesucristó rihaan roj so' a:

—Cavií roj soj cuchi' uún roj soj rihaan síí cu'naj Juan, ne cataj xna'anj roj soj rihaan so' nu' nana cuno roj soj do', nu' se vaa quene'en roj soj do' á. <sup>5</sup>Dan me se nij síí tuchrií ro', naxra' rihaan, ne nij síí na'vee cachee ro', chée nij so', ne nij síí ran' luj ri'yuj ro', nahuun sa', ne nij síí so'o ro', nachuguun xrée nij so', ne nij síí cavi' ro', cunuu i'na' uún, ne nij síí nique ro', uno nij so' nana sa' a. Nu' nihánj cataj xna'anj roj soj rihaan síí cu'naj Juan yo' á. <sup>6</sup>Ne cataj uún roj soj rihaan síí cu'naj Juan se vaa cavií sa' so' qui'yaj Diose, sese se guun na'aj so' ni'yaj so' manj a. Danj ca'mii roj soj rihaan síí cu'naj Juan yo' á —taj Jesucristó rihaan roj síí tucu'yón se-nana Juan yo' a.

<sup>7</sup>Dan me se ca'anj roj so', gaa ne guun che'e Jesucristó ca'mii so'

rihaan cunudanj nij yuvií che'é síí cu'naj Juan síí cuta' ne man yuvií a:

—Asij ca'anj soj rej tacaan quene'en soj man síí cu'naj Juan ro', ne daj gaa so' quene'en soj, rá soj ga. Ase vaa yo'o rcoo naan ndo'o 'yaj nana vaa so', rá soj na'. Guun vij nimán so' che'é tucuáan nocó' so', rá soj na'. Taj ma'. <sup>8</sup>Maan se daj gaa so' rá soj, asij ca'anj soj quene'en soj man so' ga. Sij nuu yatzíj laruu ndo'o me so', rá soj na'. Taj ma'. 'O se nij síí nuu yatzíj laruu ro', yanj rá ve' tucúa síí nicaj suun rey adonj. <sup>9</sup>Maan se daj gaa síí cu'naj Juan rá soj, asij ca'anj soj quene'en soj man so' ga. Sij nata' se-nana Diose me so', rá soj na'. Ya uxrá ei. Ne cataj xna'anj 'unj rihaan soj se vaa sa' doj vaa so' rihaan cunudanj nij síí nata' se-nana Diose adonj.

<sup>10</sup>'O se nana nihánj nana no rihaan danj Diose ro', taj xna'anj che'é síí cu'naj Juan a: “Vaa síí ca'anj suun che'é 'unj, ne ca'nej 'unj man so' quitaj yaan so' rihaan so', ne nuchran' nimán yuvií ve'é ca'mii nij yuvií ga so', qui'yaj so' a”. Danj taj danj Diose che'é síí cu'naj Juan se vaa nuchran' nimán yuvií ve'é ca'mii nij yuvií ga síí ca'na' tinanii man nij yuvií rihaan sayuun, qui'yaj síí cu'naj Juan, taj danj Diose, ne danj qui'yaj so' adonj.

<sup>11</sup>”Ya ya cataj xna'anj 'unj rihaan soj cuano se vaa sij sa' doj rihaan cunudanj nij yuvií man rihaan chumii me síí cu'naj Juan síí cuta' ne man yuvií a. A 'ó yuvií ne vaa sa' doj rihaan so' ma'. Tzaj ne cuano ro', uun chij Diose nimán yuvií man rihaan chumii nihánj, ne naj guun

yuvii uun chij Diose nimán ro', me síi sa' doj rihaan síi cu'naj Juan a. <sup>12</sup>Dan me se asij tucu'yón síi cu'naj Juan rihaan yuvii ndaa cuano me se naqui'yaj ino ndo'o yuvii se-nana Diose se vaa guun chij so' rihaan chumii nihánj, ne vaa síi sca' ndo'o síi me inanj rá cataj daj qui'yaj Diose asa' guun chij Diose adonj. <sup>13</sup>Q se nij síi nata' se-nana Diose rihaan yuvii gaa naá do', nu' se-tucuanj Moisés do', ndaa ma'an síi cu'naj Juan do', cataj xna'anj ndo'o nij so' che'é güii guun chij Diose nimán yuvii man rihaan chumii nihánj nanj á. <sup>14</sup>Dan me se aj ne'en soj se vaa síi cu'naj Elías síi nata' se-nana Diose rihaan yuvii gaa naá ro', ca'na' uún so' rihaan chumii nihánj, taj danj Diose a. Dan me se sese me rá soj guun ya rá soj cuno soj nana nihánj, ne cataj xna'anj 'unj rihaan soj se vaa síi cu'naj Juan me síi atá se-suun síi cu'naj Elías síi cane gaa naá yo' á. <sup>15</sup>Sese taj yu'uj xréé soj, ne cuno soj nana nihánj ei.

<sup>16</sup>Ne daj vaa yuvii man rihaan chumii nihánj cuano, rá soj ga. Dan me se cataj xna'anj 'unj rihaan soj á. Ase vaa xnii ca'anj rihaan yu'vee ne tico ga tuvi' ro', vaa nij yuvii man rihaan chumii nihánj adonj. Dan me se yáan nij xnii yo' rihaan yo'óó, <sup>17</sup>ne aguáj nij xnii rihaan tuvi' xnii, taj nij xnii: “Nica'j núj ta'ánj núj, go' núj chra' choco', tzaj ne me che'é ne ra'anj soj ga. Ne go' núj chra' xngá, tzaj ne me che'é ne ta'vee soj ga. Me che'é ne 'yaj soj ndaa vaa me rá núj ga”, taj nij xnii rihaan tuvi' nij so' a. <sup>18</sup>Q se ca'na' síi cu'naj Juan síi cuta' ne man yuvii, gaa ne

ne cha so' do', ne co'o so' do', ma'. Ne che'é dan taj nij yuvii se vaa nuu nana chree nimán so', taj nij yuvii a. <sup>19</sup>Ne ca'ná' 'unj sij ca'née Diose nica'j yu'unj man yuvii, gaa ne niha' rá 'unj chá 'unj do', co'o 'unj do', gaa ne che'é dan taj uún nij yuvii se vaa síi cachén chá do', síi cachén co'o do', mé 'unj, taj uún nij yuvii a. Ne taj uún nij so' se vaa tuví' 'unj me síi a'néj puextó man yuvii do', yo'ó nij síi tumé cacun' do', taj nii a. Danj tu'va nij so', tzaj ne ne ne'en uxrá nij so' ma'. Sese xcaj yuvii cuentá daj vaa 'yaj rój, ne guun ya rá nij yuvii se vaa sij cuu raá me rój ga síi cu'naj Juan yo' adonj —taj Jesucristó rihaan nij yuvii a.

**Nana nihánj taj xna'anj se vaa  
cataj xna'anj Jesucristó che'é  
sayuun quiran' yuvii man  
va'núj chuman' yuvii ne ca'vej  
rá cuno se-nana Jesucristó a**

<sup>20</sup>Sij, gaa ne guun che'e Jesucristó cuta' Jesucristó cacun' xráá nij yuvii man va'núj chuman' a. Dan me se cuta' so' cacun' xráá nij so' se vaa guun nichraj nimán nij so' a. Dan me se nda' se doj a vaa suun sa' qui'yaj suun so' chiháan nij so' quene'en nij so' rihaan suun sa' qui'yaj suun so' yo'ó chuman', tzaj ne ne canicaj nimán nij so' a ma', taj Jesucristó a. <sup>21</sup>Ne nihánj me nana ca'mii Jesucristó che'é nij yuvii man nij chuman' yo' a: —Nique soj sij man chuman' Corazín a. Nique soj sij man chuman' Betsaida a. 'Q se quiran' uxrá soj sayuun nanj á. Dan me se nij síi man chuman' Tiro do', nij síi



man chuman' Sidón do', me sí chi'ii  
nimán nanj á. Tzaj ne sese ca'anj  
'unj chiháán nij so' ne sese qui'yáj  
suun sa' nocoo ni'yaj nij so', gaa ne  
cuno nij so' se-nanaj, ne guun ya rá  
nij so' se vaa tumé nij so' cacun', ne  
canicaj nimán nij so', ne quinanó  
ndo'o rá nij so' che'é cacun' tumé  
nij so', ne ndaa yatzíj ya' cunuú nij  
so', ne ndaa yaj chruun acaa ruvaj  
caraa nij so' raa nij so', che'é se  
quinanó rá nij so' che'é cacun' tumé  
nij so' asuun saj adonj. Nihánj,  
ne ne ca'anj 'unj ma'. Maan inanj  
chiháán soj 'naj, ne qui'yáj suun sa'  
nocoo quene'en ma'an soj, tzaj ne  
ne canicaj nimán nij soj a ma'.

<sup>22</sup>Dan me se yaj cataj xna'anj 'unj  
rihaan soj se vaa güii ca'ne' 'unj  
cacun' che'é nij yuvií ro', doj a gaa  
sayuun quiran' soj rihaan sayuun  
quiran' nij sí chi'ii man chuman'  
Tiro do', man chuman' Sidón  
do' adonj.

<sup>23</sup>Ne vaa soj sij man chuman'  
Capernaum uún á. Ne sí sa' inanj  
me ma'an soj, rá soj na'. Nuveé sij  
sa' me soj ma'. Sí ca'anj rihaan  
ya'an guun soj á. Dan me se nij sí  
man chuman' Sodoma ro', me sí  
chi'ii nimán a. Tzaj ne sese ca'anj  
'unj chiháán nij so' ne sese qui'yáj  
suun sa' nocoo ni'yaj nij so', ne  
cuno nij so' se-nanaj, ne guun ya rá  
nij so' se vaa tumé nij so' cacun', ne  
canicaj nimán nij so', ne ne cacaa  
chiháán nij so' ma'. Ne naj chiháán  
nij so' ndaa cuano asuun saj a.  
Tzaj ne ne ca'anj 'unj ma'. Maan  
se inanj chiháán soj 'naj, ne qui'yáj  
suun sa' nocoo yo' quene'en ma'an  
soj, tzaj ne ne canicaj nimán nij soj  
a ma'. <sup>24</sup>Dan me se cataj xna'anj

'unj rihaan soj se vaa güii ca'ne' 'unj  
cacun' che'é nij yuvií ro', doj a gaa  
sayuun quiran' soj rihaan sayuun  
quiran' nij sí chi'ii man chuman'  
Sodoma yo' adonj —taj Jesucristó  
che'é nij yuvií ne ca'vej rá cuno  
se-nana so' a.

**Nana nihánj taj xna'anj me sí  
nari' sa' se-nana Jesucristó a**

<sup>25</sup>Dan me se güii yo' cachíin  
ni'yaj Jesucristó rihaan Diose,  
cataj so':

—Sí 'nij ra'a xta' do', sí 'nij ra'a  
chumií do', mé so', Ataj Chij. Ne sa'  
uxrá qui'yáa so' caráán so' rihaan  
nij sí avii raa do', rihaan nij sí  
acaj cuentá do', se vaa se cuno nij  
so' se-nanaj ma'. Maan nij sí vaa  
nica' nimán ro', ve'é cuno nij so',  
qui'yáa so' á. <sup>26</sup>Danj inanj qui'yáa  
so', che'é yan danj me rá so' qui'yáa  
so', Ataj —taj Jesucristó rihaan Rej  
so' Diose a.

<sup>27</sup>Canicaj Jesucristó ca'mii so'  
rihaan nij yuvií, cataj so' a:

—Aj rqué Réé 'unj Diose cunudanj  
rasuun rihanj á. Ne a 'ó sí ne  
ne'en daj vaa 'unj; maan orún' Réj  
ne'en a. 'O se ta'níí so' mej adonj.  
Ne a 'ó yuvií ne ne'en daj vaa  
Réj ma'. Maan orún' 'unj ne'en daj  
vaa so' adonj. Ne sese me rá 'unj  
cataj xna'anj 'unj rihaan yo'ó nij  
yuvií daj vaa Réj, ne quene'en yo'ó  
nij so' uún adonj. <sup>28</sup>Ne sese vaa  
sí navij ndo'o rá che'é yan nano'  
uxrá so' tucuáán sa' do', sese vaa  
sí nanó ndo'o rá che'é yan ne guun  
nucuj so' qui'yaj so' nu' tucuáán sa'  
tucuáán nocó' so' do', ne ca'na' nij  
sí vaa danj rihanj á. 'O se naraan  
rá nij sí vaa danj, qui'yáj nanj á.

<sup>29</sup>Dan me se canoco' soj manj, ne qui'yaj soj tucuáan tucu'yón 'unj man soj á. 'O se síí vaa nica' nimán mej, ne quinarí' soj chrej quinarāan rá soj adonj. <sup>30</sup>'O se ne sayuun vaa tucuáan cuchruj 'unj canoco' soj ma'. 'O se guun nucuaj soj qui'yaj soj cunudanj adonj —taj Jesucristó a.

**Nana nihánj taj xna'anj  
che'é güii naránj rá ní' a**

**12** Dan me se naca' ca'mii Jesucristó nana yo', ne 'o güii naránj rá nij yuvií israelitá me yo', ne vaj Jesucristó rque 'o naa 'núu trigó a. Vaj nij síí tucu'yón se-nana so' ga so' a. Veé dan vaj nij so', ne na'aaan rque nij so' a. Che'é dan me guun che'é nij so' cuta nij so' doj 'núu trigó chá nij so' a. <sup>2</sup>Tzaj ne quene'len nij síí fariseo se vaa cuta nij so' doj 'núu trigó, ne cataj nij so' rihaan Jesucristó a:  
—Ni'yaj so' ei. Güii naránj rá yuvií me güii cuan' á. Ne nó xcúún nij síí tucu'yón se-nana so' cuta nij so' 'núu trigó cuan' a ma' —taj nij so' rihaan Jesucristó a.

<sup>3</sup>Gaa ne cataj Jesucristó rihaan nij so' a:

—Me che'é, ne ne nayaa soj rihaan danj Diose daj qui'yaj síí cu'naj David gaa naá a. Gaa quina'aaan rque nij tuvi' nij so', <sup>4</sup>gaa ne catúj nij tuvi' nij so' rá nuvíí, ne chá nij so' rachrúún taj rihaan se-mesa Diose a. Ne ne nó xcúún nij so' cha nij so' rachrúún yo'; maan se orún' nij xrej nó xcúún cha rachrúún yo' a. Tzaj ne maan che'é se rque nij so' na'aaan uxrá, gaa ne chá nij so' rachrúún yo' nanj adonj. Tzaj ne

ne cataj Diose se vaa tumé síí cu'naj David cacun' ma'.

<sup>5</sup>Ne ne nayaa soj me taj se-tucuanj Moisés che'é nij xrej 'yaj suun nuvíí na'. 'O se che'é se-suun nij so', 'yaj nij so' se vaa ne nó xcúún yuvií qui'yaj yuvií güii naránj rá ní' s'ij israelitá ma'. Tzaj ne ne tumé nij so' cacun' che'é se vaa 'yaj nij so' ma'. <sup>6</sup>Ne cuano nihánj me cataj xna'anj 'unj rihaan soj se vaa vaa síí nicun' rihaan soj cuano, ne sa' doj vaa so' rihaan nuvíí yo' adonj. <sup>7</sup>Ne vaa yo'ó nana no rihaan danj Diose taj: “Ne uun niha' rá 'unj ni'yaj 'unj síí rque xcuu rihaan 'unj ma'. 'O se uun niha' rá 'unj ni'yaj 'unj yuvií 'ee rá man tuvi' adonj”. Yo' me se-nana Diose nana no rihaan yanj yo' a. Sese cuno soj me taj nana yo', ne ne cuta' soj cacun' xráa nij síí nihánj saj ma'. Ne ne tumé nij síí nihánj cacun' ma'. <sup>8</sup>'O se síí ca'néé Diose n'icaj yu'unj man yuvií mej, ne no xcúnj quirii ta'ngaj daj qui'yaj yuvií güii naránj rá yuvií adonj —taj Jesucristó rihaan nij síí fariseo yo' a.

**Nana nihánj taj xna'anj se  
vaa nahuun sa' 'o síí nacoq  
ra'a, qui'yaj Jesucristó a**

<sup>9</sup>Gaa ne curihanj Jesucristó rej naj naa yo', ne catúj so' rá ve' tucu'yón nij síí man chuman' yo' se-tucuanj Moisés a. <sup>10</sup>Dan me se yáan 'o síí nacoq ra'a rá ve' yo' a. Ne xná'anj nij síí fariseo man Jesucristó sese no xcúún yuvií qui'yaj cono'ó yuvií man tuvi' yuvií güii naránj rá yuvií a. Danj tu'va nij so' rihaan Jesucristó, che'é yan me rá nij so' cuta' nij so' cacun'

xráá Jesucristó che'é nana ca'mii Jesucristó adonj. <sup>11</sup>Gaa ne cataj Jesucristó rihaan nij so' a:

—Sese vaa daán yo'o soj matzinj, ne sese quinij xo' rá yu'uj güii naránj rá yuvii, ne cuxuun síi daan man xo' quirii so' man xo' rque yu'uj yo', raj a. <sup>12</sup>Ne sa' uxrá doj vaa yuvii rihaan matzinj yo' adonj. Che'é dan no xcúún yuvii racúij yuvii man tuvi' yuvii güii naránj rá yuvii á —taj Jesucristó rihaan nij síi fariseo yo' a.

<sup>13</sup>Canicaj Jesucristó cataj Jesucristó rihaan síi nacoo ra'a yo': —Tucuá so' ra'a so' á —taj Jesucristó rihaan so' a.

Gaa ne tucuá so' ra'a so', ne cunuu sa' ra'a so', ne ase vaa guee nichrej ra'a so' rej vaa sa' ro', danj vaa guee nichrej ra'a so' uún a.

<sup>14</sup>Dan me se curihanj nij síi fariseo rá ve' yo', ne ca'anj nij so' rej yaníj, ne guun rá taran' nij so' daj gaa qui'yaj nij so' ne cavii' Jesucristó a.

**Nana nihánj taj xna'anj se vaa ca'ne' Jesucristó suun rihaan yuvii se vaa se nata' nij yuvii rihaan tuvi' yuvii che'é so' a**

<sup>15</sup>Tzaj ne quene'en Jesucristó daj me rá nij síi fariseo qui'yaj nij so' man Jesucristó a. Che'é dan cavii so' rej yo', ne ca'anj ndo'o yuvii ga so', ne nahuun cunudanj nij síi ran' vaj ga nij yuvii, qui'yaj Jesucristó a. <sup>16</sup>Ne ca'ne' so' suun rihaan nij yuvii se vaa se nata' nij yuvii rihaan tuvi' yuvii che'é yan vaa 'yaj so' a.

<sup>17</sup>Danj ca'mii Jesucristó, gaa ne quisíj ya nu' nana nihánj nana cataj xna'anj Diose rihaan yuvii gaa

naá a. Dan me se ca'mii Diose nana nihánj cuno síi cu'naj Isaías síi nata' se-nana Diose gaa naá, ne nata' síi cu'naj Isaías nana nihánj rihaan yuvii che'é Diose a. Nana ca'mii ma'an Diose, cataj xna'anj Diose che'é Jesucristó me nana nihánj a: <sup>18</sup>“Xcaj soj cuentá se vaa síi nihánj me síi 'yaj suun rihanj a. Narii 'unj man so' cunuú so' rihanj, ne ee rá 'unj man so', ne aran' raj ni'yaj 'unj man so' a. Ca'nej 'unj Nimanj nimán so', ne nata' so' rihaan nij síi yaníj se vaa ve'é ca'ne' 'unj cacun' che'é nij so' a. <sup>19</sup>Se cunu' so' ga yuvii ma'. Se caguáj so' rihaan yuvii ma'. Se canicun' so' chrej ca'aan ca'mii natáj so' rihaan yuvii ma'. <sup>20</sup>Ne sese nari' so' man yo'o síi quiri' rá síi ne uun nucuaj nocó' chrej sa', ne se tiri' nu' so' man síi quiri' rá yo' ma'. 'Q se racúij so' man so' adonj. Dan me se ca'vee se ase vaa rcoo xtun' do', ca'vee se ase vaa aga' ya'an navij na acaa rque do', vaa síi quiri' rá yo', tzaj ne racúij so' man so', yan cunuu sa' so' adonj. Dan me se qui'yaj canaán nana ya ca'mii síi 'yaj suun rihanj gaa ve'é ca'ne' so' cacun' che'é yuvii nanj adonj. <sup>21</sup>Ne gaa nucuaj rá nij síi yaníj man so' se vaa racúij so' man nij síi yaníj adonj”, taj Diose gaa naá a.

**Nana nihánj taj xna'anj se vaa cuta' nij síi fariseo cacun' rmi' xráá Jesucristó se vaa ca'mii Jesucristó ga síi chree a**

<sup>22</sup>Guun naá doj, gaa ne ca'na' yuvii rihaan Jesucristó, ne nicaj nij yuvii man 'o' síi ya'mii aráan rihaan nuu nana chree nimán a. Xa' síi nuu

nana chree nimán, tzaj ne caráán rihaan so', ne ya'mii so' a. Ne nahuun nu' so', qui'yaj Jesucristó, ne naxra' rihaan so', ne ca'mii so' adonj. <sup>23</sup>Dan me se quene'en nij yuvii se vaa nahuun sa' so' qui'yaj Jesucristó, ne guun niha' rá nij yuvii, ne cataj nij yuvii:

—Sís nihánj me tuvi' sís cu'naj David gaa naá, rá soj na'. Sís tñanai man ní' rihaan sayuun me sís nihánj, rá soj na' —taj nij yuvii, xná'anj nij yuvii man tuvi' yuvii me sís me Jesucristó a.

<sup>24</sup>Tzaj ne cuno nij sís fariseo daj ca'mii nij yuvii che'é Jesucristó, ne cataj nij so':

—Nuveé ma'an sís nihánj rii nana chree ma'. Maan se a'mii so' ga sís chree uun chij sís cu'naj Beelzebú, ne che'é dan rii so' nij nana chree nimán yuvii adonj —taj nij sís fariseo che'é Jesucristó, ca'mii ne nij so' a.

<sup>25</sup>Dan me se quene'en Jesucristó daj vaa nimán nij sís fariseo yo', gaa ne ca'mii so' rihaan nij sís fariseo a:

—Ne'en soj se vaa sese vaa 'o nación, ne sese xra' ta'aj nij sís uun chij rihaan nación yo' ne cunu' nij ma'an nij so' ga tuvi' nij so', ne vaa güii, ne nu' nación yo' quiri' nu' nanj adonj. Ne sese cunu' ta'aj nij yuvii man ma'an chuman' ga tuvi' yuvii, ne vaa güii quiri' nu' chiháán nij so', qui'yaj nij so' nanj adonj. Ne sese cunu' ta'aj nij yuvii man 'o barrió ga ma'an tuvi' yuvii sís man ma'an barrió yo', ne vaa güii quiri' nu' barrió yo', qui'yaj nij so' nanj adonj. <sup>26</sup>Che'é dan me sese racuíj sís chree sís cu'naj Satanás manj rii 'unj tuvi' so' nana chree

nimán nij yuvii, gaa ne asa' ca'vee guun chij ndo'o so' rihaan nij yuvii man rihaan chumii nihánj, rá soj ga. <sup>27</sup>Dan me se sese rii 'unj nana chree nimán nij yuvii, 'yaj sís chree cu'naj Beelzebú, che'é se a'mii 'unj ga so', rá soj a. Tzaj ne nij sís tucu'yón se-nana soj me se veé danj rii uún nij so' nij nana chree nimán yuvii uún á. Ne asa' a'vee 'yaj nij so' danj, rá soj ga. Ne vaa nij so' vaa, veé danj a'mii nij so' ga sís chree, rá soj gaa na'. Che'é nana ca'mii soj me se ma'an nij sís tucu'yón se-nana soj cuta' cacun' xráá soj se vaa ca'mii ne soj adonj. <sup>28</sup>Tzaj ne 'unj me se ya Nimán Diose me sís racuíj manj rii 'unj nana chree nimán yuvii adonj. Che'é dan xcaj soj cuentá se vaa aj guun che'e Diose uun chij Diose rihaan chumii nihánj adonj.

<sup>29</sup>”Ne sese me rá yo'lo so' catuu so' rá ve' tucua' sís ru'vee qui'yaj ituu so' si'yaj sís ru'vee yo', ne asino numíj so' man sís ru'vee yo', gaa ne canicaj so' catzij so' tucua' sís ru'vee yo' ei. Ne ase vaa 'yaj sís atúj tucua' sís ru'vee ro', danj 'yá man sís chree yo' chuguanj. Dan me se numíj 'unj man so', ne cuano nihánj a'néj 'unj man nu' nij sís 'nij ra'a so' adonj.

<sup>30</sup>”Naj guun sís na'vej rá qui'yaj suun ga 'unj ro', sís taj ri'yun man me so' a. Ne naj guun sís ne racuíj manj naqui'yaj chre' 'unj man yuvii canoco' man Diose ro', so' me sís ticha'nuu man nij yuvii, ne aráán so' rihaan nij yuvii se canoco' nij yuvii man Diose ei. <sup>31</sup>Che'é dan cataj xna'anj 'unj rihaan soj se vaa nu' cacun' tumé yuvii do', nu' nana

chi'ii ca'mii yuvii do', ca'vee tinavij Diose cacun' yo' che'é nij yuvii a. Tzaj ne sese nachri' yo'o so' ni'yaj so' man Nimán Diose, ne daj chihaa mÍj se quinavij cacun' yo' xráa so' a ma'. <sup>32</sup>Dan me se 'unj sij ca'neé Diose nÍcaj yu'unj man yuvii ro', ca'vee se ca'mii yo'o so' nana chi'ii che'ej, tzaj ne ca'vee navij cacun' yo' xráa so' qui'yaj Diose ei. Tzaj ne sese ca'mii chi'ii yo'o so' che'é Nimán Diose, ne daj chihaa mÍj se tinavij Diose cacun' yo' xráa so' a ma'. Dan me se ca'vee se rihaan chumii nihánj do', ca'vee se ndaa cavi' so' do', tzaj ne se quinavij cacun' yo' nu' cavii nu' ca'anj xráa so' a ma'.

**Nana nihánj taj xna'anj se vaa ase vaa nimán yuvii ro', danj vaa nana a'mii yuvii a**

<sup>33</sup>”Sese sa' vaa 'o chruun ne sa' vaa chruj man raq chruun yo' a. Sese chi'ii vaa 'o chruun ne chi'ii vaa chruj man raq chruun yo' a. Dan me se sese ne'en yuvii se vaa vaa sa' chruj man raq chruun, ne ne'en yuvii se vaa chruun sa' me yo' a. Ne sese ne'en yuvii se vaa vaa chi'ii chruj man raq chruun, ne ne'en uún yuvii se vaa chruun chi'ii me yo' adonj. <sup>34</sup>'O se ase vaa xcuáa yuvaa vaa soj ei. Chi'ii vaa nimán soj, ne chi'ii vaa nana a'mii soj ei. 'O se ase vaa se man nimán yuvii ro', danj vaa nana avii tu'va yuvii adonj. <sup>35</sup>Dan me se síf sa' ro', man ndo'o se sa' nimán so', ne inanj nana sa' a'mii so' adonj. Síf chi'ii ro', man ndo'o se chi'ii nimán so', ne inanj nana chi'ii a'mii so' adonj. <sup>36</sup>Ne cuano nihánj me cataj xna'anj

'unj rihaan soj se vaa nu' nana a'mii ne nij yuvii ro', cataj xna'anj nij yuvii rihaan Diose me che'é ca'mii nij yuvii nana vaa danj asa' quisij güii ca'ne' Diose cacun' che'é cunudanj nij yuvii man rihaan chumii nihánj adonj. <sup>37</sup>'O se sese sa' vaa nana ca'mii so', ne cataj Diose se vaa ne tumé so' cacun' ma'. Ne sese chi'ii vaa nana ca'mii so', ne cuta' Diose cacun' xráa so' adonj — taj Jesucristó rihaan nij síf fariseo yo' a.

**Nana nihánj me taj xna'anj Jesucristó me suun sa' nocoo me qui'yaj Jesucristó, gaa ne guun ya rá yuvii se vaa ya vaa nana a'mii so' a**

<sup>38</sup>Cachén doj, gaa ne ca'na' uún doj síf naqui'yaj cuu se-tucuanj Moisés ga doj síf fariseo rihaan Jesucristó, ne cataj nij so': —Qui'yáa so' 'o suun sa' nocoo quene'en núj, maestro. Gaa ne guun ya rá núj se vaa ya a'mii so' á —taj nij so' rihaan Jesucristó a.

<sup>39</sup>Gaa ne cataj Jesucristó rihaan nij so' a:

—Xa' soj sij 'na' inanj rej chi'ii do', rej cacun' do', me se me rá gaa soj qui'yá suun sa' nocoo ni'yaj soj, tzaj ne daj chihaa mÍj se qui'yá ndaa vaa me rá soj ma'. Maan se quene'en soj se vaa ase vaa quiran' síf cu'naj Jonás síf nata' se-nana Diose gaa naá ro', danj quirán' 'unj, vaa güii, ni'yaj soj adonj. <sup>40</sup>'O se ase vaa cunuú síf cu'naj Jonás va'núj ya güii rque xcuu xij vaj rque na ya'anj ro', ta'nga' danj gaa va'núj ya güii nuvij nigan' quínáa 'unj rque yo'óo quene'en soj adonj. <sup>41</sup>Nij síf man chuman'

cu'naj Nínive ro', canicun' nij so' ga ma'an soj sij vaa i'na' rihaan chumií nihánj cuano asa' quisíj güüi ca'ne' Diose cacun' che'é yuvii, ne cuta' nij síi man chuman' Nínive yo' cacun' xráa soj adonj. Cuno nij so' nana ca'mii natáj síi cu'naj Jonás, ne nuchran' nimán nij so', ne canoco' nij so' man Diose adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Jonás yo', tzaj ne taj se qui'yá' nuchran' nimán soj ma'.<sup>42</sup> Ne güüi ca'ne' Diose cacun' che'é yuvii ro', cuchí' chana nicaj suun reiná guun hij rihaan chuman' naj gan' ndo'o rej sur, ne canicun' no' rihaan soj, qui'yaj Diose, ne cuta' no' cacun' xráa soj adonj. 'O se gan' ndo'o cachéé no' cuchí' no' rihaan síi cu'naj Salomón, ne cuno no' nana cuu tucuyón Salomón man no' adonj. Ne xa' 'unj sij nicun' rihaan soj cuano, tzaj ne sa' doj vaa 'unj rihaan síi cu'naj Salomón yo' a adonj. Tzaj ne na'vej rá soj cuno soj nana a'mii 'unj rihaan soj a man adonj.

**Nana nihánj taj xna'anj daj 'yaj nana chree gaa anicaj uún nana chree nimán yuvii a**

<sup>43-44</sup> Ne gaa tihaj yuun avii yo'o nana chree nimán snó'o, ne chéé rma'an nana chree yo' nano' so' rej cayáán so', tzaj ne taj se qui'yá' quiri' nana chree yo' rej cayáán so', gaa ne me rá uún nana chree yo' canicaj so' rej cavii so' gaa naá a. Dan me se taj nana chree yo': "Canicaj uún 'unj nan' 'unj rej cavii 'unj a. Ve'é nanj vaa tucuj, ne naruvii rá ve' tucuj cuano, ne

uun yaj yanj rá ve' tucuj cuano adonj", taj nana chree yo' a.<sup>45</sup> Gaa ne dan me se anicaj uún nana chree yo' nimán snó'o yo', ne nano' nana chree yo' yo'ó hij tuvi' nana chree yo' síi chi'ii doj, ne 'na' nique uún so' nimán snó'o yo', gaa ne cayáán taran' nij nana chree yo' a. Dan me se gaa naá gaa cayáán orún' nana chree yo', ne maan ta'nga' quij vaa nimán snó'o yo', tzaj gaa namán yo'ó hij nana chree yo', gaa ne doj a tico nana chree man so', ne doj a quij vaa nimán snó'o yo', 'yaj nana chree yo' a adonj.

"Ne ase vaa ran' snó'o yo' ro', ta'nga' danj quirán' soj sij israelitá sij na'vej rá cuno se-nana 'unj ei. 'O se che'é se natá' 'unj se-nanaj rihaan soj ro', che'é dan doj a gaa sayuun quirán' soj rihaan sayuun quirán' nij síi ataa cuno se-nanaj adonj —taj Jesucristó rihaan nij síi naqui'yaj cuu se-tucujanj Moisés do', rihaan nij síi fariseo do' a.

**Nana nihánj taj xna'anj se vaa ase vaa nii Jesucristó do', ase vaa tinúú Jesucristó do', ase vaa ra'vij Jesucristó do', vaa nij síi uno rihaan Diose a**

<sup>46</sup> Ataa quisij ca'mii Jesucristó rihaan nij yuvii, ne cuchí' nii Jesucristó do', tinúú Jesucristó do', rihaan ve' a. Nanó rá nij so' daj qui'yaj nij so' ca'mii nij so' ga Jesucristó a.<sup>47</sup> Ne cataj yo'o so' rihaan Jesucristó a:

—Xe' ro', nicun' níi so' nicun' tinúú so' nicun', ne me ndo'o rá nij so' ca'mii nij so' ga so' á —taj so' rihaan Jesucristó a.

<sup>48</sup> Ne cataj uún Jesucristó rihaan síi cataj xna'anj rihaan Jesucristó a:

—Me chana me níí 'unj rihaan 'unj, rá so' ga. Me síí me tinúú 'unj rihaan 'unj, rá so' ga —taj Jesucristó rihaan so' a.

<sup>49</sup>Ne ticun' so' ra'a so' rihaan nij síí tucuyón se-nana so', ne cataj so':

—Ní'yaj so' ei. Ase vaa níí 'unj do', ase vaa tinúú 'unj do', vaa nij síí nihánj adonj. <sup>50</sup>O se yuvii uno rihaan Réé 'unj síí nicun' xtá' ro', ase vaa tinúú 'unj do', ase vaa ra'vij 'unj do', ase vaa níí 'unj do', vaa nij so' rihanj adonj —taj Jesucristó a.

**Nihánj me cuentó nanó Jesucristó che'é 'núú trigó tix'nuu yo'o so' a**

**13** Dan me se guun naá doj, ne curihanj Jesucristó rá ve', ne cane so' tu'va na lacuaná, <sup>2</sup>ne ca'na' ndo'o yuvii rihaan so', ne che'é dan cavii so' rque 'o rihoo chéé rihaan na, ne ca'anj cané so' rque rihoo yo', ne canicun' nij yuvii tu'va na lacuaná yo' a. <sup>3</sup>Ne nanó ndo'o Jesucristó cuentó rihaan nij yuvii, cataj so':

—Dan me se curihanj 'o síí me rá cuchruj naa 'núú trigó, ne tix'nuu so' 'núú trigó yo' rihaan yo'óó, <sup>4</sup>ne cayuu doj 'núú trigó yo' rá chrej chéé yuvii, ne ca'na' xtâj chá xtâj man 'núú trigó naj rá chrej yo', ne dan me se navij nu' 'núú trigó yo', qui'yaj nij xtâj nanj adonj. <sup>5</sup>Ne yo'ó ta'aj 'núú trigó yo' ro', cayuu rihaan yuvej rej taj catun' yo'óó a. Che'é dan cuaj xra' stanj le'ej a. <sup>6</sup>Veé dan, ne quisíj güii, ne cuchrii naa le'ej, qui'yaj naán, che'é se ne ca'vee ca'anj nij yáá naa le'ej yo' a man adonj. <sup>7</sup>Ne yo'ó ta'aj 'núú trigó yo' ro', cayuu sca'núj coj tanj, ne dan me se yoo doj cachij coj tanj

yo' rihaan naa le'ej, ne quinavij nu' naa le'ej, qui'yaj coj tanj yo' nanj adonj. <sup>8</sup>Ne yo'ó ta'aj 'núú trigó yo' ro', cayuu rihaan yo'óó sa', ne naa yo' ro', cachij sa' a. Dan me se rihaan ta'aj yo'óó sa' yo' cientó ya 'núú cavii, qui'yaj 'o 'o 'núú le'ej nii quiniy rihaan yo'óó sa' yo', ne rihaan yo'ó ta'aj yo'óó sa' yo' va'núj chihaa ya 'núú cavii, qui'yaj 'o 'o 'núú le'ej nii quiniy rihaan yo'óó sa' yo', ne rihaan yo'ó ta'aj yo'óó sa' yo' icó chí' ya 'núú trigó cavii, qui'yaj 'o 'o 'núú le'ej nii quiniy rihaan yo'óó sa' yo' nanj adonj.

<sup>9</sup>Sese taj yu'uj xrée soj, ne cuno soj nana nihánj ei. —Veé dan quisíj cuentó yo' cuentó nanó Jesucristó a.

**Nana nihánj taj xna'anj me che'é nanó ndo'o Jesucristó cuentó che'é nij rasuun rihaan nij yuvii a**

<sup>10</sup>Gaa ne quinichrun' nij síí tucuyón se-nana Jesucristó rihaan so', ne xná'anj nij so' man Jesucristó a:

—Me che'é nanó so' cuentó che'é nij rasuun rihaan nij yuvii ga —taj nij so', xná'anj nij so' man Jesucristó a.

<sup>11</sup>Gaa ne cataj Jesucristó rihaan nij so' a:

—Xa' soj, tzaj ne tihaan Diose nana rihaan soj daj qui'yaj Diose asa' guun chij Diose rihaan chumii nihánj adonj. Dan me se nana ne ne'en cunudanj yuvii me nana tihaan Diose rihaan soj adonj. Ne ne racuíj Diose man yo'ó ta'aj nij yuvii quene'en nij yuvii daj qui'yaj Diose asa' guun chij Diose rihaan chumii nihánj ma'. <sup>12</sup>O se síí aj nari' nana ro', doj a nari' uún so',

ne uxrá quene'en ndo'o so', qui'yaj Diose nanj adonj. Ne sí na'vej rá nari' sa' nana ro', tananj ca'nee Diose doj nij nana nari' so' man so', ne quinaj uun so' nanj adonj. <sup>13</sup>Che'é dan nanoj cuentó che'é nij rasuun rihaan nij yuvii yo', che'é se ni'yaj nij so' do', nanó xrej nij so' do', tzaj ne ne ne'en nij so' do', ne acaj nij so' cuentá do', ma'. <sup>14</sup>Ne ase vaa nana nihánj nana nata' sí cu'naj Isaías che'é Diose gaa naá ro', veé danj vaa nij yuvii ne veé danj 'yaj nij yuvii cuano ei: “Catuu uxrá nana xréé soj, tzaj ne se xcaj soj cuentá ma'. Ne ni'yaj uxrá soj, tzaj ne se quene'en soj ma'. <sup>15</sup>Q se caráán ma'an nij yuvii nihánj rihaan nij so', che'é rej na'vej rá nij so' quene'en ma'an nij so', ne caráán nij so' xréé nij so', che'é rej na'vej rá nij so' cunó nij so' uún a. Ne ne atúj nana nimán nij so', 'yaj nij so', che'é yan na'vej rá nij so' xcaj nij so' cuentá ne canicaj nimán nij so' a ma'. 'Q se na'vej uxrá rá nij so' quinahuun sa' nimán nij so' qui'yáa 'unj a man adonj”. Yo' me se-nana Diose nana nata' sí cu'naj Isaías che'é ma'an Diose gaa naá a. <sup>16</sup>”Tzaj ne vaa che'é gaa niha' rá soj che'é rihaan soj do', che'é xréé soj do' ei. 'Q se aj quene'en soj se vaa qui'yáj, ne aj cunó soj nana ca'mij á. <sup>17</sup>Ya ya cataj xna'anj 'unj rihaan soj se vaa man ndo'o sí man gaa naá sí nata' se-nana Diose do', sí sa' do', guun rá quene'en se vaa quene'en nij soj, tzaj ne ne quene'en nij so' ma'. Ne guun rá nij so' cunó nij so' se vaa uno soj, tzaj ne ne cunó nij so' man adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj me taj cuentó che'é 'núú trigó yo' a**

<sup>18</sup>Gaa ne cataj uún Jesucristó:  
—Che'é dan cunó ma'an soj, cataj xna'anj 'unj rihaan soj me taj cuentó che'é 'núú trigó tix'nuu sí cuchruj naa yo' á. <sup>19</sup>Cunudanj yuvii uno nana che'é daj qui'yaj Diose asa' guun chij Diose rihaan chumii ro', sese ne acaj sa' nij so' cuentá, ne 'na' sí chree, ne a'néj sí chree nana yo' nimán yuvii yo' a. Dan me se ase vaa 'núú trigó cayuu rá chrej chéé yuvii vaa yuvii yo' a. <sup>20</sup>Ne 'núú trigó cayuu rihaan yo'óó taj rihaan yujej ro', ase vaa sí uno se-nana Diose vaa yo', ne cuaj uun niha' rá so' canoco' so' nana yo', <sup>21</sup>tzaj ne ataa xcaj sa' so' cuentá, ne gaa uun che'e yuvii 'yaj yuvii sayuun man so' che'é nana nocó' so', ne cuaj nu' uun na'aj so', ne tanáj so' nana yo' cuaj nanj adonj. <sup>22</sup>Ne 'núú trigó cayuu sca'núj coj tanj ro', ase vaa sí uno se-nana Diose vaa yo', tzaj ne nanó ndo'o rá so' che'é rasuun man rihaan chumii nihánj, ne me ndo'o rá so' qui'yaj canaán so' sa'anj, ne che'é dan tiha' yu'unj so' man ma'an so' che'é sa'anj a. Che'é dan me taj se 'yá' canoco' sa' so' nana nari' so', ne ne nuu sa' nimán so' rihaan Diose ma'. <sup>23</sup>Ne 'núú trigó cayuu rihaan yo'óó sa' ro', ase vaa sí uno se-nana Diose vaa yo', ne xcaj sa' so' cuentá, ne nuu sa' nimán so' rihaan Diose a. Ne sa' uxrá 'yaj ta'aj nij so', ne sa' doj 'yaj yo'ó ta'aj nij so', ne sa' doj tzin' 'yaj yo'ó ta'aj nij so' nanj adonj. —Veé danj quisíj nana ca'mii Jesucristó che'é cuentó yo' a.



**Nihánj me cuentó nanó Jesucristó  
che'é coj cachij sca'núj 'núú trigó a**

<sup>24</sup>Ne nanó so' yo'ó cuentó nii rihaan nij so', cataj so':  
—Ase vaa qui'yaj 'o sí tix'nuu 'núú trigó sa' to'óo so' ro', danj gaa qui'yaj Diose asa' guun chij Diose rihaan chumii nihánj adonj. <sup>25</sup>Dan me se quisij tix'nuu so' 'núú trigó yo', ne rej nii orá otoj yuvii catúj 'o sí taj ri'yunj man so' to'óo so', ne tix'nuu sí chi'ii yo' caân coj chi'ii rihaan yo'óo naj 'núú trigó yo', ne veé dan me se ca'anj uún so', <sup>26</sup>ne dan me se xra' 'núú trigó xra' coj xra', gaa ne quichihón caa raá 'núú trigó do', raá coj do', ne xcaj nij se-mozó sí to'oj yo' cuentá se vaa nuveé 'nuj trigó me nu' naá a. Maan se man uxrá coj rque naá yo' nanj adonj. <sup>27</sup>Che'é dan cuchii' nij se-mozó sí to'oj yo' rihaan sí to'oj, ne cataj xna'anj nij so' rihaan so', cataj nij so': “Ya inanj 'núú trigó sa' tix'nuu so' na'. Me rej cavii coj chi'ii nihánj ga, señor”, taj nij mozó rihaan sí to'oj yo' a. <sup>28</sup>Gaa ne cataj so' rihaan nij se-mozó so' a: “Sí taj ri'yunj manj me sí tix'nuu caân coj chi'ii rihaan to'ój ei”, taj so' rihaan nij se-mozó so' a. “Ne me rá so' quirihaa núj coj ne naqui'yaj chre' núj coj na'”, taj nij mozó rihaan ru'vee yo' a. <sup>29</sup>“Taj che'é qui'yaj soj danj ma'. Sese quirihaa soj man coj yo', gaa ne quirihaa uún soj man ta'aj 'núú trigó yo' gaa nanj adonj. <sup>30</sup>Maan se ca'ne' rá soj cachij rcua'aan coj yo' ga 'núú trigó yo', gaa ne yavii quirii ní' naá trigó, gaa ne cataj xna'anj 'unj rihaan nij sí quirii naá se vaa asino naqui'yaj

chre' nij so' coj yo', gaa ne numij nij so' coj yo', gaa ne cacaa coj yo' adonj. Gaa ne naqui'yaj chre' nij so' 'núú trigó sa', gaa ne caraa sa' nij so' man yo' rá cuchruu adonj”, cataj sí to'oj rihaan se-mozó so' a — cataj Jesucristó rihaan nij yuvii a.

**Nihánj me cuentó nanó Jesucristó  
che'é caân cuêj mostazá xlá a**

<sup>31</sup>Ne nihánj me yo'ó cuentó nanó Jesucristó rihaan nij yuvii a:  
—Ase vaa achij caân cuêj mostazá xlá ro', danj gaa guun chij Diose rihaan chumii nihánj adonj. Dan me se nicaj yo' o so' man caân cuêj mostazá xlá, ne axrij so' caân yo' rihaan to'óo so' a. <sup>32</sup>Dan me se le'ej doj vaa caân cuêj mostazá xlá rihaan cunudanj nij caân, tzaj ne asa' cachij yo', ne xij doj vaa yo' rihaan nu' coj man tacaan, ne ase vaa chruun vaa yo' a. Dan me se ayuu nij xtâj vaj rej xta' raá cuêj yo', ne 'yaj nij xo' se-sca' nij xo' raá cuêj yo' adonj. —Danj ca'mii Jesucristó rihaan nij so' a.

**Nihánj me cuentó nanó Jesucristó  
che'é levadura se 'yaj naraa  
nana rque rachrúun a**

<sup>33</sup>Ne nihánj me yo'ó cuentó nanó Jesucristó rihaan nij yuvii a:  
—Dan me se naqui'yaj ní' 'o chana caxrij yo'óo levadura rque cunj hariná gaa 'yaj no' rachrúun a. Dan me se ase vaa 'o chana, ne cuxra' ta'aj no' 'o va'nuj ya aga' yo'óo hariná, ne caxrij ndo'o no' yo'óo levadura, ne caxrij yuve no' man yo' ndaa navij naraa ndo'o nana rque yo' a. Ase vaa uun chij yo'óo levadura rihaan cunj hariná

ro', danj gaa guun chij Diose rihaan chumiï nihánj adonj. —Danj ca'mii Jesucristó rihaan nij so' a.

**Nana nihánj taj xna'anj  
se vaa inanj cuentó nanó  
Jesucristó rihaan nij yuviï a**

<sup>34</sup>Inanj cuentó che'é nij rasuun nanó Jesucristó rihaan nij yuviï, gaa ne a'vee nata' so' rihaan nij yuviï a. <sup>35</sup>Danj qui'yaj so', che'é yan me rá so' qui'yaj so' nu' se vaa cataj 'o sí nata' se-nana Diose gaa naá, cataj so': “Inanj cuentó che'é nij rasuun nano 'unj rihaan yuviï, ne dan me se cataj xna'anj 'unj rihaan nij so' che'é se vaa qui'yaj Diose asij qui'yaj Diose man nu' chumiï nihánj adonj”. Danj ca'mii sí nata' se-nana Diose gaa naá a.

**Nana nihánj taj xna'anj me  
taj cuentó che'é coj cachij  
sca'núj 'núú trigó yo' a**

<sup>36</sup>Gaa ne na'néé Jesucristó chrej man nij yuviï, ne catúj so' rá ve', gaa ne cuchí' nij sí tucu'yón se-nana so' rihaan so' a. Ne xná'anj nij so' man so', cataj nij so':

—Cataj xna'anj so' rihaan núj me taj cuentó che'é coj cachij sca'núj 'núú trigó yo' á —taj nij so' rihaan Jesucristó a.

<sup>37</sup>Gaa ne cataj xna'anj Jesucristó rihaan nij so', cataj so':

—Sí tix'nuu 'núú trigó sa' rihaan yo'ó ro', ase vaa 'unj sij ca'néé Diose nıcaj yu'unj man yuviï vaa so', <sup>38</sup>ne ase vaa chumiï nihánj vaa yo'ó ro', ne 'núú trigó sa' ro', ase vaa nij sí cayáan ga Diose asa' guun chij Diose rihaan chumiï vaa yo', ne ase vaa coj chí'ii yo' ro', vaa

nij sí noco' man sí chree, <sup>39</sup>ne ase vaa sí tix'nuu caän coj chí'ii rihaan yo'ó ro', vaa ma'an sí chree yo', ne ase vaa güi ca'ne' Diose cacun' che'é yuviï man rihaan chumiï nihánj ro', danj vaa güi quirii nii naa yo', ne ase vaa nij se-mozó Diose vaa nij sí quirii naa yo' á. <sup>40</sup>Dan me se ase vaa naquiyaj chre' nii man coj yo' ne cacaa yo' rihaan ya'an ro', danj gaa quiran' nij sí noco' man sí chree güi ca'ne' Diose cacun' che'é yuviï man rihaan chumiï nihánj adonj. <sup>41</sup>Dan me se sí ca'néé Diose nıcaj yu'unj man yuviï mej, ne güi dan ca'nej 'unj man nij se-mozó 'unj, ne nariï nij so' man nij sí chí'ii 'nij sca'núj nij yuviï guun chij 'unj rihaan a. Dan me se nu' sí tumé cacun' do', nu' sí na'vej rá cunó rihaan Diose do', quirii nij se-mozó 'unj man nij so' rihaan chumiï nihánj, <sup>42</sup>ne ca'nej nij so' man nij sí chí'ii rque chrúun acaa ndo'o nanj adonj. Ne yuviï cumän rej yo' me se ta'vee ndo'o nij so', ne ndaa cha ruj ma'an nij so' cúu yan' nij so' nanj adonj. <sup>43</sup>Gaa ne cuchuguun nij sí sa' yo' adonj. Dan me se ase vaa chuguun güi ro', danj gaa cuchuguun nij so', ne guun chij Rej nij so' sí nicun' xta' rihaan nij so' ei.

”Dan me se sese taj yu'uj xrée soj, ne cunó soj nana nihánj ei.

**Nihánj me cuentó nanó Jesucristó  
che'é chrúun sa'anj nari' yo'o so' a**

<sup>44</sup>”Ase vaa 'o chrúun sa'anj 'nij yuve rque yo'ó vaa rej rihaan soj se vaa cayáan soj ga Diose asa' guun chij Diose rihaan chumiï nihánj adonj. Dan me se nari' 'o

snó'o man chrúun sa'anj yo', gaa ne naráan uún so' yo'óo xráá yo', ne guun niha' uxrá rá so' che'é chrúun sa'anj nari' so', ne ca'anj so' cutu'vej so' nu' si'yaj so', ne nicaj so' sa'anj, ca'anj so', quiránj so' nu' yo'óo 'nij chrúun sa'anj yo' nanj adonj.

**Nihánj me cuentó nanó Jesucristó che'é chruj perlá tu'vee ndo'o a**

<sup>45</sup>”Ne ase vaa sí tiendá ne nano' chruj perlá tu'vee ndo'o quiraan ro', danj vaa sí cayáan ga Diose asa' guun chij Diose rihaan chumiij nihánj adonj. <sup>46</sup>Dan me se nari' sí ne tiendá yo' 'o chruj perlá sa' uxrá doj rihaan yo'óo perlá, gaa ne ca'anj so' cutu'vej so' cunudanj si'yaj so', ne nicaj so' sa'anj, quiránj so' man chruj perlá sa' doj yo' nanj adonj.

**Nana nihánj me cuentó nanó Jesucristó che'é xcuaj atúj rque nanj tiguúj nii rá na a**

<sup>47</sup>”Ne ase vaa quiran' xcuaj catúj rque nanj tiguúj nii rá na ro', danj gaa quiraan' yuviij asa' guun chij Diose rihaan chumiij nihánj ei. Dan me se tiguúj yuviij man nanj yo' rque na, ne dan me se me ma'an xcuaj catúj rque nanj yo' a. <sup>48</sup>Ndaa síj gaa caraa nanj yo', gaa ne cuxuun nij yuviij man nanj yo' ndaa tu'va na yo', gaa ne ca'anj cayáan nij so' rihaan yo'óo, gaa ne narii nij so' man xcuaj sa', ne narii nij so' man xcuaj nij uún a. Gaa ne xcuaj sa' yo' me se caraa nij so' man xcuaj sa' yo' rá scaa a. Tzaj ne xcuaj nij me se quiri'ij uun nij so' man yo' nanj ei. <sup>49</sup>Ne ase vaa quiran' nij xcuaj yo' ro', danj quiraan' yuviij asa'

ca'ne' Diose cacun' che'é yuviij, ne cavii nij se-mozó Diose ne cuxra' ta'aj nij so' man nij sí chi'ii ga nij sí vaa sa', <sup>50</sup>ne quiri'ij nij so' man nij sí chi'ii yo' rque chrúun ya'aan ndo'o, gaa ne dan me se ta'vee uxrá nij so', ne ndaa cha ruj ma'an nij so' cúu yan' nij so' nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj che'é sí ne'en cunudanj se-nana Diose a**

<sup>51</sup>Ne xná'anj Jesucristó man nij sí tucu'yón se-nana so', cataj so':

—Cuno soj nu' cuentó nanó 'unj cuano na' —taj Jesucristó, xná'anj so' man nij sí tucu'yón se-nana so' a.

—Cuno núj nu' cuentó yo' á —taj nij so' a.

<sup>52</sup>Ne cataj Jesucristó rihaan nij so' a:

—Che'é dan cataj xna'anj 'unj rihaan soj se vaa nij sí naqui'yaj cuu se-tucuanj Moisés me se sese nari' uún nij so' nana che'é güii guun chij Diose rihaan chumiij nihánj, ne sí ne'en nu' nana me nij so', ne sí cuu raá guun nij so', qui'yaj nu' nana nari' nij so' adonj. Dan me se ase vaa sí ru'vee ne man rasuun nga do', rasuun naca do', rihaan ro', danj gaa nij so', ne cavii sa' uxrá nij so' nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa ne ca'vej rá nij sí man chiháan Jesucristó chuman' cu'naj Nazaret cunó nij so' nana ca'mii Jesucristó ma'**

<sup>53</sup>Dan me se quisij nanó Jesucristó nu' cuentó nihánj rihaan

yuvii, ne curihanj so' rej yo', ne ca'anj so' a. <sup>54</sup>Gaa ne nucui' so' rej chiháán so', ne ca'anj so' ve' tucuyón nij sí man chiháán so' se-tucuanj Moisés, ne tucuyón so' man nij sí man rá ve' yo' a. Dan me se caráya'anj nij so', ne cataj nij so':

—Me rej nari' sí nihánj nana cuu avii raq sí nihánj ga. Me rej nari' so' suun sa' 'yaj suun so' ga. <sup>55</sup>Nuveé ta'nij sí acó j chruun sí ne chiháán ní' me so' na'. Ne nii so' me chana cu'naj Mariá á. Ne tinúú so' me sí cu'naj Jacobo do', sí cu'naj José do', sí cu'naj Simón do', sí cu'naj Judas do' á. <sup>56</sup>Ne nij ra'vij so' me chana ne chiháán ní' á. Tzaj ne ne ne'enj me rej me nari' so' suun nihánj qui'yaj suun so' ma' —taj nij sí man chiháán Jesucristó rihaan tuvi' nij so' a.

<sup>57</sup>Ne guun nacoo rá nij so' ni'yaj nij so' man Jesucristó a. Ne cataj Jesucristó rihaan nij so' a:

—Me rej ma'an vaj 'o sí nata' se-nana Diose, ne aráj cochroj nij yuvii rihaan so', tzaj ne nij yuvii man chiháán so' do', nij tuvi' so' sí yanj tucua so' do', na'vej rá caraa cochroj rihaan so' ma' —taj Jesucristó rihaan nij sí man chiháán so' chuman' cu'naj Nazaret yo' a.

<sup>58</sup>Ne doj vaa suun sa' qui'yaj suun Jesucristó chiháán so', che'é se ne cuchuman rá nij sí man chiháán so' ni'yaj nij so' man so' a.

**Nana nihánj taj xna'anj se vaa cavi' Juan sí cuta' ne man yuvii, qui'yaj sí nicaj suun cu'naj Herodes a**

**14** Dan me se cachén doj güii, gaa ne cuchi' nana rihaan

sí nicaj suun cu'naj Herodes che'é nu' se vaa qui'yaj Jesucristó a. <sup>2</sup>Gaa ne cataj so' rihaan nij se-mozó so' a:

—Sí cu'naj Jesucristó ro', ya sí cu'naj Juan sí cuta' ne man yuvii me so' á. Dan me se cunuu i'na' ya uún sí cu'naj Juan, raj á. Ése sí cu'naj Juan me sí guun nucuj qui'yaj nij suun sa' nocoo yo' nanj adonj —taj Herodes rihaan nij se-mozó so' a.

<sup>3</sup>Danj ca'mii sí cu'naj Herodes, che'é se gaa rque doj, ne so' me sí qui'yaj quita'aa nij tanuu man sí cu'naj Juan, ne numíj nij tanuu man sí cu'naj Juan, ne caxríj sí cu'naj Herodes taga' man sí cu'naj Juan gaa rque doj a. Danj qui'yaj so' che'é chana cu'naj Herodías nica tinúú Herodes sí cu'naj Felipé a. <sup>4</sup>Dan me se xcax sí cu'naj Herodes man no', ne cataj xna'anj sí cu'naj Juan rihaan so' se vaa ne nó xcúún so' xcax so' man chocó so' ma'. <sup>5</sup>Che'é se cataj sí cu'naj Juan rihaan so', gaa ne guun ndo'o rá sí cu'naj Herodes cavi' sí cu'naj Juan yo' a. Tzaj ne cuchu'vi' so' se vaa ca'maan rá nij yuvii a. 'O se sí nata' se-nana Diose me sí cu'naj Juan, rá nij yuvii a.

<sup>6</sup>Dan me se quisíj güii canuú se-cha'anj ma'an sí cu'naj Herodes, gaa ne quira'ánj ndo'o ta'níi chana cu'naj Herodías ni'yaj cunudanj nij sí ca'na' a. Ne guun niha' rá sí cu'naj Herodes quene'en so' man chana yaan quira'ánj, <sup>7</sup>gaa ne che'é dan cata' tu'va so' se vaa ya uxrá rque so' rihaan no' me ma'an rasuun cachinj no' rihaan so' a.

<sup>8</sup>Dan me se cataj xna'anj chana cu'naj Herodías rihaan ta'níi no' daj

ca'mii no' rihaan síi cu'naj Herodes, gaa ne canicun' chana yaan yo' rihaan síi cu'naj Herodes, qui'yaj nii no' chana cu'naj Herodías a. Ne cataj chana yaan yo':

—Ca'nej so' cúu yave síi cu'naj Juan rque aga' rco'oo, ne rque so' manj nihánj á —taj chana yaan yo' rihaan síi cu'naj Herodes, qui'yaj nii no' chana cu'naj Herodías a.

<sup>9</sup>Gaa ne quinanó ndo'o rá síi cu'naj Herodes yo' gaa cuno so' nana yo' a. Quinanó rá so' se vaa cuno cunudanj nij síi ca'na' nana ca'mii so' se vaa rque so' me ma'an rasuun rihaan chana yaan yo' a. Tzaj ne cataj xna'anj so' se vaa nicaj ya chana yaan se vaa cachíin no' rihaan so' nanj á. <sup>10</sup>Ne ca'ne' so' suun rihaan tanuu ca'anj tanuu taga' ca'ne' tanuu cúu yave síi cu'naj Juan yo' a. Ne danj qui'yaj nij tanuu a. <sup>11</sup>Ne ca'neé nij tanuu cúu yave Juan rque aga' rco'oo, ne ca'anj nicaj nij tanuu cúu yave Juan rihaan chana yaan yo', ne caxrj nij so' man yo' ston chana yaan yo' a. Ne ca'anj nicaj chana yaan yo' man cúu yave Juan rihaan nii no' a.

<sup>12</sup>Gaa ne cuchi' nij síi tucuyón se-nana Juan taga', ne ca'anj nacaj nij so' cúu man síi cu'naj Juan, ne cachin' nij so' man so' rque yo'óo a. Gaa ne ca'anj nij so', cataj xna'anj nij so' rihaan Jesucristó se vaa cavi' síi cu'naj Juan yo' a.

**Nana nihánj taj xna'anj se  
vaa ca'vee quirii Jesucristó  
se chá 'un' mij snó'o a**

<sup>13</sup>Dan me se cuno Jesucristó daj cataj síi cu'naj Herodes che'é so', ne che'é dan curihanj Jesucristó rej yo',

ne dan me se cavi' so' rque rihoo chéé rihaan na, ne ca'anj so' rej quij rej taj vaj yuvií mán a. Ne cuno nij yuvií nana se vaa ca'anj so' rej quij yo' a. Che'é dan curihanj nij yuvií chiháán nij yuvií, ne cachéé tacoj nij yuvií tu'va na lacuaná, ne ca'anj nij yuvií rej ca'anj Jesucristó a.

<sup>14</sup>Ne nanij Jesucristó rá rihoo, ne quene'en so' se vaa aj mán uxrá yuvií, ne cunuu 'ee rá so' man nij yuvií, ne nahuun sa' taran' nij síi ran' ca'na', qui'yaj so' nanj adonj.

<sup>15</sup>Dan me se cachén ndo'o orá, ne nanij güüi, ne cuchi' nij síi tucuyón se-nana Jesucristó rihaan so', ne cataj nij so':

—Rco' quij uun me nihánj, ne taj se chá chá nij yuvií nihánj, ne cachén ndo'o orá nanj á. Qui'yáá so' se ndo'o, ne na'nej so' chrej man nij yuvií, ca'anj nij yuvií chuman' quiraan nij yuvií se chá nij yuvií á —taj nij so' rihaan Jesucristó a.

<sup>16</sup>—Taj che'é ca'anj nij yuvií ma'. Maan se go' ma'an soj se chá chá nij yuvií á —taj Jesucristó rihaan nij so' a.

<sup>17</sup>—Tzaj ne taj se chá rihaan núj nihánj ma'. Maan orún' 'un' rachrúun do', vij guee xcuaj do', vaa rihaan núj nanj á —taj nij so' rihaan Jesucristó a.

<sup>18</sup>—Rque soj man yo' rihanj nihánj á —taj Jesucristó rihaan nij so' a.

<sup>19</sup>Gaa ne ca'ne' Jesucristó suun rihaan nij yuvií ca'anj cayáan nij yuvií rihaan coj chrin', gaa ne coró' so' 'un' nij rachrúun ne vij roj xcuaj, ne ni'yaj so' rej xta', ne nago' so' graciá rihaan Diose, gaa ne cuxra' ta'aj so' man rachrúun yo', ne caxrj

so' ston nij sí tucu'yón se-nana so',  
 ne caxrjij nij so' ston nij yuvij a.  
<sup>20</sup>Gaa ne chá taran' nij yuvij, ne  
 caraa rque cunudanj nij so', ne  
 ndaa quináj ndo'o se chá, qui'yaj  
 nij yuvij a. Gaa ne naquiyaj chre'  
 nii man se quináj tu'va nij yuvij,  
 ne caraa yo'ó chuvij ya scaa a. <sup>21</sup>Ne  
 nij snó'o rque Jesucristó chraa me  
 se 'un' mój snó'o me nij so', ne ne  
 qui'yaj contá nii man chaná man  
 xnii man chá se chá yo' ma'.

**Nana nihánj taj xna'anj se vaa  
 cachéé Jesucristó rihaan na a**

<sup>22</sup>Gaa ne ra'yanj ca'ne' Jesucristó  
 suun rihaan nij sí tucu'yón se-nana  
 so' se vaa cavij nij so' rihoo chéé  
 rihaan na ca'anj nij so' rej xco na  
 lacuaná yo', quitaj yaan nij so'  
 rihaan Jesucristó, ne dan me se  
 ma'an Jesucristó na'nej chrej man  
 nij yuvij, taj Jesucristó rihaan nij  
 sí tucu'yón se-nana so' a. <sup>23</sup>Dan me  
 se ca'anj nij so', ne cataj Jesucristó  
 rihaan nij yuvij se vaa ca'vee ca'anj  
 nij yuvij a. Gaa ne cavij orún' so'  
 raá quij, ne cachíin ni'yaj so' rihaan  
 Diose a. Ne daj doj cata' güii raá  
 quij, ne so' me se quináj so' raá quij  
 yo' a.

<sup>24</sup>Dan me se gan' uxrá vaj  
 rihoo nuu nij sí tucu'yón se-nana  
 Jesucristó rihaan na, ne güéj ndo'o  
 rihoo yo' rihaan na, qui'yaj nana,  
 che'é se go' nana rej rihaaan rihoo  
 yo' a. <sup>25</sup>Dan me se yan' si'nu' ca'anj  
 Jesucristó rej vaj nij so', chéé  
 tacoj uun so' rihaan na yo', vaj so'  
 nanj adonj. <sup>26</sup>Ne quene'en nij sí  
 tucu'yón se-nana so' man so' se vaa  
 chéé uun so' rihaan na, ne cuchu'vi'  
 ndo'o nimán nij so' a.

—Ta'naj me yo' ei —taj nij so'  
 rihaan tuvi' nij so', ne caguáj nij so',  
 che'é se cuchu'vi' nij so' a.

<sup>27</sup>Veé dan, ne nu' cataj Jesucristó  
 rihaan nij so' a:

—Nacui'yaj nucuaj soj nimán  
 soj ei. 'Unj 'na' ei. Se cuchu'vi' soj  
 ma' —taj so' rihaan nij so' a.

<sup>28</sup>Gaa ne cataj Pedró rihaan so' a:  
 —Sese ya ya veé so' 'na', ne  
 qui'yáá so' se ndo'o, ne ca'vee cachee  
 'unj rihaan na qui'yáá so', Señor —  
 taj Pedró rihaan Jesucristó a.

<sup>29</sup>—Ca'vee ca'na' so' á —taj  
 Jesucristó rihaan Pedró a.

Ne nanij Pedró rá rihoo, ne cachéé  
 so' rihaan na, ne ca'anj so' rihaan  
 Jesucristó a. <sup>30</sup>Tzaj ne ni'yaj so' na se  
 vaa cavij ndo'o nana yo', ne cuchu'vi'  
 so', ne guun che'é so' ca'anj nij so'  
 rque na yo' a. Che'é dan caguáj so'  
 rihaan Jesucristó, cataj so':

—Tinanii so' manj rihaan na,  
 Señor —taj so' a.

<sup>31</sup>Veé dan, ne nu' quita'aa Jesucristó  
 ra'a Pedró, ne quirii Jesucristó man so'  
 rque na, ne cataj Jesucristó:

—Doj amán rá so' ni'yaj so' manj á.  
 Me che'é guun vij nimán so' ga —  
 taj Jesucristó rihaan so' a.

<sup>32</sup>Gaa ne catúj roj so' rque rihoo  
 chéé rihaan na, gaa ne canicun'  
 nana yo' a. <sup>33</sup>Gaa ne canicun' ruj  
 nij sí man rque rihoo rihaan  
 Jesucristó, ne cataj nij so':

—Ya ta'nij Diose mé so' á —taj nij  
 so' a.

**Nana nihánj taj xna'anj se vaa nari'  
 nucuaj nij sí ran' man rej cu'naj  
 Genesaret, qui'yaj Jesucristó a**

<sup>34</sup>Gaa ne cuchu'vi' nij so' tu'va na  
 lacuaná, ne ca'anj nij so' rej cu'naj

Genesaret a. <sup>35</sup>Ne nuu yaan nij síi man rej yo' man Jesucristó, ne ca'née nij so' nana rihaan cunudanj nij síi yanj nu' anicaj se vaa ca'na' Jesucristó a. Ne nicaj nii man cunudanj nij síi ran' yanj rej yo' ca'na' nii rihaan Jesucristó a. <sup>36</sup>Ne cachíin ni'yaj uxrá nij yuvii rihaan Jesucristó se vaa ca'vej Jesucristó cano ra'a nij so' doj tu'va sagan' so' a. Ne nu' nij síi cano ra'a doj tu'va sagan' so' ro', nahuun sa' cunudanj nij so' cuaj nanj adonj.

Nana nihánj taj xna'anj me che'é ne na'ya' nij síi tucu'yón se-nana Jesucristó gaa chá nij so' chraa a

**15** Gaa ne quinichrun' síi fariseo do', quinichrun' síi naqui'yaj cuu se-tucuanj Moisés do', rihaan Jesucristó, ne síi cavii chuman' Jerusalén me nij so' a. Ne xna'anj nij so' man Jesucristó, cataj nij so':

<sup>2</sup>—Nij síi tucu'yón se-nana so' ro', me che'é ne uno nij so' nana cataj xna'anj nij síi man gaa naá ga. 'O se ne na'ya' nij so' gaa chá nij so' chraa ma' —taj nij so' rihaan Jesucristó a.

<sup>3</sup>Gaa ne cataj Jesucristó rihaan nij so' a:

—Danj nanj ma'an soj, ne me che'é ne uno ma'an soj se-nana Diose 'yaj ma'an tucuaán noco' soj ga. <sup>4</sup>'O se ca'ne' Diose suun se vaa: “Caraa cochróo so' rihaan rée so' do', rihaan níi so' do' á”. Ne: “Síi a'mii chree rihaan rej do', rihaan nii do', me se vaj so' ne nu' che'e cavi' so' á”. Danj vaa nana cataj xna'anj Diose rihaan níi á. <sup>5</sup>Tzaj ne taj soj se vaa sese cataj yo' o so' rihaan rej

so' do', rihaan nii so' do', se vaa aj rqué so' nu' si'yaj so' rihaan Diose ne che'é dan se ca'vee racúij so' man rej so' do', man nii so' do', <sup>6</sup>ne daj chihaa míj ne nó xcúún so' racúij so' man rej so' do', man nii so' do', taj soj a. Dan me se danj inanj a'mii soj gaa tucu'yón soj se-nana nij síi man gaa naá, ne axrj yuve soj man se-nana Diose nanj adonj.

<sup>7</sup>—Dan me se síi tu'va rma'an me soj nanj á. Dan me se ca'mii natáj síi cu'naj Isaías se-nana Diose gaa naá, ne cataj xna'anj so' daj sij me soj a. Cataj so': <sup>8</sup>“Yuvii nihánj ro', ase vaa nana a'mii síi aráj cochroj rihanj vaa nana a'mii nij so', tzaj ne tu'va rma'an nij so' nanj á. Nimán nij so' me se ino vaa nanj adonj. 'O se ne noco' uxrá nimán nij so' manj ma'. <sup>9</sup>Na'vjj rma'an nij so' rihanj nanj á. 'O se nanj se-nana yuvii me nana tucu'yón nij so' nanj adonj”. Dan me se-nana Diose nana a'mii che'é soj á —taj Jesucristó rihaan nij síi fariseo do', rihaan nij síi naqui'yaj cuu se-tucuanj Moisés rihaan yuvii do' a.

<sup>10</sup>Gaa ne canacúún Jesucristó man nij yuvii ca'na' nij yuvii rihaan so' a. Gaa ne cataj so' rihaan nij yuvii:

—Cuno soj nana nihánj, ne xcax soj cuentá nedi'. <sup>11</sup>Nuveé se atúj tu'va yuvii me se 'yaj chi'ii man yuvii ma'. Se avii tu'va yuvii ro', 'yaj chi'ii man yuvii adonj —taj Jesucristó rihaan nij yuvii a.

<sup>12</sup>Gaa ne cuchi' nij síi tucu'yón se-nana Jesucristó rihaan Jesucristó, ne cataj nij so':

—Ne'én so' se vaa ca'maan rá nij síi fariseo che'é nana ca'mii

so' rihaan nij so' na' —taj nij so', xna'anj nij so' man Jesucristó a.

<sup>13</sup>Gaa ne cataj Jesucristó:

—Xa' nij so', tzaj ne ase vaa coj xra' ma'an vaa nij so' do', vaa nana tucuyón nij so' do' adonj. Nuveé sij tucuyón se-nana Diose me nij so' ma'. Che'é dan, ase vaa tiri' nii man coj xra' ma'an ro', danj gaa tiri' Diose man nij so' ga nana tucuyón ma'an nij so' nanj adonj. <sup>14</sup>Tanáj nij soj man nij so' á. Me rá nij so' cataj xna'anj nij so' rihaan yuvií daj qui'yaj yuvií á. Tzaj ne ase vaa síf aráan rihaan vaa nij so' adonj. Dan me se ne'en soj se vaa sese guun rá síf tuchrii racuj so' man yo'ó síf tuchrii nari' so' chrej ca'anj so', ne quinij roj síf tuchrii yo' rá yu'uj nanj ei —taj Jesucristó rihaan nij síf tucuyón se-nana so' a.

<sup>15</sup>Gaa ne cataj Pedró rihaan so' a:

—Cataj xna'anj so' rihaan núj me taj nana ca'mii so' che'é se atúj tu'va yuvií á —taj Pedró a.

<sup>16</sup>Gaa ne cataj Jesucristó:

—Vaa soj vaa, ne ataa xcaj ma'an soj do' cuentá a na'. <sup>17</sup>Ne ne'en soj se vaa nu' se atúj tu'va yuvií ro', achén yo' rque yuvií, ne urihanj yo' gaa re'é yuvií nanj á. <sup>18</sup>Tzaj ne se urihanj tu'va yuvií ro', yo' me nana avii nimán yuvií, ne nana yo' me 'yaj chi'ii ndo'o man yuvií adonj.

<sup>19</sup>Q se nihánj me se chi'ii avii nimán yuvií a: se chi'ii do', yan ticavi' man tuvi' do', yan cotoj ga nica tuvi' do', che'é yan qui'yaj ituu si'yaj tuvi' do', che'é yan ca'mii ne che'é tuvi' do', che'é yan nachri' ni'yaj man tuvi' do', me nu' se avii nimán yuvií, <sup>20</sup>ne nu' yo' me se vaa 'yaj chi'ii man yuvií nanj adonj.

Tzaj ne che'é nu' se chá yuvií me se ca'vee se ne na'ya' yuvií gaa chá yuvií chraa, tzaj ne se qui'yaj chi'ii yo' man yuvií ma' —taj Jesucristó rihaan nij síf tucuyón se-nana so' a.

**Nana nihánj taj xna'anj se vaa cuchumán rá 'o chana cananea se vaa racuj Jesucristó man no' a**

<sup>21</sup>Gaa ne curihanj Jesucristó rej yo', ne ca'anj so' rej naj chuman' cu'naj Tiro do', chuman' cu'naj Sidón do' a. <sup>22</sup>Gaa ne curihanj 'o chana cananea chana ne rej yo' a. Ne caguáj ndo'o no' rihaan Jesucristó, cataj no':

—Ne'enj se vaa tuvi' síf cu'naj David síf cane gaa naá mé so', Señor. Che'é dan cunu 'ee rá so' manj á. 'O se canó uxrá nana chree man ta'nij chala cunii nanj á —taj chana yo', caguáj no' rihaan Jesucristó a.

<sup>23</sup>Tzaj ne a 'ó nana ne ca'mii Jesucristó rihaan no' a. Gaa ne cuchi' nij síf tucuyón se-nana Jesucristó rihaan so', ne cachíin ni'yaj nij so' rihaan so', cataj nij so':

—Qui'yáá so' se ndo'o, ne cataj xna'anj so' rihaan chana yo' se vaa ca'anj chana yo' nanj ruguanj. 'O se noco' uxrá no' man ní', ne aguáj ndo'o no' nanj asanj —taj nij so' a.

<sup>24</sup>Gaa ne cataj so':

—Nanj chana yanij me no', ne inanj rihaan nij yuvií israelitá ca'née Diose manj nanj á. 'O se ase vaa daán Diose matzinj ro', vaa nij síf israelitá rihaan Diose, ne aj ca'anj ni'ya uxrá nij so', ne che'é yan nano' 'unj man síf ca'anj ni'ya 'naj nanj adonj —taj Jesucristó rihaan nij so' a.



<sup>25</sup>Gaa ne cuchi' chana yo' rihaan Jesucristó, ne canicun' ruj no' rihaan Jesucristó, ne:

—Racu'j so' manj, Señor —taj no' a.

<sup>26</sup>Gaa ne cataj so':

—Dan me se ne'én so' se vaa se ca'vee cata'aa ní' co'oo man rihaan nij xnii ne go' ní' cha nij chuvee ma'. Che'é dan ne nó xcúnj racu'j man soj sij yan'j a man adonj. Maan se inan'j ma'an nij yuvii israelitá me no xcúun 'un'j racu'j 'un'j nan'j adonj —taj Jesucristó rihaan chana yo' a.

<sup>27</sup>Gaa ne cataj no':

—Veé danj vaa guee, Señor. Ne nij chuvee ro', chá nij xo' tachruu ayuu tu'va se-xqui' nij xo' nan'j á. Ne ase vaa chuvee chá tachruu vaa 'un'j rihaan so' nan'j adonj. Che'é dan me ndo'o raj racu'j so' doj manj, raj nan'j adonj —taj chana yo' rihaan Jesucristó a.

<sup>28</sup>Gaa ne cataj Jesucristó:

—Cuchumán uxrá rá so' ni'yaj so' manj, nocoj. Che'é dan qui'yáj se vaa achíin so' rihan'j nan'j ei —taj Jesucristó rihaan no' a.

Ne veé maan orá dan nahuun sa' ta'níí chana yo' a.

**Nana nihánj taj xna'anj se  
vaa nahuun sa' uxrá yuvii,  
qui'yaj Jesucristó a**

<sup>29</sup>Gaa ne curihan'j Jesucristó rej yo', ne cachén so' na lacuaná cu'naj Galilea, gaa ne cavii so' raá 'o quij, ne ca'an'j cayáán so' rihaan yo'óo a.

<sup>30</sup>Ne cuchi' uxrá yuvii rihaan so', ne ca'na' nij yuvii nicaj nij yuvii man tuvi' nij yuvii sí' ran' rihaan so' a. Dan me se sí' chéé rengo do',

sí' tuchrii do', sí' ya'mii do', sí' anó chi'ii do', cuchi' rihaan Jesucristó, qui'yaj nij yuvii, ne cuchruj nij yuvii man nij sí' ran' yo' tacóo Jesucristó, ne nahuun sa' nij so', qui'yaj Jesucristó a. <sup>31</sup>Ne caráya'an'j ndo'o nij yuvii quene'en nij yuvii se vaa ca'mii nij sí' ya'mii yo' do', se vaa cachéé sa' nij sí' rengo do', se vaa nachuguun rihaan nij sí' tuchrii do' a. Ne sa' uxrá ca'mii nij yuvii che'é Diose se vaa ve'é ndo'o vaa Diose sí' noco' nij yuvii israelitá man a.

**Nana nihánj taj xna'anj se  
vaa go' Jesucristó se chá  
rihaan ca'an'j m'j snó'o a**

<sup>32</sup>Gaa ne canacúun Jesucristó ca'na' nij sí' tucu'yón se-nana so' rihaan so', ne cataj so':

—Cunuu 'ee raj man nij yuvii nihánj nan'j á. 'O se quis'j va'nuj güii mán nij so' gaj, ne taj yan vaj se chá nij so' a ma'. Ne na'vej raj ca'nej 'un'j man nij so' ca'an'j nij so' ma'. 'O se vaj nij so' chrej, ne na'aan rque nij so', ne ninaj nij so' rá chrej, rá 'un'j nan'j adonj —taj Jesucristó a.

<sup>33</sup>Ne cataj nij sí' tucu'yón se-nana so' rihaan so' a:

—'O se rco' quij uun me nihánj, ne me rej quiri' ní' rachrúun cha cunudanj nij yuvii nihánj ga —taj nij so' a.

<sup>34</sup>—Me daj rachrúun vaa rihaan soj ga —taj Jesucristó, xná'an'j so' man nij sí' tucu'yón se-nana so' a.

—Daj 'o chij rachrúun ne daj doj xcuaj le'ej nii ne, vaa rihaan nún nan'j adonj —taj nij so' a.

<sup>35</sup>Gaa ne ca'ne' Jesucristó suun rihaan nij yuvii se vaa cayáán nij

yuvii rihaan yo'óo a. <sup>36</sup>Gaa ne nicaj so' chij rachrúun yo' ne doj xcuaj, ne nago' so' graciá rihaan Diose, gaa ne cuxra' ta'aj so' man rachrúun yo' do', man nee xcuaj yo' do', ne caxrúj so' ston nij síi tucuyón se-nana so', ne rque nij so' rihaan nij yuvii a.

<sup>37</sup>Gaa ne chá cunudanj nij yuvii, ne ndaa caraa rque nij so' a. Gaa ne naqui'yaj chre' nii se vaa quináj tu'va nij yuvii yo', ne quisíj 'o cunu' chij ya scaa caraa qui'yaj se quináj tu'va nij yuvii yo' a. <sup>38</sup>Dan me se cunudanj nij so' chá, ne quisíj ndaa ca'anj míj nij snó'o chá, ne ino me se chá nij chana do', nij xnii do', nanj adonj. <sup>39</sup>Gaa ne na'née Jesucristó chrej man nij yuvii, ne cavii so' rá rihoo chée rihaan na, ne ca'anj so' rej cu'naj Magadán a.

Nana nihánj taj xna'anj se vaa cachíin nij síi fariseo do', nij síi saduceo do', qui'yaj Jesucristó 'o suun sa' nocoo quene'en nij so' a

**16** Gaa ne cuchi' nij síi fariseo cuchi' nij síi saduceo cuchi' rihaan Jesucristó, ne me rá nij so' quene'en nij so' sese ya síi ca'née Diose me Jesucristó a. Che'é dan cachíin ni'yaj nij so' rihaan Jesucristó se vaa racuj Diose man Jesucristó, ne qui'yaj Jesucristó 'o suun sa' nocoo quene'en nij so', gaa ne guun ya rá nij so' se vaa síi ca'née ya Diose me Jesucristó, rá nij so' a. <sup>2</sup>Gaa ne ca'mii Jesucristó rihaan nij so', cataj so':

—Dan me se gaa ata' güii, ne ni'yaj soj xta', ne sese maree vaa xta', ne: “Xraj, ne x'nuu a'yuj”, taj soj á. <sup>3</sup>Ne rej na'yaan ni'yaj soj xta', ne sese maree vaa rej xta', ne sese

aráan ndo'o ngaa rej xta', ne: “Corá caman' uxrá maan”, taj uún soj á. Dan me se ne'en soj xcaj soj cuentá che'é se vaa ne'en soj rej xta', tzaj ne ne ne'en soj xcaj soj cuentá che'é sayuun quiran' soj sij man rihaan chumii nihánj vaa güii a ma'.

<sup>4</sup>Maan che'é se yuvii 'na' rej chi'ii na'vej rá canoco' sa' man Diose me soj sij israelitá, ne che'é dan me rá soj qui'yaj suun sa' nocoo á. Tzaj ne se qui'yaj suun sa' nocoo ma'. Maan se quene'en soj se vaa ase vaa quiran' síi cu'naj Jonás síi nata' se-nana Diose gaa naá ro', danj quirán' 'unj, vaa güii nanj á —taj Jesucristó rihaan nij síi fariseo do', rihaan nij síi saduceo do' a. Gaa ne tanáj Jesucristó man nij so', ne ca'anj so' a.

Nana nihánj taj xna'anj se vaa ne ca'vej rá Jesucristó cunó nij síi tucuyón se-nana so' man nana tucuyón nij síi fariseo do', nij síi saduceo do' a

<sup>5</sup>Gaa ne ca'anj nij síi tucuyón se-nana Jesucristó rej xco na lacuaná, gaa ne xcaj nij so' cuentá se vaa quini'yón nij so', ne nicaj nij so' rachrúun cha nij so' a. <sup>6</sup>Gaa ne cataj Jesucristó rihaan nij so' a: —Cutumé soj man soj se gaa nanj quiran' soj sayuun, qui'yaj se-levadura nij síi fariseo do', nij síi saduceo do' á —taj Jesucristó no nij so' a.

<sup>7</sup>Ne nuchruj raa ndo'o nij síi tucuyón se-nana Jesucristó che'é nana ca'mii so', ne:

—Che'é se taj rachrúun nicaj ní', ne che'é dan a'mii so' che'é levadura se 'yaj naraa nana rque rachrúun nanj adonj —taj nij so' a.

<sup>8</sup>Ne aj ne'en Jesucristó daj uun nimán nij so', ne che'é dan cataj so':

—Me che'é nanó ndo'o rá soj se vaa taj rachrúun rihaan soj ga. 'O se doj amán rá soj ne'en soj manj vaa gaa nanj asan. <sup>9</sup>Me che'é ataa xcaj soj cuentá ga. Ne ne nuú rá soj gaa vaa daj 'o 'un' guee rachrúun rihaan ní' tzaj ne quisíj chá cunú' 'un' mój snó'o, qui'yáj a. Ne ndaa que'ee scaa se chá quináj tu'va yuvií gaa naquiyaj chre' soj a. <sup>10</sup>Ne me che'é quini'yón soj che'é chij rachrúun ga. Ne nuú rá soj gaa vaa daj 'o chij guee rachrúun rihaan ní' tzaj ne quisíj chá cunú' ca'anj mój snó'o, qui'yáj a. Ne ndaa que'ee scaa se chá quináj gaa naquiyaj chre' uún soj a. <sup>11</sup>Daj me che'é ne ne cunó soj ga. Nuveé che'e nanj rachrúun ca'mij rihaan soj ma'. Maan se cütumé soj man soj se gaa nanj quiran' soj sayuun qui'yaj se-levadura nij síí fariseo do', nij síí saduceo do' adonj —taj Jesucristó rihaan nij so' a.

<sup>12</sup>Gaa ne xcaj nij so' cuentá se vaa nuveé che'e nanj levadura se 'yaj naraa naná rque rachrúun me cataj xna'anj Jesucristó rihaan nij so' se vaa cütumé nij so' man nij so'; maan ne 'o se che'e se ne ca'vej rá Jesucristó tihá' yu'unj nij síí fariseo do', nij síí saduceo do', man nij so' ga se-nana nij so' ro', che'é dan ca'mii Jesucristó naná vaa danj rihaan nij síí noco' man so' nanj adonj.

**Naná nihánj taj xna'anj se vaa cataj xna'anj Pedró me síí me Jesucristó a**

<sup>13</sup>Gaa ne ca'anj Jesucristó rej naj chuman' cu'naj Cesarea de

Filipo, gaa ne xna'anj so' man nij síí tucu'yón se-nana so', cataj so':

—Daj taj nij yuvií che'é 'unj sij ca'née Diose nicaj yu'unj man yuvií ga. Ne me síí mé 'unj, taj nij yuvií ga —taj Jesucristó, xna'anj so' man nij so' a.

<sup>14</sup>—Vaa síí taj se vaa síí cu'naj Juan síí cuta' ne man yuvií mé so' ei. Ne vaa síí taj uún se vaa síí cu'naj Elías síí nata' se-nana Diose gaa naá me uún so' chuguanj. Ne vaa síí taj uún se vaa síí cu'naj Jeremías do', yo'ó síí nata' se-nana Diose gaa naá do', me uún so' xa'. 'O se danj taj 'o 'o nij yuvií che'é so' nanj adonj —cataj nij so' rihaan Jesucristó a.

<sup>15</sup>—Ne ma'an soj, gaa ne me síí mé 'unj, rá ma'an soj ga —taj Jesucristó, xna'anj so' man nij síí tucu'yón se-nana so' a.

<sup>16</sup>Gaa ne cataj síí cu'naj Simón Pedró:

—Síí ca'née Diose tinanii man yuvií rihaan sayuun mé so', ne ta'nij Diose síí vaa i'na' ya mé so' ei —taj so' rihaan Jesucristó a.

<sup>17</sup>Gaa ne cataj Jesucristó rihaan Pedró a:

—Qui'yaj uxrá Diose se luj che'é so', Simón ta'nij síí cu'naj Jonás a. 'O se nuveé naná cataj xna'anj yuvií rihaan so' me naná ca'mii so' cuano ma'. 'O se Réé 'unj síí nicun' xta' me síí racuíj mán so' narí' so' naná yo' nanj adonj. <sup>18</sup>Ne cuano nihánj me se cataj xna'anj 'unj rihaan so' se vaa ya Pedró cu'naj so', che'é se ase vaa yuvej ne tacóo ve' ro', vaa so', ne síí nucuj ndo'o nimán mé so' ei. Che'é dan, ase vaa 'yaj nii une' nii ve' xráá

yuvej ro', danj gaa qui'yáj, cune' 'unj man nij síi noco' manj, se vaa guun nucuaaj rá nij so' mán so', ne nicaaj yu'unj so' man nij so', qui'yáj nanj adonj. Ne se cavi' nu' soj sij noco' manj a ma'. 'O se gaa i'na' soj nu' cavii nu' ca'anj nanj adonj. <sup>19</sup>Ne cune' 'unj mán so' se vaa guún so' síi qui'yaj cayáán yuvii ga Diose asa' guun chij Diose rihaan chumii nihánj, ne naj guun rasuun cataj xna'anj so' se vaa ne nó xcúún yuvii qui'yaj yuvii me se veé danj ma'an Diose na'vej qui'yaj yuvii danj ma'. Ne naj guun rasuun cataj xna'anj so' se vaa ca'vee qui'yaj yuvii me se veé danj ma'an Diose a'vej qui'yaj yuvii danj adonj. —Inanj danj ca'mii Jesucristó rihaan síi cu'naj Pedró a.

<sup>20</sup>Gaa ne cataj xna'anj Jesucristó rihaan nij síi tucu'yón se-nana so' se vaa se nata' nij so' rihaan a 'ó yuvii se vaa síi ca'née Diose tīnanii man yuvii rihaan sayuun me so', taj so' a.

**Nana nihánj taj xna'anj se vaa cataj xna'anj Jesucristó se vaa cavi' so', ne cunu i'na' uún so' a**

<sup>21</sup>Dan me se güii yo' guun che'e Jesucristó cataj xna'anj Jesucristó rihaan nij síi tucu'yón se-nana so' se vaa no xcúún so' cavii so' chuman! Jerusalén, ne quiran' ndo'o so' sayuun qui'yaj nij síi uun chij do', nij xrej atā suun nocoo doj do', nij síi naqui'yaj cuu se-tucuaaj Moisés rihaan nij yuvii do' a. Ne ticavi' nii man so', ne cachēn va'nuj güii, gaa ne cunu i'na' uún so', cataj so' a. <sup>22</sup>Gaa ne quirii yaníj síi cu'naj Pedró man Jesucristó, ne

guun che'e so' cataj so' se vaa ne nó xcúún Jesucristó ca'mii Jesucristó danj a. Ne cataj Pedró:

—Cunu 'ee rá Diose mán so', Señor. Daj chihaa míj se quirán' so' danj ma' —taj Pedró rihaan Jesucristó a.

<sup>23</sup>Gaa ne canicaj Jesucristó, ne ca'mii so' rihaan Pedró a:

—Naxuun so' mán so' rihanj á. Na'vej raj que'ne'enj mán so' ma'. 'O se ase tu'va síi chree síi cu'naj Satanás ro', danj tu'vá so', ne aráán so' chrej rihanj cunoj rihaan Diose ei. Danj tu'vá so', che'é se ne acaj so' cuentá daj me rá Diose adonj. Maan se inanj acaj so' cuentá daj me rá yuvii nanj adonj —taj Jesucristó rihaan síi cu'naj Pedró yo' a.

<sup>24</sup>Gaa ne cataj Jesucristó rihaan nij síi tucu'yón se-nana so' a:

—Sese me rá yo'o so' canoco' so' manj, ne se guun rá so' qui'yaj so' se vaa me rá ma'an so' qui'yaj so' ma'. Ne ca'vee se quiran' uxrá so' sayuun do', ca'vee se ndaa cachron nii man so' rihaan rcutze do', tzaj ne yo'o qui'yaj suun so' che'ej, ne yo'o canoco' raan so' manj adonj. <sup>25</sup>Tzaj ne sese vaa 'o síi me rá tīnanii man ma'an rihaan sayuun, ne vaa güii yo'o cavi' nimán so' adonj. Tzaj ne sese cavi' yo'o so' che'é se vaa me so' síi noco' manj, ne vaa güii cunu i'na' uún so' adonj. <sup>26</sup>Ne a me se quirii 'o so' sese qui'yaj canaán so' nu' rasuun man rihaan chumii nihánj ne ca'anj ni'ya nimán so', rá soj ga. Daj chihaa míj se ca'vee cavii sa' so', qui'yaj rasuun man rihaan chumii nihánj a ma'. Tzaj ne ca'vee se

navij nu' si'yaj yo'lo so' rihaan chumii nihánj, tzaj ne sese gaa i'na' nimán so' nu' cavii nu' ca'anj, ne quinano rá so', rá soj na'. Daj chihaa mǐj se quinano rá so' a ma'. 'O se cavii sa' uxrá so' nanj adonj.

<sup>27</sup>"O se ya ya ca'na' 'unj sij ca'née Diose nicaj yu'unj man yuvii, ne uxrá ve'é gaa 'unj, quilyaj Réé 'unj, ne ca'na' nij se-mozó so' ga 'unj nanj adonj. Gaa ne naru'vee 'unj rihaan 'o 'o so' che'é suun quilyaj suun 'o 'o so' nanj adonj. <sup>28</sup>Ya ya cataj xna'anj 'unj rihaan soj cuano se vaa xa' ta'aj soj sij nicun' nihánj cuano me se gaa ataa a cavii' ta'aj soj, ne ya quene'en ta'aj soj asa' ca'ná' 'unj guun chij 'unj rihaan chumii nihánj, ne quene'en ta'aj soj manj nanj adonj. Dan me se síi ca'née Diose nicaj yu'unj man yuvii mej nanj adonj —taj Jesucristó rihaan nij síi tucu'yón se-nana so' a.

**Nana nihánj taj xna'anj se vaa chuguun ndo'o man Jesucristó ni'yaj nij síi tucu'yón se-nana so' a**

**17** Cachén vatan' güii, gaa ne nicaj Jesucristó man síi cu'naj Pedró do', síi cu'naj Jacobo do', tinúu Jacobo síi cu'naj Juan do', ca'anj so' raá 'o quij xcaan rej taj vaj a 'ó yuvii ne a. <sup>2</sup>Gaa ne yo'lo cunuu ino cunudanj man Jesucristó ni'yaj nij síi tucu'yón se-nana so', ne dan me se chuguun ndo'o rihaan so', ne ase vaa chuguun güii ro', danj chuguun rihaan so' nanj á. Ne nuu catzii ndo'o sagan' so', ne ase vaa ya'an chuguun vaa sagan' so' a. <sup>3</sup>Gaa ne naquiyaa síi cu'naj Moisés síi cane gaa naá ga síi cu'naj Elías síi cane gaa naá rihaan nij so', ne

nanó roj so' cuentó ga Jesucristó a. <sup>4</sup>Gaa ne cataj Pedró rihaan Jesucristó a:

—Cunaj uxrá vaa mán núj nihánj ga so', Señor. Sese me rá so', ne quilyáa 'unj va'núj ve' yacataj cane soj nanj á. 'O ve' cané so', ne yo'lo ve' cane síi cu'naj Moisés, ne yo'lo ve' cane síi cu'naj Elías ei —taj Pedró rihaan Jesucristó a.

<sup>5</sup>Ataa quisij ca'mii Pedró, ne ca'na' 'o ngaa chuguun ndo'o, ne caráan ngaa chuguun yo' man taran' nij so' a. Gaa ne Diose ro', ca'mii nana cuno nij so' rque ngaa yo', ne cataj Diose:

—Síi nihánj me ta'nij adonj. 'Ee raj man so', niha' raj ni'yaj 'unj man so' adonj. Cuno soj rihaan so' ei —taj Diose cuno nij so' a.

<sup>6</sup>Dan me se cuno nij síi tucu'yón se-nana Jesucristó nana yo', gaa ne ca'anj quinaj nij so' rihaan yo'óó, ne cuchu'vi' ndo'o nij so' a. <sup>7</sup>Gaa ne chuchi' Jesucristó rihaan nij so', ne cuta' ra'a so' xráa nij so', ne cataj so':

—Canicun' caya soj, ne se cuchu'vi' soj ma' —taj so' a.

<sup>8</sup>Gaa ne naxcaj rihaan nij so' ni'yaj nij so', ne daj orún' Jesucristó nicun', quene'en nij so' nanj adonj.

**Nana nihánj taj xna'anj se vaa ase vaa síi cu'naj Elías ro', danj vaa síi cu'naj Juan síi cuta' ne man yuvii a**

<sup>9</sup>Gaa ne gaa nanij nij so' tacóó quij yo' me se ca'ne' Jesucristó suun rihaan nij so', cataj so':

—Se nata' soj rihaan a 'ó yuvii che'é se vaa quene'en soj cuan' ma'. Yo'lo dínj gaa tu'va soj che'é se vaa quene'en soj á. Ndaa quisij cavii'

'un̄j nē cunuū i'na' uún 'un̄j, gaa nē ca'vee nata' soj se vaa quene'en soj daj quirán' 'un̄j sij ca'néé Diose n̄icaj yu'un̄j man yuvī n̄anj adon̄j — taj Jesucristó rihaan nij so' a.

<sup>10</sup>Gaa nē xná'an̄j nij síi tucu'yón se-n̄ana so' man so', cataj nij so':

—Me che'é taj nij síi naqui'yaj c̄uu se-tucuan̄j Moisés rihaan yuvī se vaa asino ca'na' síi cu'naj Elías síi nata' se-n̄ana Diose gaa naá, gaa nē ca'vee ca'ne' Diose cacun' che'é yuvī ga —taj nij síi tucu'yón se-n̄ana Jesucristó, xná'an̄j nij so' man Jesucristó a.

<sup>11</sup>Gaa nē cataj Jesucristó:

—Ya a'mii nij síi naqui'yaj c̄uu se-tucuan̄j Moisés, taj nij so' se vaa asino ca'na' síi cu'naj Elías, gaa nē naqui'yaj sa' so' nu' rasuun adon̄j.

<sup>12</sup>Tzaj nē cuano nihán̄j me se cataj xna'an̄j 'un̄j rihaan soj se vaa aj ca'na' síi cu'naj Elías yo', tzaj nē ne cun̄o nij yuvī rihaan so' ma'. Maan se qui'yaj yā nij yuvī ndaa vaa me rá ma'an̄ nij yuvī man so' n̄anj adon̄j. Nē nda' se sij ca'néé Diose n̄icaj yu'un̄j man yuvī mej, tzaj nē ase vaa quiran' so' sayuun qui'yaj nij yuvī ro', dan̄j in̄anj quirán' 'un̄j sayuun qui'yaj uún nij yuvī n̄anj adon̄j —taj Jesucristó a.

<sup>13</sup>Gaa nē xcaj nij síi tucu'yón se-n̄ana Jesucristó cuentá se vaa ca'mii Jesucristó che'é síi cu'naj Juan síi cuta' ne man yuvī cataj Jesucristó se vaa síi nacaj se-suun síi cu'naj Elías me síi cu'naj Juan yo' a.

**Nanā nihán̄j taj xna'an̄j se vaa nahuun sa' 'ō xnii nuū nanā chree nimán, qui'yaj Jesucristó a**

<sup>14</sup>Gaa nē ca'an̄j nij so' rej vaj ndo'o yuvī, nē cuchi' 'ō snó'o

rihaan Jesucristó, gaa nē canicun' ruj so' rihaan Jesucristó, gaa nē cataj so':

<sup>15</sup>—Cunuū 'ee rá so' man ta'n̄j, Señor. 'O se quisnúu so', qui'yaj yavii, nē in̄anj naxru' so' rihaan ya'an, nē ran' ndo'o so' sayuun n̄anj adon̄j. Veé dan, nē in̄anj naxru' so' rque na uún, nē ne ni'yan̄j uxrá ran' so' ma'. <sup>16</sup>Nē ca'an̄j n̄icaj 'un̄j man so' rihaan nij síi tucu'yón se-n̄ana so', tzaj nē taj se qui'yá' nahuun sa' so', qui'yaj nij so' ma' —taj snó'o yo' a.

<sup>17</sup>Gaa nē cataj Jesucristó:

—Dan me se síi ne amán rá me soj sij man rihaan chumii nihán̄j cuano, nē chi'lii vaa nimán soj, nē a me daj cachej ga soj, nē a me daj gaa naj niman̄j ni'yaj 'un̄j man soj, gaa nē ca'vee qui'yaj canaán soj ga. N̄icaj soj man xnii ca'na' soj rihan̄j cuaj á —taj Jesucristó a.

<sup>18</sup>Gaa nē ca'ne' Jesucristó suun rihaan nanā chree nuū nimán xnii se vaa tan̄áj so' man xnii yo' a. Gaa nē curihan̄j so' nimán xnii, ca'an̄j so', nē veé maan orá dan nahuun sa' xnii yo' a.

<sup>19</sup>Gaa nē cuchi' in̄anj nij ma'an̄ nij síi tucu'yón se-n̄ana Jesucristó rihaan Jesucristó, nē xná'an̄j nij so' man so', cataj nij so':

—Me che'é nē guun nucuaj n̄uj ca'vee quirii n̄uj man nanā chree yo' nimán xnii ga —cataj nij so', xná'an̄j nij so' man Jesucristó a.

<sup>20</sup>Gaa nē cataj Jesucristó:

—Che'é se doj amán rá soj, che'é dan ne ca'vee guun nucuaj soj ei. Tzaj nē ne'en soj se vaa caán man rā cuêj mostazá xlá, nē nda' se tzin' vaa yo', tzaj nē asa' achij yo',

ne ase vaa caân chruun chijí ndo'o ro', vaa yo' ei. Ne ase vaa caân cuêj mostazá xlá yo' ro', danj gaa ma'an soj á. Ya ya cataj xna'anj 'unj rihaan soj se vaa sese ya amán rá soj ne sese cataj soj rihaan 'o quij se vaa curihanj quij yo' rej nicun' yo' ne natuna quij yo' rej nicun' quij yo', ne sese ya ya cuchuman rá soj se vaa ca'anj quij yo', ne cavij quij yo' rej nicun' yo', ne ca'anj yo' níchrej ei. Ne guun nucuaj soj qui'yaj soj cunudanj nanj adonj. <sup>21</sup>Ne nana chree vaa danj ro', se ca'vee qui'yaj ní' curihanj nij so' nimán yuvii sese ne achíin ni'yaj ndo'o ní' rihaan Diose ne sese ne toco' ní' x'naa man ma'an ní' che'é se aráj guee ní' rihaan Diose a —taj Jesucristó rihaan nij so' a.

**Nana nihánj taj xna'anj se vaa cataj xna'anj uún Jesucristó se vaa caví' so' ne cunuu i'na' uún so' a**

<sup>22</sup>Dan me se cunuu chre' uún taran' nij so' estadó Galilea, gaa ne cataj Jesucristó rihaan nij sí tucu'yón se-nana so' a:

—'O se sí ca'née Diose nicaj yu'unj man yuvii mej, ne vaa güii nago' nii manj rihaan yuvii adonj. <sup>23</sup>Dan me se ticaví' nij yuvii manj, gaa ne cachén va'núj güii, gaa ne cunuu i'na' uún 'unj nanj adonj —taj Jesucristó a.

Gaa ne quinano' ndo'o rá nij sí tucu'yón se-nana so' a.

**Nana nihánj taj xna'anj me che'é ne nó xcúin Jesucristó go' so' puextó che'é nuví a**

<sup>24</sup>Catúj nij so' chuman' Capernaum, gaa ne cuchi' nij sí

ca'néj puextó che'é nuví rihaan sí cu'naj Pedró, ne xna'anj nij so' man Pedró, cataj nij so':

—Sí tucu'yón nana rihaan soj ro', o' so' puextó che'é nuví na' —taj nij so' a. <sup>25</sup>—O' so' ei —taj Pedró rihaan nij so' a.

Gaa ne catúj Pedró rá ve', tzaj ne aj ne'en Jesucristó se vaa me rá Pedró xna'anj Pedró sese ya o' Jesucristó puextó che'é nuví a. Che'é dan asino Jesucristó xna'anj man Pedró, cataj so':

—Daj uun rá so', ga Simón'. Nij sí nicaj suun rey uun chij rihaan yuvii man rihaan chumii nihánj me se me sí a'néj nij so' puextó rihaan ga. Rihaan ma'an ta'níi nij so' na'. Ase rihaan yo'ó yuvii xa' —taj Jesucristó, xna'anj so' man Pedró a.

<sup>26</sup>—Rihaan yo'ó yuvii adonj —taj Pedró rihaan Jesucristó a.

Gaa ne cataj Jesucristó:

—Che'é dan taj che'é go' ta'níi sí nicaj suun puextó ma'. Ne ase vaa sí nicaj suun vaa Réé 'unj Diose, ne rii ta'nga' so' rihaan nuví, ne che'é dan ne nó xcúnj goj puextó che'é nuví ma'.

<sup>27</sup>”Tzaj ne se guun ca'maan rá nij sí a'néj puextó che'é nuví, qui'yaj ní' ma'. Che'é dan ca'anj so' tu'va na lacuaná, ne tagüéj so' 'o aga' ata'aa xcuaj rque na, ne quita'aa so' xcuaj cano' aga' asino yaan á. Gaa ne nuxra' so' tu'va xcuaj yo', ne quiri' so' sa'anj aga' estatero tu'va xcuaj yo', ne go' so' sa'anj yo' che'é ní' rihaan nij sí a'néj puextó á —taj Jesucristó a.

**Nana nihánj taj xna'anj me sí me sí guun chij doj asa' guun chij Diose rihaan chumii nihánj a**

**18** Veé maan orá dan cuchi' nij sí tucu'yón se-nana

Jesucristó rihaan so', ne xná'anj nij so' man so' a:

—Ne me síí me síí guun chij doj asa' guun chij Diose rihaan chumií nihánj ga —taj nij so' a.

<sup>2</sup>Gaa ne canacúún Jesucristó ca'na' 'o ne'ej rihaan so', ne cachrón so' man ne'ej yo' tanuu nij síí tuculyón se-nana so', <sup>3</sup>ne cataj so':

—Ya ya cataj xna'anj 'unj rihaan soj cuano se vaa no xcuún soj nuchran' nimán soj, ne ase vaa ne'ej nihánj ro', danj gaa soj á. Sese na'vej rá soj qui'yaj soj danj, ne daj chihaa mǐj se cayáán soj ga Diose asa' guun chij Diose rihaan chumií nihánj a ma'. <sup>4</sup>Dan me se sese naqui'yaj nica' yo'o so' nimán so', ne sese ase vaa nimán ne'ej nihánj danj gaa nimán so', ne so' me síí guun chij doj asa' guun chij Diose rihaan chumií nihánj nanj adonj.

**Nana nihánj taj xna'anj daj  
quiran' síí qui'yaj chi'ii nimán  
'o síí nica' nimán síí cuchumán  
rá ni'yaj man Jesucristó a**

<sup>5</sup>Ne me ma'an 'o síí aráj cochroj ne a'mii sa' ga 'o ne'ej nihánj che'ej, ne adi' ma'anj me aráj cochroj ne a'mii sa' so' ga vaa nanj adonj.

<sup>6</sup>Dan me se me ma'an 'o síí qui'yaj chi'ii nimán 'o síí le'ej amán rá ni'yaj manj, ne ca'vee a doj cavii sa' síí qui'yaj danj sese toco' nii 'o yuvej xij vǎj 'núú trigó gaán chihá so' ne taguéj nii man so' rque na ya'anj nanj adonj. Dan me se doj a sayuun quiran' so', sese qui'yaj chi'ii so' nimán 'o síí le'ej amán rá ni'yaj manj adonj. <sup>7</sup>Nique ndo'o nij síí man rihaan chumií nihánj, che'é se vaa ya'núj uxrá rihaan nij

so' canoco' nij so' chrej chi'ii ei. Ne inanj danj vaa chumií nihánj, man ndo'o chrej chi'ii canoco' yuvii ei. Tzaj ne nique síí 'yaj anoco' yuvii chrej chi'ii yo' nanj adonj. 'O se daj chihaa mǐj se cavii sa' so' ma'.

<sup>8</sup>”Dan me se sese ra'á so' do', tacóo so' do', me rá qui'yaj cacun', ne táá a se ca'ne' so' man yo', gaa ne se gaa nanj ca'anj so' rihaan ya'an qui'yaj yo' ei. Taj se 'yaj sese taj vaj tacóo so' do', ra'á so' do', tzaj ne ca'vee cayáán so' ga Diose gaa ei. Tzaj ne sese quitaj ra'á so' do', tacóo so' do', ne qui'yaj nij yo' cacun', ne ca'anj so' rihaan ya'an, qui'yaj nij yo', ne dan me se yo' me se cunuú so' nu' cavii nu' ca'anj ei. <sup>9</sup>Veé danj uún sese me rá rliij rihaan so' qui'yaj yo' cacun', ne táá a se quirii so' man yo', ne síí rihaan canuu gaa so', tzaj ne ca'vee cayáán so' ga Diose gaa ei. Tzaj ne sese cunuú rliij rihaan so' ne qui'yaj yo' cacun', ne ca'anj so' rihaan ya'an, qui'yaj yo' ei.

**Nana nihánj taj xna'anj se vaa ve'é  
ndo'o tumé Diose man nij síí vaa  
nica' nimán síí noco' man so' a**

<sup>10</sup>Cutumé soj man soj se cataj soj se vaa taj yu'vee nó yo'o tuvi' soj síí nica' nimán ei. 'O se cataj xna'anj 'unj rihaan soj cuano se vaa vaa se-mozó Réé 'unj síí nicun' xta' tumé man 'o 'o nij so' nanj adonj. Ne niganj nicun' nij so' rihaan Réj, ne uno Réj nu' nana nata' nij so' rihaan Réj ei. <sup>11</sup>'O se xa' 'unj sij ca'née Diose nica' yu'unj man yuvii, tzaj ne ca'ná' 'unj che'é rej tinanii 'unj man nij síí ca'anj ni'ya rihaan sayuun a.



<sup>12</sup>”Tumé Dios̄ man nij síi nica' nimán síi noco' man so', rá soj na'. Nihánj me cataj xna'anj 'un̄j rihaan soj á. Ne'en soj se vaa sese vaa 'o cientó daán yo'ó so' matzinj, ne sese ca'anj ni'ya orún' matzinj yo', ne tanáj síi daán matzinj yo' man ca'anj chihaa xnu' ca'anj matzinj yo' raá quij, ne ca'anj so' nano' so' matzinj ca'anj ni'ya yo' ei. <sup>13</sup>Ne cataj xna'anj 'un̄j rihaan soj se vaa sese nari' so' daán so' matzinj, ne guun niha' uxrá rá so' nanj adonj. Doj tzin' gaa niha' rá so' che'é ca'anj chihaa xnu' ca'anj nij matzinj ne ca'anj ni'ya a. Tzaj ne che'é matzinj nari' uún so' doj a gaa niha' rá so' nanj adonj. <sup>14</sup>Dan me se ase vaa na'vej rá so' ca'anj ni'ya orún' daán so' matzinj ro', danj vaa na'vej rá Rej ní' síi nicun' xta' ca'anj ni'ya a 'ó síi nica' vaa nimán síi noco' man so' nanj adonj.

**Nana nihánj taj xna'anj se  
vaa vaa suun rihaan ní' ca'mii  
ní' rihaan tinúú ní' che'é  
cacun' tumé tinúú ní' a**

<sup>15</sup>”Ne sese qui'yaj tinúú so' cacun' rihaan so', ne ca'anj orún' so' rihaan so', ne cataj xna'anj so' rihaan so' che'é cacun' tumé so' á. Ne sese cunó so' rihaan so', ne dan me se aj qui'yaj canaán so', ne yo'ó canoco' tinúú so' man Dios̄ ga so' vaa gaa nanj adonj. <sup>16</sup>Tzaj ne sese ne cunó so' rihaan so' ne nica' so' yo'ó do', yavíj do', tinúú so' ca'anj so' rihaan tinúú so' síi tumé cacun' yo', ne ndaa síj, gaa ne canicun' vij va'núj soj sij cunó nana ca'mii so', gaa ne guun ya rá soj a. Sese 'o cuyaan gaa nana ca'mii vij va'núj

síi quene'en, ne ya vaa nana ca'mii nij so' a. <sup>17</sup>Ne sese ne cunó síi tumé cacun' rihaan vij va'núj nij tinuj nij soj, gaa ne ca'anj soj nata' soj rihaan taran' nij síi noco' man Dios̄ yanj chiháán soj á. Ne sese ne cunó so' rihaan taran' nij síi noco' man Dios̄, gaa ne guun yanj soj rihaan so' á. Dan me se ase vaa 'o síi yanj do', ase vaa 'o síi tiha' yu'unj che'é puextó do', danj gaa so' rihaan soj ei.

<sup>18</sup>”Cuaño nihánj me cataj yá 'un̄j rihaan soj se vaa a me ma'an rasuun se ca'vee qui'yaj yuvii rá soj, ne veé danj na'vej rá Dios̄ qui'yaj yuvii uún a. Ne naj guun rasuun cataj soj se vaa ca'vee qui'yaj yuvii, ne veé danj gaa qui'yaj yuvii, rá ma'an Dios̄ uún a. <sup>19</sup>Dan me se cataj uún 'un̄j rihaan soj, ne sese vaa vij soj me rá cachinj ni'yaj rihaan Réj síi nicun' xta', ne cachinj ni'yaj soj se vaa achiin rihaan soj, ne rque so' man soj se vaa achiin man soj a. <sup>20</sup>Ése me rej ma'an nuu chre' 'o vij síi noco' manj cachinj ni'yaj nij so', ne veé danj nicun' ma'anj ga nij so' a —taj Jesucristó a.

**Nana nihánj taj xna'anj se  
vaa no xcúun ndo'o ní' caraa  
x'naa ní' che'é tinúú ní' a**

<sup>21</sup>Gaa ne cuchi' síi cu'naj Pedró rihaan Jesucristó, ne xná'anj so' man so', cataj so':

—Me daj nó xcúnj caraa x'naj che'é tinúj síi qui'yaj chi'ii manj ga. Chij ya caraa x'naj na' —taj Pedró, xná'anj so' a.

<sup>22</sup>Gaa ne cataj Jesucristó rihaan so' a:

—Ne ne'en uxrá so' á. 'O se naj guun cacun' qui'yaj tinúú

so', ne yo'ò caraa x'naa niganj so' che'é tinúú so' nu' cavii nu' ca'anj nanj adonj. <sup>23</sup>Dan me se ase vaa 'ò síí nicaj suun rey ro', danj gaa Diose asa' guun chij Diose rihaan chumii nihánj adonj. Dan me se síí nicaj suun rey yo' me se 'ò güiii, ne guun rá so' nachin' so' sa'anj man nij se-mozó so' a. <sup>24</sup>Dan me se guun che'è so' ca'neè so' sa'anj vaa xcúún, ne asino yaan nicaj nii man 'ò síí 'yaj xcúún que'èè millón pesó ca'na' nii rihaan síí nicaj suun rey yo' a. <sup>25</sup>Ne taj yan vaj a doj sa'anj nicaj síí 'yaj xcúún yo' narque so' rihaan rey a ma'. Che'é dan cataj xna'anj síí nicaj suun rey yo' se vaa cane' mozó cane' nica mozó cane' ta'níí mozó cane' nu' si'yaj mozó cane', gaa ne nari' rey se-sa'anj rey, taj rey a. <sup>26</sup>Gaa ne canicun' ruj mozó yo' rihaan síí nicaj suun rey yo', ne cachíín ni'yaj uxrá so', cataj so': "Caraa x'naa uxrá so' doj, ne vaa güiii narquej cunudanj sa'anj mán so', síí chij", taj se-mozó so' rihaan so' a. <sup>27</sup>Gaa ne cunuu 'èè rá síí nicaj suun rey ni'yaj so' man se-mozó so', ne ca'néj so' xcúún xráá mozó yo', ne ca'ne' rá so', ca'anj uun mozó yo', qui'yaj so' a.

<sup>28</sup>"Veé dan, gaa ne curihanj mozó yo', ca'anj so', gaa ne nari' tuvi' so' ga yo'ó mozó 'yaj suun rcua'aañ ga so', gaa ne yo'ó mozó yo' me síí qui'yaj xcúún doj pesó rihaan mozó caráj x'naa rey a. Gaa ne quita'aa so' man tuvi' so' mozó yo', ne cataj so': "Narque so' nu' se vaa 'yaj xcúún so' rihanj cuaj vij", taj so' rihaan tuvi' so' a. <sup>29</sup>Gaa ne canicun' ruj yo'ó mozó yo' rihaan tuvi' so' síí nachin' xcúún yo', gaa ne cataj

so': "Caraa x'naa so', ne vaa güiii, ne narquej sa'anj mán so' ei", taj mozó yo' rihaan tuvi' so' a. <sup>30</sup>Tzaj ne ne ca'vej rá so' caraa x'naa so' rihaan tuvi' so' mozó yo' a ma'. Maan se ca'anj so', ne caxrj so' taga' man tuvi' so', ne ndaa se narque ya tuvi' so' nu' se vaa 'yaj xcúún yo' rihaan so', gaa ne ca'ne' rá so' a.

<sup>31</sup>"Veé dan, gaa ne quene'en yo'ó nij se-mozó síí nicaj suun rey daj qui'yaj síí caxrj taga' man tuvi', ne nanó ndo'o rá nij so' che'é síí 'nij taga' yo' a. Che'é dan cuchí' nij so' rihaan síí nicaj suun rey yo', ne nata' nij so' cunudanj rihaan rey a. <sup>32</sup>Gaa ne ca'néé síí nicaj suun rey yo' nana rihaan mozó caxrj taga' man tuvi' se vaa ca'na' so' rihaan so' a. Dan me se ca'na' so' rihaan rey, gaa ne ca'mii rey rihaan so' a: "Mozó chi'ii nimán mé so' ei. 'Uñj me se ca'néj uun 'unj xcúún xráá so', che'é se cachíín ni'yáá so' rihanj a. <sup>33</sup>Ne ase vaa cunuu 'èè raj mán so' ro', danj vaa nò xcúún so' cunuu 'èè rá so' man tuvi' so' mozó 'yaj suun ga so' adonj", taj so' rihaan se-mozó so' a. <sup>34</sup>Gaa ne ca'maan ndo'o rá síí nicaj suun, ne tacuachén síí nicaj suun man mozó yo' rihaan síí 'nij ra'a taga', ne naquiyaj naca síí nicaj suun yo' xcúún xráá mozó, ne cataj xna'anj so' se vaa se curihanj mozó yo' taga' ndaa naru'vee ya so' nu' se vaa qui'yaj xcúún so', gaa ne curihanj so' a.

<sup>35</sup>"Ne ase vaa qui'yaj síí nicaj suun yo' ro', ta'nga' danj qui'yaj uún Réj síí nicun' xta' che'é soj, sese na'vej rá soj caraa x'naa soj rihaan tinúú soj nanj adonj —taj Jesucristó a.

Nana nihánj taj xna'anj se  
vaa ne nó xcúún yuvií quiril'ij  
yuvii man nica yuvií a

**19** Gaa ne quisíj ca'mii  
Jesucristó nana yo', gaa  
ne curihanj so' estadó Galilea, ne  
ca'anj so' ndaa rnej tu'va chráá  
cu'naj Jordán, ndaa estadó Judea a.  
<sup>2</sup>Ne canoco' uxrá yuvií man so', ne  
nahuun sa' nij sí ran', qui'yaj so' a.

<sup>3</sup>Gaa ne cuchí' doj sí fariseo  
rihaan Jesucristó, ne me rá nij so'  
cutá' nij so' cacun' xráá Jesucristó  
che'é nana ca'mii Jesucristó a.  
Che'é dan xná'anj nij so' man  
Jesucristó, cataj nij so':

—Sese ne chihan' 'yaj chana nica  
yo'ó snó'o, rá snó'o yo', ne no xcúún  
so' quiril'ij so' man no' na' —taj nij  
so' a.

<sup>4</sup>Gaa ne cataj Jesucristó:

—Aj nayaa soj nana no rihaan  
danj Diose nana taj se vaa asij  
qui'yaj Diose chumii, ne qui'yaj  
Diose snó'o, ne qui'yaj Diose chana,  
ne vij roj so' me yuvií, qui'yaj  
Diose a. <sup>5</sup>Ne vaa yo'ó nana taj:  
“Che'é dan tanáj snó'o man rej so'  
do', man nii so' do', ne ve'é nacaj  
snó'o man chana nica so', ne ase  
vaa orún' yuvií ro', danj gaa roj  
so' adonj”. Danj taj danj Diose a.  
<sup>6</sup>Dan me se nuveé vij ran' yuvií me  
roj so' asij xcaj tuvi' roj so' a ma'. 'O  
se ase vaa orún' yuvií ro', vaa roj so'  
nanj adonj. Dan me se ma'an Diose  
qui'yaj xcaj tuvi' roj so', ne che'é  
dan ne nó xcúún a 'ó yuvií ca'ne'  
tanuu yuvií man roj so' ma' —taj  
Jesucristó rihaan nij sí fariseo  
yo' a.

<sup>7</sup>Gaa ne cataj nij sí fariseo:

—Che'é dan, me che'é cataj  
xna'anj Moisés se vaa naxcaj snó'o 'o  
yanj cataj xna'anj se vaa quiril'ij so'  
chana nica so', ne ca'vee quiril'ij so'  
man no' ga —taj nij so' a.

<sup>8</sup>Ne cataj Jesucristó rihaan nij  
so' a:

—Che'é se nichraj ndo'o nimán soj  
ro', che'é dan cataj xna'anj Moisés  
rihaan soj se vaa naxcaj soj yanj  
yo', ne quiril'ij soj nica soj a. Tzaj ne  
asij guun che'e Diose qui'yaj Diose  
man yuvií, ne ne vaa danj ma'.

<sup>9</sup>Cuano nihánj me se cataj xna'anj  
'unj rihaan soj se vaa sese ne cotoj  
chana nica yo'ó so' ga yo'ó chii, ne  
sese ril'ij rma'an so' man chana yo'  
ne xcaj so' man yo'ó chana, ne sí  
tumé ndo'o cacun' me ma'an so'  
nanj adonj. Veé ase vaa sí cotoj ga  
naj guun chana ro', vaa so' rihaan  
Diose nanj adonj —taj Jesucristó  
rihaan nij so' a.

<sup>10</sup>Gaa ne cataj nij sí tucu'yón  
se-nana Jesucristó rihaan so':

—Sese ne nó xcúún snó'o quiril'ij  
so' man chana nica so', ne taj che'é  
xcaj snó'o man chana ma'. Maan se  
sa' doj cavií sí ne uun adonj —taj  
nij so' a.

<sup>11</sup>Gaa ne cataj Jesucristó:

—Nuveé tucuanj canoco' cunudanj  
yuvií me nana ca'mii soj ma'. Maan  
se doj vaa nij yuvií canoco' tucuáan  
yo', qui'yaj Diose nanj ei. <sup>12</sup>Dan me  
se vaa sí asij ca'ngaa so', danj na'vej  
rá so' xcaj so' man chana, tzaj ne  
vaa yo'ó so' uún, ne gaa me so' xnií,  
ne ta'aj nij sí xcoj ruvaa rá ne ma'an  
nij so' naqui'yaj capuú man ta'aj xnií,  
ne gaa achij xnií, gaa ne na'vej rá so'  
xcaj so' man chana gaa a man adonj.  
Dan me se vaa yo'ó so' uún, ne

ca'vee nanj xcaj so' chana, tzaj ne maan se noco' ndo'o so' man Diose, ne me ndo'o rá so' guun chij Diose rihaan chumii nihánj, ne 'yaj suun ndo'o so', ne ne vaa ya'núj rihaan so' xcaj so' chana, rá so', gaa ne che'é dan na'vej inanj rá ma'an so' xcaj so' chana a man adonj. Sese guun nucuaj yo'o so' canoco' so' tucuáán yo', ne ve'é canoco' so' tucuáán yo' nanj adonj —taj Jesucristó a.

**Nana nihánj taj xna'anj me che'é caran' rá Jesucristó ni'yaj so' man ne'ej a**

<sup>13</sup>Gaa ne nicaj nij yuvii man nij ne'ej ca'na' nij yuvii rihaan Jesucristó a. Me rá nij yuvii cuta' Jesucristó ra'a so' raaj nij ne'ej, ne cachinj ni'yaj so' rihaan Diose che'é nij ne'ej yo' a. Tzaj ne cataj xna'anj nij sí tucu'yón se-nana Jesucristó rihaan nij yuvii se vaa ne nó xcúún nij ne'ej ca'na' nij ne'ej rihaan Jesucristó, taj nij so' a. <sup>14</sup>Tzaj ne cataj Jesucristó:

—Ca'ne' rá soj ca'na' nij ne'ej rihanj á. Se caráán soj chrej rihaan nij ne'ej mei. 'O se tucua' nij sí vaa danj ro', me rej yanj Diose uun chij Diose nanj adonj —taj Jesucristó a.

<sup>15</sup>Gaa ne cuta' so' ra'a so' raaj nij ne'ej, gaa ne curihanj so' rej yo' a.

**Nana nihánj taj xna'anj che'é yo'o sí me rá cayáán ga Diose nu' cavii nu' ca'anj a**

<sup>16</sup>Dan me se cuchi' yo'o sí tachruu yo' rihaan Jesucristó, ne xna'anj so' man Jesucristó, cataj so':

—Me suun sa' qui'yaj sunj, ne ca'vee cayánj ga Diose nu' cavii nu' ca'anj, ga maestro' —taj so' a.

<sup>17</sup>Gaa ne cataj Jesucristó:

—Me che'é xna'anj so' manj che'é se sa' ga. 'O se orún' Diose vaa sa' á. Tzaj ne sese me rá so' cayáán so' ga Diose nu' cavii nu' ca'anj, ne cunó so' nij nana nocoo ya ya nana cataj xna'anj Diose rihaan ní' á —taj Jesucristó a.

<sup>18</sup>—Me nana ga —taj sí tachruu yo', xna'anj so' man Jesucristó a.

Gaa ne cataj Jesucristó:

—Nana nihánj a: “Se ticaví' so' yuvii ma'. Se cotoj so' ga chana nica yo'ó yuvii ma'. Se qui'yaj ituu so' si'yaj yo'ó yuvii ma'. Se nanó so' cuentó ne che'é yuvii ma'. <sup>19</sup>Caraa cochróo so' rihaan rée so' do', rihaan ní' so' do' á. Ase vaa 'ee rá so' man ma'an so' ro', danj gaa 'ee rá so' man tuví' so' á.” Yo' me nana cunó so' ei —taj Jesucristó rihaan sí tachruu yo' a.

<sup>20</sup>—Nu' nana yo' unoj adonj. Vaa yo'ó se vaa achiin qui'yáj na' —taj sí tachruu yo' rihaan Jesucristó a.

<sup>21</sup>Gaa ne cataj Jesucristó rihaan so' a:

—Sese me rá so' cunuu sa' inanj nimán so', ne cavii so' ca'anj so', ne cutu'vee so' nu' si'yáá so', ne sa'anj quirí' so' ro', caxrii so' ston nij sí nique, ne cumán ndo'o si'yáá so' rej xta', qui'yaj Diose nanj ei. Ne dan me se ca'na' so', ne canocó' so' manj, ca'anj ní' á —taj Jesucristó a.

<sup>22</sup>Dan me se cuno sí tachruu yo' nana cataj xna'anj Jesucristó rihaan so', ne ca'anj uu so', ne nanó ndo'o rá so' a. 'O se sí ru'vee me so', ne vaa ndo'o si'yaj so' a.

<sup>23</sup>Gaa ne ca'mii Jesucristó rihaan nij sí tucu'yón se-nana so', cataj so': —Ya ya cataj xna'anj 'unj rihaan soj se vaa sayuun uxrá vaa quisij

sí ru'vee cayáan sí ru'vee ga  
Diose asa' guun chij Diöse rihaan  
chumiï nihánj nanj adonj. <sup>24</sup>Dan  
me se ne'en soj se vaa sayuun ndo'o  
vaa cachēn xcuu camelló rihaan  
yu'uj taj tacúun cúu nuvá, tzaj ne  
cuano nihánj me se cataj xna'anj  
'unj rihaan soj se vaa ca'vee a doj  
cachēn xcuu yo' yu'uj taj tacúun  
cúu nuvá, ndaa rá se vaa sí ru'vee,  
ne se guun cachēn so' cayáan  
so' ga Diöse asa' guun chij Diöse  
rihaan chumiï nihánj a ma' —taj  
Jesucristó a.

<sup>25</sup>Dan me se cuno nij sí tucu'yón  
se-nana Jesucristó nana ca'mii so',  
ne caráya'anj uxrá nij so', cataj nij  
so':

—Che'é dan me se me sí guun  
nucuaj quinaniï rihaan sayuun ga —  
taj nij so' a.

<sup>26</sup>Ni'yaj Jesucristó man nij so', ne  
cataj so':

—Se guun nucuaj yuviï quinaniï  
ma'an nij yuviï rihaan sayuun ma'.  
Sayuun uxrá vaa rihaan nij so'  
nanj adonj. Tzaj ne xa' Diöse me  
se ne sayuun a doj vaa rihaan so'  
a ma'. Canó rasuun ca'vee qui'yaj  
so' nanj adonj —taj so' a.

<sup>27</sup>Gaa ne cataj Pedró rihaan  
Jesucristó a:

—Ne núj ga. Aj tanáj núj nu' si'yaj  
núj, ne canoco' núj mán so' á. Daj  
quiran' núj ga —taj Pedró, xná'anj  
so' a.

<sup>28</sup>Gaa ne cataj Jesucristó:

—Veé sí noco' manj me soj, ne  
sí ca'née Diöse nicaaj yu'unj man  
yuviï mej adonj. Ne ya ya cataj  
xna'anj 'unj rihaan soj se vaa  
asa' cunuu naca chumiï nihánj, ne  
asa' guun che'ej cayánj gunj sí

rii ta'nga' rihaan chumiï nihánj,  
ne cayáan chuvij nij soj ca'ne' soj  
cacun' che'é chuvij nij x'ne' nij yuviï  
israelitá adonj. <sup>29</sup>Ne sí tanáj ve'  
tucú tanáj tinúú tanáj ra'vij tanáj  
rej tanáj nii tanáj ta'níí tanáj yo'óo  
tanáj canoco' so' manj ro', uxrá doj  
rasuun quirí' uún so', ne cayáan so'  
ga Diöse nu' cavii nu' ca'anj adonj.  
<sup>30</sup>Tzaj ne que'ee nij sí guun chij  
ndo'o rihaan chumiï nihánj ro',  
guun nij so' sí noco' ei. Ne que'ee  
nij sí ne guun chij rihaan chumiï  
nihánj me se guun chij nij so',  
qui'yaj Diöse nanj adonj.

**Cuentó nihánj taj xna'anj daj  
qui'yaj Diöse naru'vee Diöse rihaan  
taran' ní' sij 'yaj suun che'é so' a**

**20** "Ase vaa qui'yaj 'o sí  
to'oj rej man ndo'o coj  
chruj uvá ro', danj qui'yaj Diöse  
asa' guun chij Diöse rihaan chumiï  
nihánj adonj. Dan me se sí to'oj  
yo' ro', rej taxrej curihanj so' nano'  
so' sí qui'yaj suun rihaan to'óo so'  
rej man coj chruj uvá yo' a. <sup>2</sup>Gaa ne  
yo' o ca'mii so' ga nij sí qui'yaj suun  
rihaan to'óo so', se vaa 'o sa'anj  
denario go' so' che'é suun qui'yaj  
suun 'o 'o nij so' 'o güiï, ne ca'née  
so' man nij so', qui'yaj suun nij so'  
rihaan to'óo so' a.

<sup>3</sup>Gaa ne aga' uun curihanj uún  
sí to'oj yo', ca'anj so' rihaan yu'vee,  
gaa ne quene'en so' doj snó'o nicun'  
ma'an uun rihaan yu'vee, ne taj vaj  
suun rihaan nij so' a. <sup>4</sup>Gaa ne cataj  
so' rihaan nij so': "Ca'anj soj qui'yaj  
suun soj rihaan to'ój ei. Naru'vee  
'unj rihaan soj che'é nu' suun qui'yaj  
suun soj ei", taj so' rihaan nij  
mozó a. <sup>5</sup>Dan me se ca'anj nij snó'o

yo' qui'yaj suun nij so' uún to'óó síf to'oj yo' a.

”Gaa ne caxuj do', aga' va'nuj do', curihanj uún síf to'oj yo', ne nari' so' doj síf qui'yaj suun rihaan to'óó so', ne ca'neé so' man nij so' qui'yaj suun nij so' rihaan to'óó so' uún a.

6”Gaa ne aga' 'un' curihanj uún síf to'oj yo', ne nari' so' doj síf nicun' ma'an rihaan yu'vee a. “Me che'é nicun' ma'an soj nu' güii nihánj ga. Taj vaj suun qui'yaj suun soj á”, taj so', xná'anj so' man nij so' a.

7“Maan se taj síf rqué suun man núj qui'yaj suun núj ma'”, taj nij so' a. “Ca'anj soj qui'yaj suun soj rihaan to'óó ei”, taj so' rihaan nij so' a.

8”Veé dan, gaa ne nichrun' cata' güii tu'va quij, gaa ne ca'ne' síf to'oj yo' suun rihaan se-mozó so' síf tumé sa'anj se vaa naru'vee so' sa'anj rihaan nij síf qui'yaj suun rihaan to'óó so' yo' a. “Canacunj so' ca'na' nij síf qui'yaj suun yo', ne naru'vee so' rihaan nij so' á. Asino yaan naru'vee so' rihaan nij síf catúj suun aga' 'un', gaa ne naru'vee so' rihaan nij síf catúj suun rej na'yaan á”, taj so' rihaan síf tumé sa'anj yo' a.

9”Dan me se asino yaan ca'na' nij síf catúj naa aga' 'un' rihaan síf tumé sa'anj, ne 'o sa'anj denario quiri' 'o 'o nij so' a. 10Gaa ne ca'na' nij síf catúj suun rej na'yaan rihaan síf tumé sa'anj yo' a. Nocoo doj sa'anj quiri' nij so', rá nij so', tzaj ne veé danj 'o sa'anj denario quiri' 'o 'o nij so' uún a. 11Nicaj nij so' sa'anj, gaa ne guun che'e nij so' ca'maan rá nij so' ni'yaj nij so' síf to'oj yo', 12gaa ne cataj nij so': “Síf nihánj me se orún' orá guee qui'yaj suun

nij so', tzaj ne 'o cyaan naru'vee so' rihaan nij so' ga núj, ne qui'yaj suun núj nu' güii, ne go' uxrá naán xráá núj á”, taj nij so' rihaan síf to'oj yo' a. 13Gaa ne síf to'oj yo' cataj rihaan yo'o tuvi' nij mozó: “Ne ta'yunj mán so', man tinuj. Maan se aj ca'mii ní' che'é se vaa qui'yaj suun so' che'é 'o sa'anj denario che'é 'o güii a. 14Nacaj so' sa'anj qui'yaj canaán so', ca'anj so' á. Maan se inanj me raj cyaan naru'vej rihaan soj nanj adonj. 15Ne nó xcúnj qui'yáj se vaa rii nimanj, rá so' na'. Xcoj ruvaa rá so', che'é se qui'yáj se luj rihaan tuvi' so' na'”, taj síf to'oj yo' rihaan síf qui'yaj suun rihaan to'óó so' a.

16”Dan me se ase vaa qui'yaj síf to'oj yo' ro', danj qui'yaj uún Diose che'é nij síf 'yaj suun che'é Diose nanj adonj. Che'é dan nij síf ne guun chij rihaan chumi' nihánj me se xtá' ro', guun chij nij so' a. Ne nij síf guun chij ndo'o rihaan chumi' nihánj me se xtá' ro', guun nij so' síf nocó', qui'yaj Diose nanj adonj —taj Jesucristó a.

**Nana nihánj taj xna'anj se vaa síj va'nuj cataj xna'anj Jesucristó se vaa cavi' so' ne cunuu i'na' uún so' a**

17Gaa ne cavii Jesucristó ca'anj so' chuman' Jerusalén, ne ca'anj chujij nij síf tucu'yón se-nana so' ga so', qui'yaj so' a. Veé asij vaj orún' cha'núj nij so' ga Jesucristó chrej, ne ca'mii Jesucristó rihaan nij so', cataj so':

18—Nihánj me ca'anj ní' chuman' Jerusalén, ne quita'aa nii manj sij ca'neé Diose nicaj yu'unj man yuvij, ne nago' nii manj rihaan nij xrej

atā suun nocoo doj dɔ', rihaan nij sít naqui'yaj cuu se-tucuanj Moisés rihaan yuvii dɔ' a. Ne cutā' nij so' cacun' xráj, ne cataj nij so' se vaa cavi' 'unj a. <sup>19</sup>Gaa ne nago' nij so' manj rihaan nij sít yaníj, ne ca'nga' nacoo nij sít yaníj quene'en nij so' manj, ne go' nij so' cuartá xráj, ne cachron nij so' manj rihaan rcutze a. Gaa ne cachēn va'nuj güii, gaa ne cunuū i'na' uún 'unj, qui'yaj Diose ei —taj Jesucristó a.

**Nana nihánj taj xna'anj se vaa cachín ni'yaj nii sít cu'naj Jacobo dɔ', sít cu'naj Juan dɔ', se vaa catā roj so' suun sa' doj qui'yaj Jesucristó a**

<sup>20</sup>Gaa ne cuchi' nii sít cu'naj Jacobo dɔ', sít cu'naj Juan dɔ', rihaan Jesucristó, ne ta'níi sít cu'naj Zebedeo me uún roj so' a. Dan me se cuchi' nij ta'nij no' rihaan Jesucristó, gaa ne canicun' ruj no' rihaan Jesucristó, ne cataj no' se vaa vaa se cachinj ni'yaj no' rihaan so', rá no' a.

<sup>21</sup>—Me se achiin mán so' ga —taj Jesucristó, xná'anj so' man no' a.

Ne cataj no':

—Cataj xna'anj so' se vaa asa' guun chij so' rihaan chumií nihánj, ne quitaj roj ta'níj x'núú so', ne catā roj so' suun sa' doj qui'yáá so' á. Dan me se yo'ɔ so' cayáán rej nuva' so', ne yo'ó so' cayáán rej nichruún so', ne quirii ta'nga' roj so' ga so', cataj so', raj a —taj chana yo' a.

<sup>22</sup>Gaa ne cataj Jesucristó rihaan roj tinuj roj so' a:

—Ne ne'en roj soj me rasuun cachín ni'yaj roj soj rihanj nihánj a ma'. 'O se guun nucuaj roj soj

quiran' roj soj sayuun ndaa vaa quirán' 'unj na' —taj Jesucristó, xná'anj so' a.

—Guun nucuaj rój nanj adonj —taj roj so' a.

<sup>23</sup>Gaa ne cataj Jesucristó:

—Ya ya quiran' soj sayuun gaj nanj á. Tzaj ne ne nó xcúnj cataj xna'anj 'unj me sít cayáán x'núú 'unj rej nuva' 'unj dɔ', rej nichrunj dɔ', ma'. Orún' Réj sít nicun' xtā' cataj xna'anj me sít quirii ta'nga' gaj nanj adonj —taj Jesucristó a.

<sup>24</sup>Gaa ne cuno yo'ó chi' nij sít tucu'yón se-nana Jesucristó se vaa ca'mii roj tinuj roj so' rihaan Jesucristó, ne ca'maan rá nij so' ni'yaj nij so' man roj so' a. <sup>25</sup>Gaa ne canacúún Jesucristó man cunudanj nij so' se vaa ca'na' nij so' rihaan so', ne cataj so':

—Ne'en soj se vaa nij sít atā suun man rihaan chumií nihánj me se rii ta'nga' uxrá nij so' rihaan tuvi' nij so' nanj adonj. <sup>26</sup>Tzaj ne se gaa danj sca'núj nij soj a ma'. 'O se sese me rá nij soj guun chij nij soj rihaan tuvi' nij soj, ne guun nij soj sít qui'yaj suun rihaan taran' tuvi' nij soj, <sup>27</sup>ne ase vaa mozó ro', danj gaa xa' nij soj rihaan taran' tuvi' nij soj nanj adonj. <sup>28</sup>Dan me se ca'née Diose manj nīcaj yu'unj 'unj man yuvii, tzaj ne ne ca'na' 'unj ne guun nij yuvii mozó rihanj ma'. 'O se ca'ná' 'unj qui'yaj suun ma'anj rihaan nij yuvii nanj adonj. Ne ca'ná' 'unj nayon ma'anj rihaan yuvii ne cavi' 'unj che'é cacun' atā nij so', gaa ne cavií sa' uxrá nij so', qui'yáj nanj adonj —taj Jesucristó a.

**Nana nihánj taj xna'anj se vaa naxra' rihaan vij sít tuchrii, qui'yaj Jesucristó a**

<sup>29</sup>Gaa ne cavií nij so' chuman' Jericó, ne cachéé ndo'o yuvii xcó

Jesucristó a. <sup>30</sup>Ne vaa vij sí tuchrij ne tu'va chrej, ne cuno roj so' cuentó se vaa cachē Jesucristó rej ne roj so' a. Che'é dan caguáj roj so', cataj roj so':

—Ya ya ta'níi ta'nij si'no sí cu'naj David sí cane gaa naá mé so', Señor. Cunuu 'ee rá so' man rój ei —taj roj so' a.

<sup>31</sup>Tzaj ne:

—Dínj tu'va roj soj á —taj nij yuvij rihaan roj so' a.

Tzaj ne doj a nucuaj caguáj roj so', cataj roj so':

—Ta'níi ta'nij si'no sí cu'naj David sí cane gaa naá mé so', Señor. Cunuu 'ee rá so' man rój ei —taj uún roj so' a.

<sup>32</sup>Gaa ne canicun' Jesucristó, ne canacúún Jesucristó man roj so' se vaa ca'na' roj so' rihaan so', ne cataj roj so':

—Daj qui'yáj man roj soj, rá roj soj ga —taj Jesucristó, xná'anj so' man roj so' a.

<sup>33</sup>—Cunuu sa' rihaan rój, rá rój, Señor —cataj roj so' a.

<sup>34</sup>Gaa ne cunuu 'ee rá Jesucristó man roj so', ne cuta' Jesucristó ra'a Jesucristó rihaan roj so', gaa ne veé maan orá dan cunuu sa' rihaan roj so' nanj adonj. Gaa ne ca'anj roj so' ga Jesucristó a.

**Nana nihánj taj xna'anj daj**

**qui'yaj Jesucristó gaa catúj**

**Jesucristó chuman' Jerusalén a**

**21** Gaa ne cuchí' Jesucristó cuchí' nij sí tucuyón se-nana so' cuchí' tu'va chuman' cu'naj Betfagé a. Naj chuman' yo' tacóo quij cu'naj Quij man Chruun Olivó, ne nichrun' naj

chuman' Jerusalén ga chuman' cu'naj Betfagé yo' a. Gaa ne ca'neé Jesucristó man vij tuvi' nij sí tucuyón se-nana so' ca'anj roj so' rque chuman' yo', <sup>2</sup>ne cataj so' rihaan roj so' a:

—Catuu roj soj chuman' nihánj, chuman' naj rihaan ní', ne nari' nu' roj soj yo'o burró chana numii, ne vaa ta'níi xo' burró le'ej ya'anj nicun' ga xo' adonj. Nache roj soj man burró chana yo', ne nicaj roj soj man roj xo' ca'na' roj soj rihaan 'unj á. <sup>3</sup>Ne sese xna'anj nii man roj soj me che'é nache roj soj burró, ne cataj roj soj: “Síi 'nij ra'a man ní' achiin xcuu nihánj rihaan chuguanj”, cataj roj soj, gaa ne nu' ca'nej nij so' man roj xcuu ca'na' roj xcuu ga roj soj ei —taj Jesucristó rihaan roj so' a.

<sup>4</sup>Dan me se nu' yo' qui'yaj Jesucristó, qui'yaj guee so' ndaa vaa taj síi nata' se-nana Diose gaa naá a. Ne síi nata' yo' ro', cataj so': <sup>5</sup>“Dan me se cataj xna'anj soj rihaan nij síi man chuman' Jerusalén se vaa xcaj nij so' cuentá se vaa ca'na' síi guun chij rihaan nij so' adonj. Dan me se síi nica' nimán me so', quitaj so' xráa burró a. Dan me se quitaj so' xráa ta'níi xcuu 'yaj suun nanj adonj”, taj síi nata' yo' a.

<sup>6</sup>Dan me se ca'anj roj síi tucuyón se-nana Jesucristó, ne qui'yaj roj so' nu' ndaa vaa cataj xna'anj Jesucristó rihaan roj so' a. <sup>7</sup>Dan me se nicaj roj so' man roj ta'nij roj burró chana yo' ca'anj roj so' rihaan Jesucristó, ne cuta' roj so' yatzij xráa roj xcuu, ne cavii Jesucristó a. <sup>8</sup>Ne que'ee nij yuvii cuchruj yatzij sagan' nij yuvii rá chrej, ne ta'aj nij



tuvi' nij so' ro', ca'ne' ra'a chruun, ne caraa nij so' rá chrej, cachee roj burró yo' rihaan yatzíj do', rihaan ra'a chruun do' a. <sup>9</sup>Ne man uxrá yuvií quitáa yaan rihaan Jesucristó, ne man uxrá yuvií noco' rej xco Jesucristó a. Ne caguáj nij yuvií, cataj nij yuvií:

—Caraa guee ní' rihaan ta'níí ta'nij si'no sís cu'naj David sís cane gaa naá nanj á. Cunaj ndo'o vaa ca'na' sís ca'née sís 'nij ra'a man ní' adonj. Se luj ndo'o me 'yaj Diose che'é ní' á. Caraa guee ní' rihaan Diose sís nicun' xta' ei —taj nij yuvií, caguáj nij yuvií a.

<sup>10</sup>Dan me se catúj Jesucristó chuman' Jerusalén, ne caráya'anj taran' nij yuvií man chuman' yo', ne cataj nij so':

—Me sís atúj chuman' ga —cataj nij sís man chuman' Jerusalén, xná'anj nij so' man nij yuvií atúj chuman' Jerusalén a.

<sup>11</sup>—Sís nihánj me Jesucristó sís cavii chuman' Nazaret chuman' naj estadó Galilea, ne sís nata' se-nana Diose me so' adonj —taj nij yuvií catúj chuman' Jerusalén, ni'yaj nij so' man Jesucristó a.

**Nana nihánj taj xna'anj se vaa quirii Jesucristó man nij yuvií tu'véj rasuun man rá nuvíí noco'o a**

<sup>12</sup>Gaa ne catúj Jesucristó rá nuvíí noco'o, gaa ne quirii so' man taran' nij sís tu'véj rasuun do', man taran' nij sís quiránj rasuun man rá nuvíí do' a. Ne tiguíj ra'a so' nij chruun mesá natuná nii sa'anj rihaan, ne tiguíj ra'a so' chruun xlá taj nij sís tu'véj cha'aan a. <sup>13</sup>Gaa ne ca'mii so' rihaan nij so', cataj so':

—Danj Diose taj se vaa tucúa Diose rej na'víj yuvií rihaan Diose me nihánj á. Tzaj ne guun tucua sís ituu man tucúa Diose nihánj, qui'yaj soj nanj á —taj Jesucristó a.

<sup>14</sup>Gaa ne catúj sís tuchrii catúj sís rengo catúj rá nuvíí, ne nahuun sa' nij so', qui'yaj Jesucristó a.

<sup>15</sup>Ne man xnii catúj rá nuvíí, ne caguáj nij xnii cataj nij xnii:

—Caraa guee ní' rihaan sís nihánj ta'níí ta'nij si'no sís cu'naj David sís cane gaa naá ei —taj nij xnii a.

Ne vaa xrej ata suun noco'o doj vaa sís naquiyaj cuu se-tucuanj Moisés vaa, ne quene'en nij so' nu' suun sa' qui'yaj Jesucristó rá nuvíí, ne cuno nij so' nana caguáj nij xnii a. Gaa ne ca'maan rá nij so', <sup>16</sup>ne cataj nij so':

—Unó so' nana aguáj xnii nihánj na'. Me che'é a'vej so' caguaj xnii danj ga —taj nij so', xná'anj nij so' man Jesucristó a.

Ne cataj Jesucristó:

—Unó 'unj ei. Me che'é na'vej rá nij soj ca'mii xnii danj ga. Ne ni'yaj soj, ne Diose ca'née nana vaa danj nimán xnii ca'mii xnii danj a. Me che'é ne nayaá nij soj nana no rihaan danj Diose ga. Ése gaa naá, ne ca'mii yo'o so' rihaan Diose, cataj so' se vaa ve'é ca'mii xnii do', ve'é ca'mii ne'ej utzii too do', rihaan Diose, qui'yaj ma'an Diose, taj nana no rihaan danj Diose a —taj Jesucristó rihaan nij so' a.

<sup>17</sup>Gaa ne tanáj Jesucristó man nij so', ne curihanj so' chuman' Jerusalén, ne ca'anj so' chuman' Betania, ne caran' so' 'o yan' a.

Nana nihánj taj xna'anj se vaa  
canacoꝝ 'o chruun man chruj  
higó, qui'yaj Jesucristó a

<sup>18</sup>Rej ranga' cavii uún Jesucristó  
ca'anj so' chuman' Jerusalén,  
ne na'aaan rque so' a. <sup>19</sup>Gaa ne  
quene'en so' 'o chruun man chruj  
higó nicun' tu'va chrej, ne ca'anj so'  
tacóo chruun yo', tzaj ne taj vaj a 'ó  
chruj higó ne quirí' so' a ma'. Maan  
nanj coj uun táa raá chruun yo' a.  
Gaa ne ca'mii so' rihaan chruun yo',  
cataj so':

—Daj chihaa mǐj se cumán chruj  
raá so' ma' —taj Jesucristó a.

Ne nu' ca'mii so' ga chruun, ne  
maan orá dan canacoꝝ chruun  
man chruj higó yo' a. <sup>20</sup>Gaa ne  
caráya'anj nij síi tucuyón se-nana  
Jesucristó, quene'en nij so' se vaa  
quiran' chruun yo' a. Ne cataj  
nij so':

—Aa' ca'vee nu' nacoꝝ chruun  
nihánj cuano ga —taj nij so',  
caráya'anj nij so' a.

<sup>21</sup>Gaa ne cataj Jesucristó rihaan  
nij so' a:

—Ya ya cataj xna'anj 'unj rihaan  
soj cuano se vaa sese se guun vij  
rá soj ne yo' o cuchuman rá soj, ne  
doj a qui'yaj soj vaa güii, se vaa  
qui'yáa 'unj man chruun nihánj  
a adonj. Dan me se cataj xna'anj  
nij soj rihaan quij xcaan yo' se  
vaa curihanj quij rej nicun' quij  
ne ca'anj nij quij rque na ya'anj,  
ne ya ca'anj nij yo' rque na ya'anj,  
qui'yaj soj adonj. <sup>22</sup>Ne nu' se vaa  
cachinj ni'yaj soj rihaan Diose ro',  
rque Diose rihaan soj, sese ya ya  
cuchuman rá soj nanj adonj —taj  
Jesucristó a.

Nana nihánj taj xna'anj se vaa  
xna'anj nii man Jesucristó me  
síi ca'ne' suun rihaan so' qui'yaj  
so' ndaa vaa 'yaj so' a

<sup>23</sup>Gaa ne catúj Jesucristó rá nuvíi,  
ne tucuyón so' nana man nij síi man  
rá nuvíi yo' a. Gaa ne cuchi' nij xrej  
ata suun nocoo doj do', nij síi uun  
chij rihaan nij yuvií do', rihaan so', ne  
xna'anj nij so' man so', cataj nij so':  
—Me síi ca'ne' suun rihaan so'  
qui'yáa so' ndaa vaa 'yáa so' ga —  
taj nij so' a.

<sup>24</sup>Gaa ne cataj Jesucristó rihaan  
nij so' a:

—Ne vaa yo' o nana xna'anj 'unj  
man nij soj, ne sese ya cataj xna'anj  
nij soj nana yo' rihanj, ne cataj  
xna'anj 'unj rihaan soj me síi ca'ne'  
suun rihanj a. <sup>25</sup>Dan me se me síi  
ca'ne' suun rihaan síi cu'naj Juan  
cuta' ne so' man yuvií, rá soj ga.  
Ma'an Juan cavii raá na'. Ase  
Diose cataj xna'anj rihaan so' xa'.  
Cataj xna'anj nij soj rihanj á —taj  
Jesucristó a.

Gaa ne nuchruj raá ndo'o nij so' ga  
tuvi' nij so', cataj nij so':

—Sese cataj ní' se vaa Diose ca'ne'  
suun rihaan síi cu'naj Juan cuta' ne  
so' man yuvií, ne cataj Jesucristó  
rihaan ní' me che'é ne cuchuman  
rá ní' nana ca'mii Juan, cataj so' a.  
<sup>26</sup>Tzaj ne sese cataj ní' se vaa nuveé  
sij ca'ne' Diose suun rihaan me síi  
cu'naj Juan, ne ca'maan rá nij yuvií,  
ne quiran' ní' sayuun, qui'yaj nij  
yuvií nanj á. 'O se nij yuvií me se  
síi ca'neé Diose nata' se-nana Diose  
me síi cu'naj Juan, rá cunudanj nij  
yuvií nanj á —taj nij so' rihaan tuvi'  
nij so' a.

<sup>27</sup>Gaa ne cataj nij so' rihaan Jesucristó:

—Ne ne'en núj me sí ca'ne' suun rihaan sí cu'naj Juan cuta' ne so' man yuvii ma' —taj nij so' a.

—Che'é dan se cataj xna'anj 'unj rihaan nij soj me sí ca'ne' suun rihanj qui'yáj ndaa vaa 'yáj ma' —taj Jesucristó rihaan nij so' a.

**Nana nihánj me cuentó nanó Jesucristó che'é roj ta'ní 'o so' a**

<sup>28</sup>Gaa ne nanó Jesucristó cuentó nihánj cuno nij so' a:

—Ne daj vaa nana nihánj nana cataj xna'anj 'unj rihaan soj, rá soj ga. Vaa vij ta'ní 'o so' a. Ne cuchi' so' rihaan yo'o ta'ní so', cataj so': “Cuan' cavii so' qui'yaj suun so' rque naa chruj uvá, rej”, taj so' rihaan ta'ní so' a. <sup>29</sup>“Se ca'anj 'unj ma'”, taj xnii yo' rihaan rej so' a. Tzaj ne orá nii doj naqui'yaj nica' so' nimán so', ne ca'anj qui'yaj suun so' a. <sup>30</sup>Gaa ne cuchi' rej xnii rihaan yo'ó ta'ní so', ne cataj xna'anj so' se vaa ca'anj xnii yo', qui'yaj suun yo' a. “Ca'anj 'unj, ataj”, taj so' rihaan rej so' a. Tzaj ne ne ca'anj so' qui'yaj suun so', ne tiha' so' man rej so' a. <sup>31</sup>Ne me ta'ní snó'o yo' cuno sa' rihaan so', rá soj ga —taj Jesucristó, xna'anj Jesucristó man nij so' a.

—Xnii ca'anj qui'yaj suun ro', cuno ya so' rihaan rej so' ei —taj nij so' rihaan Jesucristó a.

Gaa ne cataj Jesucristó rihaan nij so' a:

—Ya ya cataj xna'anj 'unj rihaan nij soj cuano se vaa nij sí tiha' yu'unj man yuvii che'é puextó do', nij chana niha' rá ga chii do',

quitaj yaan rihaan soj catuu nij so' rihaan Diose asa' guun chij Diose rihaan chumii nihánj, ne quinaj xco nij soj adonj. <sup>32</sup>O se cuchi' sí cu'naj Juan rihaan nij soj, ne tucu'yón so' rihaan nij soj daj qui'yaj soj cuno sa' soj rihaan Diose, tzaj ne ne cuchuman rá nij soj nana ca'mii so' ma'. Tzaj ne nij sí tiha' yu'unj man yuvii che'é puextó do', nij chana niha' rá ga chii do', cuchumán rá nana ca'mii Juan nanj adonj. Ne quene'en soj se vaa cuchumán rá nij so', tzaj ne ne nuchran' nimán soj, ne ne cuchuman rá ma'an soj ma'.

**Nana nihánj me cuentó nanó Jesucristó che'é yuvii chi'ii 'yaj suun rihaan yo'óo a**

<sup>33</sup>Ne cuno uún nij soj yo'ó cuentó nihánj á. Dan me se vaa yo'ó sí to'oj, ne chruj so' yo'ó naa chruj uvá, ne qui'yaj so' chingá nu' anicaj tu'va naa yo', gaa ne gáán so' yu'uj rej xtun' chruj uvá ne cavii na, ne cune' so' 'o ve' nata' cayáán nij sí cutumé naa yo' a. Gaa ne tanáj so' man naa yo' rihaan sí qui'yaj suun naa yo', ne curihanj so' ca'anj so' gan' a. <sup>34</sup>Cachén doj yavii, ne quisij yavii cuta' nii chruj uvá, ne ca'neé sí xnaa yo' man yo'ó ta'aj nij se-mozó so' rihaan nij sí nuu tumé xnaa so' a. Me rá so' ca'na' nica' yo'ó nij se-mozó so' doj chruj uvá rihaan ma'an so' a. <sup>35</sup>Gaa ne quita'aa nij sí nuu tumé naa man yo'ó nij mozó cuchi' uún a. Dan me se go' uxrá nij so' chruun xráa yo'ó mozó yo', ne ticavi' nij so' man yo'ó mozó yo', ne go' uxrá nij so' yahij man yo'ó mozó yo' ne yuun

che'ë cavi' so' nanj adonj. <sup>36</sup>Gaa ne ca'née uún sí xnaa yo' man yo'ó danj mozó ca'anj uún rej naj xnaa so' a. Tzaj ne nij sí nuu tumé naa ro', yo'ó danj qui'yaj uún nij so' man uún nij sí cuchi' uún a. <sup>37</sup>Veé dan, gaa ne ca'née sí xnaa yo' ta'níi so' rej man nij sí nuu tumé xnaa so' a. “Caraa cochroj nij sí tumé naa rihaan ta'níj sese ca'anj ta'níj saj xee”, taj sí xnaa yo' a. <sup>38</sup>Tzaj ne quene'en nij sí tumé naa man ta'níi sí xnaa, ne cataj nij so': “Síi nihánj me síi guun síi xnaa naa nihánj vaa güii ei. Che'é dan ticavi' ní' man so', ne vaa güii, ne guun xnaa ma'an ní' man naa nihánj chuguanj”, taj nij so' rihaan tuvi' nij so' a. <sup>39</sup>Gaa ne quita'aa nij so' man ta'níi sí xnaa yo', ne quirii nij so' xe', ne ticavi' nij so' man ta'níi sí xnaa adonj. <sup>40</sup>Ne vaa güii, ne ca'na' uún síi xnaa yo', ne daj qui'yaj so' man nij síi nuu tumé xnaa so', rá nij soj ga —taj Jesucristó, xná'anj so' man nij xrej do', man nij síi uun chij do' a.

<sup>41</sup>—Qui'yaj ndo'o síi xnaa yo' sayuun man nij síi chi'ii 'yaj suun xnaa so', ticavi' so' man nij so' nanj á. Ne taçuachén so' xnaa so' rihaan yo'ó síi tumé xnaa so', ne yavii cuta nii chruj uvá ro', ve'é rque nij so' chruj yo' rihaan síi xnaa yo' nanj adonj —taj nij so' rihaan Jesucristó a.

<sup>42</sup>Gaa ne cataj Jesucristó:

—Me che'é ne nayaa nij soj nana nihánj nana no rihaan danj Diose ga: “Yuvej quirii'ij nij síi cune' ve' ro', guun yuvej sa' doj rihaan cunudanj nij yuvej man tacóo ve' yo' nanj adonj. Ma'an síi 'nij ra'a

man ní' qui'yaj yo', ne cunaj uxrá vaa yo', rá ní' á”, taj danj Diose a. <sup>43</sup>Che'é dan cuano nihánj me se cataj xna'anj 'unj rihaan nij soj se vaa ca'nee Diose se-suun soj suun guun chij ga Diose rihaan chumii nihánj, gaa ne cune' Diose man yo'ó yuvii se vaa guun chij yo'ó nij yuvii rihaan chumii nihánj ga so', ne ve'é qui'yaj yo'ó nij yuvii yo' nu' se vaa me rá Diose qui'yaj nij so' nanj á. <sup>44</sup>Ne yuvej yo' me se ase vaa yuvej yo' vaa 'unj, ne ase vaa yuvii tíxé yuvej yo' vaa yuvii na'vej rá cuno rihaan 'unj, ne uxrá quiran' nij so' sayuun nanj adonj. Ne ase vaa yuvii quini'ij yuvej yo' xráa vaa nij yuvii qui'yáa 'unj sayuun man, ne yuun che'ë quina'vij nij so' nu' cavii nu' ca'anj nanj adonj —taj Jesucristó a.

<sup>45</sup>Dan me se cuno nij xrej ata suun nocoo doj cuno nij síi fariseo cuno cuentó nanó Jesucristó, ne quene'en nij so' se vaa che'ë ma'an nij so' me cuentó nanó Jesucristó a. Ase vaa nij síi nuu tumé naa vaa ma'an nij so' ni'yaj Jesucristó, ne quene'en nij so' se vaa che'é dan nanó Jesucristó cuentó yo' a. <sup>46</sup>Gaa ne nanó rá nij so' daj gaa quita'aa nij so' man Jesucristó, tzaj ne cuchu'vi' nij so' ni'yaj nij so' man nij yuvii a. 'O se síi nata' se-nana Diose me Jesucristó, rá nij yuvii a.

**Nana nihánj me cuentó nanó Jesucristó che'é nij síi catuu rihaan Diose asa' guun chij Diose rihaan chumii nihánj a**

**22** Gaa ne ca'mii uún Jesucristó, nanó so' doj cuentó rihaan nij so', cataj so':

<sup>2</sup>—Ase vaa qui'yaj yo'ó síi nicaj suun rey ro', danj qui'yaj uún

Diose asa' guun chij Diosé rihaan chumií nihánj ei. Dan me se síí nicaj suun rey yo' me se qui'yaj so' cha'anj che'é ta'níí so' síí nara'aa, <sup>3</sup>ne vaa yuvii navij rá cha'anj ga so', ne ca'néé so' se-mozó so' ca'anj nij so' rihaan nij yuvii, cataj xna'anj se-mozó so' rihaan nij yuvii se vaa ca'na' nij so' tucua' so' navij rá nij so' cha'anj nara'aa yo', tzaj ne ne ca'vej nij yuvii yo' ca'na' nij so' tucua' síí nicaj suun rey a. <sup>4</sup>Gaa ne ca'néé uún so' man doj se-mozó so' rihaan nij síí navij rá cha'anj ga so', ne ca'néé so' nana rihaan nij yuvii yo' se vaa aj qui'yaj chuvii so' cha ni'yánj nij so' do', se vaa aj ticavi' so' scúj aj ticavi' so' scúj le'ej ramii ndo'o aj ticavi' so' do', se vaa aj vaa chuvii nu' rasuun qui'yaj so' a. Che'é dan ca'na' nij so', ne navij rá nij so' cha'anj ga so', ne che'é dan ca'néé so' nana rihaan nij síí navij rá cha'anj ga so' a.

<sup>5</sup>Tzaj ne ne ca'na' a 'ó nij so' a ma'. Maan se ta'aj nij so' ca'anj qui'yaj suun xnaa nij so', ne yo'ó ta'aj nij so' ca'anj cutu'vee rasuun rihaan yuvii uún a. <sup>6</sup>Ne yo'ó nij so' quita'aa man nij se-mozó síí nicaj suun rey, ne qui'yaj chi'ii nij so' man mozó yo', ne ticavi' nij so' man mozó nacúún man nij so' a. <sup>7</sup>Gaa ne ca'maan ndo'o rá síí nicaj suun rey yo', ne ca'néé so' man nij se-tanu so' ca'anj ticavi' nij so' man síí ticavi' man se-mozó so' a. Cuchi' nij tanuu rihaan nij síí ticavi' man mozó yo', ne ticavi' nij tanuu man nij so', ne caxrój ya'an nij tanuu man se-chuman' nij so', ne cacaa nu' chuman' yo' a.

<sup>8</sup>Gaa ne ca'mii síí nicaj suun rey rihaan nij se-mozó so', cataj

so': "Síj qui'yaj chuvii ní' navij rá ní' cha'anj, tzaj ne nij síí me rá 'unj navij rá cha'anj gaj me se nuveé sij sa' me nij so' a ma'. Ne nó xcúún nij so' ca'na' nij so' ma'. <sup>9</sup>Che'é dan ca'anj soj rej nuná tuvi' chrej, ne naj guun yuvii nari' soj ro', cataj xna'anj soj rihaan yuvii yo' se vaa ca'na' nij so' navij rá nij so' cha'anj ga ní' á". Danj ca'mii so' rihaan se-mozó so', <sup>10</sup>gaa ne curihanj nij mozó, ne naquiyaj chre' nij so' man cunudanj nij yuvii nari' nij so' rá chrej, ne dan me se ta'aj nij yuvii yo' me síí chi'ii, ne ta'aj nij yuvii yo' me síí sa' a. Dan me se quisíj caraa nu' ve' canuú cha'anj, gaa ne ca'anj cayáán taran' nij yuvii rihaan mesá cha ni'yánj nij so' a.

<sup>11</sup>Gaa ne catúj síí nicaj suun rey yo' rá ve' chá ni'yánj nij so', ne quene'en so' man yo'ó so', se vaa nuvi' yatzíj nuu nij síí navij rá cha'anj nara'aa nuú so' a. <sup>12</sup>Gaa ne ca'mii síí nicaj suun rey rihaan so', cataj so': "Me che'é catúj so' rá ve' nihánj ve' anuú cha'anj, ne nuvi' yatzíj nara'aa nuú so', ga tinu'", taj so' a. Ne guun na'aj so', ne ne ca'mii so' a. <sup>13</sup>Gaa ne ca'ne' síí nicaj suun rey yo' suun rihaan nij se-mozó so', cataj so': "Numíj soj tacóó síí nihánj numíj soj ra'a síí nihánj numíj soj, ne quir'lij soj man so' xe' ca'anj so' rej rmi' á", taj síí nicaj suun rey yo' a. Rej rmi' yo' me se yo' me rej ta'vee ndo'o yuvii ne ndaa cha ruj yuvii cúu yan' yuvii adonj. <sup>14</sup>Ó se nacúún Diosé man uxrá yuvii ca'na' nij yuvii cayáán nij yuvii ga so', tzaj ne doj vaa nij yuvii narii Diosé cané ga so' nanj adonj —taj Jesucristó a.

**Nana nihánj taj xna'anj che'é puextó go' ní rihaan gobiernó ne che'é se rque ní rihaan Diose do' a**

<sup>15</sup>Gaa ne curihañj nij sí fariseo, ne nuchruj raá nij so' ga tuvi' nij so' daj qui'yaj nij so' cuta' nij so' cacun' xráa Jesucristó che'é nana ca'mii Jesucristó a. <sup>16</sup>Gaa ne ca'née nij so' man nij sí tucu'yón se-nana ma'an nij so' do', man nij sí noco' man sí cu'naj Herodes do', cuchí' nij so' rihaan Jesucristó a. Ne cataj nij so' rihaan Jesucristó a:

—Ne'en núj se vaa nana ya inañj a'mii so', ne ya tucu'yón so' rihaan yuvii daj qui'yaj yuvii canoco' yuvii man Diose, maestro. Ne ne chu'ví' so' ni'yaj so' man nij yuvii daj cataj yuvii ma'. Ne 'o cuyaan vaa nu' yuvii rihaan so' chuguanj. <sup>17</sup>Che'é dan cataj xna'anj so' rihaan núj daj qui'yaj yuvii, rá so' á. No xcúun yuvii go' yuvii puextó rihaan sí nicaj suun cu'naj César na'. Ase se go' yuvii xa' —taj nij so', xná'anj nij so' nana tihá' yu'unj man Jesucristó a.

<sup>18</sup>Tzaj ne quene'en Jesucristó se vaa me rá nij so' qui'yaj chí'ii nij so' man so' a. Che'é dan cataj so':

—Me che'é me rá soj tihá' yu'unj soj manj ne cuta' soj cacun' xráj ga. 'O se sí tihá' yu'unj man yuvii me soj, ne quij vaa nimán soj adonj.

<sup>19</sup>Tihaan soj rihanj daj vaa sa'anj o' nii che'é puextó á —taj Jesucristó rihaan nij sí me rá tihá' yu'unj yo' a.

Gaa ne nano' nij so' sa'anj aga' o' yuvii che'é puextó, ne tihaan nij so' sa'anj aga' yo' rihaan Jesucristó a.

<sup>20</sup>—Me sí nó rihaan sa'anj aga' nihánj ga. Ne me sí se-chuvii nó

rihaan sa'anj aga' nihánj ga —taj Jesucristó, xná'anj so' man nij sí me rá tihá' yu'unj yo' a.

<sup>21</sup>—Sí nicaj suun cu'naj César me nó rihaan sa'anj aga' yo', ne nó se-chuvii so' rihaan sa'anj ei —taj nij so' a.

Gaa ne cataj Jesucristó:

—Che'é dan go' soj si'yaj sí nicaj suun cu'naj César rihaan ma'an so', ne rque soj si'yaj Diose rihaan Diose á —taj Jesucristó a.

<sup>22</sup>Dan me se cuno nij so' nana ca'mii Jesucristó, ne ca'anj rá nij so', ne tanáj nij so' man Jesucristó, ca'anj nij so' a.

**Nana nihánj taj xna'anj se vaa ya cunuu i'na' uún nij sí cavi' a**

<sup>23</sup>Ne corá cuchí' doj nij sí saduceo rihaan Jesucristó a. Nij sí saduceo ro', a'mii nana nihánj se vaa daj chihaa mij se cunuu i'na' uún yuvii asa' cavi' yuvii, taj nij so' a. Dan me se xná'anj nij so' man Jesucristó, <sup>24</sup>ne cataj nij so' nana nihánj a:

—Cataj xna'anj sí cu'naj Moisés nana nihánj cunó ní' a: “Sese cavi' yo'o so', ne sese taj vaj ta'ní' so', ne no xcúun tinúu so' xcaj tinúu so' man choco' so' chana quináj, ne cotoj tinúu sí cavi' ga choco' so', ne cuchruj no' ne'ej, ne guun ta'nij sí cavi' man ne'ej yo', ne cunuú ne'ej yo' rihaan to'óo sí cavi' yo' a”, taj sí cu'naj Moisés gaa naá, maestro. <sup>25</sup>Dan me se vaa chíj nij tinuj 'o' nij so' ne ga núj a. Sí chava' ro', xcaj man chana, tzaj ne cavi' so', ne taj vaj ne'ej cuchruj chana nica' so', qui'yaj so', ne che'é dan quináj uun chana yo', ne che'é dan xcaj

scue'ee sí cavi' yo' man choco' so' a. <sup>26</sup>Tzaj ne cavi' so' uún, ne quináj uun chana xcaj scue'ee so' uún, ne veé dan me se xcaj chij nij tinuj nij so' man chana yo', tzaj ne cavi' taran' nij so' nanj á. <sup>27</sup>Síj, gaa ne cavi' ma'an chana yo' uún, <sup>28</sup>ne dan me se asa' cunuu i'na' uún nij sí cavi', gaa ne me nij tinuj nij so' nica' man chana yo', rá so' ga. 'O se gaa vaa i'na' nij so', ne nica taran' nij tinuj nij so' guun orún' no' a —taj nij sí saduceo, xná'anj nij so' man Jesucristó a.

<sup>29</sup>Gaa ne cataj Jesucristó rihaan nij so' a:

—Ne ne'en uxrá soj ma'. 'O se ne ne'en soj me taj danj Diose, ne ne ne'en soj sese nucuaj ndo'o Diose a. <sup>30</sup>'O se asa' cunuu i'na' uún nij sí cavi', ne se xcaj tuvi' nij so' a ma'. 'O se ase vaa yáán nij se-mozó Diose rej xta' ro', danj gaa cayáán nij so' nanj adonj. <sup>31</sup>Gaa ne cataj xna'anj 'unj rihaan soj daj gaa quene'en soj se vaa ya ya cunuu i'na' uún yuvii asa' cavi' yuvii ei. Ataa nayaa soj nana nihánj nana ca'mii ma'an Diose na'. Dan me se se-nana Diose taj: <sup>32</sup>“Diose sí noco' nij sí man gaa naá sí cu'naj Abraham do', sí cu'naj Isaac do', sí cu'naj Jacob do', mej a.” Danj ca'mii Diose che'é nij sí man gaa naá yo' a. Dan me se nuveé se-Diose nij xngá me Diose ma'. Inanj nij sí vaa i'na' a'vee noco' man Diose nanj adonj. Che'é dan, nda' se sí cane gaa naá me va'nuj nij so', tzaj ne vaa i'na' nij so' rihaan Diose nanj ei —taj Jesucristó a.

<sup>33</sup>Dan me se cuno nij yuvii nana ca'mii Jesucristó, gaa ne guun niha'

uxrá rá nij so' se vaa ve'é uxrá tucuyón so' a.

**Nana nihánj taj xna'anj me nana me nana noco' doj cuno ní a**

<sup>34</sup>Dan me se cuchí' nana rihaan nij sí fariseo se vaa sa' uxrá ca'mii Jesucristó rihaan nij sí saduceo ne taj vaj nana nari' nij sí saduceo ca'mii uún nij so' rihaan Jesucristó ma'. Gaa ne cunuu chre' nij sí fariseo nuchruj raa nij so' daj qui'yaj ma'an nij so' a. <sup>35</sup>Gaa ne xná'anj yo'o tuvi' nij so' yo'o nana man Jesucristó, quene'en so' sese guun nucuaj Jesucristó cataj xna'anj Jesucristó nana yo' a. Dan me se cataj so':

<sup>36</sup>—Me nana cataj xna'anj Moisés me nana noco' ndo'o nana cuno uxrá ní ga —taj so', xná'anj so' a.

<sup>37</sup>Gaa ne cataj Jesucristó:  
—“Ndaa nimán yá so' guun rá so' ni'yaj so' man Diose sí 'nij ra'a man ní, ne yo'o ndaa cúu yave man so' cuchuman rá ni'yaj man Diose nanj adonj”. <sup>38</sup>Ne nihánj me ya nana uun chij ya nanj ei. <sup>39</sup>Ne ase vaa nana yo', danj vaa yo'ó nana nihánj nana me rá Diose cuno uún ní a: “Adi' se 'ee rá so' man ma'an so' ro', danj gaa 'ee rá so' man tuvi' so' á”. <sup>40</sup>'O cuya'an a'mii roj nana nihánj ga nu' tucuaán cuchruj sí cu'naj Moisés gaa naá do', ga nu' nana nata' nij sí nata' se-nana Diose gaa naá do' nanj adonj —taj Jesucristó a.

**Nana nihánj taj xna'anj se vaa sí ca'nej Diose tinanii man yuvii rihaan sayuun ro', nuveé nanj yuvii me so' ma'**

<sup>41</sup>Dan me se nuu chre' nij sí fariseo rihaan Jesucristó, gaa

ne xná'anj Jesucristó man nij so',  
cataj so':

<sup>42</sup>—Daj sij me sí ca'nej Diose  
t̄inanii man yuvīi rihaan sayuun, rá  
nij soj ga. Me sí tuvīi me so', rá soj  
ga —taj Jesucristó, xná'anj so' man  
nij sí fariseo a.

—Ta'níi ta'nij si'no sí cu'naj  
David sí cane gaa naá me sí  
ca'na' t̄inanii man yuvīi rihaan  
sayuun nanj á —taj nij sí  
fariseo a.

<sup>43</sup>Gaa ne cataj Jesucristó:

—Tzaj ne gaa cunuú Nimán  
Diose nimán sí cu'naj David,  
ne cataj David se vaa sí 'nij  
ra'a man ma'an so' me sí ca'nej  
Diose t̄inanii man yuvīi rihaan  
sayuun nanj á. Dan me se cataj  
so': <sup>44</sup>“Ca'mii Diose sí 'nij ra'a  
man ní' rihaan sí 'nij ra'a manj,  
cataj so' se vaa cayáán sí 'nij ra'a  
manj x'núú Diose rej nuva' Diose  
ndaá se quisij qui'yaj canaán Diose  
rihaan taran' nij sí taj ri'yunj  
man sí 'nij ra'a manj ne quirii  
ta'nga' sí 'nij ra'a manj rihaan  
nij so' nanj adonj”, taj sí cu'naj  
David yo' a. <sup>45</sup>Dan me se sí 'nij  
ra'a man sí cu'naj David me sí  
ca'nej Diose t̄inanii man yuvīi  
rihaan sayuun, taj sí cu'naj David  
yo' a. Sese 'nij ra'a so' man David,  
ne me che'é taj soj se vaa nanj  
ta'níi ta'nij si'no David me so' ga.  
Taj che'é cataj soj se vaa nanj  
yuvīi me so' ma' —taj Jesucristó  
rihaan nij sí fariseo yo' a.

<sup>46</sup>Ne a 'ó nij so' ne guun nucuaj  
cataj xna'anj 'o nana rihaan  
Jesucristó, ne a 'ó nij so' ne quisij  
rá xná'anj doj nana man Jesucristó  
a ma'.

Nana nihánj taj xna'anj che'é  
cacun' tumé nij sí naqui'yaj  
c̄uu se-tucuaj Moisés do', che'é  
cacun' tumé nij sí fariseo do' a

**23** Gaa ne ca'mii Jesucristó  
rihaan nij yuvīi do', rihaan  
nij sí tucu'yón se-nana so' do',  
<sup>2</sup>cataj so':

—Nij sí naqui'yaj c̄uu se-tucuaj  
Moisés do', nij sí fariseo do', at̄a nij  
so' se-suun sí cu'naj Moisés sí cane  
gaa naá a. <sup>3</sup>Che'é dan, naj guun  
nana cataj nij so' rihaan soj ro', cuno  
soj nu' nana yo', ne danj qui'yaj  
guee soj á. Tzaj ne se qui'yaj soj  
ndaá vaa 'yaj nij so' a ma'. 'O se  
taj xna'anj nij so' daj qui'yaj yuvīi,  
tzaj ne ne 'yaj ma'an nij so' se vaa  
taj nij so' ma'. <sup>4</sup>Ne a'ne' uxrá nij  
so' suun rihaan yuvīi daj qui'yaj  
yuvīi canoco' yuvīi man Diose,  
ne dan me se ase vaa yuvīi araa  
ndo'o rasuun 'ee xráá tuvi' vaa nij  
so', tzaj ne a doj ne racūj nij so'  
man yuvīi cata yuvīi rasuun 'ee yo'  
a ma'. A 'ó raq ra'a nij so' ne racūj  
nij so' man yuvīi nanj man adonj.  
<sup>5</sup>Naj guun suun sa' 'yaj nij so' ro',  
tzaj ne maan che'é rej me rá nij so'  
quene'en yuvīi, ne che'é dan 'yaj  
nij so' danj nanj adonj. 'O se caxra'  
ndo'o vaa nij caxran' nuu se-nana  
Diose noco' rihaan nij so', 'yaj nij  
so', ne xcaan ndo'o vaa yiquitzij  
noco' tu'va sagan' nij so', 'yaj uún  
nij so', <sup>6</sup>ne niha' rá nij so' nano'  
nij so' rej sa' doj quitaj nij so' gaa  
'anj nij so' cha'anj, ne niha' rá nij  
so' nano' nij so' chruun xlá sa' doj  
quitaj nij so' rá ve' tucu'yón yuvīi  
se-tucuaj Moisés, <sup>7</sup>ne niha' rá nij  
so' gaa ve'é a'mii yuvīi ga nij so'



gaa chéé nij so' yu'vee, ne niha' rá nij so' cataj yuvii “Sís guun chij” rihaan nij so', <sup>8</sup>tzaj ne ma'an soj ro', se guun cataj yuvii “Sís guun chij” rihaan ma'an soj, qui'yaj soj a ma'. 'O se vaa orún' sís uun chij rihaan soj, ne tinuj taran' soj nanj á. <sup>9</sup>Ne se guun cataj soj “Ataj chij” rihaan yuvii man rihaan chumii nihánj a ma'. 'O se vaa orún' Rej soj sís nicun' xta' á. <sup>10</sup>Ne se guun cataj yuvii se vaa noco' nij yuvii man soj, qui'yaj soj a ma'. 'O se orún' sís ca'neé Diose tinanii man yuvii rihaan sayuun me sís canoco' soj man nanj adonj. <sup>11</sup>Ne me ma'an tuvi' soj sís 'yaj suun che'é soj ro', yo' me sís sa' doj rihaan taran' soj, <sup>12</sup>ne xa' sís me rá ticavii sa' man ma'an, tzaj ne quiri' so', ne guun na'aj so', ne xa' sís 'yaj nica' nimán, tzaj ne cavii sa' so' adonj —taj Jesucristó rihaan nij yuvii a.

<sup>13</sup>Gaa ne canicaj Jesucristó ca'mii Jesucristó rihaan nij sís fariseo do', rihaan nij sís naqui'yaj cuu se-tucuanj Moisés rihaan yuvii do', cataj so':

—Nique soj sij fariseo do', sij naqui'yaj cuu se-tucuanj Moisés rihaan yuvii do' a. Quiran' uxrá soj sayuun adonj. Dan me se a'néj nij soj ve' tucua chana cavi' nica, ne yuun che'e guun tucua nij soj man ve' yo', 'yaj ma'an nij soj, ne raan ndo'o achín ni'yaj nij soj rihaan Diose, che'é rej sa' doj guun nucuaj nij soj tiha' yu'unj soj man yuvii a. Che'é dan doj a gaa sayuun quiran' soj qui'yaj Diose, asa' ca'ne' Diose cacun' che'é yuvii adonj.

<sup>14</sup>Nique soj sij fariseo do', sij naqui'yaj cuu se-tucuanj Moisés

rihaan yuvii do' a. Quiran' uxrá nij soj sayuun nanj adonj. Sís nucui' rá me nij soj adonj. Dan me se aráan soj chrej catuu yuvii rihaan Diose asa' guun chij Diose rihaan chumii nihánj á. 'O se ne uun chij Diose nimán soj, 'yaj soj ma'. Ne ndaa nij sís me rá guun chij Diose nimán ro', aráan soj chrej cunqo nij so' rihaan Diose adonj.

<sup>15</sup>Nique soj sij naqui'yaj cuu se-tucuanj Moisés rihaan yuvii do', sij fariseo do' ei. Quiran' uxrá nij soj sayuun nanj adonj. Sís nucui' rá me nij soj á. Dan me se chéé soj ndaa rej xco tu'va na ya'anj do', ndaa rej xco quij do', nano' soj yo'o sís canoco' man soj, gaa ne quisij canoco' yo'o so' man soj 'yaj soj, gaa ne nuu chi'ii doj nimán so' rihaan nimán soj, 'yaj soj, ne quitaj yaan so' rihaan soj ca'anj taran' nij soj rihaan ya'an adonj.

<sup>16</sup>Nique soj che'é sayuun quiran' soj nanj á. Ase vaa sís tuchrii vaa soj, tzaj ne me rá soj tihaan soj rihaan yuvii daj gaa qui'yaj yuvii a. Ca'vee se cuta' yo'o so' raq nuvií nocoo se vaa ya vaa nana ca'mii so', tzaj ne taj se 'yaj sese ca'mii ne so' ma', taj soj a. Tzaj ne sese cuta' yo'o so' raq aga' oró mii nuu rá nuvií, gaa ne che'é dan ya vaa nana ca'mii so', ne no xcúun so' qui'yaj so' nu' ndaa vaa cataj so', taj soj a. <sup>17</sup>Ase vaa sís ni'yon do', ase vaa sís tuchrii do', vaa soj adonj. Me che'é ne ne'en soj se vaa nuvií nocoo me se sa' doj vaa yo' rihaan aga' oró mii nuu rque nuvií yo' ga. 'O se ne'en soj se vaa che'é ma'an nuvií nocoo yo' ro', nuu guee aga' oró mii yo' rihaan Diose á. <sup>18</sup>Ne taj uún soj

se vaa sese cuta' yo'o so' raꝥ chraan altar acaa xcuu rqué yuviꝯ rihaan Diose se vaa ya vaa nana ca'mii so', ne taj se 'yaj sese ca'mii ne so' ma', taj uún soj a. Tzaj ne sese cuta' so' raꝥ xcuu naj rihaan chraan altar yo', ne no xcuún so' qui'yaj so' nu' ndaa vaa cataj so', taj uún soj a.

<sup>19</sup>Dan me se ase vaa sí tuchriꝯ vaa soj adonj. Me che'é ne ne'en soj se vaa sa' doj vaa chraan altar yo' rihaan xcuu naj rihaan yo' ga. 'O se che'é ma'an chraan altar ro', che'é dan nuu gueꝥ xcuu yo' rihaan Diose nanj á. <sup>20</sup>Che'é dan sese cuta' yo'o so' raꝥ chraan altar yo', ne nuveé raꝥ chraan altar yo' me se cuta' so' raꝥ ma'. 'O se cuta' so' raꝥ chraan altar do', raꝥ nu' se taj rihaan chraan altar yo' do' adonj. <sup>21</sup>Ne sese cuta' yo'o so' raꝥ nuviꝯ nocoo, ne nuveé inanj raꝥ nuviꝯ nocoo me se cuta' so' raꝥ ma'. 'O se cuta' so' raꝥ nuviꝯ nocoo do', raꝥ ma'an Diose sí yanj nuviꝯ nocoo do' adonj. <sup>22</sup>Ne sese cuta' yo'o so' raꝥ rej xta', ne nuveé inanj rej xta' me se cuta' so' raꝥ ma'. 'O se cuta' so' raꝥ rej xta' do', raꝥ chruun xlá chruun taj ma'an Diose gaa rii ta'nga' Diose do', raꝥ ma'an Diose sí taj rihaan chruun xlá yo' do', cuta' so' nanj adonj.

<sup>23</sup>"Nique soj sij naqui'yaj cuu se-tucuanj Moisés rihaan yuviꝯ do', sij fariseo do' ei. Quiran' uxrá soj sayuun adonj. Sí nucui' rá me nij soj nanj á. Dan me se sese vaa nuu xlá do', coj eneldo do', coj cominó do', rihaan soj, ne rqué soj 'o nánj coj rihaan Diose rihaan daj a chi' nánj coj yo' a. Tzaj ne nana nocoo doj ne 'yaj soj ma'. Ne a'ne' nica

soj cacun' che'é tuvi' soj ma'. Ne 'ee rá soj tuvi' soj ma'. Ne uun nucuaj rá tuvi' soj man soj ma'. Tzaj ne Diose ro', me rá qui'yaj soj nu' nana nocoo nihánj, ne na'vej rá Diose tanáj xco soj a yo'ó nana le'ej doj ma'. <sup>24</sup>Dan me se ase vaa sí tuchriꝯ vaa soj, tzaj ne me rá soj tijaan soj rihaan yuviꝯ daj qui'yaj yuviꝯ adonj. Ase vaa sí rii ndaa 'o yacoo le'ej rque na co'o ro', vaa soj, tzaj ne chumánj uun soj cunu' xcuu camelló vaa gueꝥ nanj adonj.

<sup>25</sup>"Nique soj sij naqui'yaj cuu se-tucuanj Moisés rihaan yuviꝯ do', sij fariseo do' a. Quiran' uxrá nij soj sayuun adonj. Sí nucui' rá me nij soj nanj á. Dan me se ase vaa rasuun, ne sa' uxrá na'nu' nii xráá yo', tzaj ne rque yo' ro', me se vaa nacaj gueꝥ yo', ta'nga' danj vaa gueꝥ soj, ne xráá soj me se ve'é naruvii, tzaj ne nimán soj me se quij vaa, ne niha' uxrá rá soj ca'nee soj si'yaj tuvi' soj, ne taj se 'yá' ca'ne' rá soj a ma'. <sup>26</sup>Ase vaa sí tuchriꝯ vaa soj sij fariseo ei. Ase vaa 'yaj yuviꝯ na'nu' rque rasuun ro', danj qui'yaj uún soj, naqui'yaj sa' soj nimán soj á. Ndaa síj, gaa ne sa' inanj qui'yaj soj quene'en yuviꝯ ei.

<sup>27</sup>"Nique soj sij naqui'yaj cuu se-tucuanj Moisés rihaan yuviꝯ do', sij fariseo do' a. Quiran' uxrá nij soj sayuun adonj. Sí nucui' rá me nij soj nanj á. Dan me se ase vaa chraan naj xngá rihaan santó ro', vaa soj, ne xráá soj ro', vaa catzii, ne ve'é ndo'o ruvi' man soj, tzaj ne nimán soj me se adi' se vaa cúu ri'yuj ro', vaa nimán soj, ne chi'ii vaa nu' nimán soj adonj. <sup>28</sup>Dan me se ase vaa sí nica nimán vaa soj

chéé soj ni'yaj yuvii, tzaj ne 'yaj yuve ndo'o soj se chí'ii, ne ne uno uxrá soj rihaan Diose a ma'. Inanj danj vaa nimán soj nanj adonj.

<sup>29</sup>”Nique soj sij naquiyaj cuu se-tucuanj Moisés rihaan yuvii do', sij fariseo do' a. Quiran' uxrá soj sayuun adonj. Síí nucui' rá me nij soj nanj á. Dan me se ve'é une' soj chraan yan naj cúú man nij síí nata' se-nana Diose gaa naá do', man nij síí vaa sa' cane gaa naá do', ne ve'é tumé soj man chraan yo' a. <sup>30</sup>Ne taj soj se vaa sese cayáán soj ga xii soj nij síí man gaa naá ro', ne ne ticavi' soj man nij síí nata' se-nana Diose ndaa vaa qui'yaj ma'an xii soj a ma'. Danj a'mii soj, <sup>31</sup>taj xna'anj ma'an soj se vaa ya tuvi' nij síí ticavi' man nij síí nata' se-nana Diose gaa naá me ma'an soj nanj á. <sup>32</sup>Ne ataa quisij cacun' qui'yaj nij tuvi' soj nij síí man gaa naá yo' a. Tzaj ne tisíj soj cacun' yo' adonj.

<sup>33</sup>”Ase vaa xcuáá yuvaa vaa soj, ne taj se qui'yá' quinanií soj rihaan sayuun qui'yaj Diose man soj ma'. Cacaá soj rihaan ya'an adonj.

<sup>34</sup>Che'é dan xa' soj, tzaj ne ca'nej 'unj síí nata' se-nana Diose ca'nej 'unj síí ca'mii nana cuu ca'nej 'unj síí tucu'yón se-nana Diose ca'nej 'unj rihaan soj, gaa ne ticavi' soj man ta'aj nij so', ne cachron soj man ta'aj nij so' rihaan rcutze, ne go' soj quartá xráa ta'aj nij so', ne cunanj nij so' rihaan soj, curihanj nij so' 'o chuman', ne canoco' uxrá soj man nij so' ndaa 'ó chuman' uún, qui'yaj soj vaa güii nanj adonj.

<sup>35</sup>Ndaa síj, gaa ne nu' ton cayanj man nij síí sa' rihaan Diose rihaan chumii nihánj ro', nu' cacun' yo' ro',

nata' xráa nij soj a. Dan me se asij ton cayanj man síí sa' cu'naj Abel ne ndaa ton cayanj man síí cu'naj Zacarías ta'níí síí cu'naj Berequías gaa cavi' so' rihaan nuvíí yan nicun' chraan altar ro', nu' cacun' yo' ro', nata' xráa nij soj a. <sup>36</sup>Ya ya cataj xna'anj 'unj rihaan soj cuano se vaa quiran' ma'an nij tuvi' nij soj sayuun che'é nu' cacun' yo' adonj —taj Jesucristó rihaan nij síí fariseo do', rihaan nij síí naquiyaj cuu se-tucuanj Moisés rihaan yuvii do' a.

**Nana nihánj taj xna'anj daj quiran' nij síí man chuman' Jerusalén a**

<sup>37</sup>Gaa ne cataj uún Jesucristó a: —Nanó uxrá raj che'é soj sij man chuman' Jerusalén nihánj nanj á. Dan me se ticavi' soj man nij síí nata' se-nana Diose, ne go' soj yahij man nij síí ca'née Diose cuchi' rihaan soj á. Guun que'ee ndo'o guun rá 'unj naquiyaj chre' 'unj man soj cutumé 'unj man soj, tzaj ne taj se qui'yá' ca'vee ma'. Dan me se ase vaa 'yaj chuchee naquiyaj chre' chuchee man ta'níí xo' caráán xo' xcóo xo' xráa ta'níí xo' ro', danj guun raj qui'yáj man soj, tzaj ne ne ca'vej rá soj qui'yáj danj a ma'. <sup>38</sup>Yaj me se cutumé ma'an soj man soj nanj adonj. <sup>39</sup>Q se cuano nihánj me se cataj xna'anj 'unj rihaan soj se vaa rej rihaan ní' ro', se quene'en uún soj manj ma'. Tzaj ne ndaa güii ca'na' uún 'unj rihaan chumii nihánj quene'en soj manj, ne cataj soj: “Ve'é uxrá 'na' síí a'née síí 'nij ra'a man ní' á”, cataj soj a —taj Jesucristó ni'yaj so' man nij síí man Jerusalén yo' a.

Nana nihánj taj xna'anj se  
vaa canee nū' nuví nocoo  
ne chuman' Jerusalén a

**24** Gaa ne curihañ Jesucristó  
nuví nocoo, ca'anj so',  
ne cuchi' nij sí tucu'yón se-nana  
so' rihaan so' a. Guun rá nij so'  
quene'en Jesucristó daj vaa nij  
ve' man nuví nocoo yo' a. <sup>2</sup>Gaa ne  
cataj Jesucristó rihaan nij so' a:

—Dan me se ne'en soj nū' ve' man  
nuví nocoo nihánj na'. Ya ya cataj  
xna'anj 'unj rihaan soj cuano se vaa  
vaa güii, ne canee nū' nuví nocoo  
nihánj, ne a 'ó yujej se quitáá  
xráa tuvi' yujej nihánj a ma' —taj  
Jesucristó a.

Nana nihánj taj xna'anj  
che'é sayuun guun rihaan  
chumiñ nihánj vaa güii a

<sup>3</sup>Dan me se ca'anj cayáan  
Jesucristó rañ quij cu'naj Quij man  
Chruun Olivó, ne cuchi' orún' nij sí  
tucu'yón se-nana so' rihaan so', ne  
cataj nij so':

—Cataj xna'anj so' rihaan núj aman  
cane nū' nuví nocoo yo' do', a me  
rasuun ca'na' quí'yáa so' asa' quisíj  
ca'na' so' quene'en núj ne quinavij  
nū' chumiñ nihánj, maestro —taj nij  
so', xná'anj nij so' man Jesucristó a.

<sup>4</sup>Gaa ne cataj Jesucristó:

—Cutumé ndo'o soj man soj se gaa  
ñanj tihā' yu'unj yuviñ man soj á.

<sup>5</sup>O se ca'na' uxrā yuviñ cataj: “Unj  
me sí ca'née Diosē tñanii man yuviñ  
rihaan sayuun”, cataj nij so', ne dan  
me se tihā' yu'unj uxrā nij so' man  
tuvi' nij so' ñanj á.

<sup>6</sup>Dan me se vaa güii, ne  
quene'en soj se vaa cunū' uxrā

chuman' gā tuvi' chuman' a. Ne  
cunū uxrā soj nana se vaa unū'  
chuman' man gan' gā tuvi' chuman'  
yo' a. Cutumé soj man soj se  
cuchu'vi' nimán soj ma'. Mañ se  
vaa che'é guun sayuun yo' rihaan  
chumiñ nihánj adonj. Tzaj ne asa'  
quisíj guun ñanj, gaa ne se ca'anj  
ni'ya chumiñ nihánj nū' orá ma'. <sup>10</sup>  
se quinaj chumiñ nihánj doj adonj.  
<sup>7</sup>Dan me se cunū' uxrā yuviñ man  
chuman' nocoo gā yo'ó chuman'  
nocoo, ne cunū' gobiernó gā tuvi'  
gobiernó a. Ne cachēn x'naa  
cachēn yuún nocoo cachēn que'ee  
chuman' a. <sup>8</sup>Nū' sayuun nihánj ro',  
ase vaa guun che'e 'o chana ve'ee  
rque no' cuchruj no' ne'ej ro', ñanj  
gaa nū' sayuun nihánj ñanj ei. Dan  
me se nū' ne'en chana ve'ee rque  
yo', ne ne'en no' doj a quirān' no'  
sayuun rej rihāan, ne ase uun rá  
chana yo', ñanj guun rá soj gaa  
ca'na' sayuun yo', guun rá soj se  
vaa daj doj guun uxrā sayuun  
rihaan chumiñ nihánj ñanj adonj.

<sup>9</sup>”Gaa ne ca'anj ñicaj yuviñ man  
ta'aj soj rihaan nij sí ñicaj suun,  
ne quirān' ta'aj soj sayuun ne  
cavi' ta'aj soj ñanj á. Ne nachri'  
cunudañ nij sí yanj ni'yaj nij so'  
man soj, che'é se me soj sí noco'  
manj adonj. <sup>10</sup>Gaa ne tanáj que'ee  
tinúú soj chrej sa', ne tačuachēn  
tinúú soj sí tanáj chrej sa' man  
yo'ó tinúú soj rihaan sí ñicaj suun,  
ne nachri' uún tinúú soj sí tanáj  
chrej sa' man ta'aj soj sij noco' manj  
ñanj á. <sup>11</sup>Gaa ne ca'na' uxrā sí nata'  
rihaan yuviñ se vaa sij nata' se-nana  
Diosē me nij so', cataj nij so', tzaj ne  
ca'miñ ne uun nij so', ne tihā' yu'unj  
uxrā nij so' man yuviñ adonj. <sup>12</sup>Gaa

ne xna'anj ndo'o se chi'ii qui'yaj yuvii, ne ca'ne' rá nij yuvii ga suun noco' se-nana Diose, ne che'é dan tanáj uxrá nij síf noco' manj chrej sa' chrej 'ee rá man tuvi' a. <sup>13</sup>Tzaj ne síf noco' raan manj ndaa se ca'anj ni'ya chumii nihánj ro', so' me síf quinanii rihaan sayuun adonj. <sup>14</sup>Ne ca'mii natáj yuvii nana sa' nihánj nana che'é güii guun hij Diose rihaan chumii nihánj cunö yuvii man cunudanj chuman' man rihaan chumii, ne xcaj nij yuvii cuentá che'ej, gaa ne guun che'e chumii nihánj quinavij chumii nihánj nanj adonj —taj Jesucristó rihaan nij síf tucu'yón se-nana so' a.

<sup>15</sup>Ne soj sij nayaa nana nihánj nana cachronj rihaan yanj nihánj ro', xcaj uxrá soj cuentá me taj nana nihánj nana ca'mii Jesucristó che'é se chi'ii á.

Dan me se cataj uún Jesucristó:

—Aj ne'en soj se vaa cataj xna'anj síf cu'naj Daniel síf nata' se-nana Diose gaa naá che'é yo'o se chi'ii qui'yaj ndo'o sayuun man yuvii, ne dan me se güii quene'en soj se chi'ii yo' rej guee, <sup>16</sup>ne yo'o cunanj nij síf man estadó Judea ca'anj nij so' raa quij á. <sup>17</sup>Ne síf taj xráa ve' tucua' ro', se catúj so' rá ve' tucua' so' quirii so' si'yaj so' ma'. <sup>18</sup>Ne síf 'yaj suun tacaan ro', se canicaj so' nano' so' sagan' so' tanáj so' rihaan yo'óo ma'. Se guun raan nij so' ma'. Maan se yo'o cunanj nij so' á. <sup>19</sup>Nique chana nuu rque do', chana vaa ta'níí ne'ej utzii do', güii ca'na' sayuun yo' a. 'O se se guun nucuaj chana yo' cunanj chana yo' ma'. <sup>20</sup>Cachinj ni'yaj soj rihaan Diose se vaa se ca'na' sayuun yo'

güii gaa maan do', güii no xcúun yuvii naraan rá yuvii do' ma'. <sup>21</sup>'O se güii ca'na' sayuun ro', quij ndo'o guun nanj á. Quij doj gaa sayuun yo' rihaan nu' nij sayuun quiran' yuvii gaa nu' ca'na', ne daj chihaa mǐj se quiran' uún yuvii sayuun vaa danj ma'. <sup>22</sup>Sese que'ee uxrá güii guun sayuun, ne se quinanii yuvii rihaan sayuun yo' ma'. Tzaj ne vaa güii quisij sayuun, qui'yaj Diose, che'é rej quinanii nij síf narii so' canoco' man so' adonj.

<sup>23</sup>Ne güii yo' me se sese cataj yuvii rihaan soj: "Ni'yaj so' ei. Nihánj 'na' síf tinanii man ní' rihaan sayuun á", ne se cuchumán rá soj ma'. <sup>24</sup>'O se ca'na' uxrá síf ne síf cataj se vaa síf tinanii man yuvii rihaan sayuun me nij so', ne ca'na' uxrá síf ne síf cataj se vaa nata' nij so' se-nana Diose, ne qui'yaj nij so' suun sa' nocoo, ne tiha' yu'unj nij so' man cunudanj nij yuvii man rihaan chumii nanj adonj. Ndaa nij síf narii Diose man ro', sese taj vaj Diose tumé man nij so', ne cuchuman rá nij so' ni'yaj nij so' man nij síf tiha' yu'unj yo' nanj adonj. <sup>25</sup>Nihánj me se cataj xna'anj 'unj rihaan soj daj guun rihaan chumii nihánj nanj á. <sup>26</sup>Che'é dan me sese cataj yuvii rihaan soj se vaa vaj 'unj rej quij, ne se ca'anj soj rej quij nanö' soj manj ma'. Ne sese cataj yuvii rihaan soj se vaa yáan 'unj rá 'o ve', ne se cuchumán rá soj ma'. <sup>27</sup>Dan me se ndaa rá se uun gaa raan rej síj güii ne 'o chuguun nu' xta' ndaa rej ata' güii ro', ne ne'en cunudanj yuvii se vaa raan rihaan chumii a. Ne ase uun rá soj ne'en

soj gaa raan ro', danj guun rá soj asa' ca'ná' 'unj sij ca'née Diose nıcaj yu'unj man yuviı, ne yo'o quene'en nu' yuviı man rihaan chumiı nihánj se vaa ca'ná' 'unj adonj. <sup>28</sup>Aj ne'en soj daj 'yaj yachrúú vaj rej xta', ne ne'en ma'an xo' me rej naj nee cha xo' a. Taj síí nata' rihaan xo' me rej naj nee yo' ma'. Ne ase uun rá yachrúú ro', danj guun rá ma'an soj asa' ca'na' uún 'unj rihaan chumiı nihánj adonj. Quene'en ma'an soj sij man rihaan chumiı nihánj me rej ca'na' 'unj adonj.

**Nana nihánj taj xna'anj daj  
gaa ca'na' uún Jesucristó  
rihaan chumiı nihánj a**

<sup>29</sup>"Sıj quiran' yuviı sayuun yo', gaa ne guun rmi' güii guun rmi' yavii guun rmi', ne cayuu nij yati' xta' ne quinaan taran' nij rasuun nucuaj man rej xta' do' a. <sup>30</sup>Gaa ne vaa se curuvi' rej xta' quene'en soj, ne quene'en soj se vaa daj doj ca'na' uún 'unj sij ca'née Diose nıcaj yu'unj man yuviı a. Gaa ne cunudanj nij síí man rihaan chumiı nihánj ro', quinao ndo'o rá ma'an nij so', gaa ne quene'en nij so' man 'unj sij ca'née Diose nıcaj yu'unj man yuviı á. Dan me se xráá ngaa quitaj 'unj ca'na' 'unj, ne guun nucuaj ndo'oj quiriı ta'ngaj, ne ve'é uxrá curuvij ca'naj á. <sup>31</sup>Gaa ne ca'yanj nii chruun a'yanj, qui'yáj, ne ca'nej 'unj man nij se-mozó 'unj ca'na' nij so' rihaan chumiı nihánj, ne naqui'yaj chre' nij se-mozó 'unj man nij síí narii Diose man canoco' manj a. Dan me se cachee nij se-mozó 'unj rihaan nu' chumiı nihánj, nano' nij so' taran' nij síí cunuu chre' ga 'unj nanj adonj.

**Nana nihánj taj xna'anj se vaa  
ya quene'en ní' se vaa nichrun'  
ca'na' uún Jesucristó a**

<sup>32</sup>"Tıcu'yón soj nana nihánj nana che'é chruun man chruj higó raá á. Gaa quisıj guun laruu ra'a chruun, ne naca coj ya'lij raá chruun, ne ne'en soj se vaa nichrun' 'na' díó namán maan a. <sup>33</sup>Dan me se xcax uún soj cuentá se vaa asa' quene'en soj nu' se vaa cataj xna'anj 'unj rihaan soj cuano, ne nichrun' ca'na' uún 'unj nanj adonj. Dan me se ase vaa síí nicun' ta'yaa ro', gaa 'unj ei. <sup>34</sup>Ya ya cataj xna'anj 'unj rihaan soj cuano quisıj nu' rasuun nihánj nu' se vaa cataj xna'anj 'unj rihaan soj cuano ei. Ne ya quene'en soj nu' nihánj gaa ataa cavi' soj ei. <sup>35</sup>Vaa güii ca'anj ni'ya yo'óo do', xta' do', tzaj ne se-nanaj me se daj chihaa mıj se quinavij yo' ma'.

**Nana nihánj taj xna'anj se  
vaa ne ne'en ní' me güii  
ca'na' uún Jesucristó ma'**

<sup>36</sup>"Nihánj me cataj xna'anj 'unj rihaan soj se vaa a 'ó síí ne ne'en me güii ca'na' uún 'unj rihaan chumiı nihánj ma'. Ca'vee se ndaa se-mozó Diose 'yaj suun rej xta', ca'vee se ndaa ma'anj ta'nij Diose, tzaj ne ne ne'en nıj me güii me yo' ma'. Orún' Réj me síí ne'en nanj adonj. <sup>37</sup>Ase vaa qui'yaj yuviı gaa cayáan síí cu'naj Noé rihaan chumiı ro', danj gaa qui'yaj uún yuviı asa' ca'na' uún 'unj sij ca'née Diose nıcaj yu'unj man yuviı rihaan chumiı nihánj adonj. <sup>38</sup>Dan me se gaa cayáan síí cu'naj Noé, ne daj doj caráan na ya'anj rihaan chumiı, tzaj ne chá yuviı do', co'o yuviı do', ne xcax tuvi'

nij yuvií do!; inanj danj qui'yaj nij yuvií ndaa quisíj güii catúj nij tuví' sís cu'naj Noé rque rihoo xij chéé rihaan na a. <sup>39</sup>Ne ne xcaj nij yuvií cuentá sese caráán na ya'anj xráá nij so' ma'. Maan se ndaa quisíj caráán na ya'anj xráá cunudanj nij so', ne danj gaa xcaj nij so' cuentá nanj á. Ne ase vaa ne xcaj nij yuvií man gaa naá cuentá se vaa quiran' nij so' sayuun ro', danj gaa uún yuvií asa' quisíj ca'na' uún 'unj sij ca'néé Diose nicaj yu'unj man yuvií rihaan chumií nihánj adonj. 'O se ndaa síj güii quene'en nij so' manj, gaa ne xcaj nij so' cuentá nanj á.

<sup>40</sup>Ne asa' quisíj güii yo', ne cunuú vij roj snó'o qui'yaj suun roj so' yo'óó, ne nacaj se-mozó Diose man yo'o so', ne quinaj yo'ó so' a. <sup>41</sup>Ne cunuú vij roj chana gaj roj no' 'núú trigó, ne nacaj se-mozó Diose man yo'o no', ne quinaj yo'ó no' nanj adonj. <sup>42</sup>Che'é dan cutumé uxrá soj man soj á. 'O se ne ne'en soj me güii ca'na' sís 'nij ra'a man soj a ma'. <sup>43</sup>Dan me se sese 'o sís tucua ve' ro', aj ne'en so' me orá ca'na' sís ituu ne qui'yaj ituu sís ituu rasuun man tucua so', ne uxrá cutumé so' tucua so', ne se qui'yaj ituu sís ituu tucua so' tzaj ma'. Maan se ne ne'en soj me orá ca'na' sís ituu man adonj. <sup>44</sup>Dan me se ta'nga' danj vaa guee 'unj sij ca'néé Diose nicaj yu'unj man yuvií, ne ne ne'en soj me orá ca'na' uún 'unj man adonj. Che'é dan yo'o ni'yaj soj á.

**Nana nihánj taj xna'anj daj  
quiran' sís ve'é 'yaj suun rihaan  
Diose do', daj quiran' sís ne 'yaj  
suun sa' rihaan Diose do' a**

<sup>45</sup>Che'é dan me sese cune' sís tucua yo'o ve' man yo'o se-mozó so'

se vaa cutumé mozó yo' man tuvi' mozó rque so' se chá rihaan nij so' orá chá nij so' chraa, ne daj qui'yaj mozó yo', rá soj ga. Sese ya ya sij ve'é 'yaj suun me so' do', sese ya ya sij avii raá me so' do', ne daj qui'yaj so', rá soj ga. <sup>46</sup>Gaa ne güii naman se-ru'vee mozó ro', sese quene'en se-ru'vee mozó se vaa ve'é 'yaj suun mozó se-suun ru'vee, ne cavii sa' uxrá mozó yo', qui'yaj se-ru'vee mozó yo' adonj. <sup>47</sup>Ya ya cataj xna'anj 'unj rihaan soj cuano se vaa cune' ru'vee yo' man mozó yo' guun so' sís tumé man cunudanj si'yaj ru'vee yo' a. <sup>48</sup>Tzaj ne sese vaa chi'ii nimán mozó yo', ne guun rá so' se vaa guun raan ndo'o se-ru'vee so', <sup>49</sup>gaa ne guun che'e so' go' so' man tuvi' so' mozó, ne cha so' co'o so', ne guun xno' so' a. <sup>50</sup>Dan me se ne ne'en so' aman naman se-ru'vee so' a. Ne na'vij so' ca'na' ru'vee a. Tzaj ne síj güii síj orá síj, ne ca'na' ma'an se-ru'vee mozó yo', <sup>51</sup>gaa ne ca'ne' nu' so' man mozó yo' ne cataj so' se vaa ca'anj mozó yo' rihaan ya'an ga yo'ó nij sís nucui' rá a. Ne yuvií man rihaan ya'an yo' ro', ta'vee uxrá, ne ndaa chá ruj ma'an nij yuvií cúú yan' yuvií ei.

**Nihánj me cuentó nanó Jesucristó  
che'é chi' chana yaan me rá catuu  
rej anuu cha'anj nara'aa a**

**25** Ne asa' ca'na' uún 'unj rihaan chumií nihánj, ne ase vaa chi' chana yaan ro', danj gaa nij yuvií me rá catuu rihaan Diose asa' guun chij Diose á. Dan me se nicaj nij chana yaan yo' saga' nij no' aga' ya'an, ne ca'anj na'vij nij no' man sís nara'aa a. <sup>2</sup>Dan me se

'un' nij chana yaan yo' ro', me chana ni'yon, ne yu'un' nij chana yaan yo' ro', me chana nicaj cuentá a. <sup>3</sup>O se nij chana ni'yon yo' ro', nicaj nij no' saga' nij no' aga' ya'an, tzaj ne taj vaj casté acaa nicaj nij no' a ma'. <sup>4</sup>Ne nij chana nicaj cuentá ro', nij no' me se nicaj nij no' saga' nij no' aga' ya'an do', aga' nuu casté acaa do' a. <sup>5</sup>Dan me se guun raan síí nara'aa, ne ca'na' nej rihaan taran' nij chana yaan yo', ne cotoj taran' nij no' a. <sup>6</sup>Guun yan', ne caguáj yuvií cataj yuvií: "Na' síí nara'aa ga chana yaan ei. Cuva' soj nari' tuvi' soj ga so' ei", cataj yuvií rihaan chi' nij chana yaan yo' a. <sup>7</sup>Gaa ne cuno nij chana yaan, ne ra'yanj naxagaa taran' nij no', ne naquiyaj sa' nij no' saga' nij no' aga' ya'an a. <sup>8</sup>Ne cataj nij chana ni'yon rihaan nij chana nicaj cuentá, ne: "Qui'yaj soj doj se ndo'o, rque soj doj casté acaa rihaan núj ruguanj. Quina'áj saga' núj aga' ya'an nanj achuguanj", taj nij chana ni'yon yo' rihaan tuvi' no' a. <sup>9</sup>Gaa ne tuvi' no' chana nicaj cuentá me se cataj: "Maan se se quisíj casté acaa cacaa rihaan taran' ní' ma'. Ca'anj soj rej ane' casté acaa, ne quiraan soj man yo' á", taj nij chana nicaj cuentá yo' rihaan nij chana ni'yon a. <sup>10</sup>Veé dan, ne ca'anj nij chana ni'yon yo' quiraan nij no' casté acaa, ne ca'na' síí nara'aa, ne nij chana nicaj cuentá me se ne cachíin casté acaa rihaan nij no' ma'. Che'é dan catúj nij no' rá ve' canuú cha'anj ga síí nara'aa, ne caráán nii ta'yaa yo' a. <sup>11</sup>Cachén doj orá, gaa ne ca'na' nij chana ni'yon uún, ne cataj nij no': "Ca'nuu so' ta'yaa catuu núj, socoj", cataj nij

no' rihaan síí nara'aa a. <sup>12</sup>Ne cataj síí nara'aa yo': "Ya ya cataj xna'anj 'unj rihaan soj se vaa ne ne'én 'unj man soj ma'", taj so' rihaan nij chana ni'yon yo' a.

<sup>13</sup>Che'é dan cutumé uxrá nij soj man soj á. 'O se ne ne'en soj me güii ca'na' 'unj ne ne'en soj me orá ca'na' 'unj ne ne'en soj ma'.

**Nana nihánj me cuentó nanó  
Jesucristó che'é síí racuíj  
sa'anj rihaan se-mozó so' a**

<sup>14</sup>"O se güii ca'na' 'unj me se ase vaa qui'yaj yo'o ru'vee ga se-mozó ru'vee ro', danj gaa qui'yáj ga soj sij nocó' manj adonj. Dan me se guun rá ru'vee yo' ca'anj so' yo'ó chuman', ne canacúún so' man nij se-mozó so', ne racuíj so' se-sa'anj so' rihaan nij mozó yo' a. <sup>15</sup>Dan me se rihaan yo'o so' racuíj so' 'un' sa'anj nocoo uxrá cu'naj talento a. Rihaan yo'ó so' racuíj so' vij sa'anj talento a. Ne rihaan yo'ó so' racuíj so' yo'o sa'anj talento a. Danj qui'yaj so', racuíj so' sa'anj rihaan 'o 'o nij se-mozó so', ne rihaan 'o 'o mozó yo' racuíj so' ndaa vaa guun nucuaj mozó tinaca mozó yo' a. Dan me se me rá so' qui'yaj suun 'o 'o mozó tinaca 'o 'o mozó sa'anj rque so' rihaan mozó yo', ne che'é dan qui'yaj so' danj a. Ne cavii so', ca'anj so' a.

<sup>16</sup>Síj ca'anj so', ne cavii síí nicaj 'un' sa'anj talento ca'anj so', ne qui'yaj suun so', ne quisíj, gaa ne qui'yaj canaán so' yu'un' sa'anj talento ga sa'anj uún a. <sup>17</sup>Ne ase vaa qui'yaj so' ro', danj vaa qui'yaj síí nicaj vij sa'anj talento uún, ne qui'yaj canaán so' yavíj sa'anj talento uún a. <sup>18</sup>Tzaj ne síí quiríi'



'o sa'anj talento yo' me se cavii so' ca'anj so', ne gáán so' 'o yu'uj, ne caxríj yuve so' man sa'anj racuíj ru'vee rihaan so' a.

<sup>19</sup>”Veé dan, ne guun raan uxrá, ne namán se-ru'vee va'nuj nij mozó, ne xná'anj ru'vee man 'o 'o nij so' daj qui'yaj nij so' a. <sup>20</sup>Ne cuchi' sí nicaj 'un' sa'anj talento rihaan ru'vee, ne rque so' chi' sa'anj talento man se-ru'vee so', cataj so': “Un' sa'anj talento racuíj so' manj, señor. Ne yaj ro', nuu yo' chi' sa'anj talento, qui'yáj nanj á”, taj so' a. <sup>21</sup>Ne cataj ru'vee yo' rihaan se-mozó so': “Cunaj uxrá vaa qui'yáa so' ei. Mozó sa' mé so', ne gaa nucuaj raj mán so' adonj. Ve'é cutumé so' man doj si'yáj á. Che'é dan, ne yaj cané so' tumé so' nocoo doj si'yáj á. Cuva' so' cayáán so' ga 'unj, ne ve'é cayáán ní' nanj ei”, taj so' rihaan se-mozó so' a.

<sup>22</sup>”Gaa ne cuchi' sí nicaj vij sa'anj talento uún, ne cataj so': “Racuíj so' vij sa'anj talento rihanj, señor. Ne yaj, ne nuu yo' ca'anj sa'anj talento, qui'yáj nanj á”, taj so' a. <sup>23</sup>Ne cataj ru'vee yo' rihaan so': “Cunaj uxrá vaa qui'yáa so' ei. Mozó sa' mé so' uún, ne gaa nucuaj raj mán so' uún adonj. Ve'é cutumé so' man doj si'yáj, ne che'é dan yaj cané so' tumé so' nocoo doj si'yáj ya ei. Cuva' so', cayáán so' ga 'unj, ne ve'é cayáán ní' ya ei”, taj ru'vee yo' rihaan yo'ó se-mozó so' a.

<sup>24</sup>”Veé dan, ne cuchi' sí nicaj yo'o sa'anj talento uún rihaan se-ru'vee so', ne cataj so': “Ne'én 'unj se vaa sij sca' ndo'o nimán mé so', señor. Ne'én 'unj se vaa yo'ó yuvii unô 'núú, ne ma'án so' me

sí rii uun naa nanj adonj. Ne yo'ó yuvii narii squíj man 'núú trigó, 'yáa so', ne ma'án so' naran' uun man 'núú trigó sa' yo' nanj adonj.

<sup>25</sup>Che'é dan cuchu'ví' 'unj, ne ca'anj 'unj, ne caxríj yuve 'unj se-sa'anj so' rque yo'óo nanj adonj. Dan me se nacaj guee uún so' se-sa'anj so' nanj ei”, taj mozó yo' rihaan ru'vee a. <sup>26</sup>Ne cataj ru'vee yo' rihaan mozó: “Mozó chi'ii nimán do', mozó rmií do', mé so' ei. Se danj ne'én so' se vaa yo'ó yuvii unô 'núú, ne ma'anj rii naa, ne ne'én so' se vaa yo'ó yuvii narii squíj man 'núú trigó, ne 'unj naran' 'núú trigó sa' yo', <sup>27</sup>ne me che'é ne taçuachén so' se-sa'anj 'unj rihaan nij síi nuta' raa sa'anj ga. Gaa ne asa' ná' 'unj, ne nicaj 'unj se-sa'anj 'unj ga sa'anj nata' raa yo' ga”, taj ru'vee yo' rihaan yo'ó mozó yo' a.

<sup>28</sup>”Ne ca'mii uún ru'vee yo' rihaan yo'ó nij se-mozó so', cataj so': “Ca'nee soj sa'anj nicaj mozó chi'ii nihánj, ne taçuachén soj rihaan síi nicaj chi' sa'anj talento á. <sup>29</sup>'O se síi ne'én sa' qui'yaj suun rihanj me se vaa güii, ne doj a guun nucuaj so' qui'yaj suun so' rihanj adonj. Ne síi ne ne'én qui'yaj suun rihanj me se ca'nee 'unj suun le'ej nii atá so', ne quinaj uun so', qui'yáj adonj. <sup>30</sup>Ne mozó chi'ii yo' me se taj se uun so' rihanj ma'. Quiri'ij soj man so' xe' rej rmi' á. Ne yuvii man rej rmi' yo' me se ta'vee uxrá ne ndaa chá ruj ma'an nij yuvii cúu yan' nij so' nanj adonj”, taj ru'vee rihaan yo'ó nij se-mozó so' a.

Nana nihánj taj xna'anj che'é  
güii ca'ne' Jesucristó cacun' che'é  
yuvii man rihaan chumii a

<sup>31</sup>”Dan me se síf ca'née Diose  
nicaj yu'unj man yuvii mé 'unj,  
ne ca'na' uún 'unj rihaan chumii  
nihánj, ne ve'é uxrá gaa ca'na' 'unj,  
ne ca'na' cunudanj nij se-mozó 'unj,  
ne asa' ca'ná' 'unj, ne quitaj 'unj  
rihaan xrúun 'unj chruun xlá sa', ne  
ca'ne' 'unj cacun' che'é yuvii adonj.

<sup>32</sup>Dan me se naquilyaj chre' nij  
se-mozó 'unj man cunudanj nij yuvii  
man rihaan chumii, ne canicun' nij  
yuvii rihaan 'unj, ne cuxra' ta'aj  
'unj man nij yuvii, ne dan me se ase  
vaa 'yaj síf tumé matzinj uxrá' ta'aj  
so' man nij matzinj ga nij tana ro',  
danj gaa quilyáa 'unj, cuxra' ta'aj  
'unj man nij yuvii yo' nanj adonj.

<sup>33</sup>Dan me se nij síf sa' ro', ase vaa  
matzinj gaa nij so' rihanj, ne cachén  
nij so' canicun' nij so' rej nuva' 'unj,  
ne nij síf chi'ii ro', ase vaa tana  
gaa nij so' rihanj, ne cachén nij so'  
canicun' nij so' rej nichruún 'unj a.

<sup>34</sup>”Ne guún 'unj síf nicaj suun  
rey, quirii ta'ngá' 'unj rihaan nij  
so', ne dan me se ca'mii 'unj rihaan  
nij síf nicun' rej nuva' 'unj, cataj  
'unj: “Cuvá' soj ei. Nihá' uxrá rá  
Rée 'unj ni'yaj so' man soj á. Dan  
me se asij qui'yaj Rée 'unj man  
chumii nihánj, ne cachrón so' güii  
guun hij ma'an soj rihaan chumii  
nihánj a. Che'é dan ca'na' soj, ne  
nacaj soj nu' se sa' qui'yaj Réj á. <sup>35</sup>”  
se gaa naá, ne quina'aaan rquej, ne  
rqué soj se chaj á. Ne nacoó 'unj  
na, ne rqué soj na co'oj á. Ne ase  
vaa síf 'na' yo'ó chuman' vaa 'unj  
rihaan soj, tzaj ne ve'é ca'mii soj

gaj a. <sup>36</sup>Tachrinj uun vaa sagan'  
'unj, tzaj ne rqué soj yatzíj manj á.  
Ne canó chi'ii manj, ne cuchi' soj  
rej náj, ne taj ya'anj soj manj á.  
Qui'nij 'unj taga', ne cuchi' soj taga',  
ne ca'mii soj gaj adonj”, cataj 'unj  
rihaan nij síf nicun' rej nuva' 'unj a.

<sup>37</sup>”Gaa ne ca'mii nij síf sa'  
yo' rihanj, cataj nij so': “Aman  
quene'en núj se vaa na'aaan rqué so',  
ne rqué núj se chá so', Señor. Aman  
quene'en núj se vaa nacoó so' na,  
ne rqué núj na co'lo so' ga. <sup>38</sup>Aman  
ase vaa síf 'na' yo'ó chuman' vaa  
so' rihaan núj, ne ca'mii núj ga  
so' ga. Aman quene'en núj se vaa  
tachrinj uun vaa sagan' so', ne rqué  
núj yatzíj cunuú so' ga. <sup>39</sup>Aman  
quene'en núj se vaa canó chi'ii mán  
so' do', se vaa catúj so' taga' do',  
ne cuchi' núj racuíj núj mán so'  
ga”, cataj nij síf sa', xna'anj nij so'  
manj a.

<sup>40</sup>”Gaa ne cataj 'unj rihaan nij  
so': “Ya ya cataj xna'anj 'unj rihaan  
soj cuano se vaa racuíj ndo'o soj  
man nij tinúú 'unj gaa quiran' nij so'  
sayuun vaa danj á. Nda' se síf nicá'  
ndo'o me ta'aj nij so', tzaj ne racuíj  
ndo'o soj man nij so', ne che'é se  
racuíj ndo'o soj man tinúú 'unj, ne  
che'é dan nuchruj 'unj cuentá se  
vaa me soj síf racuíj man ma'anj  
adonj”, cataj 'unj rihaan nij so' a.

<sup>41</sup>”Gaa ne cataj 'unj rihaan nij síf  
nicun' rej nichruún 'unj a: “Naxuun  
soj man soj rihanj ei. Maan se cataj  
ya Diose se vaa inanj sayuun quiran'  
soj, ca'anj soj rihaan ya'an, cacaa soj  
nu' cavii nu' ca'anj nanj á. Dan me  
se qui'yaj Diose ya'an yo' cacaa síf  
chree cacaa nij nana chree cacaa, ne  
cacaa nij soj cacaa ga so' adonj. <sup>42</sup>”

se quina'aan rquej gaa naá, tzaj ne ne rquej soj a doj se chá chaj ma'. Nacoó 'unj na, tzaj ne ne rquej soj a doj na co'oj ma'. <sup>43</sup>Ase vaa sí 'na' yo'ó chuman' vaa 'unj rihaan soj, tzaj ne ne ca'mii soj gaj ma'. Tachrinj uun nuú 'unj, tzaj ne ne rquej soj a doj yatzíj ma'. Canó chí'ii manj do', qui'nij 'unj taga' do', tzaj ne a 'ó güii ne cuchí' soj rihanj ma'"), cataj 'unj rihaan nij so' a.

<sup>44</sup>"Gaa ne cataj ma'an nij sí chí'ii yo': "Aman quene'en núj mán so' se vaa na'aan rquej so' do', se vaa nacoó so' na do', se vaa ase vaa sí ca'na' yo'ó chuman' vaa so' do', se vaa achiin yatzíj cunuú so' do', se vaa canó chí'ii mán so' do', se vaa qui'nij so' taga' do', ne ne racuíj núj mán so', Señor", cataj nij so', xna'anj nij so' manj a.

<sup>45</sup>"Gaa ne cataj 'unj rihaan nij so': "Ya ya cataj xna'anj 'unj rihaan soj cuano se vaa a 'ó xco' ne racuíj soj man nij tinúú 'unj gaa quiran' nij so' sayuun vaa danj ma'. Ne nda' se sí nica' ndo'o me ta'aj nij so', tzaj ne no xcuúun nij soj racuíj soj man nij so' adonj. Ne che'é se ne racuíj soj man nij so' ro', che'é dan nuchruij 'unj cuentá se vaa nuveé sij racuíj manj me soj ma'"), cataj 'unj rihaan nij so' a.

<sup>46</sup>"Gaa ne cavii nij so' ca'anj nij so', ne quiran' ndo'o nij so' sayuun nu' cavii nu' ca'anj, tzaj ne nij sí sa' ro', ve'é cayáan nij so' ga Diose nu' cavii nu' ca'anj nanj adonj —taj Jesucristó rihaan nij sí tucu'yón se-nana so' a.

**Nana nihánj taj xna'anj se vaa 'o guun rá nij xrej atá suun nocoo doj do', nij sí uun chij do', se vaa cavi' Jesucristó a**

**26** Sij cataj xna'anj Jesucristó nu' nana yo', gaa ne ca'mii

uún so' rihaan nij sí tucu'yón se-nana so', cataj so':

<sup>2</sup>—Ne'en soj se vaa cachén vij güii, gaa ne canuú cha'anj pascuá, ne tacuachén nii manj rihaan nij sí cachron manj rihaan rcutzé nanj adonj. Danj qui'yaj nij so', che'é se sí ca'née Diose nicaj yu'unj man yuvii mej a —taj Jesucristó a.

<sup>3</sup>Gaa ne cunuu chre' nij xrej atá suun nocoo doj do', nij sí uun chij do', rihaan ve' xij tucuá xrej atá suun nocoo doj sí cu'naj Caifás a. <sup>4</sup>Ne 'o guun rá cunudanj nij so' se vaa tihá' yu'unj nij so' man Jesucristó, ne quita'aa yuve nij so' man Jesucristó, ne cavi' Jesucristó, qui'yaj nij so', rá nij so' a. <sup>5</sup>Tzaj ne cataj nij so':

—Se quita'aa ní' man so' gaa aman anuú cha'anj ma'. Maan se sese danj qui'yaj ní', ne ca'maan rá nij yuvii, ne guun sayuun, qui'yaj nij yuvii nanj adonj —taj nij so' a.

**Nana nihánj taj xna'anj se vaa caxrij 'o chana casté raá Jesucristó a**

<sup>6</sup>Dan me se yáan Jesucristó chuman' cu'naj Betania, ne ne so' rá 'o ve' tucuá sí cu'naj Simón sí canó luj ri'yuj man, <sup>7</sup>ne yáan Jesucristó rihaan mesá, ne cuchí' yo'ó chana rihaan so', ne nicaj chana yo'ó aga' catzii nuu casté gun' daj, ne casté tu'vee ndo'o me yo' a. Gaa ne caxrij chana casté raá Jesucristó a.

<sup>8</sup>Ne ca'maan rá nij sí tucu'yón se-nana Jesucristó, ne cataj nij so': —Me che'é tiri' rma'an chana nihánj casté sa' ga. <sup>9</sup>Me che'é ne cutu'vee no' casté, ne quiri' uxrá no' sa'anj, ne go' no' sa'anj yo' man sí nique ga —cataj nij so', ni'yaj nij so' man chana yo' a.

<sup>10</sup>Ne quene'en Jesucristó daj vaa ca'mii nij so', ne cataj so' rihaan nij so' a:

—Me che'é a'mii soj danj ni'yaj soj man chana ga. <sup>10</sup>Q se ve'é uxrá vaa qui'yaj no' manj á. <sup>11</sup>Q se síf nique me se daj a güii mán nij síf nique ga soj, ne ca'vee qui'yaj soj danj ga síf nique ei. Tzaj ne 'unj me se vaa güii ca'anj 'unj, ne quinaj un soj, ne se ca'vee qui'yaj soj se luj che'ej ma'. <sup>12</sup>Dan me se caxrj chana nihánj casté raj, ne che'é dan ne'en soj se vaa cachin' nii manj adonj. <sup>13</sup>Ya ya cataj xna'anj 'unj rihaan soj cuano se vaa me rej ma'an ca'mii natáj yuvii se-nanaj nana sa' rihaan nij yuvii man rihaan nu' chumii nihánj ro', ne cataj xna'anj uún nij yuvii rihaan tuvi' yuvii che'é se vaa qui'yaj chana nihánj manj, ne se quini'yón yuvii man chana nihánj ma' —taj Jesucristó a.

**Nana nihánj taj xna'anj se vaa cutu'vej síf cu'naj Judas man Jesucristó rihaan nij síf taj ri'yunj man Jesucristó a**

<sup>14</sup>Gaa ne cavií síf cu'naj Judas Iscariote, ca'anj so' rihaan nij xrej atá suun nocoo doj a. Dan me se yo'o tuvi' chujij nij síf tucu'yón se-nana Jesucristó me síf cu'naj Judas yo' a. <sup>15</sup>Dan me se cataj so' rihaan nij xrej a:

—A me se rque soj manj, ne racuíj 'unj man soj tacuachén 'unj man Jesucristó rihaan soj ga —taj so', xná'anj so' man nij xrej a.

Ne go' nij so' icó chi' sa'anj platá catzii man síf cu'naj Judas yo' a. <sup>16</sup>Gaa ne guun che'e síf cu'naj Judas nuchruj raa so' aman guun nucuaj

so' racuíj so' man nij xrej atá suun nocoo doj, tacuachén so' man Jesucristó rihaan nij so' a.

**Nana nihánj taj xna'anj se vaa ma'an Jesucristó taj xna'anj se vaa tacuachén yo'o tuvi' nij síf tucu'yón se-nana so' man so' rihaan nij síf taj ri'yunj man so' a**

<sup>17</sup>Ne güii canuú cha'anj pascuá ro', cuchí' nij síf tucu'yón se-nana Jesucristó rihaan Jesucristó, ne xná'anj nij so' man so', cataj nij so':

—Me rej qui'yaj chujii núj cha xti'no ní' cha'anj pascuá, rá so' ga —taj nij so' rihaan Jesucristó a.

<sup>18</sup>Ne cataj xna'anj Jesucristó rihaan nij so' se vaa catuu nij so' chuman' Jerusalén, ne cuchí' nij so' rihaan yo'o so', ne ca'mii nij so' nana nihánj rihaan so' a: “Taj xna'anj maestró rihaan so' se vaa daj doj quisij se-ora so' a. Ne cha xti'no so' do', nij síf tucu'yón se-nana so' do', cha'anj pascuá tucua so' á”, cataj nij so' rihaan síf ne chuman' yo', taj Jesucristó rihaan nij so' a. <sup>19</sup>Dan me se qui'yaj nij síf tucu'yón se-nana Jesucristó ndaa vaa cataj xna'anj Jesucristó rihaan nij so', ne qui'yaj chujii nij so' cha xti'no nij so' cha'anj pascuá a. <sup>20</sup>Ne rej ti'nuu, ne cayáan Jesucristó ga chujij nij síf tucu'yón se-nana so' rihaan mesá a. <sup>21</sup>Ne gaa chá nij so' chraa, ne cataj Jesucristó:

—Ya ya cataj xna'anj 'unj rihaan soj se vaa tacuachén yo'o tuvi' soj manj rihaan nij síf taj ri'yunj manj ei —taj Jesucristó a.

<sup>22</sup>Gaa ne quinano ndo'o rá nij síf tucu'yón se-nana Jesucristó, ne guun che'e nij so' ndaa 'o 'o nij so'

xná'anj man Jesucristó, cataj 'o 'o nij so':

—'Uñj me síi qui'yaj danj ni', Señor' —taj 'o 'o nij so' a.

<sup>23</sup>Gaa ne cataj Jesucristó:

—Síi tiguíj rachrúun ga 'unj rá co'oo ro', so' me síi tacuachén manj rihaan nij síi taj ri'yunj manj adonj. <sup>24</sup>'O se taj danj Diose se vaa ca'anj 'unj cavii' 'unj sij ca'néé Diose nijaj yu'unj man yuvii ne ya danj quirán' 'unj adonj. Tzaj ne nique ndo'o síi tacuachén manj rihaan nij síi taj ri'yunj manj nanj á. Quiran' uxrá so' sayuun nanj á. Snó'o yo' me se sese ne ca'ngaa so', ne cavii sa' so' doj tzaj adonj —taj Jesucristó a.

<sup>25</sup>Ne síi cu'naj Judas síi me rá tacuachén man Jesucristó rihaan nij síi taj ri'yunj man Jesucristó me se xná'anj so' man Jesucristó, cataj so':

—'Uñj me síi qui'yaj danj ni', maestro' —taj ma'an so', xná'anj ma'an so' man Jesucristó uún a.

—Ya uxrá cataj so', veé so' qui'yaj danj ei —taj Jesucristó rihaan so' a.

**Nana nihánj taj xna'anj che'é rachrúun rqué Jesucristó rihaan nij síi tucu'yón se-nana so' cha nij so' do', che'é na vinó rqué so' co'lo nij so' do' a**

<sup>26</sup>Ne gaa chá nij so' chraa ne quita'aa Jesucristó yo'lo rachrúun, ne nago' so' graciá rihaan Diose, ne cuxra' ta'aj so' rachrúun, ne rqué so' rihaan nij síi tucu'yón se-nana so', ne cataj so':

—Quita'aa soj rachrúun nihánj, cha soj man yo' á. Neé manj me rachrúun nihánj ei —taj so' a.

<sup>27</sup>Gaa ne quita'aa Jesucristó aga' tazá nuu na vinó, ne nago' so'

graciá rihaan Diose, ne tacuachén so' aga' nuu na vinó rihaan nij so', ne cataj so':

—Co'lo taran' soj na vinó nihánj á. <sup>28</sup>'O se ton manj me na nihánj, ne che'é ton manj ro', rqué Diose 'o nana rihaan soj daj qui'yaj Diose ga soj a. Dan me se che'é se cayanj ton manj ro', che'é dan me caraa x'naa Diose ni'yaj Diose cacun' tumé que'ee yuvii adonj. <sup>29</sup>Ne cuano nihánj me se cataj xna'anj 'unj rihaan soj se vaa veé doj nihánj me co'oj, ne se co'oj yaj a ma'. Tzaj ne asa' quisj güii guun chij Réé 'unj rihaan chumii nihánj, ne cunu naca chumii nihánj, ne co'lo ní' na vinó naca ei —taj Jesucristó rihaan nij síi tucu'yón se-nana so' a.

<sup>30</sup>Gaa ne cachrää taran' nij so' chra' rihaan Diose, ne cavii nij so', ca'anj nij so' quij cu'naj Quij man Chruun Olivó a.

**Nana nihánj taj xna'anj se vaa cataj xna'anj Jesucristó se vaa guun na'aj síi cu'naj Pedró ne cataj so' se vaa nuveé sij noco' man Jesucristó me so' a**

<sup>31</sup>Gaa ne cataj Jesucristó rihaan nij so' a:

—Danj Diose taj se vaa go' Diose man síi tumé matzinj, ne cunanj nij matzinj cha'nuu nij xo' a. Ne ya ase vaa daán 'unj matzinj vaa soj, ne ni corá guun na'aj taran' soj, ne se canoco' soj manj a ma'. <sup>32</sup>Tzaj ne asa' quisj cunu i'na' uún 'unj, ne quitaj yaan 'unj rihaan soj ca'anj 'unj estadó Galilea, ne nari' tuvi ní' estadó Galilea nanj adonj —taj Jesucristó rihaan nij síi tucu'yón se-nana so' a.

<sup>33</sup>Gaa ne cataj síi cu'naj Pedró rihaan so' a:

—Ca'vee se tanáj taran' nij so' mán so', tzaj ne daj chihaa mǐj se tanáj 'unj mán so' ma' —taj Pedró a.

<sup>34</sup>Ne cataj Jesucristó:

—Ya ya cataj xna'anj 'unj rihaan so' cuano se vaa aj ne'én 'unj se vaa nii corá gaa ataa caguaj to'loo, ne va'nuj ya cataj so' rihaan yuvii se vaa nuveé sij noco' manj mé so' a —taj Jesucristó rihaan Pedró a.

<sup>35</sup>Ne cataj Pedró:

—Taj ma'. Ca'vee se ticavi' yuvii man ní', tzaj ne daj chihaa mǐj se cataj 'unj se vaa nuveé sij noco' mán so' mej ma' —taj Pedró rihaan Jesucristó a.

Ne ase vaa cataj Pedró ro', danj cataj taran' nij síi tucu'yón se-nana Jesucristó a.

**Nana nihánj taj xna'anj daj  
qui'yaj Jesucristó gaa cachíin  
ni'yaj Jesucristó rihaan Diose a**

<sup>36</sup>Gaa ne ca'anj Jesucristó ga nij so' ndaa yo'ó rej cu'naj Getsemaní, ne cataj xna'anj Jesucristó rihaan nij so':

—Cane soj nihánj, na'vij soj mán 'unj, ne ca'anj 'unj gan' doj tzin', ne cachinj ni'yáj rihaan Réj a —taj Jesucristó a.

<sup>37</sup>Ne nicaj Jesucristó man Pedró do', man roj ta'níi síi cu'naj Zebedeo do', ca'anj so', ne guun che'e so' quinanó ndo'o rá so' a.

<sup>38</sup>Gaa ne cataj so' rihaan va'nuj nij síi ca'anj ga so' a:

—Naná uxrá raj adonj. Maan che'é rej nanó ndo'o raj, qui'yaj cavi' 'unj, raj a. Qui'yaj soj se ndo'o quinaj soj nihánj, ne se cotoj soj

ma' —taj Jesucristó rihaan va'nuj nij so' a.

<sup>39</sup>Gaa ne cavii so' yanj doj tzin', ne ca'anj cayáan rno so' rihaan yo'óo, ne cachíin ni'yaj so' rihaan Diose, ne cataj so' rihaan Diose a: —Sese ca'vee, ne caráan ra'á so' xráj, se gaa nanj quirán' uxrá 'unj sayuun, tzaj ne sese ma'án so' me rá quirán' 'unj sayuun, ne qui'yáa so' ndaa vaa me rá ma'án so', ne se qui'yáa so' ndaa vaa me rá ma'anj, man Ataj —taj Jesucristó, cachíin ni'yaj so' rihaan Diose a.

<sup>40</sup>Gaa ne canicaj uún so' ca'na' so' rihaan va'nuj nij síi tucu'yón se-nana so', ne quene'en so' se vaa cotoj cunudanj nij so' a. Gaa ne cataj so' rihaan Pedró a:

—Dan me se xa' soj me se a 'ó orá ne guun nucuaj soj ni'yaj soj gaj a ma'. Ya na'. <sup>41</sup>Maan se ni'yaj soj, ne cachinj ni'yaj soj rihaan Diose se vaa caráan Diose rihaan síi chree se caxrj síi chree chrej chi'ii rque soj á. 'O se niha' rá soj qui'yaj soj se sa', tzaj ne ne guun nucuaj soj ma' —taj Jesucristó rihaan nij so' a.

<sup>42</sup>Gaa ne cavii uún so', ne cachíin ni'yaj uún so' rihaan Diose, cataj so':

—Sese se ca'vee quinani' 'unj rihaan sayuun ase vaa, ne qui'yáa so' ndaa vaa me rá so', Ataj —taj Jesucristó, cachíin ni'yaj so' a.

<sup>43</sup>Gaa ne canicaj uún so' ca'na' so', ne quene'en so' se vaa cotoj uún va'nuj nij síi tucu'yón se-nana so' a. 'O se ca'na' ndo'o nej rihaan nij so' a.

<sup>44</sup>Gaa ne tanáj so' man nij so', ne cavii uún so', ne cachíin ni'yaj uún so' rihaan Diose, ne ase vaa cachíin

ni'yaj so' gaa rque ro', danj vaa cachín ni'yaj uún so' rihaan Diose a.

<sup>45</sup>Gaa ne canicaj uún so' ca'na' so' rihaan va'nuj nij sí tucu'yón se-nana so', ne cataj so':

—Ca'vee cotoj soj ca'vee naraan rá soj ca'vee sese vaa ya'núj rihaan soj á. Dan me se daj doj quisij orá tucuachén yo'ò so' manj rihaan sí tumé ndo'ò cacun', che'é se mé 'unj sí ca'née Diose nicaj yu'unj man yuvií adonj. <sup>46</sup>Naxagaa soj, ca'anj ní' nanj ei. Ni'yaj soj nedí'. 'Na' sí tucuachén manj rihaan sí taj ri'yunj manj nanj chuguanj —taj Jesucristó a.

**Nana nihánj taj xna'anj daj qui'yaj nii gaa quita'aa nii man Jesucristó a**

<sup>47</sup>Dan me se nicun' Jesucristó ca'mii so', ne nu' ca'na' sí cu'naj Judas yo'ò tuvi' chuvij nij sí tucu'yón se-nana Jesucristó, ne ca'na' uxrá yuvií ga so', ne nicaj nij yuvií neê espadá do', chruun do' a. Dan me se nij yuvií ca'née nij xrej atá suun nocoo doj do', nij yuvií ca'née nij sí uun chij rihaan nij yuvií israelitá do', me nij yuvií ca'na' a. <sup>48</sup>Ne sí cu'naj Judas cataj xna'anj rihaan nij yuvií se vaa daj gaa qui'yaj so' ga Jesucristó, gaa ne cunu yaan nij yuvií man Jesucristó, ne cataj so':

—Sí cachron tu'vaj ro', so' me sí quita'aa soj cuaj á —taj sí cu'naj Judas a.

<sup>49</sup>Gaa ne nu' cuchi' so' cuaj rihaan Jesucristó, ne cataj so':

—Ca'na' uxraj, nanj maestro —taj so' rihaan Jesucristó a.

Gaa ne nu' cachron tu'va so' xruu Jesucristó a.

<sup>50</sup>Gaa ne xna'anj Jesucristó man Judas, cataj so':

—Me che'é ca'ná so', ga tinu' —taj so' rihaan Judas a.

Gaa ne cuchi' nij yuvií rihaan Jesucristó, ne quita'aa nij yuvií man Jesucristó a.

<sup>51</sup>Ne yo'ò sí nicun' ga Jesucristó me se quirii so' taneê so' neê espadá, ne go' so' neê espadá yo' raa yo'ò se-mozó xrej atá suun nocoo doj, ne veé dan güéj nu' xréé mozó yo', qui'yaj so' a. <sup>52</sup>Gaa ne cataj Jesucristó rihaan sí nicaj neê espadá yo' a:

—Na'nej so' taneê so' á. 'O se nu' yuvií nicaj neê espadá ro', veé neê espadá qui'yaj cavi' nij yuvií nanj adonj. <sup>53</sup>Ne ne ne'én so' se vaa guun nucuáj cachinj ni'yáj rihaan Réj, ne ca'na' que'ee ndo'ò se-mozó Réj rihanj cuango, ne ca'vee qui'yaj cananj a. <sup>54</sup>Tzaj ne sese danj qui'yáj, gaa ne asa' ca'vee qui'yaj ní' nu' nana no rihaan danj Diose nana taj xna'anj daj gaa quirán' 'unj ga —taj Jesucristó rihaan sí nicaj neê espadá yo' a.

<sup>55</sup>Ne canicaj Jesucristó, cataj Jesucristó rihaan nij yuvií a:

—Me che'é nicaj soj neê espadá nicaj soj chruun nicaj soj, ca'na' soj ga. Sí ituu mé 'unj, rá soj na'. Ne 'o se guun que'ee güii cayáan 'unj rá nuví nocoo, tucu'yón 'unj se-nanaj rihaan nij yuvií, tzaj ne ne quita'aa soj manj a. <sup>56</sup>Tzaj ne nihánj me se quirán' 'unj nu' se vaa taj nana cachron nij sí nata' se-nana Diose gaa naá rihaan yanj a —taj Jesucristó a.

Gaa ne tanáj cunudanj nij sí tucu'yón se-nana Jesucristó man so', ne cunanj nij so', ca'anj nij so' a.

**Nana nihánj taj xna'anj  
daj qui'yaj nii gaa cuta' nii  
cacun' xráa Jesucristó a**

<sup>57</sup>Dan me se nij síí quita'aa man Jesucristó me se nicaj nij so' man Jesucristó ca'anj nij so' rihaan síí cu'naj Caifás xrej atá suun nocoo doj a. Ne aj mán chre' nij síí naqui'yaj cuu se-tucuñj Moisés do', nij síí uun chij do', rihaan síí cu'naj Caifás yo' a. <sup>58</sup>Ne gan' gan' canoco' síí cu'naj Pedró xcó Jesucristó, ne cuchi' so' rihaan chingá rej yanj síí cu'naj Caifás yo', ne catúj so' rá chingá ne ca'anj cayáán so' ga nij se-mozó xrej man rá chingá, quene'en so' daj quiran' Jesucristó a.

<sup>59</sup>Dan me se nano' nij xrej atá suun nocoo doj nano' nij cuese nano' man yuvií cataj xna'anj che'é cacun' tumé Jesucristó a. Me rá nij so' nari' nij so' cacun' rmi' cuta' nij so' xráa Jesucristó ne cavi' Jesucristó, rá nij so' a. Tzaj ne taj vaj a 'ó cacun' tumé Jesucristó a ma'. <sup>60</sup>Che'é dan nda' se cuchi' uxrá síí ne rihaan nij cuese ca'mii ne nij so', tzaj ne taj vaj cacun' quiri' nij so' cuta' nij so' xráa Jesucristó a ma'. Veé dan, ne cuchi' vij roj so', <sup>61</sup>ne cataj roj so':

—Síí nihánj cataj se vaa guun nucaj so' tacuane se' nuvíí nocoo nuvíí na'vúj ní' rihaan Diose, ne rque va'núj güii cune' uún so' nuvíí yo', taj so' ei —taj roj so' a.

<sup>62</sup>Gaa ne canicun' xrej atá suun nocoo doj, ne xna'anj so' man Jesucristó, cataj so':

—Me che'é ne a'mii so' ga. Daj vaa nana nihánj nana a'mii roj síí

nihánj che'é so' ga —taj so', xna'anj so' man Jesucristó a.

<sup>63</sup>Tzaj ne dínj táa Jesucristó a. Gaa ne cataj uún xrej atá suun nocoo doj rihaan Jesucristó a:

—Ase vaa nana taj xna'anj ma'an Diose rihaan so' ro', danj gaa nana nihánj nana cataj xna'anj 'unj rihaan so' á. 'Unj me síí ya ya ca'ne' suun rihaan so' cataj xna'anj so' sese ya ya mé so' ta'níí Diose síí tñanii man yuvií rihaan sayuun á —taj so' rihaan Jesucristó a.

<sup>64</sup>Gaa ne cataj Jesucristó rihaan so' a:

—Ya vaa nana ca'mii ma'an so' ei. Ne vaj a doj cataj xna'anj 'unj rihaan so' se vaa ndaa yaj quene'en soj se vaa síí ca'née Diose nicaj yu'unj man yuvií mej, ne quene'en soj se vaa cayáán 'unj rej nuva' Diose síí nucaj ndo'o ei. Ne quene'en uún soj se vaa ca'na' uún 'unj rihaan chumií nihánj, ne quitaj 'unj xráa ngaa xta' ca'naj adonj —taj Jesucristó rihaan xrej atá suun nocoo doj yo' a.

<sup>65</sup>Gaa ne ca'maan rá xrej yo', ne cutzin' xrej yo' sagan' ma'an xrej, ne cataj xrej rihaan tuvi' xrej a:

—Ní'yaj soj vjí. Quij uxrá tu'va síí nihánj rihaan Diose nanj ei. Se cachiin doj síí ca'na' cataj xna'anj rihaan ní' che'é cacun' tumé síí nihánj a ma'. Maan se cuano nihánj me se cuno ma'an soj nana quij ca'mii so' se vaa cayáán ma'an so' rej x'núj Diose, taj so' ei. <sup>66</sup>Daj qui'yaj ní' man so', rá soj ga —taj xrej, xna'anj xrej man nij tuvi' xrej a.

—Cavi' so' ei —taj nij so' a.

<sup>67</sup>Gaa ne quirii talúj nij so' rihaan Jesucristó, ne go' nij so' man



Jesucristó a. Ne coxro ta'aj nij so' xruu Jesucristó, <sup>68</sup>ne cataj nij so':

—Sese ya ya ca'néé Diosé mán so' t̄inanií so' man yuvií rihaan sayuun, ne racuíj Diosé mán so' cataj xna'anj so' rihaan núj me síí go' mán so' vij —taj nij so', ca'mii nacoo nij so' man Jesucristó a.

**Nana nihánj taj xna'anj daj  
qui'yaj síí cu'naj Pedró gaa  
cataj so' se vaa nuveé sij noco'  
man Jesucristó me so' a**

<sup>69</sup>Veé dan, ne ne Jesucristó ga yo'ó nij so' rá ve', ne ne síí cu'naj Pedró xe' rá chingá a.

Ne cuchi' yo'o' mozó chana rihaan so', ne cataj no':

—Ne so' me yo'o' síí cachéé ga Jesucristó síí cavii estadó Galilea á —taj mozó chana yo' rihaan Pedró a.

<sup>70</sup>—Taj ma'. Ne unó 'unj me taj so' ma' —taj Pedró cuno taran' nij yuvií cayáan ga so' a.

<sup>71</sup>Gaa ne curihanj Pedró, ne canicun' so' rej atúj yuvií chingá a.

Gaa ne quene'en yo'ó mozó chana man so', ne ca'mii no' rihaan nij yuvií nicun' rihaan ve' ga Pedró, cataj no':

—Síí nihánj cachéé ga Jesucristó síí cavii chuman' Nazaret asuun asanj —taj chana yo' a.

<sup>72</sup>Gaa ne nucaj ndo'o ca'mii uún Pedró, cataj so':

—Taj ma'. A doj ne ne'enj man snó'o yo' ma' —taj Pedró yo' a.

<sup>73</sup>Ne corá nii cuchi' nij síí nicun' ga Pedró rihaan Pedró, ne cataj nij so':

—Ya ya yo'o' síí cachéé ga Jesucristó mé so' ei. 'O se ase vaa nana a'mii nij síí cachéé

ga Jesucristó ro', vaa nana a'mii so' chuguanj —taj nij so' rihaan Pedró a.

<sup>74</sup>Gaa ne guun che'e Pedró nucaj doj ca'mii Pedró, cataj Pedró se vaa ca'vee qui'yaj Diosé sayuun man so' sese nuveé nana ya me nana a'mii so', ne cataj so':

—Ne ne'enj man snó'o yo' ma' —taj uún Pedró, gaa ne nu' caguáj to'loo a.

<sup>75</sup>Gaa ne ninuj rá Pedró ndaa vaa cataj Jesucristó rihaan so' quii se vaa gaa ataa caguaj to'loo, ne va'nuj cataj Pedró se vaa nuveé sij noco' man Jesucristó me ma'an Pedró ma'. Gaa ne curihanj Pedró xe', ne uxrá ta'vee Pedró a.

**Nana nihánj taj xna'anj se vaa  
nicaj nii man Jesucristó, ca'anj  
nii rihaan síí cu'naj Pilato a**

**27** Rej ranga' nuchruj raa taran' nij xrej ata suun nocoo doj do', nij síí uun chij do', daj qui'yaj nij so', ne cavi' Jesucristó a. <sup>2</sup>Gaa ne numij nij so' man so', ne nicaj nij so' man so' ca'anj nij so' rihaan síí nicaj suun gobernador cu'naj Pilato, ne tacuachén nij so' man Jesucristó rihaan so' a.

**Nana nihánj taj xna'anj daj quiran'  
síí cu'naj Judas gaa cavi' so' a**

<sup>3</sup>Dan me se síí cu'naj Judas me síí tacuachén man Jesucristó rihaan nij síí taj ri'yunj man Jesucristó gaa asino yaan, ne xcax so' cuentá se vaa ya ya ticavi' nii man Jesucristó ne ma'an so' me síí tumé cacun' se vaa cavi' Jesucristó a. Che'é dan nanó ndo'o rá so', ne me rá so'

narque uún so' ico chí' sa'anj platá catzii yo' rihaan nij xrej atá suun nocoo doj do', rihaan nij síi uun chij do' a. Dan me se cuchi' so' rihaan nij so', <sup>4</sup>ne cataj so':

—Tumé 'unj cacun' se vaa tacuachén 'unj man yo'o síi sa' inanj rihaan soj á —taj síi cu'naj Judas yo' a.

—Nuveé se-cacun' núj me cacun' tumé so' ma'. Xcaj ma'an so' cuentá daj gaa qui'yáa so' ei —taj nij so' rihaan síi cu'naj Judas a.

<sup>5</sup>Gaa ne nicaj so' sa'anj aga' yo', ri'lj uun so' rá nuvií nocoo, ne cavií so' ca'anj so', ne toco' vaj ma'an so' man so', ne cavi' so' a. <sup>6</sup>Gaa ne naran' nij xrej atá suun nocoo doj man sa'anj aga' yo', ne cataj nij so':

—Ne nó xcúun ní' caraa ní' sa'anj nihánj rá chrúun sa'anj taj rihaan Diose ma'. 'Q se sa'anj go' ní' che'é rej cavi' yo'o yuvií me sa'anj nihánj á —taj nij so' a.

<sup>7</sup>Dan me se nuchruj raa nij so' daj qui'yaj nij so', ne nicaj nij so' sa'anj yo', ne quiránj nij so' to'óó síi rii xruj a. Ne guun yo'óó yo' santó cachin' nii man náa guun yuvií 'na' yo'óó chuman' yuvií cavi' chuman' Jerusalén a. <sup>8</sup>Che'é dan cu'naj yo'óó yo' Yo'óó Ton cuano ei.

<sup>9</sup>Dan me se quisíj qui'yaj nij so' nu' se vaa cataj síi cu'naj Jeremías síi nata' se-nana Diose gaa naá gaa cataj so': “Gaa ne nicaj nij so' ico chí' sa'anj aga' a. Sa'anj yo' me sa'anj no yo'o so', cataj nij yuvií israelitá a. <sup>10</sup>Ne nicaj nij so' sa'anj yo' quiránj nij so' to'óó síi rii xruj, ndaa vaa cataj xna'anj síi 'nij ra'a man ní' rihanj nanj adonj”, taj síi cu'naj Jeremías a.

**Nana nihánj taj xna'anj daj ca'mii síi cu'naj Pilato ga Jesucristó a**

<sup>11</sup>Dan me se canicun' Jesucristó rihaan síi nicaj suun gobernador yo', ne xná'anj síi nicaj suun yo' man Jesucristó, cataj so':

—So' me síi nicaj suun rey uun chij rihaan nij yuvií israelitá na' —taj so', xná'anj so' man Jesucristó a. —Vejei —taj Jesucristó rihaan so' a.

<sup>12</sup>Ne xná'anj síi nicaj suun gobernador yo' man Jesucristó che'é cacun' cuta' nij xrej atá suun nocoo doj do', nij síi uun chij do', xráa Jesucristó a. Tzaj ne ne ca'mii Jesucristó a 'ó nana rihaan so' ma'. <sup>13</sup>Gaa ne xná'anj uún síi nicaj suun yo' man Jesucristó, cataj so':

—Aj cunó so' cataj nij so' se vaa tumé so' cacun' na'. Me che'é ne a'mii so' ga —taj so', xná'anj so' man Jesucristó a.

<sup>14</sup>Tzaj ne yuun che'e ne ca'mii Jesucristó a 'ó nana rihaan so' che'é cacun' cuta' nii xráa so' a. Veé dan, ne caráya'anj uxrá síi nicaj suun gobernador yo' che'é yan qui'yaj so' danj a.

**Nana nihánj taj xna'anj se vaa cataj xna'anj síi cu'naj Pilato se vaa cavi' Jesucristó rihaan rcutze a**

<sup>15</sup>Ne vaa yo'o tucuáan nocó' síi nicaj suun gobernador se vaa rii so' man yo'o síi 'nij taga' 'o 'o cha'anj pascuá, ne tinavij uun so' cacun' tumé síi urihanj taga' yo' a. Me ma'an 'o síi 'nij taga' a'mii nij yuvií che'é se vaa quirii so', ne ca'vee qui'yaj so' ndaa vaa taj nij yuvií a.

<sup>16</sup>Ne veé yo' yo' ro', 'nij yo'o síi

cu'naj Barrabás taga', ne quene'en cunudanj nij yuvii se vaa tumé ndo'o so' cacun' a. <sup>17</sup>Dan me se nuu chre' nij yuvii rihaan sí nicaj suun gobernador cu'naj Pilato, ne xná'anj so' man nij yuvii, cataj so':

—Me sí quirií 'unj, rá soj ga. Sí cu'naj Barrabás na'. Ase sí cu'naj Jesucristó xa' —taj so', xná'anj so' man nij yuvii a.

<sup>18</sup>Danj ca'mii so', ne'en so' se vaa maan che'é se guun xcoj ruvaa rá nij xrej ata suun nocoo doj me tacuachén nij xrej man Jesucristó rihaan ma'an so' a.

<sup>19</sup>Ne asij yáan sí cu'naj Pilato yo' rihaan xrúun so' chruun xlá, ne ca'néé nica so' nana cuchi' rihaan so', taj no':

—Se guun ca'ne' so' cacun' che'é sí sa' yo' ma'. 'O se asij cua'aa me se nanó ndo'o raj che'é yan tucua'nu' snó'o yo' manj adonj —taj nica sí cu'naj Pilato rihaan so' a.

<sup>20</sup>Tzaj ne cataj xna'anj nij xrej ata suun nocoo doj do', nij sí uun chij do', rihaan nij yuvii se vaa ca'mii nij yuvii che'é sí cu'naj Barrabás rihaan sí cu'naj Pilato, ne cataj nij yuvii se vaa cavi' Jesucristó a. Ne cuchumán rá nij yuvii a. <sup>21</sup>Gaa ne xná'anj sí nicaj suun gobernador cu'naj Pilato man nij yuvii, cataj so':

—Me ya ya sí quirií, rá soj ga —taj so', xná'anj so' man nij yuvii a.

—Quirií so' man sí cu'naj Barrabás ei —taj nij yuvii rihaan so' a.

<sup>22</sup>—Ne me qui'yáa 'unj ga sí cu'naj Jesucristó, rá soj ga —taj uún sí cu'naj Pilato, xná'anj so' man nij yuvii a.

—Cavi' so' rihaan rcutze, rá núj ei —taj taran' nij yuvii a.

<sup>23</sup>—Tzaj ne me cacun' tumé so' ga —taj sí cu'naj Pilato, xná'anj so' man nij yuvii a.

Tzaj ne doj a caguáj nij yuvii, cataj nij yuvii:

—Cavi' so' rihaan rcutze ei. —Danj inanj caguáj nij yuvii a.

<sup>24</sup>Dan me se quene'en sí cu'naj Pilato se vaa taj se 'yá' quina'maan rá nij yuvii, ne maan se doj a ca'maan rá nij yuvii, ne doj a qui'yaj nij yuvii sayuun a. Che'é dan nicaj so' na, ne na'ya' so' ni'yaj nij yuvii a. Ne cataj so':

—Se tumé 'unj cacun' sese cavi' sí nihánj a ma'. 'O se ma'an soj me sí qui'yaj cavi' so' adonj —taj sí cu'naj Pilato a.

<sup>25</sup>Gaa ne cataj nij yuvii rihaan so' a:

—Veé ma'an núj, ma'an ta'níí núj do', me sí tumé cacun' se vaa cavi' so' ei —taj nij yuvii yo' a.

<sup>26</sup>Gaa ne quirií sí cu'naj Pilato man sí cu'naj Barrabás taga' che'é nij yuvii, ne go' nij tanuu cuartá xráa Jesucristó, qui'yaj sí cu'naj Pilato, ne tacuachén sí cu'naj Pilato man so' rihaan nij tanuu se vaa cachron nij tanuu man so' rihaan rcutze a.

**Nana nihánj taj xna'anj se vaa ca'nga' nacoo nij tanuu ni'yaj nij tanuu man Jesucristó a**

<sup>27</sup>Gaa ne ca'anj nicaj nij tanuu 'yaj suun rihaan sí nicaj suun gobernador man Jesucristó rá ve' tucua' sí nicaj suun gobernador yo' a. Ne naqui'yaj chre' nij tanuu man taran' nij tuvi' tanuu nij so' a. <sup>28</sup>Gaa ne quirií nij so' sagan' Jesucristó man Jesucristó,

ne na'néé nij so' sagan' rey yatzíj maree man Jesucristó, <sup>29</sup>ne qui'yaj nij so' cachriin tanj, ne cuta' nij so' cachriin tanj raá Jesucristó, ne caxríj nij so' yo'ó vará tico uun ston Jesucristó a. Gaa ne canicun' ruj nij tanuu rihaan Jesucristó, ne ca'nga' nacoo nij so' ni'yaj nij so' man Jesucristó, ne cataj nij so':

—Ya ya sij nicaj suun rey rii ta'nga' rihaan nij yuvií israelitá mé so' ei —taj nij so' tiha' nij so' man Jesucristó a.

<sup>30</sup>Gaa ne quirii talúj nij so' man Jesucristó, ne nacaj nij so' vará nocó' ra'a Jesucristó, ne go' nij so' vará raá Jesucristó a. <sup>31</sup>Síj ca'nga' nacoo nij so' ni'yaj nij so' man Jesucristó, gaa ne quirii uún nij so' sagan' rey yatzíj maree nuu Jesucristó, ne na'néé uún nij so' sagan' uún Jesucristó man uún so', gaa ne nicaj nij so' man Jesucristó cavii nij so' ca'anj nij so' yan cachron nij so' man Jesucristó rihaan rcutze a.

**Nana nihánj taj xna'anj daj qui'yaj  
nij yuvií gaa cachrón nij yuvií  
man Jesucristó rihaan rcutze a**

<sup>32</sup>Dan me se cavii nij so', ne nari' nij so' man yo'ó síí ne chuman' Cirene, ne so' me síí cu'naj Simón a. Veé dan, ne qui'yaj uxrá nij tanuu fuerzá man síí cu'naj Simón yo' cãta so' rcutze cano Jesucristó rihaan a. <sup>33</sup>Gaa ne cuchi' nij so' tacaan cu'naj Gólgota, ne Gólgota ro', me rej cu'naj Tacaan Cúú Yave Xnangá a. <sup>34</sup>Gaa ne rque' nij tanuu doj na vinó nachej ga na e' man Jesucristó co'ó so' a. Ne doj tzin' tiguíj daa Jesucristó, ne ne ca'vej

rá so' co'ó so' ma'. <sup>35</sup>Veé dan, ne cachrón nij tanuu man Jesucristó rihaan rcutze, ne tico tixaj nij so' che'é sagan' Jesucristó, <sup>36</sup>gaa ne ca'anj cane' nij so' rihaan yo'óó, ne tumé nij so' man Jesucristó a. <sup>37</sup>Ne cachrón nij tanuu yo'ó rcuchra' raá rcutze, ne no letrá rihaan rcuchra' yo', ne taj xna'anj letrá yo' me che'é cavii Jesucristó, ne: “Síí nihánj me síí cu'naj Jesucristó, ne síí nicaj suun rey uun chij rihaan nij yuvií israelitá me so' a”, taj letrá yo' a.

<sup>38</sup>Gaa ne cachrón nij tanuu man yavíj snó'o rihaan yavíj rcutze yo', ne yavíj roj so' me síí ituu a. Dan me se nicun' yo'ó so' rej nuva' Jesucristó, ne nicun' yo'ó so' rej nichruun Jesucristó a.

<sup>39</sup>Gaa ne cachén yuvií rej nicun' Jesucristó, ne ca'mii chi'ii ndo'o nij so' ni'yaj nij so' man Jesucristó a. Dan me se tucunó nij yuvií raá nij yuvií, <sup>40</sup>cataj nij yuvií:

—Tãcuanee so' man nuvií nocoo, ne rque va'nuj güii cune' so' yo'ó nuvií nocoo, rá so' na'. Dan me se sese ya ya ta'nij Diosé mé so', ne tĩnanii so' mán so' rihaan rcutze, ne nanij so' rihaan yo'óó yaj vij —taj nij yuvií rihaan Jesucristó a.

<sup>41</sup>Ne ase vaa qui'yaj nij yuvií yo' ro', danj qui'yaj uún nij xrej atã suun nocoo doj do', nij síí naquiyaj cuu se-tucuanj Moisés do', nij síí uun chij do', ca'mii chi'ii nij so', cataj nij so':

<sup>42</sup>—Tĩnanii síí nihánj man yo'ó yuvií rihaan sayuun, rá so', tzaj ne ne guun nucuj so' tĩnanii so' man ma'an so' rihaan rcutze danj. Sese ya ya sij nicaj suun rey uun chij rihaan ní' sij israelitá me so', ne

nanij so' cuano rihaan yo'óó, ne cuchuman rá ní' ni'yaj ní' man so' ei. <sup>43</sup>Dan me se nucuaj rá so' man Diose se vaa cavii sa' so', qui'yaj Diose, rá so' a. Ca'vee tinanii Diose man so' cuano, sese sij 'ee rá Diose man me so' á. 'O se ma'an so' taj se vaa ta'nij Diose me ma'an so' adonj —taj nij so', chi'ii ndo'o ca'mii nij so' ni'yaj nij so' man Jesucristó a. <sup>44</sup>Ne ase vaa ca'mii nij so' ro', danj ca'mii uún roj sí ituu nocó' rihaan rcutzé rej x'nuj Jesucristó, ca'mii roj so' nana nij rihaan Jesucristó a.

**Nana nihánj taj xna'anj daj guun gaa cavi' Jesucristó a**

<sup>45</sup>Veé dan, ne caxuj, ne yuun che'le guun rmi' rihaan chumii, ne yo'o guun rmi' chumii ndaa quisij aga' va'nuj rej anoco' güii a. <sup>46</sup>Veé dan, ne quisij aga' va'nuj, gaa ne nucuaj ndo'o caguáj Jesucristó, cataj so':

—Elí, Elí, lama sabactani —taj so', caguáj so' xna'ánj a'mii ma'an so', ne nana caguáj so' taj: “Diose nocó' 'unj mé so' á. Me che'é tanáj uun so' mán 'unj ga”, taj nana caguáj Jesucristó a.

<sup>47</sup>Ne cuno ta'aj nij sí nicun' rej x'nuj Jesucristó nana caguáj so', tzaj ne ne cuno nij so' me taj Jesucristó ma'. Maan se:

—Nacúun sí nihánj man sí cu'naj Elías tadonj —taj nij so' rihaan tuvi' nij so' a.

<sup>48</sup>Gaa ne nu' ra'yanj cunánj yo'o sí nicun' rej x'nuj Jesucristó, ne nicaj so' yataañ esponja, ne caraa so' na vinó yuu rque yataañ, ne cuta' so' raá yo'o vará, ne ru'maan so' yataañ tu'va Jesucristó, ne co'o

Jesucristó na yuu yo', qui'yaj so' a. <sup>49</sup>Tzaj ne ca'mii yo'óó nij yuvii, cataj nij so':

—Dínj qui'yáá so' á. Quene'en ní' sese ca'na' sí cu'naj Elías tinanii sí cu'naj Elías man so' rihaan rcutzé ei —taj nij yuvii yo' a.

<sup>50</sup>Gaa ne sca' caguáj uún Jesucristó, ne cavi' so' a. <sup>51</sup>Veé dan, ne quisin' yatzíj mantá cortiná nocó' rá nuvi' nocoo ndaa rej raá, ne 'o quini' ca'anj ndaa tacóó yo' a. Dan me se cachén yuún, ne quixra' ta'aj nij yuvej, <sup>52</sup>ne x'núj rej cachin' nii man nij sí cavi', ne cunuu i'na' uún que'ee nij sí sa' cavi' asij rque a.

<sup>53</sup>Ne gaa quisij orá cunuu i'na' uún ma'an Jesucristó, ne curihanj nij sí cunuu i'na' uún yo', ne catúj nij so' chuman' guee chuman' Jerusalén, ne quene'en uxrá yuvii man nij so' a.

<sup>54</sup>Veé dan, ne nicun' tanuu capitán nicun' yo'óó nij tanuu nicun' cutumé man Jesucristó a. Ne quene'en nij so' cachén yuún, ne quene'en nij so' nu' se vaa guun, ne chucu'vi' ndo'o nij so', ne ndaa dan asuun gaa xcaj nij so' cuentá se vaa ya uxrá ta'nij Diose me Jesucristó, ne dan me se cataj nij so':

—Ya ta'nij Diose me sí nihánj tadonj —taj nij so' a.

<sup>55</sup>Ne gan' doj nicun' que'ee chana, ni'yaj uun nij chana man Jesucristó a. Chana cuno se-nana Jesucristó asij cavii Jesucristó estadó Galilea me nij chana yo', ne qui'yaj suun nij chana yo' che'é Jesucristó a. <sup>56</sup>Yo'o no' me chana cu'naj Mariá Magdalena, ne yo'óó no' me chana cu'naj Mariá nii sí cu'naj Jacobo ga sí cu'naj José a. Ne

yo'ó no' me nii roj ta'níí síí cu'naj Zebedeo a.

**Nana nihánj taj xna'anj se vaa cachin' nii man Jesucristó rque yu'uj yuvej a**

<sup>57</sup>Ne rej ata' güii ca'na' yo'ó síí ru'vee síí ne chuman' Arimatea a. José cu'naj so', ne so' me síí tucuyón se-nana Jesucristó a.

<sup>58</sup>Dan me se ca'anj so' rihaan síí cu'naj Pilato, ne cachín ni'yaj so' rihaan síí cu'naj Pilato se vaa ca'vej síí cu'naj Pilato cachin' so' man Jesucristó a. Ne síí cu'naj Pilato ro', cataj se vaa ca'vee qui'yaj so' danj a. <sup>59</sup>Ne nicaj síí cu'naj José man Jesucristó, ne nacutáj so' yatzíj mantá naruvii xráá Jesucristó,

<sup>60</sup>ne vaa yu'uj yuvej rihaan so', rej achin' nii man nij síí cavi', tzaj ne yu'uj naca me yo' a. Ma'an so' me síí qui'yaj gáán nii yu'uj yo', ne taj vaj xngá naj rque yu'uj ma'. Ne caxríj so' man Jesucristó rque yu'uj yo', ne caráán so' yuvej xij tu'va yu'uj yo' a. <sup>61</sup>Ne cayáán chana cu'naj Mariá Magdalena cayáán yo'ó chana cu'naj Mariá cayáán tu'va yu'uj yo' a.

**Nana nihánj taj xna'anj se vaa tumé uxrá nii man yu'uj nuu Jesucristó a**

<sup>62</sup>Veé dan, ne taxrej, ne ndaa quisíj qui'yaj chuvii nij yuvii israelitá che'é güii naraan rá nij so', ne cunuu chre' nij xrej ata' suun nocoo doj do', nij síí fariseo do', ne ca'anj nij so' rihaan síí cu'naj Pilato, <sup>63</sup>ne cataj nij so':

—Nuu rá núj daj cataj síí tiha' yu'unj yo' gaa gaa i'na' so', señor. Dan me se cataj so' se vaa cachén

va'núj güii, gaa ne cunuu i'na' uún so', cataj so' adonj. <sup>64</sup>Che'é dan ca'ne' so' suun rihaan tanuu se vaa tumé tanuu man yu'uj naj so' ndaa se quisíj va'núj güii yo' ruguanj. Sese se qui'yaj ní' danj, ne ca'na' nij síí tucuyón se-nana so', ne quirii nij so' man so', ne cataj nij so' rihaan nij yuvii se vaa cunuu i'na' uún so' nanj adonj. Asa' quisíj, gaa ne doj a tiha' yu'unj uún nij so' man nij yuvii nanj adonj —taj nij so' rihaan síí cu'naj Pilato a.

<sup>65</sup>Ne cataj síí cu'naj Pilato rihaan nij so' a:

—Vaa tanuu rihaan soj ei. Nicaj soj man tanuu ca'anj soj cutumé soj man yu'uj yo' á. Ne'en ma'an soj daj qui'yaj soj á —taj Pilato rihaan nij so' a.

<sup>66</sup>Gaa ne cavii nij so' ca'anj nij so' tumé nij so' man yu'uj yuvej yo' a. Dan me se ca'ne' nij so' suun rihaan tanuu cutumé tanuu yu'uj, ne cachrón nij so' yánj nichraj tu'va yuvej caráán tu'va yu'uj yo' a.

**Nana nihánj taj xna'anj se vaa cunuu i'na' uún Jesucristó a**

**28** Dan me se ca'anj güii cuetan' güii naránj rá nij yuvii israelitá, ne na'yaan cotungó me yo', ne daj doj quisíj güii a. Ne ca'na' chana cu'naj Mariá Magdalena do', yo'ó chana cu'naj Mariá do', quene'en roj chana yu'uj catúj Jesucristó a. <sup>2</sup>Veé dan, ne cachén uxrá yuún, ne cavii yo'ó se-mozó síí 'nij ra'a man ní' rej xta', ca'na' so', nanij so' tu'va yu'uj yo', gaa ne quirii yaníj so' yuvej aráán tu'va yu'uj yo', ne ca'anj cane so' xráá yuvej yo' a. <sup>3</sup>Daj se uun rá roj

no' ne'en roj no' gaa raan ro', danj guun rá roj no' gaa curuvi' so' a. Ne daj se uun rá roj no' ne'en roj no' yu've' catzii ndo'o ro', danj guun rá roj no' ne'en roj no' sagan' so' a. <sup>4</sup>Gaa ne cuchu'vi' ndo'o nij tanuu man tumé tu'va yu'uj yo', ne quiri'fj ndo'o man nij so' a. Dan me se ase vaa mán síi cavi' vaa mán nij so' rihaan yo'óo a. <sup>5</sup>Veé dan, ne cuchi' roj chana yo' rihaan se-mozó Diose, ne cataj se-mozó Diose rihaan roj no' a:

—Se cuchu'vi' roj soj ma'. <sup>1</sup>O se aj ne'én 'unj se vaa nano' roj soj man Jesucristó síi cavi' rihaan rcutze adonj. <sup>6</sup>Taj vaj so' naj nihánj a ma'. <sup>1</sup>O se cunuu i'na' uún so', ndaa vaa cataj xna'anj so' rihaan soj á. Catuu roj soj ni'yaj roj soj rej quinaj so' á. <sup>7</sup>Gaa ne ra'yaj ca'anj roj soj, cataj xna'anj roj soj rihaan nij síi tucu'yón se-nana so' se vaa cunuu i'na' uún so' á. Veé dan me se quitaj yaan so' rihaan soj ca'anj so' estadó Galilea, ne ca'anj soj ndaa yo', ne quene'en soj man so' á. Danj gaa cataj xna'anj soj rihaan nij síi tucu'yón se-nana so' á. Veé dan me quisij nana cataj xna'anj 'unj rihaan soj a —taj se-mozó Diose rihaan roj chana yo' a.

<sup>8</sup>Veé dan, ne curihañj roj chana ca'anj roj no' a. Veé roj no' cuchu'vi', ne veé roj no' guun niha' rá uún a. Veé dan me se cunánj ndo'o roj no', cataj xna'anj roj no' rihaan nij síi tucu'yón se-nana Jesucristó nu' se vaa quene'en roj no' do', nu' nana cataj xna'anj se-mozó Diose rihaan roj no' do' a. <sup>9</sup>Ne maan orá dan nari' tuvi' ma'an Jesucristó ga roj chana yo', ne cataj so':

—Gaa niha' nimán roj soj á —taj Jesucristó rihaan roj no' a.

Gaa ne cuchi' roj chana yo' rihaan Jesucristó, ne ca'anj canicun' ruj roj no' rihaan so', ne quita'aa roj no' tacóo Jesucristó, ne na'vij roj no' rihaan Jesucristó a. <sup>10</sup>Gaa ne cataj Jesucristó rihaan roj chana a:

—Se cuchu'vi' roj soj ma'. Maan se ca'anj roj soj cataj xna'anj roj soj rihaan nij tinúu 'unj se vaa cavi'ij nij so' ca'anj nij so' estadó Galilea, ne ndaa yo' quene'en nij so' manj á —taj Jesucristó rihaan roj chana yo' a.

**Nana nihánj taj xna'anj che'é nana  
cataj xna'anj nij tanuu rihaan  
nij xrej atá suun nocoo doj a**

<sup>11</sup>Ne gaa quisij ca'anj roj chana yo', ne dan me se cavi'ij ta'aj nij tanuu man tu'va yu'uj yo' rque chuman', ne cataj xna'anj nij tanuu rihaan nij xrej atá suun nocoo doj nu' se vaa guun a. <sup>12</sup>Ne cunuu chre'ij nij xrej atá suun nocoo doj ga nij síi uun chij, ne nuchruj raá nij so' daj qui'yaj nij so' a. Gaa ne go' uxrá nij so' sa'anj rihaan nij tanuu yo', <sup>13</sup>ne cataj nij so':

—Cataj soj se vaa rej ni'ij cotoj soj, ne nij síi tucu'yón se-nana so' ro', ca'na' quirii man so' a. Danj cataj soj á. <sup>14</sup>Ne sese cuchi' nana yo' rihaan síi nicaj suun gobernador, ne sese me rá so' qui'yaj so' sayuun man soj, ne ma'an núj caráan ra'a sayuun xráa soj á —taj nij so' rihaan nij tanuu a.

<sup>15</sup>Dan me se guun ya rá nij tanuu, ne quita'aa nij so' sa'anj yo', ne qui'yaj nij so' nu' se vaa cataj xna'anj nij xrej atá suun nocoo doj do', nij síi uun chij do', rihaan

nij so' a. Ne ase vaa nana ca'mii  
 nij tanuu rihaan yuvii ro', ta'nga'  
 danj vaa nana ticha'nuu nij yuvii  
 israelita rihaan yuvii ndaa yo' yaj  
 nanj adonj.

**Nana nihánj taj xna'anj che'é  
 suun ca'ne' Jesucristó rihaan  
 nij síí tucu'yón se-nana so' a**

<sup>16</sup>Gaa ne ca'anj xaan nij síí  
 tucu'yón se-nana Jesucristó  
 estadó Galilea, ne cavii nij so' raa  
 'o quij a. Danj qui'yaj nij so', ése  
 cuno nij so' nana cataj xna'anj  
 Jesucristó rihaan nij so' gaa rque a.  
<sup>17</sup>Gaa ne quene'en nij so' man  
 Jesucristó, ne na'víj nij so' rihaan  
 so', tzaj ne ne guun ya rá ta'aj  
 nij so' se vaa ya ya Jesucristó me  
 so' a. <sup>18</sup>Gaa ne cuchi' Jesucristó

rihaan nij so', ne cataj so' rihaan  
 nij so':

—Yaj me se 'unj me síí uun chij  
 xtá' do', nu' rihaan yo'óó do',  
 qui'yaj Diose ei. <sup>19</sup>Che'é dan ca'anj  
 soj tucu'yón soj se-nanaj rihaan nij  
 yuvii man 'o 'o chuman' naj rihaan  
 chumii, ne canoco' nij yuvii manj,  
 qui'yaj soj, ne cuta' ne soj man nij  
 so', ne cata' tu'va soj se-chuvii Réé  
 'unj Diose do', se-chuvií 'unj ta'nij  
 Diose do', se-chuvii Nimán Diose  
 do' á. <sup>20</sup>Ne tucu'yón soj rihaan nij  
 yuvii se vaa cuno nij yuvii nu' nana  
 cataj xna'anj 'unj rihaan soj á. Veé  
 dan yuun che'e cachee 'unj ga soj  
 nu' güii cachee soj rihaan chumii  
 nihánj, ndaa se quinavij nu' chumii  
 nihánj nanj adonj —taj Jesucristó  
 rihaan nij so' a.